


~~M n 13~~

c.ii.19





HISTORIA ECCLESIASTICA.

ALBION
NEW YORK

HISTORIA ECCLESIASTICA VARIIS COLLOQUIIS DIGESTA

U B I

PRO THEOLOGIÆ CANDIDATIS

*Res præcipuæ, non solum ad Historiam, sed etiam ad
Dogmata, Criticam, Chronologiam, & Ecclesiæ
Disciplinam pertinentes, per breves Interroga-
tiones, & Responsiones perstringuntur,
& in præclaro ordine collocantur.*

TOMUS SEPTIMUS

Complectens Sæculum Ecclesiæ
Decimum Sextum.

A U C T O R E

FR. IGNATIO HYACINTHO

AMAT DE GRAVESON


Sacræ Facultatis Parisiensis Doctore, & Collegii
Casanatensis Theologo, Ord. Fratrum Præd.

1733

ROMÆ MDCCXXI.
Ex Typographia Tinassii.

SUPERIORUM PERMISSU.





NOS FR. ANGELUS GULIELMUS
M O L U S

*Sacrae Theologiae Professor, ac totius Ordinis
Fratrum Praedicatorum humilis Vicarius
& Procurator Generalis salutem.*

Tenore praesentium nostrique auctoritate Officii
licentiam facimus Reverendo admodum Patri
Fr. Ignatio Hyacintho Amat de Graveson in Sacra Fa-
cultate Parisiensi Doctori, ac in Collegio Casanatenfi
Conventus Sanctae Mariae super Minervam de Urbe
Theologo, Provinciae nostrae Provinciae Alumno,
typis edendi Opus in plures Tomos distributum, cui
titulus est: *Historia Ecclesiastica varis Colloquiis dige-
sta, &c.* dummodò prius approbatum fuerit à duobus
Ordinis nostri in Theologia Magistris, & aliis servatis
de jure servandis. In quorum fidem &c. Datum
Romae in Conventu nostro Sanctae Mariae super Mi-
nervam die 2. Aprilis 1720.

FR. ANGELUS GULIELMUS MOLUS
Vic. & Proc. Generalis Ordinis.

Loco † Sigilli.

*Fr. Bernardus d'Arcet Magister,
& Socius.*

Registr. fol. 82.

A P P R O B A T I O.

JUSSU Reverendissimi Patris Fratris *Gulielmi Molo* totius FF. Ordinis Prædicatorum Vicarii, & Procuratoris Generalis, septimum Historiæ Ecclesiasticæ Tomum, decimum sextum representantem Sæculum, à Clarissimo Viro Fratre *Ignatio Hyacintho Amat de Graveson*, Sacre Facultatis Parisiensis Doctore, & Collegii Casanatensis Theologo, concinnatum, magnâ animi cum voluptate legi, pervolvique. Si enim Turcarum progressus regna divexantium, Lutheranorum, Calvinistarum, & aliorum Anticatholicorum hæreses variis in Europæ regionibus venenosas agentes radices, sacrilegia, rapinas, cœdes, incendia invehentes, magis lacrymas cient, quàm verba postulent, certe non potest non parere miram animi voluptatem divina benedictio præstans, fidem ubique lucra facientem suam, expulsam à Turcis, & expugnatam à Sectariis, ad fidelium solamen, suique tutamen in Americam extendisse propagines, Indias irradiasse, & doctrinæ lumen, pietatisque calorem in novis Sacrarum Religionum Institutis, vel antiquiorum reformationibus restaurasse, nimirum in Theatinis, Capuccinis, Recollectis, Jesuitis, Barnabitis, Sommaschis, Doctrinæ Christianæ, & Oratorii Presbyteris, quæ, aliaque hujus Sæculi sanctitatis miracula fusè juxtâ accuratèque persequitur
noster

noſter Auctor, prophanas novitates obiter quidem, at nervoſè proſtigans, ubi differendi ſe præbet occaſio. Cæterùm, cùm Tomus iſte nihil aliundè complectatur, quod fidei, boniſve moribus diſſonum eſſe videatur, ut publici quantocyùs juris fiat, digniſſimum planè eſſe cenſeo. Datum Romæ in Conventu, & in Collegio S. Maria ſuper Minervam, die 30. Decembris, anni 1720.

*Fr. Antonius Bardou, Sacra Facul-
tatis Pariſienſis Docttor Theologus,
Catedraticus Caſanatenſis, Ordinis
Prædicatorum,*

A P P R O B A T I O.

PRæclarum sanè, ac multis nominibus proficuum Opus auspiciari, res est haud unâ laude digna, aſt incredibili penè ſtudio, rapido curſu, ſummâ diligentîâ, felici Marte, iſtud ad finem uſquè perducere, magnorum certè encomiorum ſeges eſt. Hanc in ſe provinciam ſuſcepit, ſuſtinuit, ac ſuperis benè fortunantibus, propedièm explebit Vir Clariffimus Frater *Ignatius Hyacinthus Amat de Graveson*, Sacræ Facultatis Pariſienſis Doctör, & Collegii Caſanatenſis Theologus. Decurſus quippè, illuſtratis, atque, doctörum Ariſtarchorum iudicio, pulchrè concinnatis quindecim prioribus Hiſtoriæ Eccleſiaſticæ Sæculis, decimum ſextum jam ejuſdem Hiſtoriæ Sæculum, Tomo ſeptimo comprehenſum, prælo paratum habet. De cujus ſtyli majeſtate, rerum geſtarum accuratâ narratione, maturo Factorum difficilium Criterio, peramænâ valdè methodo, aliſque præcellentiſſimis dotibus, non eſt, quòd plura diſſeram impræſentiarùm. Prodeat igitur in publicum Tomus iſte, ſanæ fidei, caſtiſque moribus conſentaneus. Prodeat cunctorum Hiſtoriæ Eccleſiaſticæ ſtudioſorum applauſibus excipiendus. Prodeat demùm ad maximum celeberrimi Authoris decus, & ornamentum. Cùm enim priores Tomi præ omnium manibus verſentur, ab omnibus avidè legantur, atque

atque præconiis non vulgaribus celebrentur ;
quidni id augurari mihi liceat , Tomum hujus-
modi omne quoque punctum apud eosdem
esse laturum . Datum Romæ , in Conventu
Sanctæ Mariæ super Minervam , die primâ An-
ni 1721.

*Fr. Patricius Plonket Ordinis Prædi-
catorum , Sacræ Facultatis Pari-
siensis Doctor , & Collegii Casana-
tensis Theologus .*

APPROBATIO
REVERENDI ADMODUM PATRIS
LEONIS A'S. FELICE

*Carmelita Discalceati, Sacrae Theologiae Praeceptoris, & Definitoris
Provincialis.*

B Enè coepit, prosequitur meliùs, properans ad finem, usque in finem commendandus R. Admodum P. Mag. Ignatius Hyacinthus Amat de Graveson, Doctor Sorbonicus, ac Collegii Casanat. Theol. Ord. Prædic. Profectò concludet optimè; Optima siquidem Ecclesiasticæ Historiæ Monumenta quæque, consuetâ styli mirâ claritate, majori eloquentia, omniscia eruditione, omni cum delectu addiscenda, Discipulo PRINCIPI de more exponit: Exponens, inter Principes loquitur sapientiam, ut cum Principibus sedens, solium gloriæ teneat (a) Tenens loquitur, quæ decent sanam doctrinam (b) ut semper in labiis ejus inveniat Sapiencia (c) ac Discipulus Princeps Audiens Sapiens Sapientior sit (d) Quamobrè, cum (jubente Reverendissimo P. F. Gregorio Selleri, Sac. Apost. Palat. Mag.)

Sæcu-

[a] 1. Reg. cap. 2. [b] ad Titum cap. 2.

[c] Proverb. 10. [d] Proverb. 1.

Sæculi decimi sexti Tomum hunc septimum, non modicâ mentis jucunditate revolverit ac juxtâ Christianorum Morum disciplinam, Fideique Theologicę Assertis conformia adinvenerit omnia, Impressioni dignum jure optimo existimavit. Ita dabat Romæ in Collegio Sanctæ Mariæ de Victoria 1. Septembris 1720.

*Fr. Leo à S. Felice Carmelita Excalceatus Sac. Theol. Pralector,
ac Definitor Provincialis.*

INDEX

INDEX COLLOQUIORUM

Quæ in sexto Historiæ Ecclesiasticæ Tomo continentur.

COLLOQUIUM PRIMUM,

IN quo textitur series Imperatorum, & Principum, qui Sæculo decimo sexto tam in Oriente, quàm in Occidente supremo dominio potiti sunt.
pag. 6.

COLLOQUIUM SECUNDUM,

De Serie, Vita & Gestis Romanorum Pontificum, qui Sæculo decimo sexto universam Ecclesiam rexerunt.
pag. 92.

COL-

COLLOQUIUM TERTIUM,

De erroribus & Hæresibus, quæ Sæculo decimo sexto variis in locis enatæ Ecclesiam Catholicam miserum in modum dilacerarunt.
pag. 187.

COLLOQUIUM QUARTUM,

De Conciliis tam Oecumenicis, quàm Nationalibus, quæ vel ad profligandas Hæreses, vel ad resarciendam Ecclesiæ Disciplinam fuerunt Sæculo decimo sexto celebrata.
pag. 286.

COLLOQUIUM QUINTUM,

De Clarissimis Viris, qui Sæculo decimo sexto Doctrinâ, Vitæque sanctimoniam Ecclesiam illustrarunt.
pag. 381.

COL-

COLLOQUIUM SEXTUM,

*De Doctrinà Fidei , de Disciplinà tam
Ecclesiasticà , quàm Monasticà , nec-
non de Ethices Christiane Doctri-
nà Seculi decimi sexti .*

pag. 507.



IMPRIMATUR,

**Si videbitur Reverendissimo Patri Magistro
Sacri Palatii Apostolici.**

T. Episcopus Heracliae, Vicesgerens.

IMPRIMATUR,

**Fr. Gregorius Selleri Ord. Prædicatorum,
Sacri Palatii Apostolici Magister.**

MEN-

M E N D A,

*Quæ irrepperunt in Editionem hujus Tomi
septimi Historiæ Ecclesiasticæ.*


Pag.	Lin.	Lege.
8.	22. Ægyptus	Ægyptus
11.	2. sexcenta	sexaginta
14.	30. MDLXXII.	MDLXI.
19.	12. suis	suis
21.	17. Comitiss	Comitiis
48.	19. ficarum	ficarium
75.	29. fulgine	fuligine
84.	20. Indarum	Indiarum
106.	7. profectos	profectas
107.	6. quos	quas
117.	6. Ferdinandæ	Ferdinandi
120.	4. Ponticem	Pontificem
272.	25. protendebant	portendebant
281.	14. fueretur	frueretur
320.	12. quæ Legnem X.	adde, <i>inter</i>
331.	9. judicis	judicis
362.	5. ejusdem Concilii Tridentini	adde, <i>Catechismi</i>
572.	14. Paulo	Petro

Alia leviora menda, si quæ, amice Lector,
inter legendum offendas, tute faciliè emendabis, &
pro tuâ benignitate condonabis.

HISTORIA ECCLESIASTICA

DECIMI SEXTI SÆCULI

Variis Colloquiis digesta.



ACTANTIUS FIRMIANUS ,
cujus linguam unice mi-
ratur Sanctus Hierony-
mus, Christianæ Religio-
ni adversus Ethnicos pa-
trocinaturus, cum primis
optabat sibi dari elo-
quentiam Tullianæ pro-
ximam ; quò mortales
omnes ad sanctissimum
& saluberrimum Chri-

stianæ Philosophiæ studium vehementius adhor-
tari posset . At ego sanè , si quid hujusmodi votis
proficetur , Sæculi Ecclesiæ decimi sexti descriptu-
rus Historiam , optarim eam mihi dari eloquen-
tiam , quæ non aures tuas , dilectissime Discipule,
nox periturâ voluptate deliniat , sed quæ tenaces
aculeos in animo tuo relinquat, efficiatque ut tibi
placeat Historiæ Ecclesiasticæ veritas , claritate,
ac nitore sermonis illustrata. Hæc quippè, si quan-
tùm in se splendoris ac dignitatis habet , tantùm

Tom. VII.

A

ipse

ipse efficiam dicendo, ut in animo tuo obtineat, si nihil ei de suo pondere momentoque tractantis vitio decerpatur, nullus dubito, quin tu perdiscendæ Historiæ Ecclesiasticæ decimi sexti Sæculi sedulò, uti par est, incumbas, & in ejus cognitionem atque amorem omni curâ studioque rapiaris. At enim, quæ tria nobis ad capeffendas artes incitamento esse solent, honestatem dico, quam optimus quisque sequitur; utilitatem, cui servitur fermè; fructum animi jucunditatemque, cui vel in primis indulgere solemus; ea universa huic, quam nunc describendam aggredior, Historiæ decimi sexti Ecclesiæ Sæculi ita penitus conjuncta reperio, ut tribus hisce quasi admotis facibus facile sit tua ad illius comparandam notitiam inflammare studia. Ac primùm omnium, si te magnorum eventuum vel delectat copia, vel juvat admirabilitas; florentissima Regna victricibus infidelium Turcarum armis divexata; inducti Anglicani Schismatis sub *Henrico VIII.* initium ac progressum: pestiferas Lutheranorum, Calvinistarum, Zuinglianorum, Socinianorum, aliorumque A catholicorum Hæreses latè disseminatas; importata ab illis infortunia; sexcentaque id genus obstupescas. Si Catholicæ Religionis propagationem scire gestias, perspicies Orthodoxam Fidem à Turcis, & Hæreticis Sæculi XVI. oppugnatam, & ex nonnullis Europæ partibus, prohdolor! expulsam, ad fidelium solamen & sui tutelam in Americam extendisse propagines, Indias irradiasse, ac sua ubique facientem lucra, doctrinæ lumen, pietatisque calorem in Religiosis Ordinibus eo Sæculo institutis, vel in antiquiorum

Re-

Reformationibus magno cum fœnore restaurasse. Virorum Illustrium immortalia facta si tibi cordi sunt, ultrò fateberis, Sæculum Ecclesiæ decimum sextum quàmplurimis Scriptoribus, doctrinâ & pietate celeberrimis, abundasse, qui in profligandis Hæreticis, & extirpandis vitiis egregiam, periclitanti Ecclesiæ operam navarunt. Denique, si Leges & Instituta quæris, si ritus, cæremonias, sacrorumque Religiones investigare cupis, agnosces summam Romanorum Pontificum, & Episcoporum Sæculi decimi sexti vigilantiam, tum in custodiendo sibi credito avitæ Fidei Deposito, tum etiam in præscribendis saluberrimis Statutis ad emendandos Clericorum mores, ad fovendam fidelium pietatem, ad conciliandam cultui divino debitam majestatem, ad eliminandas invecas superstitiones, & ad dignam Sacramentorum administrationem omnino necessariis, quæ in Conciliis eâ ætate celebratis fuerunt promulgata, sed præsertim in Concilio Generali Tridentino, cujus tu quoque miraberis omni procul dubio divinam quamdam sapientiæ vim, sanctissimis Legibus temperantem omnia, habenas, pro ut res postulabat, vel adducentem vel remittentem, & mirum in modum collapsæ Disciplinæ Ecclesiasticæ pristinum splendorem restituere satagentem. Hæc & alia bene multa, quorum accurata notitia animum tuum maximâ voluptate perfundet, referemus in Historia Sæculi decimi sexti, quam, juxta nobis præscriptam methodum, sex Colloquiis integram absolvemus. Primum exhibebit Statum Ecclesiæ sub Imperatoribus & Principibus, qui tam in Oriente, quàm in Occidente supremo

dominio potiti sunt. In altero Colloquio dabimus seriem Summorum Pontificum, qui Sæculo decimo sexto Sedem Romanam tenuerunt, prætermisſis Patriarchis Eccleſiarum Conſtantinopolitanæ, Alexandrinæ, Antiochenæ, & Hieroſolymitanæ, quæ ſub Turcarum jugo oppreſſæ ingemiſcunt, ac diro Schiſmate ab Eccleſia Romana ſunt ſeparatæ. In tertio Colloquio proferemus in medium Hæreſes, quæ eodem Sæculo variis in locis pullulantes graviffima damna Eccleſiæ Catholicæ intulerunt. In quarto Colloquio diſſeremus de Conciliis tam Œcumenicis, quàm Nationalibus, in quibus vel protritæ fuerunt Hæreſes, vel reſtaurata eſt Eccleſiæ Diſciplina. In quinto Colloquio, Virorum Illuſtrium, qui Sæculo XVI. doctrinâ & pietate inſignes floruerunt, præclara merita & Opera compendioſâ narratione perſtringemus. In poſtremo Synopſim Doctrinæ Fidei, Diſciplinæ tam Eccleſiaſticæ, quàm Monaſticæ, & Moralis Chriſtianæ Sæculi decimi ſexti inſtruemus. Non ſum tamen adeò imprudens, & mearum tam parùm conſcius virium, ut affirmare velim, me omnia, quæ Sæculi Eccleſiæ decimi ſexti Hiſtoriam latè diſfuſam, & variis rerum eventibus locupletiffimam, ſpectant, uberiori ſtylo hic deſcripturum, cùm ea res infiniti penè operis ſit & immenſi, ut ſi quis hæc dilatare atque exequi pleniffimè velit, tanta illi rerum copia exuberet, ut nec libri modum, nec finem reperiât oratio. Meminiſſe etiam debes, me eò duntaxat conſilio id operis fuiſſe aggreſſum, ut rerum quæ ad Hiſtoriam Eccleſiæ pertinent, quæque per multa volumina alibi diſfuſæ Lectorum

ECCLESIASTICA. 5

deterrent studium , vel patientiam fatigant , brevem suppeditarem notitiam , magis ad tuam excitandam famem ad opimio rem dapem , quàm sariandam , digitumque intenderem ad ipsum Historiæ Ecclesiasticæ uberrimum ac plenissimum fontem , cujus haustu atque potu , conceptam visceribus sitim sedare , ardoremque restinguere posses . Cæterum , quamvis omnia breviter collegerim , duo tamen certò affirmare possum , primò , omnia tibi fore facilia , clara , prona , manifesta , modo ne pigeat ad percipienda , quæ referam , Historiæ monumenta , legendi , vel audiendi patientiam commodare . Secundò , nihil à me consultò vel dictum , vel prætermis sum fuisse , quod Orthodoxæ doctrinæ , reverentiæ & auctoritati Romanorum Pontificum , Ecclesiæ Catholicæ dignitati , Conciliorum Statutis , Virorum Illustrium Operibus , integritati morum , Historiæ veritati & Christianæ paci officere posse crediderim .

COLLOQUIUM PRIMUM,

*In quo texitur series Imperatorum, &
Principum, qui Sæculo XVI. tam
in Oriente, quàm in Occi-
dente supremo dominio
potiti sunt.*

DISCI-
PULUS.

C Aptâ Sæculo decimo quinto seu anno MCCCCLIII. à Mahomete II. Turcarum Imperatore, Regiâ Constantinopolis Urbe, & extincto planè Græcorum Imperio, suam in Oriente tyrannidem latè propagarunt Turcæ, Imperium Orientis armis invaserunt, Christianos aut expulerunt, aut in duram servitutem redegerunt, & vastissimas Orientis Regiones impiæ suæ Religionis peste infecerunt, sicut jam descripsisti in Colloquio primo in Historiam decimi quinti Ecclesiæ Sæculi. Cùm igitur Turcæ, deletò Græcorum Imperio, supremum in Oriente dominium obtinuerint, debemus in præsentia primùm expendere, quo loco res Ecclesiæ fuerint in Oriente Sæculo XVI. sub Imperatoribus Turcarum, quorum seriem in laudato jam Colloquio perduxisti usque ad Selimum I. filium Bajazetis II. Turcarum Imperatoris secundo-genitum, qui, si bene memini, imperandi cupidine accensus contra patrem arma cepit, &, ope Janizzarorum, Achmeti, fratri suo pri-

primogenito, prælatus, patrem, qui ipsi imperio cesserat, veneno sustulit, *Achmetem*, fratrem suum primogenitum, prælio vicit & occidit; *Corcutum* quoque, alterum fratrem, quietis & litterarum amantem, unâ cum octo nepotibus pariter necari curavit. Cætera ejusdem *Selimi I.* & aliorum, qui eidem Sæculo XVI. successerunt, Turcarum Imperatorum Gesta lubenti animo auscultabo.

MAGISTER. Postquàm *Selimus I.* cædibus *Achmetis*, & *Corcuti*, germanorum fratrum, & Procerum plurimorum, parricidiale suum confirmasset Impetium, adversus *Ismailem*, Sophinum Persarum, bellum gessit, & anno MDXVII. Syriâ & Ægypto potitus est, atque *Mamalucorum* celebre quondam in Ægypto Imperium in suam potestatem redegit, sui que Imperii appendicem fecit. Obiit *Selimus I.* in Tentoriis versùs Hadrianopolim, eo ipso in loco in quo cum patre suo *Bajazete II.* prælium commiserat, die XXII. mensis Septembris anni MDXX. Imperii VIII. Reliquit *Selimus I.* filium, dictum *Solimanum*, qui eodem anno patri successit, & Turcarum Imperator fuit salutat.

D. Quid, amabo, sibi vult celebre istud *Mamalucorum* Imperium, quod *Selimus I.* Turcarum Imperator in Ægypto armis subegit?

M. Mamaluci aliquandò Imperium in Ægypto obtinuerunt. Postquàm enim Ægyptus à Caliphis ad Turcomannos pervenit sub *Saladino*, Babyloniz Sultano, qui Sæculo Ecclesiæ duodecimo Ægyptum occupavit, Turcomanni emptos à Tartaris, ex Mengrelia, Gurgestania, & Kirkasia,

Christianorum pueros, armis eruditos, custodiz ac defensionì Regni præfecerunt, eosque *Mamaluks* appellarunt. *Mamaluk* autem idem est in lingua Syriacâ, quod niancipium regium. Contigit verò, ut isti *Mamaluki* defensionì Regni Ægypti præpositi, cùm viderent Turcomannos otio & voluptatibus enervatos, consilium inierint Regni ad se transferendi, idque feliciter executioni mandarint die xxvi. mensis Novembris anni Christi mcccclxxxii. Tunc enim *Kircassi*, seu *Mamaluci*, primum ex gente sua Regem in Ægypto crearunt, nomine *Berkukum*, atque ita longâ serie perpetuo Reges Ægypti ex Mamalucis creati sunt, quorum vigesimus primus, nomine, *Causo*, vulgò *Campson Gaureus*, in prælio contra *Selimum I.* Turcarum Imperatorem, in Syria occubuit anno Christi mdxvi. Huic successit *Thömambajus*, qui ab eodem *Selimo I.* in Ægypto victus, captus, ac miserabiliter in porta Urbis *Alchaila* publicè suspendio peremptus est anno Christi mdxvii. Eo pacto, extincto in Ægypto *Kircassorum*, seu *Mamalucorum* Imperio, tota Ægyptus, Arabia, Palæstina, ac Syria Turcico Imperio accesserunt.

D. Turcici Imperii fines latiùsne protulit cum aliquo Christianorum dispendio *Solimanus*, qui, ut mox dixisti, post obitum patris sui *Selimi I.* Turcarum Imperator anno mdxx. fuit salutatus.

M. *Solimanus* hujus nominis II. bellicâ fortitudine, & rerum gestarum gloriâ patrem suum *Selimum I.* æquavit, immò & superavit. In primis, Ægyptios rebellantes, per *Ibrahimum*

Baf-

Bassam coercuit. *Gazellem*, Syriæ Præfectum per-
 duellum, misso in eum exercitu, profligavit an-
 no MDXX. Dein, ad Christianos digressus, *Albam*
Græcam, seu *Belgradum*, munitissimum totius Hun-
 gariz oppidum, & validissimum totius Christia-
 nitatis propugnaculum, die XXIV. Junii anni MDXXI.
 expugnavit. His victoriis elatus *Solimanus*, Rhodi
 insulam, præmisso cum insigni classe *Mustapha* Bas-
 sa, obsidione cinxit anno MDXXII. Hæc est illa
 Insula, quam Equites Hospitalarii, seu S. *Joan-
 nis Hierosolymitani*, expulsis Turcis occupaverant
 anno MCCCX. eamque incredibili fortitudine, in-
 victisque animis à Turcarum obsidione liberave-
 rant, adjuti præsertim potentissimo auxilio *Ame-
 dei V.* Sabaudiz, Mauritanizque Comitis, qui
 disjectâ Barbarorum classe, navi Prætoriâ captâ,
 marisque Præfecto cæso, navalem palmam ferens,
 celeberrimam Rhodi Insulam extrema deditio-
 nis agitantem ex obsidione exemit, & Equitibus
 S. *Joannis Hierosolymitani* servavit: in cujus fau-
 stæ victoriæ monumentum *Amedeus V.* pro Majo-
 rum Aquilis, Crucis candidæ stemma, rogatus
 ad pietatem assumpsit cum his litteris F. E. R. T.
 hoc est, *Fortitudo ejus Rhodum tenuit*, ut videre
 est in *Augusta Regiæ Sabaudiz Domus Arbore Gen-
 tilitia*, quæ ab Abbate *Ferrero à Labriano* typis
 edita est Augustæ Taurinorum anno MDCCII. Ad
 hanc igitur Rhodi Insulam, quam ducentis & duo-
 decim abhinc annis obtinebant Equites S. *Joannis*
Hierosolymitani, indeque vulgò dicti *Rhodii Equites*,
 obsidendam, misit *Solimanus*, Turcarum Impe-
 rator, ingentem ducentorum armatorum millium
 classem. Sed eâ cladibus jam fractâ, & ad reditum
 respe-

respettante, Insulam Rhodi ipsemet cum aliis militaribus copiis appulsus, non ante recessurum, se juravit, quam Insulam subegisset. Complana-
tis igitur per machinas murales propugnaculis, nec suppetente à Christianis Principibus, magno
ipsorum dedecore, auxilio, Rhodii Equites ad
extremas redacti angustias, & spe diutius tuendæ
Insulæ abjectâ, eam, post pactas deditionis ho-
norigas condiciones, concesserunt Turcis, quo-
rum sexaginta millia, & in iis plurimos Duces
ac Præfectos, ferro & igne eâ in obsidione pe-
riisse, ac quinquaginta penè millia variis morbis
extincta, produnt, præter Turcarum Annales,
Spanduginus, *Sansovius*, *Leunclavius*, *Bosius* in
Historia Ordinis Sancti *Joannis Hierosolymitani*,
& alii. Quò fit, ut habitâ ratione immanis eâ
in obsidione Turcarum editæ stragis, eorum vi-
ctoria verè *Cadmea* appellari possit. Captâ Insulâ
Rhodi, *Solimanus*, Turcarum Imperator, Regno
Hungariæ Bellum intulit, præliumque in Campis
Mohatzii die xxix. mensis Augusti anni MDXXVI.
commisit, in quo Hungarorum copiz fusz sunt,
Ludovicus II. eorum Rex, annos natus xx. in aquæ
lutulento gurgite depressus & suffocatus interiit,
multique capti primariæ nobilitatis viri, qui in
conspectu victoris exercitus capite multati sunt.
Indè *Solimanus* Budam versùs, Hungariæ Metro-
polim, pergens, aliasque circum Urbes diripuit,
ducenta Christianorum millia vel immanitèr oc-
cidit, vel, quod tristius, in servitutem abduxit.
Germaniam itidèm invadere volebat *Solimanus*,
& Viennam Austriæ anno MDXXIX. obsedit, mul-
tisque diebus acerrimè oppugnavit. Sed *Philippus*
Pa-

Palatinus, aliique Duces ferocientis impetum fregerunt, Viennam liberarunt, & sexcenta Turcarum millia trucidarunt. Nec magis secundo Marte pugnavit *Solimanus* in obsidione Melitæ, quam, invictâ Equitum S. *Joannis Hierosolymitani* fortitudine repulsus, turpiter & cum magna sui Exercitus clade solvere coactus est. Tandem *Solimanus* longâ jam octoginta ferme annorum ætate in Christianorum direptionibus exercitâ, tot Principum cladibus, tot Regnorum excidiis nobilitatus; integrâ viridique senectute acerrimus, in obsidione Sigethi, firmissimi totius Pannoniæ Oppidi, apoplexia extinctus est anno Christi MDLXVI. Hic silentio præterire hæud possum egregium facinus, quod edidit vir fortissimus, pluribusque pugnis cum Turcis confertis, & partis victoriis inclytus *Nicolaus Comes Serinus*, quicum temporis propugnationi *Sigethi* ad Christianorum defensionem præerat. Hic quippè fortissimus Dux ad quindecim assultus lectissimarum ex universa Turcia copiarum sustinuit, & quidem interdum ad ipsas quatuor & viginti continentes horas, dum ex immenso Turcarum exercitu subindè aliis alii, defessis recentes, faucibus integrè succederent; ad triginta hominum millia inter propugnationem, in iisque Bassas quatuor cecidit, & eò *Solimani* adegit, ut ægritudine animi verius, quàm corporis morbo consumptus obsidioni immoreretur. Sed prudenter à *Mahomete* Bassa celatâ morte *Solimani*, ne ejus publicatio Turcis noceret, tandem Comes *Serinus* cum duobus dumtaxat millibus & quingentis militibus contra ducenta Turcarum millia acriter pugnans, ho-

hostium numero obrutus, & annonâ, machinis, militibus, ac loco ad repugnandum, ad confistendum absumptis, fœdissimè grassante, atque, conspirantibus ventis, omnia penitus depascente incendio, suos, qui adhuc supererant, milites ad occumbendū fortiter, potius quàm turpi servituti se se dedendum, adhortatus est, & actutum unâ cum illis in medias Turcarum acies, invocato nomine *Jesu*, se intrepidè immisit, gladio inter confertos ac undique prementes *Janizzaros* rem ita per dimidiam horam strenuè gessit, ac tantam illorum edidit stragem, ut Turcæ obstupesci fortitudinis miraculo, cum, ejusque socios ultrò ad deditionem invitarint. At ille in Turcarum manus vivus venire non sustinens, gloriosissimis in adverso pectore & capite exceptis vulneribus, cum suis generosis commilitonibus, œcubuit, ac suâ morte non solum omnibus urbium obsessarum Præfectis ingens exemplum ac documentum reliquit, sed memoriam sibi gloriamque peperit sempiternam.

D. sicut acerbo dolore ex morte laudatissimi Herois *Nicolai* Comititis *Serini* afficior, itâ magnis gaudiis triumpho ex obitu *Solimani II.* Turcarum Imperatoris, seu potius magni illius prædonis, & insatiabilis Regnorum helluonis, quî magnâ jam parte devoratâ terrarum, avidius orbi reliquo inhians, Turcicam barbariem omni immanitate teterrimam, & inexpiabili ac plusquàm, hostili in Christianos odio bacchantem latius propagare moliebatur. Sed valdè timeo, ne graviora mala Christianæ Religioni importarint *Solimani II.* Turcarum Imperatoris successores.

M. So-

M. *Solimano II.* qui eas, quas mox commemoravi, clades in Panonia & apud Rhodum intulit, successit *Selimus II.* unicus filius superstes (cæteros enim *Solimanus* occiderat.) Cypri Regnum ut Christianis adimeret *Selimus II.* Turcarum Imperator, Bellum indixit Venetis, & huic gerendo Bello *Mustapham* Bassam copiarum terrestrium, & *Pialim* ac *Alim* Bassas Classis Præfectos constituit. Ad Nicosiam, Regni Metropolim, sub finem mensis Julii anni MDLXIX. admota Castra, eamque captam die x. Septembris miserè diripuerunt Turcæ, cæsis præfidiariis, extinctâ nobilitate, & cæteris aliis duræ servituti mancipatis. Captâ Nicosiâ, obsidionem Urbis *Famagustæ* aggressus est *Mustapha* Bassa. Vim omnem hostilem invicto animo sustinuit *Antonius Bragadinus* Venetus, Urbemque per annum integrum tuitus est incredibili virtute ac fortitudine, atque indefessis militum ad paucos redactorum laboribus. Sed tandem extremâ urgente fame, & disiectis mænibus ac propugnaculis, nullâque relictâ subsidiorum spe, deditionem fecerunt cives honestis conditionibus utrinque conventis, quas *Mustapha* Bassa laudavit, approbavit, eisque propriâ manu subscripsit, sed paulò post, per summum scelus violatâ fide, eas palam infregit. At enim, *Antonium Bragadinum*, cujus virtute *Famagusta* fuerat hætenus propugnata, in *Mustaphæ* Castra cum illustri nobilium Virorum comitatu venientem, ut ei claves civitatis offerret, sicut in hujusmodi deditionibus fieri solenne est, confestim perfidus *Mustapha* apprehendi jussit, cum contumeliosè elusum auribus multavit, deinde barbaricâ inhumanitate vivum excoxiavit; quo
in

in tormento vir ille fortissimus ad ultimum usque spiritum sibi semper constans; Christum Salvatorem nostrum invocare non intermisit. Cæteros Viros nobiles, *Antonii Bragadini* comites, crudeliter trucidari imperavit Barbarus. Hac tam crudelis bellæ indignitate percitus Sanctissimus Pontifex *Pius V.* Turcis bellum indixit, fœdusque iniit cum *Philippo* Hispaniarum Rege, & Senatu Veneto. Ejus fœderis copiarum omnium institutus est Generalis Præfectus *Joannes Austrius*, filius nothus *Caroli V.* Imperatoris. S. *Pius V.* Pontifex Maximus, suis triremibus *M. Antonium Columnam* præfecit; Veneti verò amplissimæ, quam instruxerant, classis imperium *Sebastiano Venerio*, quem postea Ducem quoque suum crearunt, commiserunt. Contractis itaque in unam Classem Pontificiis, Hispanis, Venetisque navibus, ductore *Joanne Austrio*, pugnatum est ad Naupactum, seu Lepantum, in sinu Corinthiaco, quâ pugna victi penitus ac profligati barbari, eorum ducentæ triremes cum immensis spoliis partim à Christianis captæ, partim depressæ. Turcarum cæsa vel captiva fuere viginti quinque millia. Christiana mancipia ex turcicis triremibus liberata quindecim millia. Celebrem illam victoriam multis à sæculis inauditam, non absque evidentibus præsentis Dei Exercituum auxilii indiciis, & suffragantibus præsertim precibus, ardentissimisque votis S. *Pii V.* de Turcis reportarunt Christiani die VII. Octobris anni MDLXXII. Hinc victus *Selimus*, Turcarum Imperator, apertè testatus est, plus sibi preces *Pii V.* quàm arma Christianorum nocuisse, Christiani quoque felicem illius inexpectatæ

statæ victoriæ exitum precibus S. Pii V. Pontificis Maximi acceptum referunt, quem *Sixtus V.* Summus Pontifex appenso ad S. Pii V. sepulchrum elogio paucissimis his verbis perstrinxit: *Selimum Turcarum tyrannum multis insolentem victoriis, ingenti parata classe, Cyproque expugnata, Christianis extrema minitantem Pius V. fœdere cum Philippo Hispaniarum Rege ac Republica Veneta inito: M. Antonium Columnam Pontificiæ classi Præficiens, ad Echinadas hostibus xxx. millibus casis, x. millibus in potestatem redactis, triremibus clxxx. captis, xc. demersis, xv. millibus Christianis à servitute liberatis, precibus & armis devicit. Ex hac insigni victoriâ confœderata Christianorum classis magnum omni procul dubio potuisset consequi emolumentum, ac plures nutantis Turcici Imperii occupare Provincias, maximè cum Barbarorum portus & stationes navibus & subsidiis evacuata, terrore etiam animi illorum perculsi ac consternati essent. sed dissidentibus Christianis Principibus, absque ullo alio operæ pretio classis dirempta est. Obiit *Selimus II.* Turcarum Imperator subitâ Apoplexiâ correptus anno MDLXXIV. ætatis suæ quinquagesimo, Imperii octavo: in ejus locum successus est ipsius filius, natu major, dictus *Amurathes* hujus nominis III.*

D. Legi nuperrimè in Vita Sancti Pii V. hanc victoriam post homines natos maximam de Turcis à Christianis reportatam, revelatam fuisse eidem Sanctissimo Pontifici, qui ideò festum B. Virginis de *Victoria* primâ Dominicâ mensis Octobris recoli voluit, adjuncto eidem Dominicæ festo *Rosarii*, quod in honorem Dei-paræ Virginis in-

instituit *S. Dominicus*, Ordinis Prædicatorum, Fundator, ut hæc solemnis festivitas esset in Ecclesia gratiarum actio celebrior, & perpetuum tantæ victoriæ monumentum. Hujus Sanctissimi Pontificis vestigiis insistens *Clemens XI.* (quem Deus Ecclesiæ suæ diu sospitem ac incolumem servet) ob insignem victoriam de Turcis, Imperio & Italiæ incubantibus, anno MDCCXVI. terrâ marique à Christianis feliciter reportatam, publico Decreto sanxit, ut singulis annis Dominicâ primâ mensis Octobris Officium de Rosario Beatissimæ Virginis Mariæ in universa Ecclesia ab omnibus deinceps celebraretur. Sed prosequamur seriem Imperatorum Turcarum, & ostende, si placet, quis & qualis fuerit iste *Amurathes* hujus nominis III. Turcarum Imperator, qui patri suo *Selimo II.* successit,

M. Imperium suum *Amurathes* ejus nominis III. annum agens ætatis suæ vigesimum septimum, auspicatus est à quinque juniorum fratrum, cæde, ad minimi, adhuc infantuli, ipsi blandientis necem illacrymavit, Deum testem appellans, se non livore aut odio ad hujusmodi parricidium, sed concordie in familia Othomanica conservandæ necessitate compelli. Infestissimum, & maxime diuturnum bellum *Amurathes*, Turcarum Imperator, gessit cum *Mahometo Hodabenda* Persarum Rege, magno quidem Christianæ Religionis emolumento, quæ interim à continuis Turcarum, qui eo bello Persico fuerunt occupati, invasionibus ferè quievit. At pace cum Persis an. MDXCI. compositâ, bellum movit *Amurathes*, Turcarum Imperator, adversus Christianos in Illyricum & Croa-

& Croatiam, ubi *Sinanes*, primarius Vizir, qui Christianos summo odio prosequeretur, *Javarium*, munitissimum oppidum in dextera Danubii ripa situm, expugnavit. Verum, nonnullis cladibus vicissim à Christianorum exercitu affecti Turcæ, pacem inierunt, aliòque arma verterunt. Mortuus est *Amurathes III.* Turcarum Imperator Constantinopoli die XVIII. Januarii anni MDXCV. ex gravissimis calculi doloribus, ut ait *Spondanus* ad hunc annum, vel, ut alii referunt, ex paroxysmis epilepticis; ætatis suæ anno quadagesimo octavo, Imperii vigesimo primo inchoato. Lectione librorum, præcipuè Historiarum, impensè delectabatur *Amurathes III.* Turcarum Imperator, & quidquid apud cunctos Orbis Principes ageretur scire gestiebat. A fundendo sanguine alienum, & ad indulgentiam, quàm ad severitatem proniorem se se exhibuit. Gulæ ac veneri deditus multas uxores accepit, ex quibus complures procreavit liberos, quos inter *Mahometes* hujus nominis III. filius *Amurathis III.* natu major, patri demortuo successit, sui que Imperii initia octodecim, vel, ut alii dicunt, unius & viginti fratrum suorum, quos ipsius pater *Amurathes III.* ex diversis concubinis susceperat, Turcico more cruentâ strage funestavit. Sorores autem viginti septem vivere permisit, vir aliundè naturâ sævissimus, quem ideo pater naturâ mitior de medio tollendum decreverat. Sub Imperio hujus *Mahometis III.* res Turcicæ in Walachia, Transylvania, & Moldavia à *Sinane*, primario Turcarum Vizire, malè gestæ sunt. *Tregovistiam*, *Girgionem*, seu *Arcem S. Georgii* Turcis eripuit *Sigismundus* Transylvaniæ Princeps.

Sinanis Viziris copias fudit, & Turcis cladem anno MDXCV. intulit, quâ nullam unquam turpiorem, & undè plus dedecoris hausissent, hæcenus habuerant. Eodem anno *Strigonium*, & *Winsburgum* in Hungaria Cæsarianus exercitus, magnâ itidè Turcarum editâ strage, recuperavit. In Strigoniensi obsidione eluxit præ cæteris virtus Comitum *Mansfeldii*, Viri bellicosi, qui vulneribus confossus mox obiit & citiùs quàm res Christianorum postulassent. His cladibus necdum, attritus *Mahometes III.* anno MDXCVI. in Hungariam venit, *Agriam*, vicinasque urbes deditione recepit, ubi captivos Christianos cum Turcæ contra datam fidem crudeliter trucidassent, tam immane & contra jus gentium facinus adeò *Mahometi* Turcarum Imperatori displicuit, ut Prætorianum Præfectum, cui hoc crimen imputabatur, statim in frustra concidi iusserit. Mox magnis itineribus properans *Maximilianus*, Rudolphi Cæsaris frater, junctis cum *Sigismundo* Transylvaniæ Principe, & *Tiffembachio* superioris Hungariæ Prorege, viribus, prælium cum Turcis ad *Kereftium* conseruit, in quo victi Turcæ cum turpem ac præcipitem fugam arriperent, Christiani victores, citiùs quàm par fuisset, ad prædam conversi, dum in diripiendis eorum castris, quasi plenâ obtentâ victoriâ, occupantur, ab *Affane* Cicada Bassa, natione Calabro, & Religionis Christianæ Apostatâ, superati sunt, relictis suorum duodecim millibus, sicque *Mahometi III.* Turcarum Imperatori plenam & certam, sed inexpectatam, reliquerunt victoriam. Refert *Spondanus* in Annalibus Ecclesiasticis ad annum MDXCIX. Num. VI.

Ma-

Mahometem III. iussisse, ut Sepulchrum *Jesu Christi* Domini nostri Christianis adimeretur, & Franciscanz Religionis Viri, quorum custodiæ creditum est, pellerentur; sed illum à Legatis Galliarum Regis, & Reipublicæ Venetæ admonitum, id tentari haud posse absque gravissimâ omnium Principum Christianorum, qui summo semper honoris ac venerationis loco sacrum illud monumentum habuerant, offensione; sacrilegum illud præceptum revocasse, & ne quid innovaretur prohibuisse. Obiit *Mahometes III.* Constantinopoli anno MDCIII. ætatis suis undequadragesimo, Imperii nono, cum paulò ante duplici parricidio se ipsum inquinasset, filium suum primogenitum coram Sultana Matre laqueo suffocando, ipsamque, ob insidiarum suspicionem, in mari demergendo. Successorem habuit filium suum natu minorem dictum *Achmetem* hujus nominis I. cujus Gesta in Colloquio primo in Historiam Seculi XVII describemus.

D. Christianorum, qui in Oriente sub Turcarum Imperio duram serviunt servitutem, deplorandam sortem lugeo. Heu! Gens barbara, obscuræ originis, quot cladibus afflixit populum Christianum, quid immanitatis in nos non exercuit? Quot civitates, quot insulas, quot provincias, quot Regna ademitt Christianæ ditioni? à quanta latitudine in quantas angustias detruxit nostræ Religionis Imperium? An pietati Turcarum tantus rerum successus tribuetur? nequaquam. An virtuti? Gens est effæminata luxu, nec aliâ re quàm luxu formidanda, ut nihil interim dicam de Religione & moribus. Quid igitur causæ?

Christianorum, ut puto, vitiis, & Christianorum Principum ambitioni, regnandi libidini, & funestis dissentionibus suas Turcæ debent victorias, & amplissimi Imperii sui propagationem. Verum, ut tot malorum originem magis perspectam habere valeam, te etiam atque etiam rogo, ut Imperatorum, ac Principum Christianorum decimi sexti Sæculi seriem, mores ac Gesta compendiosè describas.

M. Non solum depravati Christianorum decimi sexti Sæculi mores, sed etiam Hæreses *Lutheri* in Germania, & *Calvini* in Gallia serpentes, de quibus in Colloquio III. agemus, necnon dirum illud Schisma, quod *Henricus VIII.* Angliæ Rex contra Ecclesiam Romanam eo in Regno conflavit, & immortales inimicitie, quas cum *Francisco I.* Galliarum Rege gessit *Carolus V.* Hispaniæ Rex, & Romanorum Imperator, in causa fuerunt, cur Christianis Principibus varias in partes distractis, vel in profligandis Hereticis distentis, vel ab Ecclesiæ Romanæ comunione divulsis, vel suæ regnandi libidini plus justo serviens, Turcæ suam tyranidem longè latèque propagaverint, & præter Syriam ac Palæstinam, tot Græciæ Regna, tot Asiæ minoris Provincias, ac magnam Europæ partem invaserint, occupaverint, & miserum in modum desolaverint. Id ita esse tute ultrò fateberis, si tantisper Statum Ecclesiæ sub Principibus Christianis, qui Sæculo Ecclesiæ decimo sexto Imperio & Regnis in Occidente præfuerunt, mecum in præsentia perpendere haud graveris.

D. Incipe, quæso, à Gestis Imperatorum
Chri-

Christianorum decimi sexti Ecclesiæ Sæculi, quorum seriem in Colloquio I. in Historiam Sæculi decimi quinti perduxisti usque ad *Carolus V.* qui patruo suo *Maximiliano I.* in Imperio Occidentis successit anno MDXIX.

M. Post obitum *Maximiliani I.* Imperatoris *Carolus V.* ejus nepos, *Philippi Austriaci* filius ex *Joanna*, Ferdinandi Hispaniarum Regis & *Isabelle* filiâ, Hispaniæ Rex, Francofordiæ electus est Imperator IV. Kalendas Septembris anni MDXIX. Contra *Solimanum*, Turcarum Imperatorem, Hungariæ Regnum ferro flammâque crudelitè devastantem, bellum suscepit, quod tamen nullum felicem exitum habuit, ob ingentes tumultus, quos in Germania excitavit Hæresiarcha *Lutherus*, qui ægrè admodum ferens, quòd *Carolus V.* Imperator anno MDXXI. in Comitibus Wormationensibus Catholicam Fidem egregiè professus, cum velut manifestum Hæreticum proscripsisset, & Sententiam *Leonis X.* Pontificis Maximi, in eum ac sectatores illius promulgatam, executioni mandari jussisset; Scripta virulentissima contra ipsum Cæsarem, ac cæteros Germaniæ Principes in vulgus temerè & arroganter sparsit, in quibus illos porcos, lupos, asinos, temulentos, stolidos, furiosos moriones appellare non dubitavit, palàmque asserere frustrâ Principes armis pugnare in Turcas, nisi suum Evangelium reciperent; præliari adversus Turcas nihil aliud esse quàm repugnare Deo, visitanti iniquitates nostras per illos: itemque non licere Christianis bellare, sed eos debere vim & injuriam pati: denique Turcas esse decies probiores ac prudentiores Principibus Christianis, ideò-

que nihil prosperi à nostris expectandum esse, nec quidquam ad bellum agendum contra Turcas contribuendum. *Lutherum* itaque impium Hæresiarcham, ejusque Sectarios, qui, tractis in suas partes quibusdam Germaniæ Principibus, & Collecto perduellium exercitu, seditiones concitabant, & sùs dequè omnia temerario ausu miscebant, ut in ordinem redigeret *Carolus V.* Imperator, dimisso Turcico Bello, fœderatis Protestantibus, seù Lutheranis, quorum Principes erant *Joannes Fridericus* Dux Saxoniz, & *Philippus Lantgravius* Hessiz, bellum indixit, quod *Smalcaldicum* vocatum est, ob fœdus à Principibus & Civitatibus inter Protestantes primùm Smalcaldæ initum pro defensione doctrinæ & Sectæ Lutheranz. Hoc Bellum Smalcaldicum felicissimè confecit *Carolus V.* & memorabilem de *Joanne Friderico* Duce Saxoniz, & *Philippo Lantgravio* Hessiz, aliisque Germaniz Hæreticis, in perniciem Ecclesiæ Romanæ conspirantibus, victoriam retulit ad flumen Albim, post acerrimum novem horarum prælium. In eo capti sunt *Joannes Fridericus* Dux Saxoniz, & *Philippus Lantgravius* Hessiz, Lutheranorum Sectæ columina, & mox in utrumque à Cæsare sententia capitis lata est, vitam tamen obtinuerunt, Electore Brandeburgensi, & Clivenfi Duce pro ipsis deprecantibus. Verùm, *Joannes Fridericus* exutus est Saxoniz Electoratu, qui concessus est fratri ejus *Mauritio*, Arcibus itidem Witembergâ & Gothâ spoliatus, & bonorum omnium publicatione punitus, excepto quinquaginta millium aureorum annuo redditu. *Lantgravius* verò his conditionibus gratiam obtinuit, ut se, suamque Provinciam

Cæ

Cæsaris arbitrio permetteret, Majestatis ejus pedibus provolutus veniam rogaret, & centum quinquaginta aureorum millia Cameræ Imperiali persolveret. Præter hanc insignem de Hæreticis Lutheranis reportatam victoriam, quâ *Carolus V.* Imperator de tota Ecclesia Catholica optimè meritus est, aliud præclarum & immortalis laude dignum gessit, dùm Melitam Insulam Equitibus Sancti Joannis Hierosolymitani, quos Turcæ Rhodo depulerant, dono dedit, ut pro Christianæ Religionis defensione excubantes, Turcarum impetus ac irruptiones ferro flammisque retunderè possent. Hactenus *Caroli V.* Imperatoris rectè præclarèque gesta perstrinxi, nunc verò ea, quæ malè, iniquè & imprudenter egit, nec probare, nec dissimulare possum. In primis, meritò culpandus venit *Carolus V.* quòd infauftum Edictum procuderit, quod *Interim* fuit appellatum, ex eo quòd præscriberet in illo formulam doctrinæ, Disciplinæ Ecclesiasticæ, & Cœremoniarum in Germania tenendam, interim dum de universa religione, in Concilio Generali esset definitum. Concedebat etiam in eodem Edicto Presbyteris jam ordinatis conjugii facultatem, & populo communionem sub utraque specie. Hoc *Caroli V.* Edictum à Sede Apostolica fuit statim reprobatum, non solum quia Principibus Laicis minimè licet manum mittere ad Sacra, sed quia etiam in maximum Ecclesiæ Catholicæ dedecus vergebat. Quam ob causam nunnulli ejusmodi Edictum haud incongruè *Interreligionem* nuncuparunt. Alii illud non *Interim*, sed *Interitum*, quòd animas illud recipientium interimeret, vocandum esse dixerunt. Alii denique

istud *Interim* Ediſtum non minus Eccleſiæ pernicioſum eſſe affirmarunt, quàm Imperatorum *Zenonis* Henoticon, *Heracii* Ectheſis, & *Constantis* Typus, funeſta Ediſta, olim ſub ſpecioſo obtentu ſedandarum in Religione diſiſionum, in grandem nihilominus Eccleſiæ Catholicæ perturbationem imprudentiſſimè fuerunt promulgata. En quibus ſeſe difficultatibus Principes implicant, dum plus poſſe volunt, quàm Deus & Eccleſia ſinunt. Nec in hoc ſolùm Hiſtorici culpant *Carolum V.* Imperatorem, ſed etiam atris coloribus depingunt crudelem illam Romæ direptionem, cujus ipſe anno MDXXVI. author fuit, dum ad oppugnandum Romanum Pontificem *Clementem VII.* qui cum Gallis ſœdus pepigerat, miſit Romam Exercitum magna ex parte Hæreticis Lutheranis conſtitutum, eique præfecit *Carolus Borbonium*, Galliarum Regis, patriæque proditorem, ſed egregium Imperatoris adminiſtrum, ejuſque potentia ſtruendæ præcipuum adiutorem, qui tamen Urbem Romam adortus, & inter primos, ſcalis admotis, conſcenſo muro, glande plumbeâ ad ilia trajectus, pugnandi ac vivendi ſinem fecit. Ejus tamen morte non eſt reſtinctus militum ardor ad prædam, ſed inſtigante *Philiberto* Arauſicano Principe, qui locum demortui *Borbonii* occupaverat, capta eſt Urbs, & à militibus in omnem licentiam effuſis miſerè devaſtata. Nullum templum ſacrilegis eorum manibus inviolatum manſit, Matronis, & Virginibus etiam ſacris ereptus pudor, obvii quique armati & inermes trucidati, Procerum atque divitum Ædes direptæ, Sanctorum Reliquiæ diſjectæ, combuſtæ, diſſipatæ, Sanctiſſima Euchariftia

con-

conculcata, Bibliotheca Vaticana incensa, Summus Pontifex *Clemens VII.* in Arce Sancti Angeli obsessus, qui, ut in Colloquio proximo ostendimus, durissimis conditionibus se se dedere compulsus est, quas cum audisset *Solimanus*, Turcarum Imperator, exhorruisse dicitur; uno verbo, quidquid sacrilegiorum ab impiis, quidquid rapinarum ab avaris, quidquid cædium à truculentis, quidquid spurcitiarum ab immundis, quidquid inhumani à barbaris, quidquid brutale à feris, quidquid tartareum à Dæmonibus timeri poterat, Roma in hac immanissima direptione miserum in modum experta est. Sed, quod satis festivum ac lepidum est, *Carolus V.* dissimulandi peritus artifex, dum ab Exercitu, quem ipsemet Romana miserat, in Arce S. Angeli *Clemens VII.* Pontifex Maximus, captivus detineretur, magnum mærorem de ipsius captivitate, & Urbis direptione præ se tulit, habitis etiam pro ipsius liberatione publicis supplicationibus, & festivâ Aulæ suæ specie, ob natum filium, in vestes lugubres propter captivitatem Pontificis, de qua tamen in sinu suo gaudebat, commutatâ. Postremò, Historici vitio vertunt *Carolo V.* Imperatori, quòd perpetuas cum *Francisco I.* Galliarum Rege similitates aluerit, ac cruentum Bellum toto ferme Imperii sui tempore gesserit. Quòd eundem Regem in Ticini obsidione captum, Madriti captivum detinuerit, illumque gravissimis conditionibus, quas mox agendo de Galliarum Regibus referemus, libertatem redimere compulerit. Occasione quippè diuturni istius belli, quòd acrioribus semper odiis, mutuisque ac savissimis inter-

necio-

necionibus per annos viginti tres duravit, *Solimannus*, Turcarum Imperator, Christianis Principibus mutuis odiis, & internecinis bellis vires suas atterentibus, Turcici Imperii fines, cum summo Christianæ Religionis dispendio latè protendit. Has labe, quas *Carolus V.* Imperando contraxit, verâ, ac sincerâ pœnitentiâ ante obitum suum absterfit. Imperium quippè anno MDLVI. abdicavit, illud *Ferdinando*, Fratri suo, administrandum reliquit, secessitque in Extremaduram, Vallem Hispaniæ amœnissimam, in Cœnobium S. *Iusti* Ordinis Hieronymitarum, duodecim tantum, famulis sibi reservatis, ubi rebus divinis solum, vacans, & bonis operibus intentus, pientissimè vixit, & mortuus est XI. Kalend. Octobris anni MDLXIII. receptis omnibus Sacramentis, & manu Crucifixi imaginem tenens, dictis his verbis expirantis Christi Domini: *in manus tuas Domine commendos spiritum meum*. Ei morienti adfuit *Bartholomæus Caranza*, Archiepiscopus Toletanus, Ordinis FF. Prædicatorum, qui, auditâ eius infirmitate, protinùs accurrerat, & pridie obitus advenerat.

D. Felicem *Carolus V.* qui caduco, ac terreno Imperio nuncium remisit, ut immortalem coronam in cœlis consequeretur. Erit semper apud omnes pro laudatione, & monumento pia illius mors omni præconio maior, & omni mole firmior, omnibus titulis luculentior, omnibus militiæ triumphis longè illustrior. Sed de *Ferdinando*, cui *Carolus V.* ejus Frater, Imperium administrandum reliquit, pauca nunc dicere juvat.

M. *Ferdinandus*, hujus nominis Primus, *Caroli V.*

roli V. Cæsaris Frater, Hungariæ, & Bohemiæ Rex jam creatus anno MDXXVII., & Rex Romanorum, in Comitibus Imperii Colonia Agrippinæ anno MDXXXI. habitis, tandem renunciatus est Imperator Francofurti pridie Idus Martii anni MDLVIII. cum ibidem *Carolus V.* per Legatos coram septem Viris Imperium abdicasset. Fuit Princeps mitis, affabilis, temperans, & pacis artibus illustrior. Bella valde memorabilia non gessit, unum tantum aut alterum non magni momenti suscepit ex necessitate tuendi Hungariæ Regnum contra Turcas, qui illud misere depopulati sunt. Concilii Tridentini absolutionem vehementer optavit, & pro viribus promovit, sed impedire haud potuit, quin pestifera Lutheri Hæresis late per Germaniam, grassaretur, immò intempestivâ mansuetudine Lutheranis nimium otii, ac tranquillitatis indulgit, impiæ Hæresis pravitati, ut decuerat, non obstitit, *Pium IV.* Pontificem Maximum obnixè rogavit, ne in Reginam Angliæ *Elizabetham* sententiam ferret, quòd spem ipsi fecisset conjugii cum filio suo *Maximiliano*, & ad reconciliandos Hæreticos, qui ejus clementiâ abutebantur, postulavit à Patribus Concilii Tridentini Legum Ecclesiasticarum laxamenta, quæ ei tamen non fuerunt concessa. Obiit Viennæ die xxv. mensis Julii anni MDLXIV. ætatis suæ LXI. Imperii VII. Post ejus obitum *Maximilianus*, hujus nominis II. ejus filius, Bohemiæ olim, & Hungariæ Rex, qui, vivente patre, Romanorum Rex fuerat creatus, Imperium rexit. Moribus, & ingenio Patri suo similimus fuit, pacis conservandæ studiosissimus, perduelles Lutheranos in ordinem redigere non curavit.

vit. Quò factum est, ut sub ejus Imperio magna hæreticis contigerit libertas, & latus patuerit campus Lutheranz Hæresis in Germania grassationibus. Proceribus, ac nobilitati Austriacæ *Maximilianus* Imperator decreverat concedere licentiam profitendi Confessionem Augustanam, ita dictam, quòd Hæreticus *Philippus Melancthon* eam à se procuram in Comitibus Augustanis anno MDXXX. celebratis Germaniæ Principibus exhibuisset, quamque, ut in colloquio quinto ostendemus, Lutherani instar Evangelii sequebantur; sed adhortationibus, & minis S. Pii V. Pontificis Maximi per Cardinalem *Commendonum*, Sedis Apostolicæ Legatum, intentatis, deterritus Imperator, hanc licentiam rescidit. Bellum gessit *Maximilianus* Imperator contrà *Solimannum II.* Turcarum Imperatorem, ejusque filiū *Selimum II.* ab anno MDLXVI. usque ad annum MDLXVIII. quod tamen fausto caruit exitu. Denique, *Maximilianus* à magna Procerum parte Rex Poloniæ adversus *Stephanum Battorium* electus, dùm jus suum, favente *Gregorio XII.* armis tueri parabat, obiit Ratisponæ, vex ex dolore calculi, vel, juxtà alios, ex palpitante cordis, die XII. Octobris anni MDLXXVI. ætatis suæ XLIX. Imperii XII. *Rudolphus* hujus nominis II. filius *Maximiliani II.* Imperatoris, Hungariæ, & Bohemiæ Rex, Patri in Imperium successit, qui jam anno antecedenti, seu MDLXXV. ætatis suæ annum agens XXIV. in Comitibus Ratisponensibus Romanorum Rex fuerat renunciatus. Princeps fuit pacis, ac tranquillitatis, quàm ipsius dignitas, & Religio postulabant, amantior. Tumultuantibus quippè Bohemis, & Austriacis de

de Religione concessit publico Ediſto, ut ſequerentur Auguſtanam, & Bohemicam Confeſſiones, quæ planè Hæreticæ erant. Hoc Ediſtum datum Pragæ die xx. Julii anni MDXCIX. inferuit *Goldaſtus* Tomo II. *Conſtitutionum Imperialium*. Quin, tanta fuit illius Imperatoris ſocordia, vt Lutherani auſi ſint ei per Principem *Anhaltinum* renunciare, niſi aliam regendi formam ſervaret, ſe proviſuros. Nec ſolùm inter minas hæſerunt, ſed fœdus contrà Imperatorem, & Catholicos pepigerunt, cujus Ducem Palatinum Principem, Vicarium Principem *Anhaltinum* conſtituerunt, ſeque *Correſpondentes* appellarunt. Aliundè Catholici, ut ſe, Majestatemque Imperii tuerentur, arctius inter ſe fœdus percufferunt, quod *Ligam Catholicam* appellarunt: Patienter hæc *Rudolpho* Imperatore pro ſua facilitate ferente, & in utramvis aurem dormiente. Unum dumtaxat Bellum *Rudolphus* Imperator geſſit cum *Amurathæ*, hujus nominis III. Turcarum Imperatore per annos quatuordecim, ſeu ab anno MDXCI. uſque ad annum MDCVI., & huic Bello, in quo ancipiti Marte, ac mutuis cladibus pugnatum eſt, præfecit fratres ſuos *Matthiam*, & *Maximilianum*, alioſque ſtrenuos Duces, dùm ipſe interim immobilis ac penè deliteſcens in Bohemia federet inglorius. Propter Hungariæ, ac Tranſylvaniæ exortas ſeditiones, quibus ſedandis par non erat, Regnum Hungaricum fratri ſuo *Matthiæ* ceſſit *Rudolphus* Imperator, obiitque Pragæ die xx. Januarii anni MDXII. ætatis ſuæ LIX. Imperii xxxvi. in cujus locum ſeptem Viri Francofurti convenientes ſuffecerunt *Matthiam* ejus fratrem, jam antea Hungariæ, & Bohemiæ Regem, qui Sedem Czſaream.

Pra-

Pragâ , ubi eam tenuerat *Rudolphus* Imperator , Viennam Austriæ transtulit, sed de hoc Imperatore , & de rebus ab eo gestis suo loco disseremus , videlicet in Colloquio primo in Historiam Sæculi decimi septimi .

D. Utinam! Imperatores Christiani nascentis , ac prodeuntis in Germania Sæculo decimo sexto infirmis ac timidis Lutheranorum Hæresis principiis strenuè , uti par erat , obstitissent, eosque consultissimos sequuti fuissent Rerum publicarum Moderatores, qui diligentissimè providerunt, ne qui existerent novarum Religionum Artifices , qui peregrinis , ac falsis doctrinis infatuarent civium animos, adjunctosque sibi , & Religionis nexu , & gratiâ novitatis , possent ad quidvis audendum abducere. At , ex rebus gestis , quas mox retulisti , Christianorum Imperatorum decimi sexti Sæculi , satis intelligo , eos , dùm ad primam novitatis auram errorem non represserunt , sed spatium ei dederunt corroborandi confirmandique sui ; non potuisse postea Turcarum in Europa progressus compescere , & Lutheranz Hæresis in Germania propagationem impedire , vndè maxima tam in statu Civili , quàm Ecclesiastico consecuta est perturbatio , quâ emotæ civitates , convulsæ Provinciæ , afflicta Regna , immutata Religio , omnis Europa concussa est . Sed videamus , si placet , an Catholicæ Ecclesiæ status tranquillior fuerit sub Regibus Galliarum Sæculi decimi sexti ?

M. Quid in animos non possit conciliatricula novitas , & quàm parùm tuta sit Respublica , ubi periclitantur Sacra ; Heu nimium! decimo sex-

sexto Sæculo experta est Gallia, luctuosissimis discordiarum fluctibus miserrimè jactata, dum in hoc florentissimo Regno pestifera Calvinistarum Hæresis, Sacerdotum exuviis, populorum sanguine, Provinciarum cladibus, & exitio satiata impunè grassaretur. Involaverat exitialis illa Hæresis in Scholas, in Aulam Regiam, in Forum, inter purpuratos Judices vitæ ac necis arbitra, confidebat, irrepsit ad honores, primosque Regni gradus obtinebat, suas habebat Arces, sua templa, eoque sensim provecta est, ut Galliam, tùm temporis vidisset tristissimo Hæresis incendio deflagrantem, nutantia Regum solia, labantem populorum fidem, scissam ubique concordiam, & pacem, ac tandem nefarios Cives, hac peste infectos, à templorum ruinis, ad Urbium, & Provinciarum direptiones; à contemptu Sacrorum, & Cæremoniarum, ad legum everSIONem; à Divine Auctoritatis neglectu, ad Regiæ potestatis odium, indicto Bello progredientes, & omnia ferro flammæque devastantes. Tot gravissima mala, quibus Sæculo decimo sexto vexata fuit, & tantùm non oppressa Gallia, ut tibi ob oculos ponam, seriem Christianissimorum hujus Sæculi Regum, hic at-
texam, eorumque Gesta breviter describam.

Ludovico XII. Galliarum Regi, de quo satis egimus in Colloquio primo in Historiam Sæculi xv. defuncto absque mascula prole Kalendis Januarii anni MDXV. ætatis suæ LIV. Régni XVII. agnationis jure successit *Franciscus* Dux Valesiorum, & Ingolismensium Comes. Hic est ille *Franciscus*, hujus nominis I. Galliarum Rex, qui in petitione Imperii æmulus fuit *Caroli V.*, & cum ipso

ipso perpetua habuit bella, quæ Galliarum Regno fuerunt admodum funesta, inter quæ potissimum censeretur acerrima illa Ticinensis, seu Papiensis pugna, quæ contigit die xxiv. mensis Februarii anni mxxxv. in qua octo Gallorum millia, aut ferro, aut in Ticino fluvio periere, & ipse Rex *Franciscus I.* dum intrepidè, ubi Mars atrocissimus erat, extremo vitæ discrimine certamen sustineret, captus est, & Madritum captivus abductus. Madriti itaque in custodia detento *Francisco I.* Galliarum Regi pacis, ac libertatis duras condiciones *Carolus V.* proposuit, quarum prima, & præcipua fuit, ut Burgundiæ Ducatum cum multis ejus appendicibus ei traderet omni supremo jure possidendum. Altera conditio, ut omnibus Regni Neapolitani, Principatus Mediolanensis, Genuæ, Astæ, quibuscumque juribus, necnon Flandriæ, & Artesiæ Dominio cederet, atque Urbes, quas in eis possidebat, restitueret. Tertia conditio, ut Eleonoram *Caroli V.* Cæsaris Sororem, *Emmanuelis* Lusitaniz Regis Viduam, duceret uxorem. Quarta conditio, ut *Carolo Borbonio*, qui, ut jam observavimus, Galliz, patriæ suæ, & Regis Christianissimi proditor erat, ablatas omnes ditiones, & opes restitueret. Postrema conditio, ut duos filios suos natu majores obsides datæ fidei traderet. His oblatis conditionibus Rex *Franciscus I.* libertatis cupidus, fidem obstrinxit. Sed libertati restitutus, promissis non stetit, causatus ejusmodi conditionum asperitatem, duritiam, & iniquitatem, moxque fœdus cum *Clemente VII.* Pontifice Maximo, Venetisque contrà Imperatorem percussit. Quod ægerrimè ferens *Carolus Imperator*,

tor, Italiam ingressus, *Caroli Borbonii* ductu, Romam, ut superius diximus, obsedit, cepit, incendit, turpius profectò, quàm Principem Christianum decuisset. Pacem cum Summo Pontifice, & Rege Christianissimo *Francisco I.* iniit *Carolus V.* Imperator anno MDXXIX. cujus conditiones apud *Guicciardinum* libro XIX. legere est. Sed hæc pax non fuit diuturna ob implacabiles utriusque Principis similitudines, quæ indetentim in bella erumpentes, Galliarum Regnum in magnas coegerunt angustias, & gravissima Ecclesiæ damna intulerunt, quæ tamen *Franciscus Primus* refarcire pro viribus studuit, Fidem Catholicam in suo Regno contra Hæreticos Calvinistas ardentissimo studio propugnando, sive solemnes supplicationes decernendo, quibus ipse cum Principibus, Clero, plebeque universâ aderat, ut læsæ sacrilegis Hæreticorum in Sacrosanctam Eucharistiam sparsis libellis Christi Domini Majestati fieret satis; sive convictos Hæreticos extremo supplicio damnando; sive severissimum Edictum contra Hæreseos Authores, ac disseminatores datum apud Fontemblaudei Kalendis Junii anni MDXL. promulgando; sive denique, dum *Henrico VIII.* Angliæ Regi, ob schismæ ab ipso conflatum, excommunicatione jure merito à Sede Apostolica perculso suppeticas ferre constantissimè renuit. Cum *Leone X.* Pontifice Maximo congressus est *Franciscus I.* Bononiæ anno MDXV. in quo congressu Pontificem inter ac Regem Pacta illa, in Regno Galliarum observanda, inita sunt, quæ vulgò *Concordata* vocantur, & abolita est tandem *Pragmatica sanctio*, ut fusiùs ostendamus in Colloquio sexto agendo de Disciplina.

Ecclesiastica Sæculi decimi sexti. Non solum Justitiæ severus exactor fuit *Franciscus I.* Galliarum, Rex, sed etiam adeò litterarum, bonarumque Artium amans, ut insignem Bibliothecam, conquisitis undiq; optimis libris locupletatam in Regiis *Fontisblaudi* ædibus instruxerit, ac perdoctis Professoribus, quos accivit, amplissima assignaverit stipendia, ut eorum ope, profligatâ barbarie, Artes, ac scientiæ in Galliis reflorescere possent. Hinc illustri cognomento *litterarum parens*, & *munificentissimus litteratorum Mæcenas*, passim appellatus est. Sui erga Ordinem FF. Prædicatorum singularis affectus egregia documenta dedit, sive dùm *Guillelmum Parvum* Confessarium, & Concionatorem suum, ejusdem Ordinis Theologum Parisiensem, Trecentem primum, deindè Silvanensensem Episcopum, Filiis suis Præceptorem dedit; sive etiâ, dùm Comitia Ordinis Fratrum, Prædicatorum Lugduni anno MDXXXIV. habita humanissimus Rex dignatus est suâ præsentia, & cum tribus Cardinalibus assiduus concertationibus Scholasticis interfuit auditor; assedit mensæ communi, & tandem comprobata disputationibus eruditione, sanctionibus, sapientiâ, & pietate, amplitudine Religiosorum ex omnibus Orbis partibus aduentu, illustrissimo testimonio Familiam Dominicanam ornavit dicens: *Fratrum Prædicatorum Ordinem non tantum Ecclesiæ Catholicæ, sed etiam sui Galliarum Regni invictum esse propugnaculum.* Obiit *Franciscus I.* omnibus Ecclesiæ Sacramentis munitus anno MDXLI. ætatis LIII. Regni XXXIII. de cujus Gestis si plura nosse cupias, leges ejus Historiam paucis ab hinc annis

con-

concinnatam, ac in lucem editam à Clarissimo *Varillaffio*, Gallo Historiographo. Post obitum *Francisci Primi* regnavit in Galliis ejus filius, *Henricus* hujus nominis II.

D. Fuitne *Henricus II.* Galliarum Rex in Bello felicior Patre suo *Francisco I.* in quo sanè Regiarum dotum nihil desiderabatur præter felicitatem virtuti, ac fortitudini parem?

M. *Henricus II.* in Bellis, quæ cum *Carolo V.* Imperatore, & *Philippo II.* Hispaniarum Rege, gessit, *Francisco I.* Patre suo multò felicior fuit. Sed antequàm hæc bella aggredereetur *Henricus* Franciæ Rex, magnitudine animi, & rei militaris peritiâ insignis, Regni sui administrationem à Religione orsus est, probè sciens Rempublicam rectè constitui hand posse, nec diu florere, nisi Religio à perversis, & seditiosis Hæreticorum studiis, & erroribus illibata servetur. Hinc Hæreticos Lutheranos, qui in Galliarum Regno occultè grassabantur, severissimis Edictis coercuit, multosque ex illa secta captos igne ardere jussit. Mox Calvinianos Hæreticos, qui Gallias pestilentî Hæresi infestabant, ut omninò profligaret, Domos, in quibus prædicti Hæretici in toto Regno conventicula habere solebant, solo æquari jussit; Viros nobiles, cæterosque summâ jurisdictione pollentes, suâ jurisdictione privari, Regios Magistratus officiis suis abdicari, si in puniendis horumce Conventiculorum authoribus negligentiores essent. Alias contra hujusmodi Hæreticos leges tulit sapientissimus ille Rex, quibus nihil intentatum reliquit, ut nascentem illam Calvinianam Hæresim in cunis præfocaret, eamque pestem procul

cul è Regni sui finibus eliminaret . At , dùm totus in Calvinianæ Hæreseos extirpationem incumbere*t* *Henricus* Rex , coactus est bellum suscipere , adversus *Carolum V.* Imperatorem , & *Philippum II.* Hispaniarum Regem . Misso itaque in Lotharingiam exercitu , Duce *Mommorantio* Magistro Equitum , Diviodurum Mediomatricorum , quos nunc Metenses vocamus , Tullum , & Vir dunum Regno Galliarum adjecit . Paulò post *Carolus V.* centum armatorum millibus Diviodurum Mediomatricorum obsedit , sed *Francisco Guisio* strenuè propugnante , potiundi desperatione obsidionem solvit *Carolus V.* Res non minùs segniter contra *Philippum II.* Hispaniarum Regem in Belgio , & in Italia gessit *Henricus II.* Galliarum Rex . Plures Civitates in Belgio partim expugnavit , partim deditione accepit . Exercitum in Campaniam , Neapolitanumque Regnum immisit , Duce *Francisco Guisio* anno MDLVII. quo quidem anno Galli in Belgio ab Hispanorum exercitu , cui præfectus erat *Emmanuel Philibertus* , Dux Sabaudiarum , gravissimam ad Sancti *Quintini* Oppidum in Veromanduis die x. mensis Augusti cladem acceperunt , quæ *Sanquitiana* , aut *Sanlaurentiana* , à die quâ contigit , dicta est , in qua plures procures , ac nobiles cæsi , aut capti sunt . Sed eâ victoriâ uti nescierunt Hispani . *Henricus* quippè Galliarum Rex , ex hac clade factus sapientior , ex Italia accersit *Franciscum Guisium* , qui *Calesium* , Arcem munitissimam , quæ jam ab annis ducentis & decem Anglicum ferebat jugum , intrâ septem dies ad deditionem redegit , Anglisque eripuit . *Thermens* etiam *Mareschallus Gravelingam* , *Burgam* , *Dunkerkum* ,
aliaf-

aliasque Belgii Civitates cepit, sicque penitus abolita est illius *Sanquitianæ*, seu *Sanlaurentianæ*, Gallorum cladis recordatio. His alternantis fortunæ casibus permoti Galliæ, & Hispaniæ Reges pacem nuptiali adstrictam fœdere inierunt anno MDLIX. datâ *Philippo II.* Hispaniarum Regi in conjugium *Elizabethæ*, filiâ *Henrici II.* Galliarum, Regis. Parisiis nuptiæ celebratæ fuerunt ludicris Equitum certaminibus, & hastiludiis, in quibus cum ipse *Henricus* Rex decertare voluisset, lethale vulnus in capite accepit, obiitque die x. Julii anni MDLIX. ætatis XLII. Regni XLII. Adeò fluxa, lubrica, & instabilis est rerum humanarum conditio, ut hanc lætitiâ, cum maximè gesseret, exceperit luctus, tamque justam gratulationem, dum ferveret, funestaverit optimi Regis interitus, simulque perculsi totius Galliarum Regni ægritudo, luctus, consternatio, squallor intercesserit, solis Hæreticis, Religionis ac patriæ juratis hostibus, ingenti exultatione bacchantibus.

D. Ecceur, quæso, mortuo *Henrico II.* tanta consternatio universum Galliæ Regnum occupavit?

M. Jure optimo Galli gravissimis, ac verissimis lachrymis mortuum Regem *Henricum II.* luserunt, quia, eo moriente, unâ cum illo extincta est omnis felicitas Regni Galliæ, domesticis malis continuo irrumpentibus, quæ florentissimum, illud Regnum ad ultimum ferè exterminium adduxissent, nisi Deus ab irreparabili casu illud præservasset. At enim, mortuo *Henrico II.* successit in Regno Galliæ filius ejus *Franciscus* hujus nominis

II. annum agens ætatis suæ decimum septimum, ,
 cujus ætas juvenilis, & in experta locum dedit Calvinianæ Hæresi, armis & facibus instructæ, caput efferendi, & funestis cladibus totum Galliæ Regnum cruentandi. Tentaverat quidem Rex *Franciscus II.* sub initium Regni sui Hæreticorum Calvinianorum frangere audaciam, sive negotiorum Regni administrationi præficiendo *Guisios* fratres Lotharingios, Ducem, & Cardinalem, Catholicæ Fidei acerrimos defensores, & avunculos Reginæ Conjugis *Mariæ Stuartiæ*; sive etiam renovando lata jam sub defuncto patre suo *Henrico II.* in Hæreticos Edicta, & nova promulgando; sive denique novam instituendo Classim, seu Cameram, quæ in quolibet Regni Senatu tantummodò de criminibus ad Religionem pertinentibus cognosceret: *Cameras Ardentes* appellarunt, quòd ad rogam passim damnarentur, qui Calvinianæ superstitionis convicti essent, & in nocturnis conventiculis deprehensi. Verùm, hæc omnia Hæreticos in officium reducere minimè potuerunt, animos eis præsertim faciente *Ludovico Borbonio Condeò*, Regii sanguinis Principe, qui hac peste infectus, ut suam, specioso Religionis obtentu, potestatem auget, Caput illorum se constituerat, æmulatione quoque incitatus adversus *Guisios*, quos Catholici, ut avitæ Fidei vindices suspiciebant ac venerabantur. Hæretici itaque audaciores facti, non solum libros seditiosos adversus *Guisios*, quos suis superstitionibus contrarios vatiniiano odio prosequabantur, vulgarunt ac disseminarunt, sed etiam in apertam conjurationem adversus Regem *Franciscum II.* eruperunt, eumque

que Ambasiâ , ubi tunc erat, clam dispositis viris armatis, conati sunt abducere, eam in spem ere-
cti, fore ut capto semel Rege adolescente, Regnum
pro arbitrio ejus nomine administrarent. At, de-
tectâ per certos indices conjuratione, rebelles
cum magna eorum clade dissipati sunt, & *Franci-*
scum Guisium, ob rem optimè gestam, Senatus
Parisiensis titulo *Patriæ Conservatoris* cohonestav-
it. Animos tamen non desponderunt feroces
Hæretici, sed potius in rabiem acti multas Urbes
occupare tentarunt, & cuncta seditionibus, cœ-
dibus, rapinis, sacrilegiis compleverunt. Qui-
bus malis Rex, ut præsentissimum adhiberet re-
medium, Comitia Meldis indicta transtulit Au-
reliam, ut Cives ad res novas propensos in offi-
cio contineret. In his Comitiiis, seu, ut loquun-
tur Galli, in hoc trium Ordinum Conventu, ca-
ptus est Princeps *Condæus*, custodiæ traditus, &
læsæ Majestatis reus convictus, latâ à judicibus
sententiâ morti addictus fuit; procrastinatum ta-
men est ejus supplicium ob morbum Regis *Franci-*
sci, qui obiit ex apostemate in aure sinistrâ ena-
to, Ecclesiæ Sacramentis religiosè perceptis, No-
nis Octobris anni MDLX. ætatis suæ duodevigesi-
mo, nullâ relictâ prole.

D. Quis ad Galliarum Regnum admini-
strandum suffectus est in locum *Francisci II.* qui, ut
mox observasti, è vivis excessit nullâ relictâ pro-
le?

M. Defuncto *Francisco II.* successit in Re-
gnum Galliæ ejus frater *Carolus*, hujus nominis IX.
annum agens ætatis decimum, qui administratio-
nis Regni per ætatem cum adhuc incapax esset,

Catharina Medicæ Regina, ejus mater, fœmina solers, & imperandi cupidine flagrans, optatum gubernandi Regni procurationem mille adhibitis artibus obtinuit, & ut Sectæ Calvinianæ Principes sibi arctius devinciret, his plus æquo favit, & Religionis Catholicæ negotiis haud parum nocuit. Ea quippè ambitiosa fœmina, cui retinendæ supremæ auctoritatis studium Religione ipsâ antiquius erat, non solum in Regni Comitibus, apud Aureliam habitis, Principem *Condeum*, seditionis facem, & Calvinianæ factionis Antesignanum, absolvit, sed etiam Calvinistarum precibus annuens Edictum Regium publicavit, quo Provinciarum, Præfectis jubebat, ut Calvinistæ, qui Religionis causâ in carcere detinebantur, libertate donarentur; Hi verò, qui in exilium erant ablegati, revocarentur, hisque licitum esset cum Catholicis sine offensione vivere. Ingentes animos ex eo præpostero Edicto sumpserunt Calviniani, ac Principum freti patrocinio, & hujus ambitiosæ Reginæ Matris elati favore, Ecclesias Catholicorum occuparunt, Altaria everterunt, Sacras Imagines confregerunt, Sacerdotes trucidarunt, Sacrilegiis ac cœdibus omnia fœdarunt, nec jam clandestina, & nocturna conventicula habere contenti, publicos Conventus egerunt, in quibus novum Evangelium prædicare, Cœnam suam celebrare, & in Ecclesiæ Romanæ Dogmata impunè dabacchari cæperunt, ac tandem Clasticum cautes, bellis civilibus totum Galliarum Regnum aperto Marte infestarunt. Numerosos siquidem exercitus Hæretici Calvinistæ eduxerunt, adjunctis Germanorum Protestantium, seu Hæreticorum Lutherano-

norum auxiliis, & quatuor potissimum generali-
 bus præliis contra Catholicum *Caroli IX.* Gallia-
 rum Regis exercitum magnis animis pugnarunt,
 in quibus tamen Deus victoriam Catholicis in-
 dulsit, nec tamen domiti sunt rebelles. Primum
 Prælium datum est apud *Drocas*, indeque dictum
Drocense, anno MDLXI. & in eo duo primarii
 partium Duces capti sunt. Ex parte quidem Hæ-
 reticorum captus est Princeps *Condaus* à *Francisco*
Guisio Catholicorum Duce. Ex Catholicorum
 verò parte *Annas Mommorantius* captus in Hæreti-
 corum potestatem venit. Alterum Prælium dici-
 tur *Sandionysianum*, quòd propè oppidum *S. Dio-*
nyssi, duabus à Lutetia Parisiorum leucis distans,
 commissum sit anno MDLXVI. in quo *Mommoran-*
tius Dux, & Franciæ Connestabilis, æternâ me-
 moriâ dignus Heros, acceptis sex vulneribus,
 gloriosè pro Religionis, & patriæ defensione oc-
 cubuit. Cæsis tamen Calvinistis, aut in fugam
 actis, victoria penès Catholicos stetit. Tertium
 Prælium ad Jarnacum in Santonibus editum est,
 indeque dictum prælium Jarnacense, in quo Ca-
 tholici, Duce *Henrico* Andegavensium Principe,
 & fratre *Caroli* Galliarum Regis, plenâ victoriâ
 potiti sunt, & Princeps *Condaus*, perduellium
 Calvinistarum Dux, victus mortem oppetiit anno
 MDLXIX. Eodem anno ultimum prælium confertum
 est ad Moncontorium in Pictonibus, Duce eodem
Henrico Andegavensium Principe, in quo Calvinis-
 tæ ad internecionem cæsi, duodeviginti suorum
 millia perdidere, & victus omninò *Colinius Tha-*
lassiarchus, cui Hæretici Calvinistæ, post mortem
 Principis *Condæi*, summam rerum contulerant. Hic

Colinius fratrem habuit *Andelotum*, ejusdem Calvinianæ superstitionis fautorem præcipuum, & Sacerdotum hostem adeò infensum, ut ex eorum auribus torquem collo appensum gestaret, eique ludus esset Sanctorum reliquias flammis addicere, templa inflammare, Ecclesias spoliare, & alia id genus sacrilegia perpetrare. His quatuor præliis victi quidem, ac debellati fuerunt Hæretici Calvinistæ, sed nec ad gremium Catholicæ Ecclesiæ, nec ad obedientiam Galliarum Regis redire voluerunt. Quapropter, ad eos sæpiùs tumultuantes ac nova molientes penitùs exterminandos visum, est extremum quidem, & paulò durius, sed eâ ætate maximè necessarium, adhibendum esse cauterium. Anno igitur MDLXXI. Postquam Parisiis nuptiæ Henrici Regis Navarræ cum *Margarita*, Sorore *Caroli IX.* Galliarum Regis fuissent celebratæ, inchoata est Calvinistarum Cædes, dicta *Matutinæ Parisienses*, quòd summo manè cæpta sit, vel cædes *San-Bartholomæa*, quia contigit die *S. Bartholomæo* Apostolo sacrâ. Primus cæsus est *Colinius Architalassus*, tractus à pueris per plateas, & in Sequanam fluvium projectus. Eandem sortem nacti sunt *Rupifulcadius*, *Lavardinus*, aliique Duces, & Viri fortes, præcipua sectæ Calvinianæ præsidia, necnon innumeri Calvinistæ, qui in ea strage perempti sunt. Nec solùm Parisiis, sed & in cæteris totius Galliarum Urbibus Catholicis in Hæreticos Calvinistas sævitum est, exceptâ tamen Civitate *Lexoviensi* in Normannia, cujus Episcopus *Joannes Hennuyerius*, Ordinis FF. Prædicatorum, & *Henrico II.* olim Galliarum Regi à Confessionibus, ab Urbis Præfeto obtinuit,

tinuit, ut Mandati Regii suspenderetur executio, sicque eximiâ charitate, ac clementiâ Calvinistarum promovit animos, ut quotquot Lexovii degebant, in sinum Ecclesiæ redierint, sicut referunt *Sammarthani* fratres Tomo II. *Galliæ Christianæ*, in Lexovienfibus Episcopis. Eâ strage, *San-Bartholomæa* exacerbati Calvinistæ, nova Bella meditabantur, dum *Henricus* Dux Andegavensium, & *Caroli IX.* Galliarum Regis frater, *Rupellam*, in Santonibus prævalidam Arcem, quæ à Calvinistis occupata fuerat, cum exercitu regio obsedit. Sed cum sub idem tempus *Henricus* Polonorum Principum suffragiis ad illius gentis Regnum expetitus esset, ab Urbe discessit, ejusque obsidionem solvit. Quò factum est, ut Rex *Carolus IX.* cum non posset Hæresis fundamenta destruere, hos funestæ arboris ramos amputare, scelerati illius monstri tot annorum diuturnitate corroborati, tot redivivi cladibus, tot superbi exitiis, tot locis diffusi debilitare vires, volens nolens, pacem injerit cum Calvinistis, Arces, & oppida *Rupellam*, *Montalbanum*, *Nemausum* concesserit, undè postea Calviniana factio potentia Regum insultans, sua jura, terroremque in vicinas latè oras circumferre non destitit. Obiit *Carolus IX.* Galliarum Rex in Pentecostes Festo, qui incidit in diem xxx. mensis Maji anni MDLXXIV. ætatis xxv. Regni xiv. Gesta *Caroli IX.*, & Historiam Bellorum Civilium, quibus, eo Regnante, conflagravit Gallia, accuratè inter alios Scriptores concinnavit *Varillasius* Scriptor elegans, ac sincerus, totique Orbi litterario notissimus.

D. O funestissima tempora! in quibus Gal-

liarum Regnum, olim opibus abundans, ditione augustum, ac pacis munere fortunatum, tum, Calvinianâ Factione tumultus & perpetuas tempestates concitante, in se ipsum conjuratum pugnat, suis consumptum opibus, suis fractum viribus, quod alienis semper fuerat invictum. At, dùm video obfirmatissimos in errore Hæreticorum animos, factiones, audacias, seditiones, bella, & reliqua, quæ novitas omnis parturit, dùm eorum conventus, fœdera, conspirationes, partium studia fervere audio, vehementer timeo, ne sub *Caroli IX.* Galliarum Regis successoribus, gliscente Calvinianâ Hæresi, graviores tumultus ac procellas Gallia passa sit. Error quippè, ut experienciâ notum est, qui statim non opprimitur, sensim sine sensu serpit incrementis propè fallentibus, se longè latèque diffundit, novos ritus, rescissis antiquis, novas cæremonias, novas leges, novam Religionis formam introducit, uno verbo, novum populum facit, qui acerrimis & ardentissimis studiis pro errore certat, & civilibus bellis Regnorum, ac Rerumpublicarum pacem perturbat. Nulla quippè Regni, aut Reipublicæ pax, tranquillitasve speranda est, ubi Religionis divortia vigent. Omnia igitur mala, quæ sub *Caroli IX.* successoribus intulit Galliarum Regno Calviniana Factio, percense, quò plenam Status Ecclesiæ sub Galliarum Regibus decimi sexti Sæculi notitiam adipisci possim.

M. Mortuo *Carolo IX.* Galliarum Rege; *Henricus*, ejus frater, qui jam Poloniæ Rex fuerat inauguratus, statim, relicta Poloniâ, in Gallias ad Regnum capeiendum festinavit, dictusque est

est

est *Henricus III.* Eo regnante fœda fuit Ecclesiæ Gallicanæ facies, & Regum periclitari visum est, teterrimæ factionis, conjurationisque furore laceratum. Beneficia impunè vendebantur, viginti octo Archiepiscopatus, & Episcopatus Præsulibus destituti erant; Cœnobîa innumera sine Abbatibus, sine divino cultu, à prophanis hominibus tenebantur, qui, ut luxui & libidini affatim indulgerent, eorum bona abliguriebant, decoquebant, dilapidabant. Præter hanc infamem corruptelam, *Henricus III.* Francorum Rex necessitate adaçtus belli consopendi, quod *Franciscus Alenconius* Dux, Regis frater, *Henricus Borbonius*, Rex Navarræ, & *Henricus Condaus* Princeps, fœderati cum Calvinistis Galliæ, & Protestantibus Germaniæ, intulerant Franciæ Regno, Edictum promulgavit in favorem seditiosorum & Hæreticorum Calvinistarum, Catholicis odiosum, & Ecclesiæ omninò injurium, in quo Hæreticis in omnibus Galliarum locis permittebantur Conventus, publica eorum Religionis exercitia, facultas celebrandi suæ Sectæ Synodos Nationales seu Provinciales, & ad honores, Magistratus, & publica munia Hæretici admittebantur non secùs ac Catholici; Sacerdotum & Monachorum Apostatarum conjugia jam contracta recipiebantur, & liberi ex iis suscepti censebantur legitimi, octo Urbes in diversis Regni Provinciis securitatis causâ Calvinianis tradebantur, aliaque ejusmodi sexaginta duobus Capitibus comprehensa hæreticis indulgebantur Ecclesiæ Catholicæ valdè perniciofa. Extortum istud ab *Henrico III.* Francorum Rege in gratiam Hæreticorum Edictum in causa fuit,

fuit, cur Principes Catholici Galliarum Regni
 fœdus inter se inierint ad impediendum, ne quis
 Hæreticus Princeps regii sanguinis *Henrico III.* in
 Regnum succederet, neve ullum permetteretur
 Calvinianæ Sectæ exercitium publicum, quod fœ-
 dus juramento sancitum *Ligam* appellarunt. Ad-
 monitus Rex *Henricus III.* conjurationum, quas
 plerique in ipsum moliebantur, ut sibi caveret à
 Parisiensibus, qui *Henricum Guisium*, inter fœde-
 ratos Principes Catholicos præcipuum Ducem,
 impensè colebant, eumque post mortem *Henri-
 ci III.* Regno Galliæ destinabant, milites pro sui
 tutela Parisios advocavit, atque per diversas Ur-
 bis stationes disperfit. Quâ de re commoti Pari-
 sienses, mox eorum commotio in seditionem,
 seditio in apertam defectionem erupit, quam non
 parum auxit *Guisi* Ducis, contra Regis prohibi-
 tionem, Lutetiam adventus, quem exultans po-
 pulus magnis acclamationibus, & festivis gra-
 tulationibus excepit. Rex metu consternatus, ut
 vitæ suæ securitati consuleret, fugam secretò
 arripuit, & Carnutum accessit, cùmque nullam
 rebus suis lucem affulgere videret, indixit an-
 no MDLXXXVIII. Comitia Blesensia, in quibus
 consilium cepit plenum desperationis. Ducem,
 siquidem *Henricum Guisium*, ejusque fratrem Car-
 dinalem *Ludovicum*, privatim ad se quasi ad con-
 sultationem evocatos per suos satellites confodi
 jussit, eâ spe ductus, fore ut, sublati *Guisis*, ab-
 solutiùs regnaret. Sed eum fefellit eventus. Provin-
 ciæ quippè Regni ægrè admodum ferentes mor-
 tem *Guisiorum*, quos, tanquam Fidei Catholicæ
 invictos assertores, venerabantur, rebellionis ve-
 xilla

xilla ubique crexerunt, sibi que *Carolus Meduanus*, occisorum Guisiorum fratrem, summum Belli Ducem præfecerunt. *Sixtus V.* Pontifex Maximus, ob interemptum Cardinalem *Guisum*, in ipsum Regem anathema vibravit. Ad has angustias redactus Rex *Henricus III.* cum Lutetiam oppugnaturus, ad Sancti *Clodoaldi* Municipium stativa posuisset, immani parricidio Kalendis Augusti anni MDLXXXIX. trucidatus est, non à Monacho, sicut multi, mendaci famâ, & falso rumore delusi, perperam scripserunt, sed vel ab Hæretico Calvinista, vel, ut probabilius censent alii, ab uno ex Guisiana confœderatione, quam *Ligam* vocabant, perditionis filio, qui, ut faciliorem aditum ad Regem nancisci posset, sumptâ Religiosâ veste, & sub ea, instar lupi sub pelle ovina, latens, ad Regem admissus, cultrum venenatum in ejus ventrem infixit, ex quo vulnere sequenti die è vita migravit *Henricus III.* Rex sanè meliori sorte dignus, utpotè qui Religionis Catholicæ, Apostolicæ & Romanæ publicam professionem studiumque semper prætulit, ac servavit, seque Hæresis & Hæreticorum hostem ac persecutorem acerrimum præbuit, quamvis, ut jam observavimus, temporum calamitate & rerum necessitate compellus, aliquot Edicta in gratiam Calvinianæ Factionis concesserit, ne Catholica Religio, & Regia autoritas ab illa sacrilega factione in utramque armatâ penitus opprimeretur. Pietatis, quam in animo fovebat, nonnulla identidem indicia dedit *Henricus III.* sive cum Ordinem Sancti Spiritus fundavit, sive cum Pœnitentium sodalitia instituit, iisque

iusque inscribi voluit; si vè cùm ipse, dimissâ Regiâ Majestate, in supplicationibus Pœnitentis habitu processit, contemptui ac ludibrio Politicorum se exponens; si vè denique dum moriturus propediem, sumptis cum magnâ pietatis, contritionis & humilitatis significatione Sacramentis, atque omnibus suis inimicis veniâ concessâ, ex Regno, quod perpetuis calamitatibus fuerat expertus infestum, ad beatius Regnum, ut par est credere, transiit. Ejus morte defecit *Valesiorum* Stirps Regno idonea, Regniq; jus in *Borboniorum* familiam, quæ etiamnùm in Galliis feliciter regnat, devolutum est.

D. Suppetuntne aliqua momenta, quibus evinci possit, eum, qui *Henricum III.* Galliarum Regem trucidavit, non fuisse Monachum, sed Hæreticum Calvinistam, vel potius aliquem ex Guisiana confœderatione, quam *Ligam*, vocitabant, scelestum sicarum, qui, ut facilius regem adiret, & nefandum illud facinus perpetraret, religiosum habitum sumpsit, & Monachi professionem ementitus est.

M. Multa ad id persuadendum suppetunt momenta, quæ latè referuntur tum ab Authore Libri, cui Titulus est: *La Fatalite de Sainct Cloud*, seu *Fatum Sancti Clodoaldi*, Gallico Idiomate anno MDCLXXI I. editi; tum etiam à *Varillasio*, nuperrimo quidem, sed clarissimo Regum Franciæ Historiographo, in *Historia Henrici III.* Galliarum Regis, quorum præcipua duntaxat, brevitatis ergo, hic delibabo. In primis, certissimè constat ex Annualibus & Historiis Gallorum, tantum his ianellis, miserisque temporibus exarsisse in *Henri-*

cum III. Regem factionis conjurationisque Guisiani furorem, ut non semel perduelles fœderati ei mortem inferre tentaverint, & plerique ex illis in sacris Suggestis, in Pœnitentiæ tribunalibus, in Doctorum celeberrimis Collegiis, adversus Regem, ceu Tyrannum, hypocritam, & perfidum publicæ fidei, libertatisque Comitiorum violatorem, concionibus, consiliis, scriptis, responsis, decretis populum animarint, & ad defectionem sollicitaverint, palam asserentes non esse servandam fidem *Henrico* Regi datam, ejus Sacramento populos exsolutos, fas esse contra eum armari plebem, & non ampliùs pro Rege solitas in Sacris Mysteriis preces esse fundendas. Profectò ex illo perduellium fœderatorum furore, facili negotio quisque judicare potest, sceleratum illum sicarium, qui *Henricum III.* trucidavit, ex eorum grege ac societate fuisse. At inquires, sicarius ille Regicida Dominicanam vestem gestabat. Id certè non inficias eo, sed quo pacto id acciderit, disce nunc. *Achilles Harlaus*, supremus Senatus Parisiensis Princeps, qui in Regis *Henrici III.* fide & obsequio constans, è Senatu in carcerem ad Arcem Bastiliæ à factiosis fuerat abreptus, miserat *Jacobum Clementem*, Religiosum Dominicanum Sacerdotem, cum litteris & secretis mandatis maximi momenti, quæ Regi relaturus esset. Hic sub Vesperam ad Sanctum *Clodoaldum*, ubi tunc Rex erat, accessit, & in ædibus *Jacobi Gueslai*, Generalis in Regio Senatu Procuratoris, receptus, nocte sequenti occisus est à perduelli fœderato, qui opportunam occidendi Regem occasionem nactus, habitum Dominicanum induit, & unâ cum litte-

ris *Harlai* perrexit ad Regem, quas cum attentius legeret Rex, ab eo perfido & iniquissimo sicario lethale vulnus in imo ventre accepit. Id autem ne gratis à me dictum putes, audi, si placet, rationes, quæ æquum rerum æstimatorem convincere debent. In primis, testantur omnes ad unum, Historici Galli, sicarium, à quo occisus est Rex *Henricus III.* statim ac Regem percussisset, non solum à *Gueslæo*, Generali in Regio Senatu Parisiensi Procuratore, sed etiam ab Aulicis, qui tunc adstabant, multis vulneribus confossum, & interfectum fuisse. Hæc autem violenta ac repentina mors haud obscure probat, non solum hunc sicarium, sed etiam illos à quibus occisus est, fuisse perduelles fœderatos, & Guisianæ factioni addictissimos, qui malè sibi conscii cum justè pertimerent, ne ille sicarius, si vivus post patratum execrandum illud facinus servatus esset, totum istud mysterium iniquitatis detexisset, & conscios hujus culeo digni sceleris, quos inter ipsimet censebantur, propalaret, ut vitæ suæ & honori confulerent, ei mortem accelerarunt. Alioquin, nemo non videt, hujus sicarii vitam protrahi debuisse, donec interrogatus causam & nefandi illius criminis conscios declarasset. Præterquamquod, post obitum Regis *Henrici III.* jamque occiso ejus sicario, reperta sunt Regis viscera, quæ in loco seorsim fuerant reposita, gladiis transfixa ac dilaniata non ab aliis sanè, quàm à perduellibus fœderatis, qui in Aula erant, quique jampridem Vitæ *Henrici III.* insidias struentes, ejusque mortem machinantes, in ejus viscera, etiam post mortem, summâ immanitate sævierunt. Sed videamus

mus finem hujus Tragædiæ . Corpus hujus sicarii, ut narrant iidem Hiftorici Galli, nudum per fenestram projectum est, ut pateret omnium oculis, & dignosci posset, quis esset ille sicarius . At Perduelles foederati, qui in Aula erant, tot vulneribus corpus ejus consultò confoderant, atque deformaverant, ut à nemine dignosci potuerit . Hoc unum tamen viderunt omnes, nullum Tonsuræ Clericalis, quæ in Viro Religioso major, quàm in aliis Clericis esse solet, in capite illius sicarii Regicidæ apparere vestigium . quod quidem argumento fuit, hunc sicarium non fuisse Religiosum, sed perduellem foederatum, qui, ut mox diximus, *Jacobum Clementem* Dominicanum, missum ab *Achille Harleo*, supremo Senatus Parisiensis Principe, ad Regem, intempestâ nocte dormientem occidit, ejusque religiosam vestem sumpsit, quò facilius sub e mentita illâ veste Regi fucum faceret, eumque sacrilego parricidio necaret . Accedit ad hujus veritatis confirmationem, quòd ille sicarius exhibuit Regi litteras, quas ad ipsum scribebat *Harleus* (quas litteras de industria fictas fuisse dici certè non potest, cum nunquàm *Harleus* adversùs illas reclamaverit, nec à se datas fuisse unquàm negaverit .) Porro abhorret ab omni veri specie, *Harleum*, fidissimum Regis *Henrici III.* Ministrum, committere voluisse perduelli foederato litteras maximi momenti ad Regem perferendas . Vero igitur quàm simillimum est, *Harleum* hujusmodi litteras ad Regem deferendas tradidisse *Jacobo Clementi* Dominicano, quem probè sciebat ergà Regem esse optimè affectum, & capitalem conjurationis Gui-

fianz inimicum , sed hunc Religiosum occisum , esse à scelerato conspirationis Guisianæ fœderato , quì ejus religiosum habitum induit , & litteras ab *Harlao* scriptas detulit ad Regem , quem , dùm illas attentis oculis perlegeret , lethali vulnere fauciauit. Hinc est, quòd post mortem *Henrici III.* perduelles conjurationis Guisianæ fœderati , quamvis de morte Regis ultra modum lætarentur , tripudiarent ac triumpharent , attamen , ne tam flagitiosi , & à Sæculis in Galliis inauditi paricidii authores audirent , sicut reverà erant , rumorem ubique sparserunt , Regem *Henricum III.* à Religioso Dominicano fuisse occisum , idque ut efficacius populo persuaderent , prædictum Dominicanum summis laudibus extulerunt , eumque ut Martyrem non solùm verbis , sed scriptis , & imaginibus prædicarunt . Quæ res gravem in Dominicanos , licèt infontes , tempestatem excitavit , præsertim in *Edmundum Burgonium* , tum temporis Conventus ac Collegii Parisiensis Prædicatorum Priorem , qui tamen , sicut narrant omnes Historici Galli , constantissimè semper negavit , se neque *Henrici III.* cœdis suasorem , neque conscium fuisse , aut de eâ , antequàm patrata fuisset , quidquam scivisse : *quin immò* , teste *Spondano* in *Annalibus Ecclesiæ* ad annum MDLXXXIX. Num. XVII. ait , *eam se ex animo detestari & execrari , qui nihilominus falsis testium accusationibus obrutus , à quatuor equis discerptus fuit , in pia ad Deum oratione Vitam finiens.* Hic rumor de cœde Regis *Henrici III.* à Religioso Dominicano factâ ita increbuit , & prævalente Guisianâ factione , sic populorum animos pervalit , ut deinceps omnes termè Historici Galli

Galli falso illo rumore delusi, vel politicis adducti rationibus, hoc detestabile parricidium Religioso Dominicano perperam & inscite affinxerint. Longè veriùs ac prudentiùs *Petrus Matthæus*, qui *Henrici IV.* Galliarum Regis, successoris *Henrici III.* Historiographus fuit, describendo *Henrici III.* mortem Tomo I. Historiæ Franciæ pag. 772. hæc Habet: *jusque à cette heure on n'a sceu au vray, qui à été le conseil, ni l'auteur de la mort d'Henri III.* Quæ verba sic latine redduntur: *Quis necis Henrici III. verus suator, Authore fuerit, hætenus incompertum omnino est.*

D. Facile his, quas protulisti, hæud levis conjecturis adducor ut credam, cædis *Henrici III.* Galliarum Regis Authorem fuisse non Monachum, sed perduellem Guisianæ conjurationis fœderatum. Sed quisquis ille fuerit, tam grande scelus quo nomine appellem? nescio. Parricidium, an rebellionem, perduellionem, furorem & insaniam nominabo? leve illud est ad tam tetri facinoris atrocitatem exprimendam. An belluinam sub larva vultus humani immanitatem? ne istud quidem sufficit. An florentissimi Galliarum Regni fœdissimam maculam, immò exitium, flammam ac perniciem? Quàm possum atrocia, ac detestanda nomina mente efformavero, vincit omnia horrendi illius Regicidii atrocitas, ac ne cogitatione quidem capi, nedùm oratione satis exprimi, explicarique potest.

M. Rectè quidem ac catholicè sentis, optaremque ipse abominandi illius flagitii horrore percussus, luctuosa illa atque calamitosa tempora altissimo præterire silentio, si liceret. At co-

gunt me Historiæ leges, alterius perindè execrabilis in Successore *Henrici III.* Galliarum Regis memoriam parricidii refricare. *Henrico III.* Galliarum Regi successit *Henricus Borbonius Navarrozorum Rex*, inter Francorum Reges dictus *Henricus IV.* & ob res præclare gestas, Magni cognomen promeritus. In Francorum Regimen assumptus, Sanctissimè juravit, se Fidem Catholicam in toto Regno sartam testam conservaturum, nihilque contra eam unquam moliturum. Sed cum Calvinianam Hæresim, quâ irretitus erat, necdum palàm ejurasset *Henricus IV.* ejus electio non omnibus placuit. Guisianæ Factionis fœderati, qui sibi Ducem elegerant *Carolus Meduanus*; seu *Mayenium*, fratrem *Henrici Guisii*, jussu *Henrici III.* Galliarum Regis interempti, non solum alterum Francorum Regem elegerunt, videlicet *Carolus Cardinalem Borbonium*, Regis *Henrici IV.* patruum, quem *Carolus decimus* nuncuparunt, sed etiam bellum in Regem *Henricum IV.* instaurarunt, quod tamen feliciter confecit Rex, insignem de fœderatis referendo victoriam, quæ *Ivriaca* dicitur, per quam *Egmondanus*, Comes Hispanarum Copiarum ductor, occubuit. At nihiloseciùs, fervente adhuc in Galliis Bello civili, Rex *Henricus IV.* divino tandem lumine illustratus, seriam de ejuranda Hæresi cogitationem suscepit, eamque reverà, postquam accuratè institutus fuisset ab Episcopis, quos consuluit, & inter quos eminebat *Jacobus Davitius Perronius*, Ebroidensis Antistes, publicè ejuravit, & ritu solemnì Catholicam Fidem professus est, atque ab hæresi ac peccatis, præviâ Sacramentali Confessione, absolutus

lulus die xxv. mensis Julii S. *Jacobo* sacrâ anni MDXCIII. Hac editâ Fidei Catholicæ professione, Rex *Henricus IV.* Romam ad *Clementem VIII.* Pontificem Maximum, veniæ impetrandæ causâ Legatum misit Nivernensem Ducem, & interim Regiam sui consecrationem suscepit *Carnuti à Nicolao*, ejusdem Urbis Episcopo. Deindè Lutetiam cum armato milite veniens, eâque potitus, præteritorum omnium gratiam Civibus concessit. Tandem anno MDXCV. *Clemens VIII.* qui hætenus gratiam cunctabundus distulerat, à *Jacobo Perronio* Ebroicensi Episcopo, Regis Oratore, & *Arnaldo Offato* exoratus, Absolutionem Regi *Henrico IV.* concessit iis conditionibus, quas in ejusdem *Perronii*, postea Cardinalis, Relationibus legere est. Tum verò, certatim Proceres ac Civitates ad Regis *Henrici IV.* fidem & obsequium redeuntes, eum Galliarum Regem justis ac festivis gratulationibus proclamaverunt. Galliæ itaque pro suo jure imperans *Henricus Magnus*, Calvinianam quidem Hæresim debilitavit, sed radicatus extirpare haud potuit; immò, Calvinianis ad arma pronis, nec tumultuari desinentibus, coactus est Rex, non aliâ ratione civiles tumultus compescere valens, *Edictum Nannetense*, sic dictum à loco unde prodiit, anno MDXCVIII. concedere, in quo Hæreticis, præter alia privilegia, jus ad honores, dignitates & munera Regni, atque Synodos celebrandi, & Cœtus agendi facultas tribuebantur. Hoc Edictum Nannetense Catholicis perniciosum, & Hæreticis utilissimum, quod ab invito Rege *Henrico Magno* extortum, servatum metu, vim adhuc obtinebat Regnante

in Galliis *Ludovico Magno* hujus nominis XIV. qui istud Edictum Nannetense tandem rescidit ac penitus abolevit, quo uno facto subtulit fibras omnes pestiferi mali, ut renasci deinceps, ac repullulare non possit, sicut fusiùs ostendemus in Colloquio I. in Historiam Sæculi XVII. Eximiis dotibus præditus fuit *Henricus IV.* virtute militari, beneficentiâ in populum, in profligandis vitiis, abusibus, & duellis severâ disciplinâ, sed præsertim admirabili benignitate, quâ Patres Societatis Jesu, qui anno MDXCIV. toto Regno ejecti fuerant, occasione facinoris *Joannis Castelli*, perditissimi adolescentis, qui Regem cultro aggressus fuerat, nec tamen occiderat, ab exilio revocavit, Regno honorificè restituit anno millesimo sexcentesimo quarto, ac nobile Collegium *Flexiæ Andegavorum* iisdem Regali munificentia erexit. Hunc fortissimum, & clementissimum Regem, rebus pace belloque, manu & consilio gestis, verè *magnum*, quem Galli in oculis & delitiis habebant, cumque immortalem cupiebant, inter plausus & magnificentiam coronandæ apud *S. Dionysium*, ut moris est, Reginæ Conjugis suæ *Mariæ Mediceæ*, dum Parisiensem lustrat urbem, impius sicarius *Franciscus Ravallacus*, inculis mensis, bis in corde percussit & nefario parricidio abstulit. Sic lætitiâ, cum maximè gestit, excipit luctus, & summis gaudiis summi fermè dolores intercurrere solent. Contigit *Henrici IV.* Regis optimi interitus die XIV. mensis Maji anni MDCX. ætatis LVII. Regni XXII. Reliquit Regni hæredem ex *Maria Medicea* uxore filium *Ludovicum*, qui post ipsum regnavit, hujus nominis XIII.

Justum cognominatum, cujus præclarè Gesta describemus in Colloquio I. in Historiam Sæculi XVII.

D. Gallia, fortunata Gallia, quæ te, domesticis fluctibus Sæculo XVI. tam atrociter jactatam, manebat sors, qui casus, quæ conversio rerum, nisi qui tibi Regnum finè fine dedit Deus immortalis, idem coortas tempestates illas turbulentissimas in optatam tranquillitatem tandem convertisset, teque ad tot scopulos allisam brevi naufragium facturam, in portu, præter omnium spem, feliciter collocasset? At nunc, quæso te, paulisper expendamus, an Ecclesia, quæ Sæculo XVI. sub Galliarum Regibus tot bellorum, furiis, totque Hæresum procellis agitata fuit, meliorem sortem nata sit sub Regibus, qui eodem Sæculo Angliæ Regno præfuerunt.

M. Multò fœdior fuit Ecclesiæ facies sub Regibus, qui Sæculo XVI. Angliæ Regnum gubernarunt, eoque magis infauusta ejus deploranda sors, quòd necdùm immutata sit Anglia, sed ab Ecclesia Romana diro Schismate etiamnum divulsa maneat, cui antehàc summis obsequiis erat addicta. Huic funesto Anglicano Schismati initium dedit *Henricus VIII.* Angliæ Rex, filius *Henrici VII.* cujus Gesta descripsimus in Colloquio I. in Historiam Sæculi XV. Litterarum cultorem, & fidei Catholicæ strenuum defensorem sub initium Regni sui sese prodidit *Henricus VIII.* nonnulla etiam specimina virtutum præbuit, quas postea nefandi Schismatis, ebrietatis, avaritiæ, crudelitatis, & effrænatissimæ libidinis infamiâ obscuravit. Hæresim, adversus quam signum
ipse-

ipſemet ſuſtulerat , ſcribendo Opusculum contra *Lutherum Hæreſiarcham* , propter quod glorioſum *Defenſoris Fidei* nomen Pontificio *Leonis X.* diplomate promeritus erat , in Regnum ſuum introduxit , Chriſti Eccleſiam probris omnibus affecit , ſe caput Eccleſiæ Anglicanæ conſtituit , & in Romanum Pontificem , cui vehementer iratus erat , vim omnem inauditæ cujuſdam acerbitatis effudit . Cauſam illius iræ , quâ *Henricus VIII.* in Romanum Pontificem flagrabat , breviter hic aperiam , ut intelligas , quò tandem ſapientiſſimos interdum homines nefariæ cupiditatis æſtus abripiat . *Catharina* , Regum Hiſpaniæ *Ferdinandi* , & *Iſabella* , filiæ , necnon Viduæ *Arthuri* , qui erat *Henrici VIII.* frater , quique virginitatis ejus florem nequidem deliſſe dicebatur , *Henricus VIII.* Rex , obtentâ priùs à Romano Pontifice *Julio II.* diſpenſatione , nupſerat die III. menſis Junii anni MDIX. ex qua tres filios , duasque filias ſuſcepit , paucis poſt nativitatem menſibus morte præreptos . Sola *Maria* ex eo connubio procreata utrique parenti ſuperſtes vixit , camque , ut legitimam prolem , & Regni hæredem declaravit & inſtituit ejus pater *Henricus VIII.* Contigit autem , ut poſt annos undeviginti ab iſto inito matrimonio , Rex *Henricus VIII.* naturâ levis , in libidines pronus , & furtivas cum nobilibus puellis voluptates ſæpiùs captans , divortium cum Regina *Catharina* conjuge ſua , quæ omnium Chriſtianarum virtutum cultu eminebat , facere decreverit : maximè ex quo infandis *Anne Bolenæ* flammis ardere cœpit . Viri Aulici , qui temporari ſervire ſolent , & undè ſtatus oſtenditur , illuc vela dare , iſtud præpoſterum *Henrici VIII.* pro-

propositum non improbarunt, sed potius rationum suarum atque propriæ utilitatis, quàm Religionis & justitiæ studiosiores, ut Regi placerent, divortium suaserunt, dictitantes, *Henrici* Regis connubium cum *Catharina* legitimum non esse, quòd *Arthur*i Principis, ejus fratris, vidua esset, nec in eo salvâ conscientiâ ipsum manere posse. Inter illos projectæ adulationis Aulicos, qui se in omnibus ad Regis nutum componebant, nullamque aliam Religionis ac Disciplinæ normam sectabantur, tres præcipui fuerunt, videlicet *Thomas Volsus*, *Thomas Cranmerus*, & *Thomas Cromwellus*, qui, ut Regis libidini indulgerent, ei divortii cum *Catharina* legitimâ conjuge sua consilium aut suggererunt, aut politicis artibus usi illud executioni mandari curarunt. *Thomas Volsus*, Archiepiscopus Eboracensis, Regni Cancellarius, S. R. E. Cardinalis, & Sedis Apostolicæ per totam Angliam Legatus à latere creatus, hoc divortium primus quidem Regi suggessit, sed postea culpam agnoscens, seque rem pœnitendam, commisisse fassus, non solum gratiam amisit ac summam, quâ apud Regem pollebat, auctoritatem, sed etiam omnibus dignitatibus & bonis spoliatus, dum captivus Londinum, tanquam reus læsæ Majestatis, duceretur, in ipso itinere ad Lecestræ oppidum obiit anno MDXXX. *Thomas Cranmerus*, alter hujus divortii suasor, & promotor, quem ob id Rex *Henricus VIII.* ad Archiepiscopatum Cantuariensem nominavit, vir fuit versatilis ingenii ad omnem auram mutabilis, omnis Religionis expertus, barbarum concitator, qui tandem anno MDLIII. vivus exustus est, ut videre est apud
 Illu-

Illustrissimum D. Bossuet Episcopum Meldensem libro VII. *Historiæ Variationum Ecclesiarum Protestantium*, ubi Thomam Cranmerum Archiepiscopum Cantuariensem, quo, tanquam Ecclesiæ suæ reformationis, ut ajunt, Antesignano, Hæretici Angli gloriantur, graphicè ac nativis coloribus depingit. Denique, Thomas Cromvellus, qui in hoc procurando divortio omnem curam operamque adhibuit, homo fuit vaser, ambitiosus, avarus, Lutheranz factioni addictus, totique Ordini Ecclesiastico infestus, quem subindè Rex Henricus VIII. consiliis suis aptissimum Ministrum elegit, & in eum plenâ manu præcipuas Regni dignitates concessit. Hi sunt, qui repudium Reginz Catharinæ approbarunt, & Regi novi ineundi Matrimonii Authores fuerunt. At versâ vice, justissimam Catharinæ Reginz causam, præter doctissimos Angliæ Theologos, benè multi ex omni natione viri eruditissimi acriter tuiti sunt. Carolus quoque Imperator hujus nominis V. ejusdem Catharinæ Reginz, materteræ suæ, legitimum connubium strenuè defendit apud Clementem VII. Pontificem Maximum, cujus ipsamet Regina, suæ dignitatis, jurisque tenax, patrocinium imploraverat. Summus Pontifex, re cum matura deliberatione expensâ, & æquâ lance libratis hinc inde momentis, pro validitate matrimoni stetit invictus, nec adduci unquàm potuit, ut Henrico Regi facultatem alterius contrahendi matrimonii concederet. Hanc repulsam passus Henricus VIII. in Summum Pontificem debacchari cœpit, eoque licèt repugnante, induxit Thomam Cranmerum, alterum in Religione Protheum, quem, ut mox dixi,

dixi , Archiepiscopum Cantuariensem creaverat, ut sententiam ferret ; ac palàm pronuntiaret , necessitatem jure Divino impositam esse regi *Catharinam* Reginam , utpotè fratris sui *Arthuri* uxorem , dimittendi ; subindè concessam novi contrahendi matrimonii libertatem . Eâ iniquâ sententiâ fretus *Henricus VIII.* absque mora *Annam Bolenam* , quam quinque ante menses clam sibi copulaverat , solemni pompâ duxit , eamque Regio diademate ornavit postridiè Kalendas Junii anni MDXXXIII. Sed quanti & Regno & Ecclesiæ constiterit istud inauspicatum *Catharina* Regis repudium , ex his , quæ nunc dicturus sum , facile percipies . Rex *Henricus VIII.* postquàm *Catharinam* legitimam conjugem suam repudiasset , Dei præpotentis scelerum ultoris vindictam expertus , non ampliùs Rex , sed homo planè uxorius , & vile scorti mancipium evasit . *Annam Bolenam* , cui nupsierat , & ex qua filiam , dictam *Elizabetham* , suscepit ; paulò post adulterii & incestus convictam , capite multari jussit , & statim tertiàm duxit uxorem *Jannam Semeiram* , quæ filium peperit *Eduardum* , sed in ipso partu defuncta est . Quare *Henricus* Rex ad quartas protinùs nuptias convolvit , quas inivit cum *Anna* , sorore *Guillelmi* , Clivix & *Julix* Ducis ,cujus conjugis brevi pertæsus , *Thomam Cromvellum* , qui hujusmodi nuptias conciliaverat , mortis supplicio affecit , & *Annam Clivensem* , ut parùm illecebrofam , dimisit , & cū *Catharina Howarda* , Ducis *Notfolciæ* Nepte , quintas nuptias celebravit . At *Catharina Howarda* ob adulterium neci traditâ , *Catharinam Parram* , Baronis *Latimeri* Viduam , sextis nuptiis sibi copulavit salacissimus Rex *Hen-*
ri-

ricus VIII. quem Deus optimus Maximus tradidit in reprobum sensum, &, ob impotentem; quâ flagrabat, libidinem, à scelestis hominibus excarari permisit, maximè à *Thoma Cranmero*, indignissimo illo Cantuariensi Archiepiscopo, qui, conculcatis divinis & humanis legibus, hæc illicitas nuptias conciliavit. Nèc sanè id tibi mirum videri debet, cùm Hæretici illius temporis libidinosi Principibus, qui eorum Sectæ favebant, Polygamiam, seu duas simul uxores habendi facultatem indulgerent, ut constat ex Consultatione *Lutheri*, & aliorum Germaniæ Protestantium, datâ Vitembergæ die Mercurii post festum S. Nicolai anni MDXXXIX. in qua Principi Landgravio potestatem permiserunt novum matrimonium ineundi cum *Margarita Saal*, etiam adhuc vivente legitimâ conjugē suâ. Sic enim ajunt in ea consultatione egregii illi, si superis placet, Ecclesiæ Reformatores, ad hunc Principem scribentes: *Quòd si denique vestra Celsitudo omninò concluscrit, adhuc unam conjugem ducere, judicamus id secretò faciendum, nempe ut tantum vestræ Celsitudini, illi personæ, ac paucis personis fidelibus constet Celsitudinis vestræ animus, & conscientia sub sigillo confessionis Sic & tantum in hoc approbamus: nam quod circa Matrimonium in lege Moysis fuit permissum, Evangelium non revocat, aut vetat, quod externum regimen non immutat, sed affert æternam vitam, & orditur veram obedientiam erga Deum, & conatur corruptam naturam reparare.* Hanc Hæreticorum Consultationem, quæ *Luthero*, aliisque Hæreticis, qui ei subscripserunt, perpetuam inurere debet infamiam, integram refert Illustrissimus Jacobus

cobus Bossuet, Meldensis Episcopus Tom. I. lib. VI. *Historia Variationum Ecclesiarum Protestantium*. Cum igitur *Lutherus*, alique ejusdem furfuris hæretici suæ Sectæ addictis Principibus Polygamiam simultaneam divinâ lege vetitam in Germania, perimiserint, mirum certè tibi videri haud debet, quòd *Thomas Cranmerus*, Cantuariensis Archiepiscopus, intus & in cute hæreticus Lutheranus, legitimas *Henrici VIII.* cum *Catharina* nuptias dissolverit, & aliarum nuptiarum, quas idem Rex contra legem Dei, & cum gravissimo omnium scandalo, ut effrænem libidinem expleret, contraxit, conciliator simul & approbator extiterit.

D. Ex eo divortio Regis *Henrici VIII.* cum *Catharina* legitima uxore sua habuitne originem Schisma Anglicanum, seu fatalis illa Angliæ Regni ab Ecclesia Romana separatio?

M. Prædictum divortium Schismati Anglicano initium dedisse, immò illius unicam causam fuisse certissimè constat. At enim *Clemens Septimus* Pontifex Maximus certior factus de hoc divortio, & de novo matrimonio, quod Rex *Henricus VIII.* injerat cum *Anna Bolena*, peremptoriam tulit sententiam, quâ declaravit, Reginam *Catharinam* ad suum pristinum Regiæ dignitatis statum restitui, *Annam Bolenam* à Regno thoro deiici, ac penitus amoveri debere: & *Henricum* Regem incurrisse in censuras, ac pœnas in eos latus, qui Sedis Apostolicæ mandatis parère detrectant, quarum tamen executionem suspendit, quò Pontificiæ Sententiæ commodius Rex morem gerere posset. At *Henricus VIII.* Pontificiâ illâ sententiâ exacerbatus, edixit, ut *Catharina* non amplius appellaretur Regina,

gina, vel *Henrici* Regis uxor, sed tantum deinceps diceretur *Arthuri* Principis Vidua. Voluit insuper, ut *Maria*, ex *Catharina* filia, quam ipse ante *Wallia* Principem, Regnique hæredem instituerat, haberetur in posterum tanquam spuria, & illegitima proles, quodque luctuosius est, ut Romano Pontifici insultaret, totius Anglicanæ Ecclesiæ Summum, & unicum Caput se dixit, & *Thomam Cromvellum*, cujus superius inveni, Virum licet Laicum, & omnis bonæ eruditionis expertem, suum in causis Ecclesiasticis Vicarium, Generalem constituit, sacras opes Fisco addixit, pretiosissima quæque Ecclesiarum ornamenta rapuit, Monachis, & Monialibus vel redire ad sæculum iussis, vel passim crudeliter contrucidatis, Vitam Monasticam penitus abolevit. Ausus est etiam in Cœlites ferociam exercere, nec *S. Thomæ* Martyri, Archiepiscopo quondam Cantuariensi, pepercit, quem reum Majestatis dixit, sanctorum albo expunxit, corpus ejus comburi, & cineres in ventum spargi iussit. Sævit in *Fischerum* Roffensem Episcopum, *Thomam Morum*, Regni Cancellarium, & alios, quos eo tantum nomine morti addixit, quod monstruosum Ecclesiæ Anglicanæ Primatum, quem sibi arrogabat, agnoscere nollent, de quorum gloriosis agonibus legendus est *Sanderus* Libro 1. de *Schismate Anglicano*.

D. In hoc Schismate, quod adversus Ecclesiam Romanam conflavit *Henricus VIII.* fuitne fides Catholica in iisdem capitibus immutata, in quibus nunc Angli ab Ecclesia Catholica sunt separati?

M. Hen.

M. *Henricus VIII.*, ut suum temerè vsurpatum Ecclesiæ Anglicanæ Primatum exerceret, formam Religionis, ac Divini cultus in Regno Angliæ deinceps tenendam, ac servandam, sex Articulos complectentem, jussit per *Thomam Crommuellum*, suum in causis spiritualibus Vicarium Generalem, annò MDXXXIX. promulgari cum hac Inscriptione: *Articuli per Regiæ Majestatis Serenitatem constituti*. Horum primus, *Transubstantiationem* in Sacramento Eucharistiæ credi jubet. Alter *Communionem sub una specie ad salutem sufficere* declarat. Tertius *Calibatam Sacerdotum retinendam* decernit. Quartus, *vota castitatis, & viduitatis necessariò persolvenda* sancit. Quintus, non modò *Missarum celebrationem juri Divino consentaneam esse, verùm, & Missas privatas celebrari bonum, ac necessarium esse* statuit. Sextus denique Articulus, *Auricularem Confessionem in Ecclesia necessariò conservandam esse præcipit*. Sex illi Articuli, quandiu *Henricus VIII.* in Anglia regnavit, fuerunt ad amissum observati, sed postea ab Anglis, sensim sine sensu in varios errores prorumpentibus, fuerunt penitus aboliti, & in integrum immutata in Angliæ Regno Religionis forma, sicut luculenter ostendit Illustrissimus *Jacobus Bossuet* libro VII. *Historiæ Variationum Ecclesiarum Protestantium*, ex quo faciliè intelligere potes, solenne esse his, qui semel veritatis viam, & Ecclesiæ Romanæ communionem reliquerunt, sibi nunquàm in fide constare, in gravissimos præcipitari errores, nec ullam prorsus habere Religionis formam, in qua tutò pedem figere possint. Quod, proh dolor! nunc experiuntur Angli, qui à tempore schismatis

Henrici VIII. omni vento doctrinę circumferuntur , & magnam videntur assumpsisse Religionem, dum nullam respiciunt falsitatem , omnesque Sectas *Lutheri* , *Calvini* , *Zuinglii* , *Anabaptistarum* , *Fanaticorum &c.* in sua Anglicana Ecclesia admittunt, eis- que pro suo arbitrio adhærent .

D. Resipuitne ante mortem *Henricus VIII.* à funesto illo schismate , quo Anglię Regnum à communione Catholicę , & Romanę Ecclesię separavit ?

M. Frustrà pia Mater Ecclesiā ad Pœnitentiam sapius invitavit *Henricum VIII.* cujus cor obdurefcebat in dies, quique novis sacrilegiis, ac flagitiis facinorum suorum mensuram cumulabat . Dicitur tamen, cum gravi correptum ægritudine, jamque propediem moriturum , statuisse cum Summo Pontifice , & Romana Ecclesia reconciliari , sed Aulicorum turbâ , quos sacris bonis locupletarat, impeditum fuisse . Sic , ut veteri fertur Adagio , *serò sapiunt Phryges* . Sumpsit tamen Rex *Henricus VIII.* Catholico more Sacro-Sanctam Eucharistiam paulò ante mortem ad se delatam , eamque genuflexo , ac prono capite adoravit . Postea Testamentum condidit , in quo statuit , ut *Eduardus* , filius ex *Janna Semeira* novennis, sibi in Regnum succederet, eique adjunxit sexdecim Tutores ac Curatores, omnes ferè Catholicos , ut in fide ac Religione Catholica educaretur , excepto tamen Ecclesię Anglicanę Primatus titulo, quem in ipsum transfudit ; Quod si absque liberis obiret *Eduardus* , voluit ut regnaret *Maria* Princeps ex *Catharina* priori Conjugis filia ; & eâ itidem deficiente, tertia esset in jure suc-

successionis ad Regnum *Elizabetha*, filia ex *Anna Boleña* suscepta. His rebus ita constitutis, Rex *Henricus VIII.* in schismate obfirmatus migravit è vita v. Kalend. Februarii anni MDXLVII. Regni xxxviii. ætatis lvi.

D. *Eduardus* Rex fuitne, juxta supremam patris sui *Henrici VIII.* voluntatem, in fide, ac Religione Catholica educatus, atque eruditus?

M. Inter Tutores Regi *Eduardo* à parente, datos, *Eduardus Semeirus*, Herfordiæ Comes, & paulò post Somerseti Dux, *Janus Semeira*, quondam Reginæ, frater, ac subindè *Eduardi* Regis avunculus, totam ad se rapuit auctoritatem, seque solum Regis Tutorem, ac Regni Protectorem dixit. Curavit autem ut juvenis Rex *Eduardus* Zuinglianæ hæreseos peste inficeretur, & suadente *Cranmero* Archiepiscopo Cantuariensi, qui huic hæresi favebat, accivit in Angliæ Regnum *Petrum Vermilium Martyrem*, *Martinum Bucerum*, *Bernardinum Ochinum*, & alios hæreticos, quos Academicis præfecit, & ad illos audiendos compulit Angliæ juventutem. Tùm *Cranmerus* perfrita fronte sex illos Articulos, quos à Rege *Henrico VIII.* editos suprâ recensuimus, quosque ipsemet, usque ad mortem ejusdem Regis approbaverat, & executioni mandaverat, omninò abrogavit, & abolevit, Theologiam Scholasticam ex Academicis proscripsit, novos administrandorum Sacramentorum ritus constituit, vasa sacra, Cruces, candelabra aurea, argentea Regis Fisco adjudicavit, Sanctorum Imagines disiecit, Missæ Sacrificium sustulit, Communionem Eucharisticam sub utraque specie Laicis dandam esse sanxit, &

vulgaris idiomatis vsum in Sacra introduxit. Huiusmodi sacrilegæ in doctrina Fidei mutationes factæ à *Cranmero*, aliisque mox laudatis hæreticis, approbatæ fuerunt in Comitibus Regni Angliæ Londini anno MDXLVII. & statim missi sunt per totum Regnum Visitatores hæretici, qui omnia Religionis Catholicæ monumenta ac signa tollerent, & Episcopos, qui ab impia illa novitate abhorrent, in carceres conijcerent, dignitate exuerent, & in eorum loca Hæreticos intruderent. Hæc fuit luctuosa Religionis facies sub *Eduardo* Angliæ Rege, qui obiit pridie Nonas Julii anni MDLIII. ætatis XVI. Regni VII. Cognitâ Regis *Eduardi* morte, statim *Maria*, quæ *Henrici VIII.* & *Catharinæ* erat filia, se Reginam dixit, & ut in Angliæ Regno fidem Catholicam restitueret, accivit *Reginaldum Polum* Cardinalem, *Julii III.* Pontificis Maximi à Latere Legatum, qui totum Angliæ Regnum à schismate absolvit, Catholicam Religionem restauravit, Cleri populique mores emendavit, antiqua Instituta, & pias consuetudines postliminiò revocavit, uno verbo, omnes suas curas cò convertit, ut in Angliæ Regno Sedi Apostolicæ reconciliato, & ab Hæresibus repurgato, refloresceret Catholica Religio. *Maria* Regina sapientissimis huius Cardinalis adjuta consiliis, Supremi Ecclesiæ Anglicanæ Capitis appellationem, à Patre suo *Henrico VIII.* impiè usurpatam, & ab *Eduardo*, fratre suo, sacrilegè retentam, abdicavit. Oratores Romam misit, qui ejus nomine obedientiam Summo Pontifici exhiberent. Supra triginta Hæreticorum millia ex Angliæ Regno excedere compulit. Sceleratum *Cranmerum*, Can-

tua-

tuariensem Archiepiscopum, convictum fide cecinisse palinodiam, & multa in Ecclesiam Catholicam sacrilego ore deblaterantem, vivum exuri iussit, atque in ejus locum suffecit *Reginaldum Polum*, hoc honore, propter Regium sanguinem, eruditionem singularem, Legationem Pontificiam, & obitos pro Ecclesia labores, dignissimum. Quæ omnia tam à *Maria* Regina, quam à *Reginaldo Polo* Cardinali prudentissimè constituta, & à *Paulo IV.* Pontifice Maximo confirmata, diuturnam Ecclesiæ Anglicanæ pacem spondere videbantur, quam tamen spem fefellit eventus. *Maria* quippè Regina, quæ, ad facilius ac felicius procurandam in Regno Angliæ Religionis Catholicæ restaurationem, nupserat *Philippo II.* Hispaniarum Regi, *Caroli V.* Imperatoris filio, obiit, nullâ relicta prole, anno MDLVI. ætatis XLIV. Regni v. cujus mortis nuncium cum accepisset *Reginaldus Polus* Cardinalis, qui tum temporis ex quartana febre decumbebat, intra sexdecim horas abiit è vivis, annos natus quinquaginta novem, Vir pietate, doctrinâ, prudentiâ, aliisque præclaris virtutibus nulli secundus. Post mortem *Mariæ* Reginæ, summo omnium Ordinum consensu Regina Angliæ salutata est *Elizabetha* ex illicitis nuptiis *Henrici VIII.* cum *Anna Bolena* procreata. De suâ in Regnum Angliæ inauguratione *Elizabetha* certior fecit *Paulum IV.* Summum Pontificem, per suum Legatum in Aula Romana versantem, eam tamen Pontifex, obstante natalium vitio, ceu Reginam, agnoscere noluit. Hanc repulsam ægerri- mè tulit *Elizabetha*, eâque occasione usa est, ut Hæresim, quam animo fovebat, palam profiteretur,

tur, & in toto Regno stabiliret. Pedetentim tamen in hoc negotio procedere voluit callidissima mulier. In primis, declaravit, sibi non probari quatuor Reformatæ doctrinæ Capita, quæ sub Rege *Eduardo*, fratre suo, condita, & publicata fuerant, quorum primo proscribebantur cæremoniæ, quæ in cultu divino adhiberi solebant, quas tamen ipsa, se approbare significavit. Altero prohibebatur cultus, & usus Christi, & Sanctorum Imaginum, quem tamen ad excitandam pietatem fidelium utilem esse judicavit. Tertio Capite excludebatur vera, ac realis præsentia Corporis, & Sanguinis Christi ab Eucharistiæ Sacramento, quam tamen præsentiam, nec excludi, negarive debere voluit Regina *Elizabetha*. Postremo Capite Regibus Angliæ tribuebatur Supremi Ecclesiæ Anglicanæ Capituli titulus, quem ipsa sibi arrogare non audebat. Verùm, ejusmodi scrupulos, quibus sub initium Regni sui *Elizabetha*angebatur, ad quos sopiendos Hæretici, ut luculentè ostendit Illustrissimus *Jacobus Bossuet* Libro x. *Historiæ Variationum Ecclesiarum Protestantium*, doctrinæ suæ Capita sub *Eduardo* Rege stabilita recudere, refigere, ac reformare debuerunt, hos, inquam, scrupulos paulò post Regina *Elizabetha* omninò dissipavit, & firmato schismate novam Religionis formam instituit. Imagines Sacras à Templis, aliisque locis deturbari jussit. Missæ Sacrificium, & Sacramenta administrandi ritum sustulit, novasque Cæremonias, ac preces linguâ vulgari præscripsit. Supremi Ecclesiæ Anglicanæ Capituli titulum sibi vendicavit, rerum, Causarumque Ecclesiasticarum plenitudinem temerario ausu

ausu assumpsit, cum omni visitatione, correctione ac reformatione Cleri, cum omni auctoritate Episcopos creandi, Synodos convocandi, in iis præsidendi, leges condendi, errores, & Hæreses damnandi, Schismata, & abusus tollendi. Hanc in Religione, & Ecclesiæ regimine factam ab *Elizabetha* immutationem omnes Fidei Catholicæ professores, ac defensores vehementer sunt execrati, in quos ipsa cruentam excitavit persecutionem, præsertim postquam Sanctissimus Pontifex *Pius V.* Constitutione datâ quinto Kalendas Martii anni MDLXX. eam Angliæ Regno privatam declarasset, omnesque, ac singulos ejus subditos à juramento fidelitatis absolvisset. Quam Constitutionem *Gregorius XIII.* & *Sixtus V.* innovarunt, & confirmarunt. His siquidem Romanorum Pontificum Diplomatum exasperata *Elizabetha*, crudelem carnificinam in catholicos exercuit, *Mariam Stuartam*, Reginam Scotiæ, in Fide Catholica constantissimam, ad se confugientem in custodiam dedit, eamque licet innocentissimam, oppressit, & ultimo supplicio affici jussit. Belgas perduelles, & Hæreticos, qui se *Geusios* appellabant, necnon Calvinistas in Galliæ pecuniâ, & milite juvit, ut fœdus contra Catholicos inire, & Hæresim longè latèquè propagare possent. Regnavit *Elizabetha* annis quadraginta quinque, & obiit anno MDCIII. ætatis suæ LXX. Egreis ingenii, & naturæ dotibus prædita fuit *Elizabetha*, quas tamen turpiter fœdavit tum Hæresi, cui se se totam addixit, tum crudelitate, quâ in omnes pios grassata est toto tempore Regni sui, quod Catholicæ Religionis in Angliâ infustum maximè ac perniciosum

fuit. Artem quoque dissimulandi apprimè calluit, quippèquæ plures Principes, ejus nuptias ambientes, pro suarum rerum opportunitate inescavit, ac spe ineundi matrimonii lactavit, sed his omnibus postea vaferrima mulier illudit, nullique nupsit. Sed de Gestis Regine *Elizabethæ* plura leges apud *Camdenum*, qui ejus Vitam descripsit.

D. Quàm tecta sunt consilia Numinis! quàm investigabiles viæ ejus! Fidem Catholicam, quæ, *Maria* regnante, faustis ominibus lucem, in Angliæ Regno adspicere incipiebat, omninò extinxit *Elizabetha*, ad Hæreses, & novitates propensissima, quodque magis dolendum est, patria fides pristinum in gradum necdum in hoc Regno restituta est, & damna, per *Henricum VIII.*, & *Elizabetham* Ecclesiæ optimæ parenti importata, hæcenus resarciri non potuerunt. Sed à tristissima, horum recordatione funestissimorum temporum, quorum partim incendia, partim adhuc fumantes reliquias videmus, animos nostros, si placet, ad lætiora traducamus, & Statum Ecclesiæ sub Regibus Catholicis, qui Sæculo Ecclesiæ decimosexto supremum in Hispania Dominium obtinuerunt, in præsentia perpendamus.

M. Catholici Reges Sæculi decimi sexti, *Carolus V.*, qui etiàm fuit Imperator, & *Philippus II.* ejus filius, immortalī laude jure merito censerī debent, quòd Hispaniam ab Hæresi, quæ alia Regna eodem Sæculo infecerat, puram illibataque servaverint. De *Carolo* Hispaniarum Rege, & Imperatore hujus nominis *Quinto*, sat superque diximus agendo superius de his, qui Sæculo decimo sexto Imperium Occidentis guber-

narunt. Quapropter, nunc hærebimus dumtaxat in *Philippo II.* Imperatoris *Caroli V.* filio, qui in Hispania regnare cepit anno MDLV. postquam ipsius pater *Carolus V.* Hispaniarum Rex se se eo Regno abdicasset, ut privatam vitam duceret. *Mariam*, Angliæ Reginam, quæ Fidem Catholicam, ut mox observavimus, in illud Regnum postliminio revocavit, uxorem duxit *Philippus II.* sed *Maria*, Angliæ Reginâ, absque prole defunctâ, nupsit *Elizabethæ* filiæ *Henrici II.* Galliarum Regis, postquam de eo insignem reportasset victoriam, datâ anno MDLVII. ad *S. Quintini* Fanum pugnâ, in qua per *Emmanuelem Philibertum*, Sabaudix Ducem, maximâ clade affecti sunt Galli. Gravissimum ac diuturnum Bellum gessit Rex Hispaniarum *Philippus II.* in Belgio, cui præfecerat sororem suam *Margaritam*, filiam notham *Caroli V.* Imperatoris, & *Ostavii* Ducis Parmensis conjugem. Hoc Bellum Belgicum excitarunt *Gensii*, quod quidem nomen fœderatis, & perduellibus Calvinistis in Belgio datum est à Domino de *Barlemon*, qui Bruxellæ existens, & videns quadringentos circiter istiusmodi fœderatos Belgas *Margaritæ* Belgii Gubernatrici libellum supplicem exhibentes, ut liberum ab ea obtinerent suæ Calvinianæ Religionis exercitium, Gallicè dixit *Margaritæ* nonnihil eorum adventu exterritæ: *Vous ne devès rien craindre de ces Gueus*; idest, nihil est cur timeas ab illis *Gensiiis*. Sic apud Gallos audiunt, qui, re perditâ, victum ostiatim mendicare solent. Indè huic Belgarum contra Hispanos fœderatorum factioni nomen *Gensiorum* adhæsit; ac ipsimet in tesseram, seu symbolum suæ conspirationis,

tionis, præter vestem mendici, æreum, seu plumbeum numisma, sibi fundi curarunt, cujus in una facie *Philippi II.* Hispaniarum Regis effigies erat expressa, ipsorum manibus in fidem junctis cum hac Epigraphe: *Regi Fideles usquequaque*. Ex altera verò parte mendicantis hominis speciem, bulgasque, vel sacculos à tergo gestantis deformarunt, his adjectis verbis: *Regi Fideles usque ad bulgas*. His simulachris collo appensis, vestibus cinericiis coloris induti procedebant isti *Geusii*, à quibus Catholici Belgæ, ut certo avitæ Religionis symbolo se se discernere possent, æreas, aut argenteas ad collum circumferebant imagines, quæ Christum, & Deiparam repræsentarent, quasque gestantibus Sanctissimus Pontifex *Pius V.* Sacra Apostolicæ indulgentiæ præmia concessit. Quæpiarum Iconum, & Sacrorum numismatum religio ita tùm temporis invaluit, ut ubique gentium Catholici sacris illis muneribus locupletari, & præfidiis muniri ambirent, ac gloriarentur. Interim *Geusii*, seu Hæretici Belgæ fœderati, quatuor à *Margarita* Belgii Gubernatrice Capita minaciter postularunt, primò, ut novos Episcopos in Belgium introductos omninò removeret. Secundò, ut Inquisitionis Officium tolleret. Tertiò, ut in Belgio Concilium Tridentinum non reciperetur. Postremò, ut ipsi Calvinianæ Religionis in Belgio exercendæ libertatem haberent. At cùm *Margarita* Gubernatrix eos ad *Philippum II.* Hispaniarum Regem remisisset, & moras consultò neceretur *Philippus*, tandèm perduelles isti *Geusii* moræ impatientes, clavicum canere, & rebellionis vexillum palàm erigere cæperunt, ubique inclamantes:

Vi-

Vivant Geusii, eoque sublato rebellionis signo, cum Hæreticis Galliarum Calvinistis uniti, iisque crudelitate, & sacrilegiis pares, conciones Calvinistarum ritu celebrarunt, multa Monachorum Cœnobيا diripuerunt, & sacra quæque violarunt. Inter hos turbulentissimos perduellium Hæreticorum motus *Margarita* Belgii Gubernatrix nihil non egit, ut efferatos eorum animos emolliret, tantâque dexteritate, & prudentiæ laude clavum hisce calamitosus temporibus tenuit, ut spes esset, brevi hosce tumultus pacatû iri. Sed *Philippus II.* Hispaniarum Rex, veritus ne his sedandis motibus impar viribus esset *Margarita*, misit in Belgiû cum exercitu *Ferdinandum Toletum*, Ducem Albanum, qui Bruxellas cum appulisset, & summam rerum penès se solum esse veller, ei locum *Margarita* cessit, & in Italiam rediit. Dux *Albanus* asperitate sui regiminis, vulnus, quod jam cicatricem ducere cæperat, exasperavit, duos primariæ nobilitatis Comites *Egmondanum*, & *Hornanum*, necnon alios innocentiae probatæ Proceres capitali supplicio affecit, multorum opes publicavit, tantoque rigore sæviit in Belgas, ut in apertum bellum prosilierint, excusso Hispanorum Imperio, quod immodicis exactionibus, & intempestivis cædibus invisum reddiderat Dux Albanus. Huic incendio oleum infuderunt *Elizabetha* Regina Angliæ, Princeps Arausicanus, & nonnulli alii Principes Calvinianæ Hæreseos fulgine tincti, quorum potentiâ animati *Geusii*, seu Belgæ Hæretici fœderati, Catholicorum templa invaserunt, in res sacras, Sacerdotes, ac Monachos grassati sunt, & omnia Catholicæ Religionis insignia exterminare mo-

moliti sunt. *Requesinus*, qui Duci Albano in administratione Belgii suffectus fuerat, nullâ mansuetudinis specie, nullo veniæ promisso eorum animos lenire potuit, quos tum Hæreseos genius, tum Ducis Albani atrocitas ex desperatione ad rebellionem egerat. Quapropter, armis, sæpiùsque confertis præliis eos domare ac in ordinem redigere tentavit. Sed mortuo *Ludovico Requesino* anno MDLXXVI. *Joannes Austriacus* in Belgium venit à *Philippo II.* Hispaniarum Rege Gubernator hujus Provinciæ missus. Hic anno MDLXXVIII. Geusios, seu Belgii fœderatos, certamine aggressus, in fiduciam, & omen victoriæ præcipuo vexillo suo Crucem appingi jussit cum hoc Emblemate: *In hoc signo vici Turcas, in hoc & vincam Hæreticos.* Nec cum fefellit eventus, eodem siquidem anno insignem de Geusiis reportavit victoriam. Hic est *Joannes Austriacus*, Imperatoris *Caroli V.* filius nothus, qui à Sancto *Pio V.* Pontifice Maximo præfectus classi maritimæ, ex Pontificiis, Hispanis, Venetisque navibus confœderatæ, victoriam illam, cujus superiùs meminimus, post homines natos maximam ad Naupactum, seu Lepantum in sinu Corinthiaco de Turcis retulit die VII. mensis Octobris anni MDLXXI. Obiit *Joannes Austriacus* apud Namurcum Kalendis Octobris MDLXXVIII. ætatis suæ XXXII. Intempestiva ejus mors novas turbas excitavit. *Matthias*, quippè Archidux Austriæ, ex Ordinum sententia Belgii Præfectus renunciatus, summam Principis Arausicani auctoritatem considerans, fœdus cum eo imprudenter pepigit, eumque in Belgii Præfectura Vicarium suum constituit, sub cujus auctoritate crevit au-
da

dacia Geusiorum, quibus etiam suppetias tulere *Franciscus Dux Andegavenfis*, *Henrici Galliarū Regis frater*, & *Joannes Casimirus Palatinus Princeps*. Hanc Geusiorum audaciam, quā omnem Catholicæ Religionis cultum, ubi viribus superiores erant, penitus abolere satagebant, ægerrimè tulerunt Hannoniæ, & Artesiæ Proceres, cūque Catholicæ Fidei, quam pessundari vehementer dolebant, tenacissimi essent, à communi fœdere recesserunt, novumque pro Fidei Catholicæ defensione inierunt, ob idque dicti *Malècontenti*, quòd nec à Rege Hispaniæ, nec à Belgii Ordinibus, qui Hæreticis magisquàm Catholicis apertè favebant, stare vellent, sed pro Catholica Religione, non minùs quàm pro libertate tuenda sanguinem profundere, mortemque oppetere paratos se esse palàm profiterentur. Infinitus profectò essem, si omnia mala, quæ ambæ illæ *Geusiorum*, & *Malècontentorum* factiones, omisâ boni publici curâ, res dumtaxat suas promovere studentes, Belgio post obitum *Joannis Austriaci* intulerunt, hîc recensere vellem. Dicam tantùm obiter, *Alexandrum Farnesium*, Parmensem Principem, qui *Joanni Austriaco* in Belgii administratione successus est, Res Catholicorum in Belgio maximè afflictas haud parùm erexisse. Ille quippè generosus Princeps, singularis fortitudinis, ac virtutis laude nulli secundus, multas civitates occupavit, perduellium exercitum sæpiùs profligavit, totamque belli molem in Belgio magnâ cum sui nominis gloriâ multos annos sustinuit, quod tamen ad optatum exitum perducere haud potuit, quia *Philippus II.* Hispaniarum Rex aliis Bellis se se implicans, dùm alic-

aliena invadere contendit, tanquam canis Æsopius, sua propria amisit. At enim *Philippus II.* fœderatis perduellibus Gallis Henoticæ, seu Guisiani Factionis, adversus *Henricum III.* Regem, Christianissimum, tuendæ specie Religionis, conjunctus, Bellum civile studiis omnibus, viribusque fovit, dumque post mortem *Henrici III.* ejus successor *Henricus IV.* Parisios obsideret, mandavit Rex Hispaniæ *Alexandro Farnesio* Parmensi Principi, ut obsessis Parisiensibus, qui contra Regem fœderati erant, suppetias ferret. Quod ubi ille fecisset, rediit in Belgium exercitu valdè conciso. Hac Expeditione aliam multò infeliciorem anno MDLXXXVIII. suscepit *Philippus II.* Hispaniarum, Rex, ex qua fœderati perduelles Belgæ novas vires, magnosque animos sumpserunt. Ea quippè ingens, ac formidanda Classis centum, & quadraginta navium, quam *Philippus II.* ad invasionem Angliæ, & ut Reginam *Elizabetham* è solio deiceret, & Catholicam Religionem restitueret, magnis sumptibus instruxerat; Hæc, inquam, Hispanica Classis, cui *Invincibilis* ambiciosum nomen inditum est, ab Anglis ex parte dissipata, tempestatibus ac naufragiis quassata, & circum Britannicas Insulas circumflectere coacta, dedecoris, & ignominie plena in Hispaniam rediit, amissis duabus supra trigina navibus, & decem armatorum milibus cum magna parte nobilitatis, adeò ut de hac Hispanica Classe, ad insultandum *Philippi II.* infelicitati, id in ære ab ejus hostibus tam verè, quàm ingeniosè percussum, & inscriptum sit: *Venit, vidit, fugit.* Hujus cladis nuncium æquo animo, ut decebat Principem Catholicum, recepit, *Phi-*

Philippus II. serò tamen intellexit, se, frustrà tentatis Bellis minimè necessariis, præcipuum Bellum Belgicum, in quo propria res agebatur, neglexisse, indèque occasionem dedisse Batavis, quos Hollandos vocamus, & Zelandicarum Insularum incolis, necnon aliis conjuratis Belgii Urbibus, excussio Hispanorum dominio, in Rempubicam, coalescendi, quæ etiamnum, excluso Catholicæ Religionis cultu, fœderatorum Ordinum auctoritate gubernatur. Plura legesis apud *Famianum Stradam* Societatis Jesu, qui Bellum Belgicum latinâ styli majestate singulari libro complectitur, ejusque causas, initia ac progressus nitidè exponit, Urbium ruinas, Provinciarum ærumnas, ac perpetuas tot annorû tempestates accuratè describit, quas sparsa temerè apud Belgas Calvinianæ Sectæ novitas una concitavit. Suum Hispaniarû Regnum ut amplificaret *Philippus II.* Lusitaniæ Regnum hunc in modum occupavit. Occiso *Sebastiano* Lusitaniæ Rege in prælio, quod cum Mauris in Africa anno MDLXXVI. conferuit, Regnum Lusitaniæ jure devolutum est ad *Henricum*, Cardinalem, *Sebastiani* Regis Patrum. Sed *Henrico*, postquàm menses. xvi. regnasset, mortuo anno MDLXXX. multi Principes jus suum ad Lusitaniæ Regnum, cujus incerta erat successio, armis vindicare decreverunt. Inter competitores *Philippus II.* Hispaniarum Rex ad invadendum Lusitaniæ Regnum, potentem exercitum terrâ marique comparavit, cùmque Lusitani ab Hispanica dominatione abhorrentes, *Antonium* Crati Priorem proclamassent Regem, hanc controversiam *Philippus II.* diremit in prælio dato die xxv. mensis Augusti anni

ni MDLXXIX. ad Vicum *Alcantaram*, in quo profligavit *Antonium*, & universam Lusitaniam, Indiam etiam Orientalem, & Africæ Arces Lusitanix Regibus subditas in suam potestatem redegit. Non certò constat, quænam vera fuerit causa, ob quam *Philippus II.* Rex Catholicus, *Carolus* filium suum primogenitum in custodiam tradiderit. Ferunt alii *Carolus* de patris nece cogitasse, de ejus occupando Regno, tentatâ novercæ pudicitia. Alii eum Hæresis insinulatum fuisse ajunt. Ut sit, magnam certè fuisse causam suspicari licet, cum pater tam acerbè in primogenitum suum animadverterit. *Carolus* Principem jussu Patris sui *Philippi II.* veneno in carcere extinctum esse quidam scripserunt, sed vulgò alii volunt, hunc Principem sibi procurasse mortem, partim inedia, partim ingurgitatione ciborum, & crebrâ portione aquæ frigidæ. Obiit tamen Christiano ac pœnitenti animo Ecclesiæ Sacramentis munitus die XXIV. mensis Julii anni MDLXVIII. ætatis suæ XXIV. Non levem controversiam habuit *Philippus II.* Catholicus Rex cum *Henrico II.* Christianissimo Rege, cujus Oratoribus principem locum post Cæsares præripere conatus est; Sed Venetiæ Senatus consulto causâ cecidit anno MDLVI. & Romæ Decreto *Pii IV.* Pontificis Maximi anno MDLXIX. Denique, *Philippus II.* postquam Hispaniæ Regnum per quadraginta tres annos non minus feliciter, quàm sapienter gubernasset, excessit è vivis in Monasterio S. *Laurentii Escurialis*, quod Regio sumptu septem à Madrito leucis distans extruendum curaverat, & in eo sepultus est anno millesimo quingentesimo nonagesimo octavo.

vo. Hæredem omnium Regnorum, & Ditionum reliquit *Philippum* ejus nominis III. natum annos xx. cujus res præclarè gestas referemus in Colloquio I. in Historiam sæculi decimi septimi.

D. Quod mox narrasti de obitu *Sebastiani* Lusitanæ Regis in prælio à Mauris occisi, cujus Regnum occupavit *Philippus II.* Hispaniarum Rex, non videtur mihi omninò certum. Audiui quippè à quibusdam Lusitanis, *Sebastianum* Regem in eo prælio non fuisse cæsum, sed ex eo salvum, & incolumem evasisse, indeque in Italiam venisse, ubi à multis pro vero *Sebastiano* Lusitanæ Rege agnitus, & habitus est.

M. In dubium revocari haud potest, *Sebastianum*, magnanimum Lusitanæ Regem, annos natum xxiv. & aliquot menses, in prælio à Mauris captum, & occisum fuisse, cum illius cadaver secundo post illud prælium die inter mortuos, septem vulneribus confossum, à *Sebastiano Resendio* ejus Domestico inventum fuerit, à multis Proceribus, & Nobilibus Lusitanis, & à *Vincentio Fonseca* Ordinis FF. Prædicatorum, qui Regi à Confessionibus fuerat, deinde Archiepiscopo Goënsi, visum & agnitum sit. Quò fit, ut explodi meritò debeat anilis illa fabula, quam tibi illi Lusitanæ venditarunt, cuique occasionem dederunt duo Impostores, qui *Sebastiani* Regis, quasi è pugna elapsi, personam posthàc mentiti sunt. Primus impostor, qui *Sebastianum* Lusitanæ Regem, divinâ providentiâ ad salutem subditorum à Mauro-rum manu conservatum se dixit, prodiit anno MDLXXXV. ut videre est apud *Spondanum* in Annalibus Ecclesiæ, sibi que septingentos circiter ar-

matos Lusitanos, qui Castellæ jugum impatientissimè ferebant, adscivit. Sed à Cardinali Austriaco Prorege captus mimicus ille Rex, & Ulyssipone tormentis subjectus, imposturamque falsus, in furcam actus dignam imposturâ suâ mercedem tulit. Alterius Impostoris, qui se *Sebastianum* Lusitanæ Regem mentitus est, meminit idem *Spondanus* ad annum MDC. Num. XXVII. ubi ait, hunc Impostorem accessisse Venetias ad finem anni MDXCVIII. qui ætate, staturâ, effigie, sermone, & corporis lineamentis vero *Sebastiano* similimus erat, quique dicta, facta, gesta privata & publica veri *Sebastiani*, variasque negotiationes, cum pluribus, ipsisque etiam Venetis, habitas, quæ vix ab aliquo supposititio sciri possent, ita accuratè referebat, ut quidam Lusitani, qui tunc Venetiis erant, ac *Sebastianum* Regem de facie novisse dicebant, jurarent, ipsissimum esse *Sebastianum* ipsorum Regem. A Senatu Veneto, cujus jussu in carcerem detrusus fuerat ille impostor, interrogatus quis esset? absque ulla hæsitazione se *Sebastianum* Lusitanæ Regem esse affirmavit, prælio Africano captum, miraculo è servitute creptum, fuisse, ac pudore illius expeditionis adeò levitèr à se susceptæ, & infelicitèr confectæ, reditum in Regnum vitasse, complures annos ignotum victitasse, varias Africæ, atque Asiæ regiones peragrassè, indè, vivido juventæ flore amisso, magnis incommodis ærumnisque confectum adustam faciem induisse, atque in Europam redire, Principibusque sese patefacere, & Lusitanæ Regnum à *Philippo II.* Hispaniarum Rege, qui illud occupaverat, repetere decrevisse. De quibus cùm Senatus, ob mul-

multas probabiles rei conjecturas, ambiguus hæreret, hominem dimisit, qui dum pergit in Lusitaniam, ubi jam non parva erat populorum commotio, in Etruria à Duce *Ferdinando* captus, Hispanis traditus est, & Neapolim perductus, ubi post diversas multi temporis interrogationes, militari judicio tanquam impostor per vicos asello impositus, ignominiosè traductus est, indèque post in Hispaniam delatus, & in arce conclusus, sive acceleratâ, sive naturali morte, tragædijs ex eâ causâ quotidie exorientibus finem imposuit. Vndè facile intelligere potes, duos illos impostores, qui se *Sebastianum* Lusitaniz Regem finxerunt, occasionem dedisse huic fabulæ, quam de *Sebastiano* Rege è pugna elapso tibi narrarunt quidam plus æquò creduli Lusitani.

D. Ea, quæ de Statu Ecclesiæ sub Principibus Christianis Sæculi decimi sexti hætenus dixisti, dum mecum tacitus perpendo, ubique funesta bella video, clades, Hæreses, Schismata, & lugubrem in Germania, Gallia & Anglia faciem Ecclesiæ cerno. Hoc unum tamen me solatur, quòd, sicut nuperrimè legebam, vera fides in quibusdam Europæ partibus, sic Deo propter Christianorum crimina permittente, deficiens, in alias Orbis regiones, notitiæ hominum impervias, eodem Sæculo decimo sexto migraverit, in quibus sibi novum acquisivit populum, qui eam pronis animis excepit, eique de Idololatria triumphanti augustissima trophæa erexit.

M. Ita est. Vera Fides, quæ ex aliquot Europæ partibus à Turcis expulsa, ab Hæreticis Lutheranis, & Calvinistis Sæculo Ecclesiæ decimo

sexto fuit oppugnata, sua ubique lucra fecit, & ad fidelium solamen, suique tutamen in varias Orbis regiones suas propagines extendit. In primis, anno MDXX. regnante in Hispania *Carolo V.* novum Imperium Mexicanum primus per navigationem detexit, & Hispaniarum Regi acquisivit *Ferdinandus Cortesius*, ex Hispania Bætica nobili genere ortus, quod nunc *Nova Hispania* dicitur. Ad illas latissimas Mexicanas oras missis Hispanorum Coloniis, & Verbi Dei præconibus, ex infidelitatis tenebris emerferunt barbari divinâ fide illustrati, suisque rejectis superstitionibus, Catholicam Religionem susceperunt. Non multò post *Franciscus Pizzarrus* Hispanus *Peruanam* Provinciam, venis auri & argenti ditissimam, invenit anno MDXXV. quam intra annos octo hispanico adjunxit imperio, eamque totam ad Christi fidem conversam læta aspexit Ecclesia. A *Paulo III.* Pontifice Maximo obtinuit *Carolus V.* Hispaniarum, Rex, ut Novi Orbis & Indiaram Occidentalium Ecclesiæ, à Provincia Metropolitanæ Ecclesiæ Hispanensis, cui suberant, disjungerentur, Hispanensi Archiepiscopo consentiente, Urbesque illarum regionum amplissimæ, *Mexica*, *S. Dominici*, & *Regum*, in Metropoles erigerentur, suis cuique Episcopatibus suffraganeis attributis, quod factum est anno MDXLVII. Hic autem sine encomio prætermittere hæud possum rem præclarè gestam à *Carolo V.* Hispaniarum Rege, qui à *Bartholomæo de las Casas*, Episcopo Regiæ Civitatis *Chiapæ* in nova Hispania ex Ordine Prædicatorum assumpto, admonitus de sævitia, quam Hispani in illius novi Orbis incolas exercebant; protinùs in *Peruanam*

Pro-

Provinciam misit *Petrum Gascam*, Præsidem, Virum integerrimum, ut asperiores Hispanorum agendi modum temperaret, Duces, qui tyrannicè regebant, extremo afficeret supplicio, ac æquissimis promulgatis legibus, Indorum tranquillitati & levamento consulere, ut refert *Ulloa* in *Vita Caroli V.* Vetuit etiam Sanctissimus Pontifex *Pius V.* ne Hispani injustè exagitarent Indos, quos non armis ad fidem compellendos, sed cum omni benignitate & charitate, Verbi divini prædicatione, sacrâ doctrinâ & sanctis exemplis ex infidelitatis tenebris educendos judicavit, præsertim cum novi illius Orbis homines optimis moribus præditi essent, & maximè dociles ad Christianam Religionem legemque suscipiendam. Sanè, ut obiter dicam, Christus Dominus non machinis bellicis subegit Regna mundi, non opibus, non honoribus, non voluptatum illecebris. Nihil ex humanis præfidiis huic negotio voluit admisceri, quod totum Cælo deberi voluit. Accommodavit sese his, quos ad se trahere studebat. Ut homines servaret, homo factus est, ut peccatores sanaret, cum peccatoribus familiariter versatus est, ut Judæos alliceret, circumcissus est. Vicit mansuetudine, vicit beneficentiâ, vicit veritate. His præfidiis Christus, & post ipsam Apostoli, Judaicæ gentis expugnaverunt pervicaciam, Græciæ, Philosophiâ tumentis, vicerunt supercilium, his armis tot Barbararum nationum invictam feritatem subegerunt: atque totius Orbis Tyrannos ac Satrapas fidei jugo subdiderunt. Quis autem non videat, quibus rebus Christiana Religio nata, aucta, ac constabilita est, iisdem etiamnum prædicandam

& annuntiandam Gentibus , ut Fidei lumine colu-
 lustratæ verum Deum agnoscant . Sed alia , si pla-
 cet , proferamus incrementa , quæ Sæculo deci-
 mo sexto Fides Catholica apud ignotas & Barba-
 ras Gentes suscepit . *Emmanuel* , Lusitaniæ Rex,
 sub initium Sæculi decimi sexti , missis cum vali-
 dioribus Classibus *Alphonso Albuquerque* , & *Francisco Almeida* , quos Indiarum Proreges dixit,
Malacam , *Molucas* , *Brasiliam* , aliasque Insulas
 antehac incognitas , auro , argento , margaritis ,
 aromatibus , aliisque rebus opulentissimas , Regno
 suo adjecit , & ad illas destinavit viros doctrinâ
 & pietate præstantes , qui zelo salutis animarum
 accensi innumeram ex illa gente multitudinem ad
 Catholicam Fidem convertam sacro Lavacro tin-
 xerunt . *Joannes* , hujus nominis III. Lusitaniæ
 Rex , *Emmanuelis* Regis filius , non minùs Chri-
 stianæ Religionis in Indiis Orientalibus propa-
 gandæ , quàm amplificandi Regni sui studiosus ,
 Viros Apostolico spiritu repletos *Simonem Rode-
 ricum* Lusitanum , & *Franciscum Xaverium* Navar-
 rum , à *S. Ignatio de Loyola* , Societatis Jesu Instituto-
 re , impetravit , qui Evangelium Indis Orientalibus
 prædicarent . Sed solus *Franciscus* , quem unum
 hujus Apostolatus gloriâ manebat , in Indiam cum
Martino Alphonso Souza , Indiarum Prorege desi-
 gnato , anno MDXL. navigavit , accepto à Rege Di-
 plomate Pontificio , quo eum Nuncium Apostoli-
 cum in universis , quæ latè patent , Indiarum
 regionibus amplissimâ cum potestate creandum
 curaverat . Eâ sibi demandatâ provinciâ *Franciscus*
Xaverius , Vir Sanctitate vitæ & miraculis stupen-
 dus , præclarè functus est . Plurimas Indiarum
 Oricq;

Orientalium Gentes ad Fidem Christi convertit. Dein, in vastissimum *Japoniorum* penetrans Imperium, innumeros ex Idololatria ad Christi cultum traduxit, nec his laboribus Apostolicis contentus, quasi totus Orbis zelo, quo succensus erat, promovendæ salutis animarum, esset angustior, per amplissimam Sinarum regionem propagandî Evangelii cupidus, vicinam Insulam Sancianum adiit, in qua dum opportunam Sinas ingrediendi occasionem præstolaretur, gravi correptus morbo, solus & omni humano solatio destitutus, divino æstuans amore ad Cœleste Regnum migravit.

IV. Nonas Decembris anni Christi MDLII. peregrinationis suæ Indicæ undecimo. Præter illas regiones, quas Christiani per navigationem sæculo decimo sexto detexerunt, & Fide Catholicâ illustrarunt, Britones, & Normanni jam ab an. MDIV. dum vacarent piscationi Asellorum Marinorum, Gallicè *des Morues*, invenerunt promontorium & Insulam Britonum, Gallicè *L'isle du Cap Breton*; & anno millesimo quingentesimo vigesimo quarto quidam *Joannes Verrazzanus* Florentinus, auspiciis *Francisci I.* Galliarum Regis, detexit versùs septentrionem in Orbe novo supra *Floridam*, regionem habitatam hominibus barbaris & incultis, quæ *Canadensis* dicitur à fluvio magno, *Canada* nuncupato, qui eam alluit, nunc verò *Nova Francia* vulgò appellatur. In hanc regionem *Canadensem* sæpiùs missæ sunt ex Francia Coloniae barbaris & incultis illis populis perutiles ad erudiendos illos, & imbuendos Christianâ Religione & civilibus artibus. Respexit Deus benigno vultu *Canadenses* populos, & aspirans votis, periculis &

laboribus Gallorum, qui eò se conferebant, Gentem illam per inextricabiles tenebras oberrantem illuminavit, atque ad veram Religionem perduxit. Eâ regione Canadensium etiamnum potiuntur Galli, qui locis opportunioribus munitiones struxerunt ad arcendos finitimos barbaros, à quibus Canadenses assiduis incursionibus infestabantur & capti devorabantur. Ex tot populis & novi Orbis regionibus, quibus Sæculo decimo sexto Lux Evangelii affulsit, facile nunc intelligere potes, veram, seu Romanam Ecclesiam ab Hæreticis Lutheranis & Calvinistis, ita permittente Deo, fuisse eodem Sæculo exagitata, & ex aliquot Europæ locis expulsam, ut inde florentior evaderet, & ad ignotas novi Orbis gentes suas propaggines protenderet, juxta illud *Isaia* Cap. lv. v. 5. *Ecce gentem, quam nesciebas, vocabis: & Gentes, quæ te non cognoverunt, ad te current propter Dominum Deum tuum, quia glorificavit te.* Sic semina messium gelu congelata, & mortua germinant: sic ignis flatu premitur, ut crescat: sic unguenta commota, redolent: sic aromata fragantiam suam, cum incenduntur, latius expandunt: sic vinea putata uberior redditur & fecundior: sic Arca Noemi ab undis sepelienda diluvii, ab iisdem altius ferebatur, ejusque concussio, ipsius erat erectio: sic Luna videtur deficere, & non deficit, & obumbrata non obscuratur. Ita planè Ecclesia Romana multis Sæculo decimo sexto filiorum suorum claudibus, damnis ac ruinis ab Hæreticis Lutheranis & Calvinistis devicta videbatur, cum tamen per filiorum mortem vivida, per dispendia dives, per ruinas gloriosa effecta sit, quia, ut appositè ait S. *Hilarius*

larius Lib. vi. De Trinitate: proprium est Ecclesie, ut tunc vincat, cum caditur; tunc intelligat, cum arguitur; tunc obtineat, cum deseritur. Ecclesia, quippè similis Christo sponso suo, nonnisi per tribulationes & persecutiones triumphat, Christus autem, ut inquit Sanctus Paulinus Epistolâ trigessimâ primâ, vicit, cum judicatus est; cedendo superavit, & cadendo in mortem, resurrexit in gloriam.

D. Dùm Christianos in Regno Angliæ & in aliquot aliis Europæ partibus à vera Ecclesiæ Catholicæ Fide Sæculo decimo sexto defecisse audio, & versâ vice tor barbaros novi Orbis populos ad veram Christi Fidem lætos festinare video, facile mihi persuadeo, impletum tùm temporis esse illud Christi Domini Oraculum, Capite octavo, Vers. xi. & xii. *Matthæi* dicentis: *Dico autem vobis, quòd multi ab Oriente, & Occidente venient, & recumbent cum Abraham, Isaac, & Jacob in Regno Cælorum: filii autem regni ejicientur in tenebras exteriores.* Vel, ut ait idem Salvator Cap. xxi. *Matthæi* Vers. 41. & 43. *Malos malè perdet, & vineam suam locabit aliis agricolis, qui reddant ei fructum temporibus suis. Idèd dico vobis, quia auferetur à vobis Regnum Dei, & dabitur genti facienti fructus ejus.* Quibus verbis admonemur, ut oblatam & præsentem nobis Dei gratiam non negligamus, non spernamus, sed Regno Dei nos spontè subdamus, & expectatos à Vinca ipsius fructus illi reddamus. Alioquin, quod Christianis non solum per Africam, Asiam, & Græciam, sed etiam in Angliæ Regno & in aliquot Europæ partibus evenisse jam dolemus, idem & nobis ne usu veniat veremur.

verendum est, videlicet, ne, verâ Christi Fide sensim sine sensu apud nos tepescente, auferatur à nobis Regnum Dei, & detur novi Orbis genti facienti fructus ejus Regni. Sed hîc primo Colloquio nostro, quod ad solitam horam protraximus, finem imponamus, alterum crastinâ luce habituri de Episcopis, qui Sæculo decimo sexto præcipuas Ecclesiæ Sedes, Romanam, Constantinopolitanam, Alexandrinam, Antiochenam, & Hierosolymitanam tenuerunt.

M. Catalogum, seu accuratam seriem ac successionem Episcoporum, qui Sæculo decimo sexto Romanam Ecclesiam summâ cum laude, rexerunt, describam quidê in proximo Colloquio: at consultò prætermittam successiones Episcoporum, qui eodem Sæculo Ecclesias Orientis Constantinopolitanam, Alexandrinam, Antiochenam, & Hierosolymitanam occuparunt, quia successiones Episcoporum, qui his Orientalibus Ecclesiis præfuerunt, præsertim postquàm ab Ecclesia Romana funesto Schismate fuerunt divisæ, & sub Barbarorum jugo oppressæ, nec certò nosci, nec accuratè texi possunt. Ecquis, amabo, ejusmodi Episcoporum successiones certò callere, & in Ordinem distribuere possit post tot illas calamitates quibus Oriens afflîctus fuit? post vastatas amplissimas, populosissimasque & amænissimas Provincias, æquatas solo urbes innumeras, quibus ille tractus scatebat, ipsasque primarias olim præstantissimas? Quomodò etiam Episcoporum Orientis seriem scire ac describere possemus nos, qui tam longo intervallo ab illis terris sumus divisi? Præterquàmquòd, Ecclesiarum Orientalium

Epi-

Episcopi cum sint Schismatici, & doctrinâ non valdè celebres, eorum successiones, seu nuda nomina ipsorum exhibere supervacaneum omninò esset, tibi que Historiæ Ecclesiasticæ studio parùm utile, ac fructuosum. His itaque Episcoporum Ecclesiarum Orientalium successiónibus referendis in integrum supersedebo, maximè cum sciam, doctissimum Patrem *Michaelem Le Quien* Ordinis Fratrum Prædicatorum, & in linguis Orientalibus versatissimum, propedièm Parisiis in lucem editurum Opus duobus Tomis in Folio comprehensum, cui Titulus: *Oriens Christianus*, in quo Patriarcharum Sedium Constantinopolitanæ, Alexandrinæ, Antiochenæ, Hierosolymitanæ, & aliarum præcipuarum Orientis Ecclesiarum successiones Episcoporum, ex Historiis Ecclesiasticis, ex probatis Authoribus, & ex indubitata fidei monumentis describer, & in præclaro ordine collocabit.

COLLOQUIUM SECUNDUM,

*De Serie , Vita & Gestis Romanorum
Pontificum , qui Sæculo decimo
sexto universam Ecclesiam
rexerunt .*

DISCI-
PULUS .

CUM à Sede Romana Ecclesiasticæ res auctoritatem, motum & robur sumere consueverint, & ab Historia Romanorum Pontificum, velut à fundamento, complura, ne dicam omnia, Historiæ Ecclesiasticæ capita ita pendeant, ut absque illius notitia, eorum rudis & imperfecta tantum cognitio haberi possit; necesse est, ut in isto Colloquio accuratè referas Gesta Romanorum Pontificum, qui Sæculo decimo sexto universæ Ecclesiæ præfuerunt.

M. Illustriora dumtaxat Gesta Summorum Pontificum, qui Sæcul. decimo sexto Sedem Romanam tenuerunt, summatim hic attingam, tum quia omnia repræsentare immensæ foret operæ, &, ut trito fertur adagio: *Leo magnanimus ex unguibus agnoscitur*; tum quia in vasto adeò mari non licuit mihi, brevitati consulenti, eorum, qui Pontificiam concinnarunt Historiam, expiscari omnia, eaque singillatim referre ex animi sententia. Incipiam autem à Pio hujus nominis III. qui ante Pontificatum dicebatur *Franciscus Tudeschinus*, & Picolomineo nomine ac stemmate à Pio II. Pon-

Pontifice Maximo, cujus erat ex sorore nepos, donatus fuerat, atque ab eodem Pontifice Senensis Archiepiscopus & Cardinalis creatus anno ætatis suæ circiter vigesimo. In Cathedra S. Petri collocatus post *Alexandri VI.* obitum, qui accidit xv. Kalendas Septembris anni MDIII. nihil tam curæ ac cordi habuit *Pius III.* quam ut collapsam Ecclesiæ Disciplinam restauraret, eamque, eliminatis corruptelis, & omni pietatis ac virtutum genere inducto, sanctissimis Legibus augetet ac confirmaret. Hoc Sanctissimum propositum ut felicius executioni mandare posset vigilantissimus ille Pontifex, Concilium Æcumenicum, quod in Conclavi unanimi Cardinalium consensu intra biennium celebrandum fuerat decretum, se absque ullâ cunctatione congregaturum significavit in solemni Consistorio ante Coronationem suam habito, dicens, se nolle expectare biennium, sed rumpere continuò moras ad Concilii Generalis pro reformatione morum celebrationem. Verùm, dùm hæc ad Reipublicæ Christianæ salutem, suique nominis gloriam immortalem quàmprimùm perficere sedulò cogitaret pius ille Pontifex, in procinctu ingentium rerum, quibus magnam sui expectationem excitaverat, præmaturâ morte raptus est, tanque gravis jactura acerbo dolore perculit omnes fideles, qui ei longiorem Pontificatum apprecabantur, absolvendis, quas faustè feliciterque inchoaverat, rebus, maximum Catholicæ Ecclesiæ splendorem conciliaturis. Diem Pontificatus dumtaxat vigesimum septimum numeravit *Pius III.* Electus quippè fuerat Pontifex Maximus decimo Kalendas Octobris an, MDIII. & migravit
c vi-

è vita decimo quinto Kalendas mensis Novembris
eiusdem anni , natus annos sexaginta quatuor,
menses quinque . Ejus Corpus in Basilica S. Petri
in sacello S. *Andreae* Apostolo sacro propè Avun-
culum , seu *Pium II.* marmoreo eleganti sepul-
chro conditum est , hac nobili additâ inscriptio-
ne , quâ res præcipuæ ab eo gestæ breviter con-
tinentur :

Pius III. Pont. Max.

A Pio II. Avunculo Duos & xx. Annos Natus
In Cardinalium Collegium accitus

Urbis Ac Piceni Legatione integerrimè functus

A Paulo II. Ad Federicum III. Missus Ut Germanorum
Arma In Turcas Concitaret

Conventum Frequentissimum Pontificis Morte
Dissolutum habuit

Sub Innocentio VIII. Umbros Dissidentes Pacavit
Carolo Gallorum Rege In Italiam Irrumpente

Ab Alexandro VI. Serò Admodum Obviam Missus
Eo Mortuo

Duo De Quâdraginta Patrum Suffragiis
Pontifex Creatus

Dum De Restituenda In Pristinam Majestatem
Christiana Republica Ac Urbe Agit

Viginti Sex Die Ex Tanta Expectatione Rerum
Publico Omnium Luctu Decessit

Eloquio Prudentia Religione Innocentia
Et Gravitate Domi Forisque

Insignis In Dicendis In Senatu Sententiis Liber
Et gravissimus

Vixit Annos LXIV. Menses v. Dies x.

Obiit Anno Salutis Christi MDIII. XV. Kalèd. Novembris
Jacobus Et Andreas Fratri Sanctissimo Posuere

E Ba-

E Basilica S. Petri Corpus Pii III. postea sub Pontificatu Pauli V. translatum est à Cardinali Petro Montaltio ad Ecclesiam S. Andreae supra Pompejani theatri ruinas à se extructam, ubi nobilibus Epitaphiis fuit decoratum, quæ legi possunt apud Ciaconium in Vita Pii III. Pontificis Maximi.

Post obitum Pii III. Pontifex Romanus electus est Julianus Ruverus, Nepos Sixti IV. Cardinalis, & Episcopus Ostiensis, cui S. Franciscus de Paula, Ordinis Minimorum Fundator, Pontificatum prædixerat. Ad Pontificale Solium sublimatus Julianus Ruverus, voluit appellari Julius II. illudque signum, sive Symbolum sibi assumpsit: Dominus mihi adjutor, non timebo quid faciat mihi homo. Ecclesiæ utilissimas Constitutiones edidit Julius II. Pontifex Maximus. In primis, statuit, ut si in electione Romani Pontificis crimen Simonie vel ab Electo, vel ab Electoribus committatur, electio nulla ac irrita habeatur. Detestabilem Duellorum usum fabricante Diabolo introductum, ut cruentâ corporum morte animarum, etiam perniciem lucretur; in tota Ditione Ecclesiastica prohibuit sub pœna Excommunicationis latæ sententiæ, corporaque in Duello morientium Christianâ Sepulturâ privari jussit, & sub eadem Excommunicationis, & Interdicti Ecclesiastici pœnâ Ducibus, Comitibus, Marchionibus, Baronibus, & aliis temporalibus Dominis Locorum, & Terrarum Ecclesiæ Romanæ Dominio immediatè vel mediatè subiectarum districtè inhibuit, ne deinceps aliquibus, cujuscumque dignitatis, & nobilitatis essent, locum, seu campum
liber-

liberum ad Monomachiam, seu ad duellum concederent. Ordini Minimorum favit *Julius II.* & cum ipsis Mendicantium Privilegia communicavit. Monachis etiam Congregationum Montis Oliveti, & Vallis Umbrosæ Ordinis S. *Benedicti*, necnon Eremitis S. *Augustini* amplissima indulgit Beneficia. Ad recuperandas Ditiones Romanæ Ecclesiæ præreptas suos omnes conatus, & consilia contulit idem Summus Pontifex, cui à natura inerat mira quædam excelsitas animi, labores quosvis periculaque despicientis, & ad difficiliora quæque aggredienda negotia comparati. Hæc eximia animi excelsitas in eo Pontifice præsertim enituit, quando turbulentissimas tempestates, quas malignitas quædam horum temporum excitaverat, fortitudine suâ, virtute, constantiâ vel fregit, vel superavit, & potentissimorum hostium Bellis jactatam Italiam strenuè defendit, ablatas ab invasoribus Ditiones Ecclesiæ Romanæ Dominio Sedis Apostolicæ asseruit, hostesque virtutis suæ terrore complevit. Desiderio, itaque bona Ecclesiæ Romanæ recuperandi incensus *Julius* Pontifex Maximus, Primum, ut Venetos, qui nonnulla Ecclesiæ oppida sub *Alexandro VI.* occupaverant, eaque restituere detrectabant, in ordinem facilius redigeret, fœdus inivit cum *Ludovico XII.* Galliarum Rege, quicum summa ipsi intercedebat necessitudo, eò quòd toto ferè tempore *Alexandri VI.* apud Reges Galliæ *Carolus VII.* & *Ludovicum XII.* versatus fuisset. *Julium* Pontificem præclare juvit *Ludovicus XII.* Galliarum Rex, quippè qui solus cum Francis omnia Belli pericula, & sumptus in se suscipiens, & in Italiam veniens, triumphalibus suis

fuis armis Venetos Ecclesiæ Ditionis hostes debellavit, Urbes, Castra, & Terras Apostolicæ Sedi ab ipsis ereptas, *Faventiam* videlicet, *Ariminum*, *Ravennam*, *Cremam*, *Cremonam* &c. uno, eoque rapidissimo victoriæ cursu, cepit, Ecclesiæ restituit, tantamque cladem intulit Venetis, ut ipsi acie superati, gravissimoque terrore concussi, quidquid in continente habebant dimittendi, solamque Venetiarum Urbem tuendi consilium injerint. At, præter omnium expectationem contigit, ut *Julius* Pontifex, postquam quæcumque optaverat oppida à Venetis Ecclesiæ erepta, solis usus Francorum viribus, in deditionem accepisset, pacem, novumque fœdus cum Venetis percussisset, & in Francos, quorum nimiam in Italia potentiam pertimescebat, arma converterit. Nec solum cum Venetis, sed cum Hispaniæ, & Angliæ Regibus, & cum Helvetiis ad expellendos totâ Italiâ Gallos fœdus inivit *Julius* Pontifex, indèque gravissimum inter *Julium II.* Pontificem Maximum, & *Ludovicum XII.* Galliarum Regem exarsit Bellum, de quo consultius est tacere, quàm loqui. Dicam tantum obiter, infausito illo dissidio fervente, Belloque flagrante, *Ludovicum XII.* Galliarum Regem consilium pessimum, & Rege Christianissimo indignum suscepisse, propriâ videlicet, & *Maximiliani* Imperatoris auctoritate convocandi Concilium, seu potius Conciliabulum ad *Julium* Papam in ordinem redigendum, novumque Pontificem constituendum. Eâ *Maximiliani* Imperatoris, & *Ludovici XII.* auctoritate fulti novem Cardinales, à *Julio II.* Pontifice Maximo secessione factâ, istud Conciliabulum, *Pisanum* dictum, inchoarunt Pi-

sis anno MDXI. eique præfuit *Julius Bernardinus Carvajalius*, natione Hispanus. Ad dissolvendum istud Pisanum Conciliabulum, de quo copiosius agemus in Colloquio quarto, *Julius II.* Pontifex Maximus exemplum sequutus *Eugenii Quarti*, qui, ut Concilium Basileense jam ad schisma propendens, seque altiùs adversùs Supremam Sedem efferens, reprimeret, Concilium Ferrariæ primum, deindè Florentiæ indixit: hoc, inquam, *Eugenii IV.* exemplum secutus *Julius* Pontifex, Concilium legitimâ fultum auctoritate Romæ in Ecclesia Lateranensi instituit celebrandum, indèque dictum Concilium Lateranense V. ad quod demùm Cardinales Pisani, soluto infausto conciliabulo, tanquam privati accesserunt post *Julii* Papæ obitum, qui contigit, dum adhuc celebraretur concilium istud Lateranense V. ejusque Successori *Leoni* Papæ X. eidemque Concilio Lateranensi veniam supplicantes, dictâque palinodiâ, absolutionem obtinuerunt, pristinisque honoribus benignitate *Leonis* X. Pontificis Maximi restituti sunt in integrum. Rex verò Christianissimus *Ludovicus XII.* missis Oratoribus *Clandio Seiffel*, Episcopo Massiliensi, & *Ludovico De Forbin*, in gratiam *Leonis* X. Romani Pontificis, & Sacri Concilii honorificè receptus fuit, sicut in Colloquio IV. agendo de Conciliis, quæ Sæculo XVI. in Ecclesia fuerunt celebrata, plenius juxtà ac opportuniùs commonstrabimus. Obiit *Julius II.* Pontifex Maximus, Sacramentis Ecclesiæ religiosè perceptis, nono Kalendas Martii anni MDXIII. dum celebraretur Concilium Lateranense V. ab ipso convocatum. Sunt nonnulli Scriptores, qui *Julio II.* Summo Pontifici vitio ver-
 tunt,

runt, quòd toto sui Pontificatus tempore animum non tam ad pacem conciliandam, quàm ad Bella gerenda propensum exhibuerit: At *Alphonsus Ciacconius* hunc Pontificem his verbis excusat in ejus Vita quam descripsit: *Nec enim*, inquit, *probari ob id minùs debet, seu Julius II. Pontifex Maximus, quòd tam infracta animi virtute contra Ecclesiæ dignitatis invasores pugnauerit, quandò temporum ea, conditio tantum Virum religione, ac fortitudine verè Maximum Pontificem postulabat. Neque sanè ob alias causas tot Bella gessit, nisi ut à pluribus occupatum Sacræ Sedis Imperium recuperaret. Ad quòd præstandum insita à natura Julii invictò animo bellicæ virtutis semina cernebantur. Erat enim animo magnus, acer, constans, liberalis, contumacibus implacabilis, in calamitatibus se ipso semper excelsior. Irritari adversis, non enervari, virtus ejus poterat.*

D. *Leonem X.* Pontificem Maximum mortuo *Julio II.* suffectum fuisse jam insinuasti, sed nunc patriam, & Familiam, è qua oriundus erat *Leo Decimus*, eximias ejus dotes, resque præclare ab eo in Pontificatu gestas describere debes.

M. Post obitum *Julii II.* Romani Pontificis, *Joannes Medicæus*, patriâ Florentinus, è *Medicæa* Familia Principe, *S. Mariæ in Dominica* Diaconus Cardinalis, annum agens ætatis trigesimum octavum, Idibus Martii anni MDXI I. ad Summum Pontificatum provectus est, dictusque *Leo X.* cujus egregias virtutes magnis præconiis celebrant multi Scriptores, sed præsertim *Paulus Jovius*, *Onuphrius Panvinus*, & *Alphonsus Ciacconius*. Ingeniî sublimitate, sermonis elegantia, facilitate ac prudentia singulari excelluit. Summâ morum suavi-

rate ac benignitate omnes excipiebat, ac patienter auscultabat. Unice favebat honestis litteris, sibi-
 que Virorum eruditorum, in quos magnanimus,
 & munificentissimus erat, laudem, & amorem
 devinxit. Moribus castissimis, vitæque adeo in-
 taminatâ fuit, ut nec Hæresiarcha *Lutherus*, Ec-
 clesiæ Romanæ infensissimus hostis, à Summo illo
 Pontifice damnatus, nec alii hujus temporis hære-
 tici eam violare, aut impetere ausi fuerint. Bis
 per hebdomadam jejunabat *Leo X.* Pontifex Ma-
 ximus, quartâ Feriâ temperabat à carnibus, sex-
 tâ verò in memoriam Passionis Christi Domini
 herbâ tantum, ac legumine vescabatur. His aliis-
 que id genus heroicis, verèque Christianis virtu-
 tibus abundè cumulus *Leo X.* multa in Pontifi-
 catu gloriâ immortali digna gessit. Vaticanam Bi-
 bliothecam aliquot librorû millibus locupletavit.
 Academiam Romanam, accitis undique magno
 sumptu Artium ingenuarum doctissimis Professio-
 ribus, ita instauravit, ut nulli Italiæ, sive Docto-
 rum præstantiâ, sive auditorum concursu conce-
 dere videretur. *Santem Pagninum* Ordinis Prædi-
 catorum hortatus est, ut scripturæ sacræ latinam
 ex hebræo textu Interpretationem susciperet,
 sumptusque ad tantum Opus absolvendum neces-
 sarios largâ manu suppeditavit. *Petrum Bembum*,
 & *Joannem Sadoletum*, Viros doctrinâ, & pietate
 omni exceptione majores, in suum famulitium
 adscivit, quos postea *Paulus III.* Pontifex Maxi-
 mus in numerum Cardinalium cooptavit. Porro,
 sicut in Viros, bonarum litterarum cultores, se se
 propensissimum exhibuit *Leo Decimus*, ita & in eos,
 qui novitatis studio abrepti sanam doctrinam er-
 rori-

roribus, falsisque sparsis opinionibus corrumpébant, severè animadvertit. Hinc in Concilio Lateranensi V. Sessione octavâ Constitutionem edidit contra nonnullos Philosophiæ Professores, qui ex sententia *Aristotelis*, & *Averois* probare conabantur, Animam rationalem unam esse in omnibus, eamque unâ cum corporibus interire; dictitantes insuper, *nonnulla esse vera secundum Philosophiam, sed non secundum Fidem Catholicam*. Ejusmodi errores non solum in prædictâ Constitutione, quæ legi potest in Actis ejusdem Concilii Lateranensis V. proscripsit *Leo Decimus*, sed etiam ad tollendam omnem in præmissis errandi occasionem, sapientissimè statuit, ne quis deinceps in Sacris Ordinibus constitutus, Philosophiæ, aut Poësis studio ultra quinquennium post Grammaticam, & Dialecticam sine aliquo studio Theologiæ, aut Juris Pontificii incumbat: *Et cum non sufficiat*, inquit *Maximus ille Pontifex*, *tribulorum radices præscindere, nisi & ne iterum pullulent, funditus evellere, ac eorum semina, originalesque causas, undè facillè oriuntur, remove*; cum præcipuè humanæ Philosophiæ studia diuturniora, quam *Deus secundum verbum Apostoli evacuavit, & stultam fecit absque divinæ sapientiæ condimento, & quæ sine revelatæ veritatis lumine in errorem quandòque magis inducunt, quàm in veritatis elucidationem; ad tollendam omnem in præmissis errandi occasionem, hac salutarì Constitutione ordinamus, & statuimus, ne quisquam de cætero in Sacris Ordinibus constitutus secularis, vel regularis, aut aliàs ad illos de jure arētatus, in studiis Generalibus, vel alibi publicè audiendo Philosophiæ, aut poësis studiis ultra quinquenn-*

quennium post Grammaticam, & Dialecticam sine aliquo studio Theologiæ, aut juris Pontificii incumbat; verum, dicto exacto quinquennio, si illis studiis insuadere voluerit, liberum sit ei, dum tamen simul, aut seorsum, aut Theologiæ, aut Sacris Canonibus operam navaverit, ut in his Sanctis, & utilibus Professionibus Sacerdotes Domini inveniant, undè insectas Philosophiæ, & Poesis radices purgare, & sanare valeant &c. Sed nunquam Leonis X. Sacrum Fidei depositum, suæ curæ concreditum, illibatum custodiendi zelus magis eluxit, quam dum anno MDXVI. damnavit Lutheranam Hæresim, cujus Autor, ut fusè ostendemus in proximo Colloquio, fuit *Martinus Lutherus*, qui in omnem licentiam effusus, permulta Ecclesiæ Catholicæ Dogmata convellere, ac oppugnare ausus est, & sicut jam observavimus in superiori Colloquio, tantum ejus nequitia prævaluit, ut indictum adversus Turcas, Christiani nominis hostes, Bellum in mutua inter Christianos Principes Bella deflexerit, seductisque per hæresim populis, tota ferè Germania, & aliæ pleræque nationes hoc incendio conflagrarint. Quò factum est, ut Turcæ, Principibus Christianis inter se pugnantibus, suasque vires Bellis atterentibus, Christianos fines invaserint, suæque potestati subjugarint. Hic autem prætermittere haud possum insignem calumniâ, quam *Theophylus Raynaldus* impingit Dominicanis in Libro, quem edidit de Immunitatibus Cyriacorum, ubi ait, Leonem X. Indulgentiarum promulgationem demandasse Religiosis Dominicanis, non verò Eremitis Ordinis S. *Augustini*, ut mos erat, indeque Hæresim Lutheranam ex cupiditate nimia Dominicanorum omnia ad se trahentium

nium progerminasse. Hæc autem calumnia facile refellitur, primò, quia falsum est, munus promulgandi Indulgentias Eremitis Ordinis S. *Augustini* injungi solitum fuisse, cum certissimè constet, id muneris à *Julio II.* Romano Pontifice FF. Minoribus impositum fuisse, idemque munus *Leonem X.* commisisse Ministro Generali FF. Minorum unà cum Archiepiscopo Moguntino in pluribus Germaniæ locis, Diplomate dato die ultimâ Martii anni MDXV. Præterea, Eminentissimus Cardinalis *Palavicinus* in Historia Concilii Tridentini part. 1. lib. 1. cap. 3. disertè asserit, hanc Indulgentias promulgandi provinciam non FF. Prædicatoribus à *Leone X.* fuisse demandatam, sed *Alberto*, Electori, & Archiepiscopo Moguntino, è Brandeburgensi familiâ, Virò tunc in Germania præstantissimo, qui hac in re sponte suâ uti voluit operâ *Joannis Tetzelii*, Quæstoris Fidei, Ordinis Prædicatorum doctissimi Viri, & Concionatoris ferventissimi, qui paulò antè simili delegatione pro Equitibus Teutonicis feliciter perfunctus fuerat, cujus eo in munere obeundo prudentia atque integritas apud omnes manifesta erat. Quod autem *Lutherus*, tunc Augustiniæ, id ægrè tulerit, & æmulatio aliqua Augustinianos inter, & Dominicanos intercesserit, non indè ortus Lutherani hæresis tribuendus est Dominicanis, qui ab Electore *Alberto*, Archiepiscopo Moguntino, ad promulgandas Indulgentias accersiti fuerant. Sed missâ hac calumniâ, alias *Leonis X.* res præclare gestas prosequamur. Pacem inter Reges ac Principes Christianos *Leo X.* composuit, ut eorum arma in Turcam, communem hostem, converteret,

ret, missâque ad Regem Abyssinorum *Davidem* Legatione, Christianam Religionem apud illos propagare summooperè studuit, necnon in America novis Episcopatibus erectis. Pragmaticam Sanctionem in Galliis abolevit *Leo X.* ejusque abolitioni consensit *Franciscus I.* Galliarum Rex, qui pepigit cum eodem Summo Pontifice Concordatum, cujus condiciones commodiùs referemus in Colloquio VI. agendo de Disciplina Ecclesiastica Sæculi XVI. S. *Franciscum de Paula*, Sacri Minimorum Ordinis conditorem, Sanctorum numero solemni ritu adscripsit idem Pontifex primâ die Maji anni MDXIX. Dubia quædam circa Regulam Monialium *Sanctæ Clare* declaravit, ac dilucidavit. *Julii II.* decessoris sui Constitutionem contra pugnantes duello auctoritate Apostolica confirmavit. *Henricum VIII.* Angliæ Regem, oblibrum contra *Lutheri* Hæresim editum, perhonorifico *Defensoris Fidei* titulo donavit. Cardinales creavit viros doctrinâ, & pietate clarissimos, & inter illos, *Thomam de Vio Cajetanum* Ordinis FF. Prædicatorum, Virum eruditione, vitæ integritate, ingenii subtilitate, variisque editis Operibus celeberrimum, qui Legatione Apostolica in Germania ad coercendum *Lutherum*, nascentemque ejus Hæresim profligandam functus est. Obiit *Leo X.* apoplexiâ oppressus die primâ mensis Decembris anni MDXXI. ætatis XLVI. Pôntificatus nono.

D. Cùm nuperrimè incidissem in librum, cujusdam Hæretici, qui *Leonem X.* Pontificem Maximum multis probris, injuriis, & calumniis acriter perstringit, incescit animum cupido legendi Epistolas *Desiderii Erasmi*, qui sub Pontificatu

Leo

Leonis X. floruit, quemque ipsimet Hæretici impensè laudare solent, ut illius Scriptoris testimonio, quod Hæreticis suspectum esse non potest, eorum calumnias revincere possem. Nec me profectò suscepti laboris pœnituit. Multas quippè offendi, & perlegi Epistolas, in quibus *Desiderius Erasmus* eximias dotes ac præclara *Leonis X.* Pontificis Maximi facinora maximis laudibus celebrat. In primis, in Epistola, quam hic Author scripsit ad *Leonem X.* Pontificem Maximum, quæque in recentissimâ illius Operum Editione, anno MDCCII. Lugduni Batavorum adornatâ, extat ordine centesima septuagesima quarta, hæc de *Leone X.* habet *Desiderius Erasmus*, quæ illius Pontificis virtutem plurimùm commendant: Sensit illicò Mundus *Leonem Pontificem* gubernaculis rerum, admotum, repentè *Saculum* illud plusquàm ferreum, in aureum versum: ac tanta, tamque fatalis subita rerum omnium commutatio, ut nemini non palàm esset, hæc auctore Deo geri. Compositæ bellorum undæ, cohibita Principum inter ipsos minæ, acerbis odiis dissidentes maximorum Regum animi in Christianam adacti concordiam, sublatum perniciosum illud Schisma, & ita sublatum tam ingens malum, ut ne cicatrix quidem supersit. Proindè optimo jure sibi gratulatur Orbis Christianus, talem Leonem, in cujus ore reperit mundus plusquàm melleam dulcedinem. Quid enim pace dulcius? præsertim post gravissimos ac diutinos bellorum tumultus, quibus inter nos collidebamur, immensa Christiani sanguinis jactura, ingenti bonorum mentium dolore, magno Turcarum gaudio. Neutra certè in re cessat inaudita tua pietas, Pater beatissime, quæ simul & Christianæ plebis religio-

ligionem, jam olim multis collapsam modis, & in dies magis ac magis collabentem, saluberrimis, ut audio, Synodi Constitutionibus sarcit ac restituit, & hujusmodi Constitutionibus, non quæ quæstum, aut dominandi libidinem, aut tyrannidem oleant, sed quæ verè spiritum referant Apostolicum, quas qui vis à Patribus, non à dominis profectos possit agnoscere, in quibus piæ mentes ipsum Christum veluti loquentem venerentur. Hac igitur via molitur Sanctitas Tua, ut Christi Ecclesia veris ac suis opibus locupletetur, ut sua præmineat gloria, ut sua polleat ditione: breviter, iis cælestibus donis cumuletur, quæ nonnunquam tum potissimum exuberant, cum cæteris illis destituimur maxime. Quanquam nec alteram illius virtutis functionem videris negligere, ut qui conciliandis omnium inter se Principum animis componendisque Christianorum rebus, pulcherrimam pariter ac tutissimam struis viam ad impiam Turcarum gentem, vel subigendam, vel profligandam. Non ferent aliquando Leonis nostri rugitum immanes illæ belluæ; sentient invictum illud Leonis mansuetissimi robur quantumvis truculentæ feræ, impares erunt Pontifici, magis pietate quam copiis armato, ac numen etiam immortale secum in bella trahenti. Video jamdudum Beatissime Pater, quam ingens laudum tuarum campus se nobis aperiatur, sed longè impar est hujus ingenioli vis rebus tantis explicandis; ad tam divina facinora, nostra non adspirat eloquentia, vel potius infantia. Aque utinam hoc studium detur eruditis omnibus, ut velint, tum ea facultas, ut possint omnium Saculorum memoria dignas Leonis decimi virtutes, dicendi viribus exæquare. Me quidem procul absterret tua celsitudo, quem enim illa non absterreat? Et

tamen nescio quo pacto, mihi vehementer gestit animus pro virili omnes ingenii nervos in hoc explicare, ut quanta extiterunt Leonis in Christianam gentem merita, tanta & posteris habeantur ac celebrentur, nullo unquam tempore intermoritura. Nec solum in laudata ista Epistola, & in aliis, quos ad Summum Pontificem Leonem X. scripsit *Desiderius Erasmus*, quæque in recenti ejus Operum Editione insertæ sunt Ordine cxciv. ccccliii. dxxix. sed etiam in multis Epistolis, quas ad varios scripsit amicos, Leonis X. Pontificis Maximi mitissimum ingenium, bonarum Artium ac Litterarum singulare studium, raras dotes, & eximios mores deprædicat, eumque passim appellat Pontificem doctum, integrum ac pium, virtute Christum referentem; pacis publicæ vindicem; Virorum eruditorum patronum munificentissimum; tam benignum, ut de omnibus benemereri studeret; tam constantem, ut animum ad utramque fortunam infractum haberet; tam vigilem Pastorem, ut nihil sibi antiquius crederet, quàm Christi gloriam, & gregis concrediti procurare salutem. Ex his & similibus encomiis, quæ de Leone X. Pontifice Maximo contextit *Desiderius Erasmus*, Scriptor coævus, & cujus testimonium hæreticis suspectum esse haud potest, facile confutantur contumeliæ & calumniæ, quas quidam malè feriatum moderni heterodoxi de industriâ excogitarunt, ut Vitam hujus Summi Pontificis aliquâ infamiæ labe aspergere possent, eo solo nomine, quòd hic Pontifex, avitæ doctrinæ Catholicæ retinendæ studiosissimus, ad profligandam nascentem *Lutheri Hæresim* curam omnem industriamque contulerit.

lerit. Sed mittamus illos Hæreticos, à quibus multò melius est vituperari, quàm laudari, & profequamur, si placet, seriem aliorum Romanorum Pontificum, qui Sæculo XVI. *Leoni X.* successerunt.

M. Defuncto *Leoni X.* Pontifici Maximo successit *Hadrianus* hujus nominis VI. qui ante Pontificatum *Hadrianus* itidèm appellabatur, natione Batavus, ex ignobilibus parentibus natus, Facultatis Lovanienſis Doctor, *Caroli Austriaci*, *Philippi I.* Castellæ Regis filii, & postea Imperatoris, dicti *Caroli V.* Præceptor. A *Leone X.* in Collegium Cardinalium ob egregia merita adlectus, tandèm summo totius Collegii consensu, absens licèt, Romanus Pontifex electus est quinto Idus Januarii anni MDXXII. Hanc electionem non humanis studiis, atque factionibus, sed divino consilio factam fuisse, ex eo præcipuè probat *Franciscus Guicciardinus* libro XIV. *Historiæ* sui temporis, quam Italicè scripsit, quòd Cardinales *Hadrianum*, qui tanto regionum intervallo absens erat, cujus nomen vix erat ipsis cognitum, quique Italiam nec viderat unquàm, nec se visurum vel sperabat, vel cogitabat, Summum Pontificem, nemine reclamante, elegerint. Certè ipsemet *Hadrianus*, Pontifex Maximus, disertè testatur in Mandatis, quæ dedit *Francisco Cheregato*, Episcopo Aprutino, quem ad Conventum Norimbergæ in Germania coactum, Nuntium destinavit, se nunquàm Pontificatum ambiuisse. In his quippè Mandatis (quæ legi possunt apud *Odoricum Raynaldum* Tomo XX. *Annal. Eccles.* ad annum MDXXII. Num. LXVI.) sic prædictum Nuntium *Hadrianus VI.* Pontifex Maximus, alloquitur: Nos, uti aliàs tibi di-

dixisse credimus, Pontificatum hunc nunquam ambivimus, immò quantum in nobis fuit, longè maluissimus privatam vitam agere, & in sancto otio Deo servire. Et profectò Pontificatum ipsum planè recusassemus, nisi Dei timor, & sincerus Electionis nostræ modus, necnon Schismatis ex recusatione nostra imminentis metus, Nos acceptare illum coëgisset. Subjicimus igitur colla summæ dignitati, non ob dominandi libidinem, neque ad ditandos propinquos nostros, sed ad divinæ voluntati parendum, ad deformatam ejus sponsam Ecclesiam Catholicam reformatandam, ad subuentandum oppressis, & doctos & virtute præditos, qui multo jam tempore neglecti jacuerunt, erigendum & ornandum; & denique ad omnia illa agendum, quæ bonum Pontificem, & legitimum Beati Petri successorem agere oportet. Hoc sanctissimum consilium, quo permotus Pontificatum susceperat, executioni mandare pro viribus studuit Hadrianus VI. Ad pacem inter Principes Christianos, præsertim Carolum V. Imperatorem inter & Franciscum I. Galliarum Regem, conservandam, ad Lutheranam Hæresim penitus evertendam, ad reformationem morum in Clero promovendam, ad frangendas Turcarum vires statim animum adjecit. Ludovico Hungariæ Regi contra Turcarum impetum suppetias tulit, & auxilia misit ad Equites Hierosolymitanos à Solimano II. Turcarum Imperatore obsessos in Insula Rhodi, quam tamen Insulam, nobilissimum quondam post Athenas Græcarum litterarum ac scientiarum domicilium, & firmissimum torius Christianismi adversus immanem Turcarum tyrannidem propugnaculum, Solimanus, Turcarum Impera-

perator, cum summâ Christianorum Principum, ex torpore ad illius Insulæ conservationem ostenso, contractâ infamiâ, in suam potestatem redegit anno, ut in superiori Colloquio observavimus, millesimo quingentesimo vigesimo secundo. In Beneficiorum & Dignitatum Ecclesiasticarum distributione nihil carni & sanguini concessit *Hadrianus VI.* Pontifex Maximus. Cognatos, & affines suos, qui spe celsioris fortunæ Romam venerant, severis verbis excepit, eosque modico viatico donatos, sua relegere vestigia, & pedibus in patriam redire iussit. Nepotem suum, qui Beneficium annui census septuaginta Ducalium aureorum possidebat, & aliud pinguius, quod ad centum aureos ascendebat, obtinere cupiebat, asperâ admonitione corripuit, ac tandem multorum precibus exoratus consensit, ut opulentius Sacerdotium assequeretur eâ tamen lege, ut prior Beneficio sese abdicaret, asserens, se nullâ ratione pati velle, ut quisquam duobus Beneficiis, quibus annexa est cura animarum, simul frueretur, sed *Ecclesias Sacerdotibus, non Sacerdotes Ecclesiis ornare se velle*, sicut ex *Hieronymo Nigro*, Scriptore corvo, refert *Odoricus Raynaldus* in Annalibus Ecclesiæ ad ann. MDXXI. Num. 21. Multa gessit *Hadrianus VI.* ad compescendos tumultus, quos *Lutherus*, alique Hæretici, in Ecclesiam Romanam dabacchantes, propudiosis per Germaniam sparsis libris, excitarunt, de quibus commodius agemus in proximo Colloquio, in quo referemus Hæreses, quæ Sæculo decimo sexto Ecclesiam exagitarunt. Regibus Hispaniæ concessit potestatem *Hadrianus VI.* nominandi Episcopos, sicut

sicut *Leo X.* Regibus Galliz antea concesserat. Beatos *Antoninum*, Florentinum Archiepiscopum, ex Ordine Fratrum Prædicatorum assumptum, & *Bennonem* Misnensem Episcopum, Sanctorum Catalogo adscripsit ultimâ die mensis Maji anni MDXXIII. quo anno multis virtutibus clarus, & perdoctis editis Operibus, quæ in Colloquio quinto, ubi agemus de Viris Illustribus decimi sexti Sæculi, recensēbimus; obiit religiosissimus ille Pontifex decimo octavo Kalendas Octobris, postquam annum unum, menses octo, & dies sex Christi Ecclesiam Sanctissimè rexisset, eique Epitaphium istud positum est: *Hadrianus Sextus hic situs est, qui nihil sibi infelicius in vita duxit, quàm quòd imperaret.* Non defuerunt malevoli detractores, Critici, & Blaterones, qui hunc Pontificem Sanctimoniâ licet, doctrinâ, Christianâ prudentiâ, & omnibus ad Ecclesiam sanctè regendam dotibus necessariis præditum, jamque è vita sublatum, contumeliis prosciderunt, sicut ex *Panlo Jovio*, qui Vitam *Hadriani VI.* scripsit, narrat *Spondanus* ad annum MDXXIII. Num. xx. At ejusmodi contumelias falsi convincit *Blasius Ortizius*, Canonicus Toletanus, qui Itinerarium *Hadriani VI.* Pontificis Maximi, cujus domesticus fuerat, scripsit, in quo, postquam capite quadragesimo laudavit *Hadriani VI.* modestiam, frugalitatem, continentiam, cæterasque Pontificias dotes, quæ in gradu heroico in iplo fulgebant, hæc subdit: *Audacter fortassis asserere possum, ut domesticus testis, quòd neque vidi, neque persenssi quidquam sinistrum aut minus grave in dictis aut factis; immò quasi speculum cunctarum virtutum, antequàm Urbem ingrederetur,*
ut

ut cuncti noverunt. Cujus orationi studium vehemens succedebat, & studium interdum oratio interpellabat, ita ut solum ea tempora, quæ naturæ necessitas exigit, victui & quieti concederet, cetera omnia officiis divinis ac humanis ita distribuens, ut humani generis adversario nullum locum vacuum relinqueret. At quid moror in illius præconiis enarrandis, cum esset vir ex omni parte irreprehensibilis. Hoc Hadriani VI. Itinerarium, à Blasio Ortizio, ejus Domesticus, scriptum, Vir Clarissimus Stephanus Baluzius ex veteri Codice manuscripto Navarrici Collegii publicavit, inseruitque libro III. Miscellaneorum.

D. Sæpè usu venire solet, ut vivi meritâ laude fraudentur, at Viros illustres, qui vitâ jam defuncti sunt, maledictis insectari, summa ignavia & iniquitas est, acerbis pœnis meritò castiganda: pascitur in vivis livor, post fata quiescit, inquit Ovidius, cui concinit Plantus in Truculento, Actû I. Scenâ II. dicens: Dùm vivit, hominem noveris: ubi mortuus est, quiescas, facilè itaque crediderim, eos, qui jam extinctum Hadrianum VI. Pontificem optimum, probrosis calumniis dilacerarunt, omnem penitus exuisse frontem, ac bibisse facem iniquitatis. Sed, missis illis malevolis obrectatoribus, alios, obsecro te, percense Romanos Pontifices, qui Hadriano VI. Sæculo decimo sexto successerunt.

M. Hadriano VI. Pontifici Maximo successus est summo Cardinalium consensu Julius Medicus, qui Leonis X. patruelis erat, S. Laurentii in Damaso Cardinalis Presbyter, & Romanæ Ecclesiæ Vicecancellarius. Ad summum itaque Pontificatum pro-

profectus *Julius Medicus* decimo tertio Kalendas Decembris anni MDXXIII. voluit appellari *Clemens VII.* fuitque Pontifex in suis actionibus gravis, sagax, victor sui, in adversis sibi semper constans, & in Catholica Fide tuenda, comprimendisque Novatoribus, qui Lutheranz Hæresis virus in Gallia, Germania, aliisque Regnis & Provinciis diffundere conabantur, vigilantissimus. Gravissimas turbas, quibus toto ferè sui Pontificatus tempore agitatus fuit *Clemens VII.* jam obiter in superiori Colloquio insinuavimus, quas tamen paulò uberiùs hic explicare necesse est, quò faciliùs omnia, quæ præclarè gessit, vel ab iniquis passus est Summus ille Pontifex, comperta ac explorata habere possis. Incipiam autem à Bello, quod *Carolus V.* Rex Hispaniæ & Imperator adversùs hunc Pontificem movit eo solo nomine, quòd *Clemens VII.* fœdus iniisset cum Regibus Galliæ & Angliæ, cum Venetis, & *Francisco Sfortia* Mediolanensium Duce pro Italiæ libertate tuendâ, & recuperandis *Francisci I.* Galliarum Regis filiis, quos *Carolus V.* captivos in Hispania detinebat, postquàm Regem *Franciscum I.* quem in Ticinensi, seu papiensi pugna captum in Hispaniam abduxerat, liberum è custodia dimisisset, sicut jam observavimus in superiori Colloquio. Eo fœdere, irritatus *Carolus V.* bellum *Clementi VII.* indixit, ei que initium Romæ dedit *Columnensium* familia, quæ *Carolo V.* addictissima occultè adversùs Pontificem anno MDXXVI. conspiravit. Cardinalis *Columnensis Vespasianus*, ejusque frater *Pompejus* cum *Hugone Moncada* Hispano, & Regni Neapolitani Pro-Rege, nemine de ipsorum molitione suspican-

te , Urbem summo mane cum octingentis Equitibus & tribus peditum millibus ingressi , ad Vaticanum contenderunt, eorumque inopinato adventu territus Pontifex cum nonnullis Cardinalibus in arcem S. Angeli actutum se recepit . Hostes verò , Palatio Pontificio sacrâ omni prophanâque suppelle&tili direpto , in Basilicam quoque S. Petri nefarias manus injecerunt , eamque pariter diripere cum opulentioribus suburbii domibus. Hæc fuerunt præludia Belli , quod licet , compositis induciis, brevi aliquo temporis intervallo utcûmque sopitum fuerit, paulò post tamen vehementiùs exarsit , ac multas Romæ funestas clades intulit. Missus quippè in Italiam cum valido exercitu à *Carolo V.* Imperatore conjuratus Christianissimi Regis *Francisci I.* & Galliarum, patriarum suarum, hostis *Carolus Borbonius*, Romam obsedit, sed in murorum expugnatione plumbeo globo minoris tormenti ictus occubuit , ejusque corpus à Cæsarianis militibus Cajetam asportatum sepulturæ mandatum est superbo hoc Epitaphio illius sepulchro appposito :

*Aucto Imperio , Gallo victo ,
Superata Italia , Pontifice obseſſo ,
Roma Capta ,
Carolus Borbonius in Victoria Cæsus ,
Hic jacet .*

Demortuo *Carolo Borbonio* in Cæsariani exercitus, qui magna ex parte , ut asserunt corvi Scriptores , ex Lutheranis militibus constatus erat , Imperium confestim successit *Philibertus* Princeps Arausicanus ; qui Romam obsidione cinctam cepit, ac ferro flammâque devastavit. Hanc Urbis dire-

direptionem, quæ accidit anno MDXXVI. Petrus Justinianus libro xii. *Historiæ Venetæ* elegantèr describit his verbis: Contigit miserabilis, fædæque Romanæ Urbis direptio, qualis olim nec à Gothis, nec à Longobardis, Vandalisve facta legitur. Hispani, Germanique milites in omne crudelitatis genus prolapsi multas Urbis partes incendunt, Sacra, profanaque diripiunt, omniaque fuga, tumultu, terrore ac cæde replent: nec Cardinales, Episcopi, ceterique viri religiosi impias deprædantium effugere manus. Ædes quoque sacræ ad unam omnes spoliatæ sunt, vasaque, libatoria, divinis rebus dicata, in prædam nefariè acta, ab altaribusque ablata aureæ Cruces, pretiosæ candelabra, Sacerdotalia indumenta, atque usque in sacrosancta Domini Corporis tabernacula rapaces manus injectæ, omnesque tandem Ecclesiarum thesauros barbarico fastu, immanique avaritia crudelis hostis expilavit; atque in Religionis Christianæ ludibrium Virgines Sacras vel violavit, vel expoliatas in publicum nudo corpore traxit: Ceteras quoque Matronas eadem ignominia affecit: nullum præterea fuit genus hominum, nulla tota Roma vel publica, vel privata domus, quæ furentis, sacrilegique hostis manus evaserit. His adjungit Joannes Cochlaus, Scriptor Germanus, & coætaneus, milites, Cæsarianos Sectæ Lutheranae, ex veteri Cappella Papæ, in qua ejus Cantores quotidie Missam, pias preces, & horas canere solebant, fecisse stabulum equorum, Cardinalium vestes, ac pileos in eorum opprobrium induisse, fictumque creasse Papam ex Landesknechio, qui dixerit in ficto suorum Cardinalium catu, & Consistorio, se donare Papatum Luthero: Quisvis militum id approbet, dexteram in altum tollat. Milites itaque levasse ma-

num ac clamasse : *Lutherus Papa* , *Lutherus Papa* . Interim , dùm hæc agerentur , & teterrima esset captæ Urbis Romæ facies , *Clemens VII.* Pontifex Maximus , in Molem *Adriani* , quæ Arx *S. Angeli* nunc vocatur , sese recepit . Hanc Arcem *Philibertus* , Dux *Arausicanus* , perductâ in circuitu fossâ , dispositisque per loca præfidiis , circumvallavit , ne qua subsidia vitæ incluso Pontifici suppeditarentur , sicque fame , & penuria ad deditionem adigere-
tur , ad quâ demùm coactus sub durissimis conditio-
nibus fuit , nec libertate donatus , nisi postquam illas omnes implevisset . Hæ autem fuerunt condi-
tiones . Primò , ut Summus Pontifex quadraginta aureorum millia numeraret . Secundò , ut præci-
puas Ecclesiasticæ Ditionis Arces , unâ cum Ca-
stro *S. Angeli* , ac *Placentiam* , *Parmam* , *Mutinam* Civitates , Imperatoris potestati , quandiù ei li-
bitum foret , retinendas permetteret . Tertiò , ut Summus Pontifex cum tredecim Cardinalibus , quos secum habebat , donec pars pecuniæ soluta fuisset , captivus detineretur , & obsides Exercitui pro reliquâ pecuniâ darentur . Postremò , ut *Columnenses* Sacris , & Dignitatibus Pontificiâ sen-
tentiâ privati , restituerentur in integrum . His adimpletis conditionibus , *Clemens VII.* Pontifex Maximus in libertatem assertus , pacem , & amicitiam , extinctis prioribus simultatibus , inivit cum *Carolo V.* eique solemni ritu Imperii coronam imposuit Bononiæ anno MDXXX.

Alterum non minoris momenti negotium *Clementis VII.* Pontificatum turbavit , illudque originem habuit ex perditis *Henrici VIII.* Angliæ Regis in *Annam Bolenam* amoribus , quibus , ut in
supe-

superiori Colloquio jam observavimus, incitatus ille Rex, & pravis *Thomæ Volſei* Cardinalis, Archiepiscopi Eboracensis, & Regni Cancellarii, consiliis impulsus, contractum olim matrimonium cum *Catharina*, filiâ Regum Catholicorum *Ferdinandæ*, & *Isabellæ*, & materterâ *Caroli V.* Imperatoris, à Summo Pontifice irritum declarari rogavit. Huic injustæ Regis petitioni annuere noluit *Clemens VII.* causamque ad se Romam evocavit, toto tamen triennio Sententiam ferre de industria procrastinavit, ne Regem libidinis impotentem unâ cum Regno præcipitem ageret, quamvis *Carolus V.* Imperator, ac *Ferdinandus*, Rex Catholicus, Summum Pontificem ad ferendam Sententiam acerrimè compellerent. Sed effrænâ Regis libido, & adversùs Authoritatē Apostolicam contumaciâ Censuras à Pontifice extorserunt, postquam *Thomas Cranmerus*, Archiepiscopus Cantuariensis, matrimonium *Catharinæ* cum *Henrico VIII.* Angliæ Rege irritum latâ sententiâ pronunciaſſet, eâque nixus *Henricus* Rex clandestinum cum *Anna Bole-na*, quæ jam grvida erat, conjugium contraxisset. Tunc Summus Pontifex *Clemens VII.* in secreto Consistorio die trigesimâ mensis Julii anni MDXXXIII. Sententiam peremptoriam tulit, quâ ejectionem ac spoliationem *Catharinæ* Reginae à possessione juris conjugalis, & Regiæ dignitatis, & Matrimonium inter *Henricum VIII.* Angliæ Regem, & *Annam Bolenam* contractum nulla, injusta, & attentata fuisse, & esse declaravit, prolemque susceptam vel suscipiendam, illegitimam fuisse, & esse; ipsamque *Catharinam* Reginam ad suum pristinum statum, & quasi possessionem ju-

ris conjugalis , & Regiæ Dignitatis restituit : Annam Bolenam à Regio thoro, & quasi possessione ejusdem Juris , & Dignitatis eiici ac amoveri debere, prout ipse Pontifex restituit , & reponit , reiicit , & removet . *Henricum* Regem in majorem Excommunicationem , & alias Censuras & pœnas , ob inobedientiam , & contemptum Mandatorum Sedis Apostolicæ incurrisse declaravit , suspenso nihilominus ad mensem Censurarum effectu , ut rex ad officium redire , & Pontificiæ sententiæ commodius obtemperare posset . Hæc in *Henricum VIII.* Regem Pontificia Sententia legitur apud *Sanderum* libro 1. *De schismate Anglicano* pag.76. Non resipuit tamen *Henricus VIII.* sed potius eâ sententiâ exacerbatus in Summum Pontificem furere cœpit , & , sicut in superiori Colloquio ostendimus , funestum induxit schisma Anglicanum , quod etiamnum perdurat . Sunt nonnulli Scriptores , qui ex eventu facta metientes , dicunt , *Clementem VII.* nimiam festinatione Sententiam tulisse , suoque præproprio judicio *Henricum VIII.* Angliæ Regem , totumque Regnum in hanc schismatis voraginem submersisse . Sed ab hac calumnia prædictum Pontificem egregie vindicat Cardinalis *Palavicinus* libro 111. *Historia Concilii Tridentini* cap.xv. & nemo est , si à præjudiciis liber sit , qui hujus Pontificis Sententiam æquissimam fuisse ultrò non fateatur , cum *Henrici VIII.* Angliæ Regis indomita libido , despecta matrimonii religio , publicum propudiosæ vitæ scandalum , & abjecta Supremo Ecclesiæ Capiti , Summo Pontifici , Christi in terris Vicario , debita reverentia pœnâ anathematis jure optimo ple-

ſi deberent. Conſultò hìc prætermitto res, quas præclarè geſſit *Clemens VII.* ad proſtigandam gligentem Lutheranorum hæreſim, quia de his commodiùs agemus in proximo Colloquio, ubi varias referemus Hæreſes, quæ Sæculo xvi. eruperunt, magnumque ei dedecus aſperſerunt. Obiit Summus ille Pontifex Romæ die xxvi. Septembris anni m^oxxxiv. annos natus quinquaginta ſex. Deiparæ Virgini devotiſſimus fuit, piumque Roſarii Sodalitium in ejus honorem inſtitutum non ſolùm Auctoritatè Apoſtolicâ commendavit, verùm, etiàm Indulgentias Sodalibus Roſarium recitantibus à Summis Pontificibus *Sixto IV.* & *Leone X.* conceſſas ampliavit. Nonnullas Congregationes recens inſtitutas, videlicèt Congregationem Clericorum Regularium, qui *Theatini* vocantur, Congregationem FF. Minorum ſtrictioris Obſervantiæ, & Congregationem Clericorum Regularium *S. Pauli Decollati* in Diœceſi Mediolanenſi, approbavit idem Pontifex. Sed de iſtarum, & aliarum ejuſmodi Congregationum, & Regularium Ordinum Inſtitutionibus, Conditoribus, ac Pontificiis approbationibus diſſerendi ſe ſe opportunior dabit occaſio in Colloquio ſexto, in quo ea, quæ ad Monasticam, ſeu Regularem Sæculi xvi. ſpectant Diſciplinam, uberiùs exponemus.

D. Fuitne conſimilibus turbis perindè agitato Pontificatus Succęſſoris *Clementis VII.* Supremi totius Eccleſiæ Paſtoris?

M. Poſt ſolemnes Exequias, ut moris eſt, mortuo *Clementi VII.* perſolutas, *Alexander Farnęſus*, Cardinalis & Epiſcopus Oſtienſis, concordibus

dibus Cardinalium suffragiis, Pontifex Romanus die decimâ tertiâ mensis Octobris anni MDXXXIV. electus est, dictusque *Paulus III.* Quem fuisse Ponticem multis insignibus virtutibus clarum, humanitate, affabilitate, clementiâ, comitate, prudentiâ, diuturno rerum usu comparatâ, cæterâque aliis virtutibus præditum, & litteris apprinnè excultum, testatur *Onuphrius Panuinus* in hujus Summi Pontificis Vita. Ecclesiam, sedente *Paulo III.* Pontifice Maximo, gravissimis turbis exagitavit *Henricus VIII.* Angliæ Rex, in sceleribus, Schismate, Sedis Apostolicæ, & Ecclesiæ Romanæ contemptu, & in Catholicorum sævissima persecutione obduratus. Et primò quidem, ut in Romanum Pontificem virus suum expectoraret impius ille Rex, jussit (teste *Sandero* Scriptore Anglo, libro I. de Schismate Anglicano) ut omnis potestas, ac jurisdictio in Anglos, & Hibernos Pontifici Romano in perpetuum adimeretur, reusque perduellionis fieret, si quis deinceps quidquam honoris, aut auctoritatis Sedi Apostolica deferret: Anglicanæ verò Ecclesiæ summum in terris caput ut solus Rex haberetur, cujus solius esset auctoritate plenissima errores, Hæreses, abusus omnes emendare, & illi propterea omnium Sacerdotiorum integri proventus primi cujusque anni, quo quis beneficium aliquod sortitus esset, solverentur; illi omnium Ecclesiasticarum Dignitatû Decime redderentur; quin immò, ipsum Papæ vocabulum consecutus, edici curavit, ut de cætero nullus Pontificum Romanorum vocaretur Papa, sed tantum Episcopus In Litaniis præterea, precibusque, quæ tum privatim, tum publicè in omnibus Oratoriis, Ecclesiis, Monasteriis, aliisque in locis recitabantur; loco

loco petitionis illius , quæ pro Domino Apostolico & Christi fidelibus per universum Orbem fieri solet, *Henricus Rex* hac impia verba apponi , imprimique præcepit : *Ab Episcopi Romani tyrannide , & detestandis enormitatibus libera nos Domine .* In omnes Catholicos , qui eum , tanquam Supremum Status Ecclesiastici caput agnoscere detestabantur, crudeliter sævit *Henricus Rex*, eosque morte affecit, præcipue *Fischerum* Roffensem Episcopum, à *Paulo III.* Pontifice Maximo purpurâ donatum , & *Thomam Morum* Angliæ Regni Cancellarium , qui ambo pro defensione Primatus Romani Pontificis constanter mortem oppetentes Martyrii palmam adepti sunt. Hanc immanem in Catholicos persecutionem novo sacrilegio cumulavit *Henricus VIII.* Angliæ Rex , dùm *S. Thomam* , olim Cantuariensem Archiepiscopum, tanquàm in perduellem Sententiam dicere , ejus memoriam penitus damnare , ossa igni, cineres fluvio, Templi ornamenta fisco Regio addicere ausus est . Sic furentem *Henricum VIII.* compescere volens *Paulus III.* Pontifex Maximus , Sententiam in ipsum tulit, duoque Diplomata promulgavit, unum tertio Kal. Septembris anni MDXXXV. alterum die xxv. Decembris anni MDXXXVIII. in quibus in perduellem , & hæreticum Regem non solum Censuris Ecclesiasticis animaduertit , sed etiam declarat , subditos à juramento fidelitatis , & omni ergà Regem subjectione esse omninò absolutos , eisque sub pœna Excommunicationis præcipit , ut ab ejusdem *Henrici Regis* , suorumque Officialium , Iudicum , & Magistratum quorumcumque obedientia penitus recedant, nec illos in superiores recognoscant . Extant hæc duo
Pau-

Pauli III. Diplomata Tomo II. Bullarii Romani, de quibus legendus est jam citatus *Sanderus* lib. I. *De schismate Anglicano*. Verum, quod magis dolendum est, dum Rex *Henricus VIII.* Catholicam Religionem in Anglia, & Scotia abolere pro viribus satagebat, *Lutberus* in Germania, *Calvinus* in Gallia, *Zuinglius* in Helvetia, aliique nefarii Hæretici, ut in proximo Colloquio commonstrabimus, in Lituania, Suecia, Dania, & Prussia, suos errores impune disseminabant. Ad tot profligandas Hæreses, & domandam Hæreticorum, pertinaciam, Concilium Generale Tridentinum, de quo in quarto Colloquio latè differemus, convocavit *Paulus III.* Pontifex Maximus, illudque cæptum est die XI I. Decembris anni MDXLV. continuatum sub *Julio III.*, & absolutum sub *Pio IV.* die IV. Decembris anni MDLXI I. Undecim hujus Concilii Tridentini Sessiones sub *Paulo III.* celebratæ sunt, octo videlicet Tridenti, & tres Bononiæ, quò translatum est istud Concilium autoritate Pontificiâ Legatis demandatâ anno MDXLVI I. ob contagiosum morbum, qui Tridenti grassabatur, sed ortâ inter Patres ob eam translationem diffensione, Concilium à *Paulo III.* suspensum est anno MDXLIX. Ad promovendam hujus Concilii Tridentini celebrationem *Paulus III.* præcipuas curas adhibuit in Christianis Principibus conciliandis, sed potissimum *Carolo V.* Imperatore, & Rege Christianissimo *Francisco I.* quos in concordiam ut facilius revocare posset, Niciam ipsemet Pontifex ad Colloquium venit cum utroque Principe anno MDXXXVI I. induciasque inter eos in decem annos firmavit. Edictum, quod in Con-

ven-

ventu Spirensi *Carolus V.* Imperator anno MDXLIV. promulgaverat, tanquàm Religioni Catholicæ periculosum, & Sedi Apostolicæ indecorum, reprobavit *Paulus III.* ut videre est in litteris, quas ad eundem Imperatorem scripsit, & quæ extant apud Cardinalem *Palavicinum* libro v. *Historiæ Concilii Tridentini* cap. 6. Improbavit etiam idem Summus Pontifex libellum ab eodem Imperatore in Comitibus Augustanis anno MDXLVIII. promulgatum, quem *Interim* nuncuparunt, quòd præscriberet quidquid interim usque ad futuri Concilii Generalis Decreta credendum esset. Hunc, inquam, Libellum (qui præcipua capita, quæ per recentes controversias agitabantur, viginti sex articulis digesta complectebatur) improbavit *Paulus III.* Pontifex Maximus, tum quia *Carolus V.* Imperator in hoc publicando libello quamdam in causa Fidei auctoritatem sibi arrogasse videbatur; tum quia etiam idem Imperator in prædicto libello contra sancitam in Ecclesia de servando Cœlibatu legem concedebat Sacerdotibus, ut in conjugio, quod contraxerant, persisterent; & Laicis, qui communioni sub utraque specie assueverant, permittebat, ut hunc communicandi ritum retinerent, & super utroque capite futuri Concilii sententiam expectarent. Hunc itaque infustum *Caroli V.* libellum à Summo Pontifice proscriptum repudiarunt Catholici, quin & ipsimet Hæretici eum approbare renuerunt, sed illum pauci dumtaxat Lutherani susceperunt, qui ideo *Interimistæ* fuerunt appellati, ut videre est apud *Hosium* Cardinalem in libro *De Hæresibus hujus temporis*. Ad depravatos Clericorum mores corri-

rigendos, & ad restaurandam collapsam Ecclesiæ Disciplinam *Paulus III.* instituit Cætum gravissimorum, & doctissimorum quatuor Cardinalium, & quinque Præfulum, quibus adjunxit *Gregorium Cortesium* Abbatem *S. Georgii* Venetiarum, Ordinis Benedictini, & *Thomam Badian* Magistrum Sacri Palatii, Ordinis FF. Prædicatorum, qui ut vehementi Summi Pontificis desiderio facerent satis, Libellum confecerunt, quo præcipua reformationis capita ad tollendos serpentes abusus, ad rectam universæ Ecclesiæ disciplinam, & æconomiam, ipsiusmetque Pontificis, & Episcoporum officium pertinentia, summo candore, & pari diligentia comprehenderunt, illumque Romano Pontifici obtulerunt anno MDXXXV I I I. Hæc reformationis Capitula, seu selectorum Cardinalium, & Prælatorum ad *Paulum III.* Monita, fuerunt Antuerpię edita anno MDXXXIX. Parisiis anno MDCXII, eaque integra *Petrus Crabbe*, Ordinis Minorum, in sua Conciliorum Editione præposuit Synodo Tridentinæ, velut ejus exordium. Dùm hæc, & alia utilissima pro emendatione morum, & resarciendâ Ecclesiæ Disciplinâ animo pervolueret *Paulus III.* Pontifex Maximus, obiit quarto Idus Novembris anni MDXLIX. ætatis suæ octogesimo primo, Pontificatus decimo quinto. Testatur *Spondanus* ad annum MDXLIX. Num. XI I. hunc Pontificem, multis aliundè virtutibus clarum, domesticæ amplificandæ atque evehendę fortunæ supra modum studiosum fuisse, eumque, paulò antequam moreretur, proximorum suorum, quos plus æquò dilexerat, ingratitude incusasse, ac subindè illud Davidicum ingeminasse: *Si mei non fuissent*

fuissent dominati, tunc immaculatus essem, & emundarer à delicto maximo. Observat idem Spondanus, nullam prorsus fidem adhibendam esse calumniis, quas, ad obterendam *Pauli III.* Pontificis Maximi famam, hæretici & apostatæ *Ochinus, Vergerius, Baleus, Sleidanus*, aliique ejusmodi impuri & perversi homines de industria confinxerunt.

D. Tot inter laudes, quibus jam aliquos Sæculi *xvi.* Romanos Pontifices exornasti, hæc una instar omnium mihi esse videtur, quòd videlicet profligandis Hæresibus, quibus istud Sæculum exundabat, ac sancienda Disciplina Ecclesiasticæ infatigabili zelo incubuerint. Hanc, inquam, laudem non imminuet tempus, non detereat oblivio, & licet totus collabatur orbis ac pereat, vivet illa tamen, æternumque stabit. Sola pietas Romanis Pontificibus hanc mentem iniecit, ut rem tantam, tamque Ecclesiæ salutarem magnis aggrederentur animis, administrandæ modum præscripsit sapientiâ, perficiendæ felicitas præfuit. Nihil hoc opere, si causam intueamur excelsius; si progressum & ordinem, nihil ad sapientiæ leges accommodatius; si exitum, nihil propius miraculo fingi, & excogitari potest. Verbo dicam, Romanis Pontificibus Sæculi decimi sexti debemus, quod, pulsis Hæreticorum erroribus, sancita sit Religionis avitæ majestas, legum auctoritas asserta, Ecclesiasticæ Disciplina restitutus splendor, & veritas, discussâ omni caligine, per se jam luceat, & gloriosè triumphet. Sed perge aliorum Romanorum Pontificum res præclare gestas continuâ serie describere, ut inde constet, illos pietate, doctrinâ, & indefesso labore

bore de Hæresibus Sæculi XVI. triumphos egisse.

M. Post obitum *Pauli III.* tribus ferè mensibus vacavit Sedes Apostolica. Multi Cardinales se se propensos exhibuerunt ad eligendum in Romanum Pontificem *Reginaldum Polum*, Cardinalem, natione Anglum, in quo nobilitas sanguinis regii, & insignis morum gravitas juxtà & probitas cum doctrina eximia conjunctæ erant, quique Pontificiis Legationibus præclare functus fuit in Gallis, in Belgio, & in Anglia, ubi, *Maria*, regnante, Catholicam Religionem restituit. At *Reginaldo Polo* tam sublinem dignitatem pertimescente potius quàm appetente, ac seriò monente Cardinales, ut omnia sua consilia ad Dei tantummodò honorem, & Ecclesiæ utilitatem referrent, contigit, ut præter omnium expectationem ad Summum Pontificatum consentientibus suffragiis electus sit sexto Idus Februarii anni millesimi quingentesimi quinquagesimi *Joannes Maria De Monte* Cardinalis, Episcopus Prænestiæ, qui *Julii III.* nomen sibi adscivit, cum hac Sententia: *Vias tuas Domine demonstra mihi*. Eo sedente Romano Pontifice, tria memoratu digna contigerunt, quæ hic ordine referemus. In primis, Concilium, quod sub *Paulo III.* in Tridentina Civitate anno MDXLV. cœptum fuerat, & ab eodem Pontifice Bononiam anno MDXLVII. translatum, ac tandem anno MDXLIX. ob exortas inter Patres super hac translatione dissensiones suspensum erat, *Julius III.* Pontifex Maximus Diploma de Concilio in Civitate Tridentina resumendo promulgavit Kalendis Decembris anni MDL. scripsitque ad omnes

omnes Reges ac Principes Christianos, ut iustis ac piis ipsius hac in re votis annuerent; monuit insuper omnes Prælatos, aliosque, qui de jure, vel consuetudine, vel privilegio, Concilio Generali interesse debent, ut ad Concilium in Civitate Tridentina proximis futuris Kalendis mensis Maji anni sequentis, seu MDLI. resumendum, & proseguendum, legitimo cessante impedimento, accederent. Hoc pacto Concilium in Civitate Tridentina continuatum est, ac sex sub *Julio III.* Sessiones fuerunt celebratæ. At propter Parmense bellum inter Imperatorem *Carolum V.* & Regem Christianissimum *Henricum Secundum*, cujus in fidem, & clientelam se contulerat *Octavius Farnesius* Dux Parmensis à Cæsare bello petitus, coactus est *Julius III.* Pontifex Maximus in tanto belli apparatu & armorum strepitu celebrationem Concilii Tridentini suspendere in Cœtu Purpuratorum Patrum die xv. Aprilis anni MDLII. sicut fusiùs ostendimus in quarto Colloquio, ubi agemus de Conciliis, quæ Sæculo xvi. habita sunt. Altera res memorabilis, quæ sub Pontificatu *Julii III.* contigit, in hoc consistit, quòd dum Lutherani, & Calvinistæ cæco furore abrepti Ecclesiam Romanam impeterent, & Romani Pontificis Primatum apertâ fronte oppugnarent, Divinæ Providentiæ dispositione factum est, ut Syri, qui Nestoriano Schismati diutiùs adhæserant, ad Ecclesiæ Romanæ fidem & unitatem reversi sint, miserintque ad *Julium III.* Legatos, qui eorum nomine obedientiam ipsi exhiberent, & Romani Pontificis Primatum colerent, palàmque profiterentur. Inter hos Legatos, qui à Syris Romam missi sunt, præcipuus erat

erat *Simon Sulakas*, totius Orientis trans Euphratem usque ad Indos Patriarcha electus, qui, oblata Relatione historicâ Ecclesię ac Religionis illarum regionum, Fidei professionem in Palatio Apostolico magnâ celebritate emisit die xx. mensis Februarii anni MDLII. cumque *Julius III.* Pontifex Maximus doctrinâ ac morum probitate præstantem, & Catholicâ fide probatum, Episcopum, consecrari jussit, & Patriarchali pallio suis manibus in Consistorio ornavit, ac demùm variis muneribus donatum remisit in patriam, adjunctis ei aliis nonnullis Religiosis Viris, linguę Syriacę, & rituum Ecclesię Romanę peritis, qui Catholicam Religionem in his nationibus propagare possent. Extant litterę ad *Julium III.* Pontificem Maximum ab iis Orientalibus per *Sulakam* scriptę, quas *Andreas Masius* ex Syriaco Latinas fecit, in quibus primò rogant *Julium* Pontificem, ut prædictum *Sulakam*, quem Patriarcham elegerant, confirmare ac consecrare velit, & unâ cum ipso in patriam regressuro mittat Viros idoneos, à quibus de Fidei rebus edoceri queant. Secundò, apertè docent, sincerisque animis profitentur Primatum Romani Pontificis his verbis: *Tu sedes in sede alta, & sublimi Principis Apostolorum, tenentis Claves Regni Cælestis, cui ore suo salutari Dominus noster dixit: Quidquid ligaveris in terra, erit ligatum, & in Cælo, & quidquid solveris in terra, erit solutum & in Cælo, & super eum fundavit Ecclesiam suam, adversus quam Porta Inferi non valebunt in generatione generationum Tu es caput omnium Patrum, sicut erat Petrus Caput omnium Discipulorum, cui ut est data Sedes alta, & sublimis in terra,*
sic

*sic his ultimis temporibus alta, & excelsa est Sedes tua, ipsa Roma magna, & celeberrima. Plura de hac Syrorum Legatione, eorumque cum Ecclesia Romana unione legesis apud Onuphrium Panuinum, qui rem plenius narrat in Vita Julii III. Pontificis Maximi. Denique, sub Pontificatu Julii III. sublatum est Schisma Anglicanum, Regnante Maria, Regis Angliæ Henrici VIII. & Catharinæ filiâ, quæ ut damna à suo patre Ecclesiæ Catholicæ illata refarciret, evocavit in Angliam Cardinalem Reginaldum Polum, Summi Pontificis Julii III. Legatum, qui Anglos declarantes, pœnitere se scissuræ & ab Ecclesia Romana defectionis, atque ab eo veniam & in gremium Ecclesiæ restitutionem postulantes, absolvit solemniter à Schismate, eoque Ecclesiæ Romanæ, auctoritate sibi à Summo Pontifice concessâ, reconciliavit pridie Kalendas mensis Decembris anni MDLIV. Curavit etiam post hæc idem Cardinalis, Sedis Apostolicæ Legatus, ac diligentissimè invigilavit, ut hortationibus, Synodis, aliisque modis Catholica Religio in Angliâ instauraretur, redirent pii viri exules, pellerenturque è contra depravatæ & hæreticæ doctrinæ sectatores, frequentarentur Academiæ, Cleri restitueretur disciplina, populi reformarentur mores, & antiqua Instituta, piæque consuetudines postliminò revocarentur. Hanc Regni Angliæ mutationem, quæ certè fuit *Dextera Excelsi*, statim ac Julius III. accepisset à Legatis Romam missis, qui Regum & Ordinum Angliæ nomine obedientiam Sedi Apostolicæ, eique præstiterunt, in summam lætitiâ effusus Summus Pontifex, supplicationes publicas non in Urbe tantum, sed per Italiam,*

universam, gratiis Deo agendis, decrevit, & Indulgentiam ad modum Jubilæi per Christianum, Orbem in gratiarum actionem publicavit. Inter *Carolus V.* Imperatorem, & Christianissimum Regem *Henricum II.* quorum iræ ac similitudines in dies exasperari videbantur, pacis conciliandæ percupidus fuit *Julius III.* probè sciens, per horum Principum discordias nova quotidie incrementa Turcas, & Hæreticos suscipere, quos postea coercere, atque in ordinem redigere facili non esset. Legatos itaque ad illos misit, eisque etiam per litteras significavit, seipsum ad pacem componendam lubentissimo animo accessurum, ubi primùm ambo Principes in eam propenderent. Reipublicæ Christianæ Leges utilissimas edidit *Julius III.* & inter alias, contra Blasphemos & Hæreticos Edicta severissima promulgavit, Incredibilem in subditos mansuetudinem & clementiam exercuit, & à cupiditate agnatos suos ultra modum locupletandi alienus fuit. Obiit optimus ille Pontifex decimo Kalendas Aprilis anni MDLV. ætatis suæ anno sexagesimo septimo, mense sexto, Pontificatus anno quinto, die quadragesimo quarto, & sepultus est in Basilica S. Petri.

D. Doleo certè ex animo, quòd tam citò *Julius III.* fuerit è vivis sublatus, cujus Pontificatus ad promovendum Catholicæ Religionis incrementum diuturnior esse dubiislet.

M. Multò brevior fuit Pontificatus *Julii III.* successoris, videlicet *Marcelli II.* qui die vigesimo secundo Pontificatus sui extinctus est incredibili omnium bonorum dolore, quibus aureum sæculum sub hoc Pontifice videndi spes affullerat. Hic

. Ju-

Julii III. in Sede *S. Petri* successor, dictus autem Pontificatum *Marcellus Cervinus*, patriâ *Politianus* fuit, honestis parentibus natus, tantâque modestiâ, continentiâ, probisque moribus ab ipsa adolescentia condecoratus, ut si quid non seriò, sed per jocum inter amicos paulò liberiùs ageretur, aut diceretur, ad *Martelli* adventum omnes illicò conticescerent. Eminabant in eo, ac certatim de palma contendere videbantur ingenii maturitas, prudentia usu rerum consultissima, insignis pietas doctrina eximia, cæteræque virtutes, quæ ipsum ad supremum totius Ecclesiæ Principatum evexerunt. Fuit *Marcellus Cervinus* Cardinalis Presbyter Tituli *S. Crucis* in Hierusalem creatus à *Paulo III.* Pontifice Maximo, missus ad *Carolum V.* Imperatorem, & *Franciscum I.* Christianissimum Regem pro gravissimis Ecclesiæ & Reipublicæ negotiis Nuncius Apostolicus, & in Concilio Generali Tridentino Legatus & Præses, ac tandem post obitum *Julii III.* Pontifex Romanus concordibus Cardinalium suffragiis die nonâ Aprilis anni MDLV. electus, proprium suum nomen *Marcelli* retinuit, voluitque appellari *Marcellus II.* ut inde omnibus testatum faceret, se per hanc supremam dignitatem immutatum non iri. Et sanè res cæteroquì disjunctissimas arctissimo vinculo in se sociavit sanctissimus ille Pontifex, sublimem dico dignitatem cum modestia, exquisitam prudentiam cum candore, doctrinæ studium cum maximis occupationibus, & miram benignitatem cum integerrima æquitate, ita ut, licet nihil momenti haberet apud ipsum gratia, nihil tamen diceret aut faceret nisi gratissimum. Morum reformatio-

nem ardenti studio exoptans, eam ad os Hæreticis obstruendum necessario fieri debere asserbat. Carni & sanguini, ut ait *Spondanus*, adeò nihil tribuit Summus hic Pontifex, ut neminem propinquorum Romam venire voluerit, ac ne fratrem quidem: duos parvulos fratris sui filios, quos ipse in Urbe educabat, à nemine saluari passus fuerit, nec, quo tempore Pontifex fuit, unquam viderit. Interpellatus verò an in Palatium ex privatis ædibus introducendi essent? incunctanter respondit. *Quid illis cum Palatio? eorumne id patrimonium est?* Pacem inter Principes Christianos componere vehementer cupiens *Marcellus* Pontifex Maximus, Oratores Imperatoris, & Galliarum Regis ad se accivit, eisque iussit, ut ad Dominos suos scriberent, ni in pace ineunda consentirent, se non tantum Nuncios & Legatos missurum, sed ad ipsos quoque profecturum, quò illorum animos ad sancendam concordiam, & ad pacis consilia tandem præsentia suâ flectere posset. Severus justitiæ cultor, Oratori Regis Hispaniæ, veniam homicidii pro nobili quodam Romano roganti, respondit idem Pontifex, se Pontificatum ab homicidæ absolutione auspicari nolle. At, dum totus esset Summus ille Pontifex in excogitandis modis, quibus Ecclesiam ab Hæresibus & vitiis, Rempublicam à bellis & dissensionibus, Romanam Curiam à superfluis sumptibus & pompis inutilibus expurgaret; dum omnes magnam de ipsius Pontificatu demonstrarent lætitiâ, & in spem longè majorem erigerentur, huic tam justæ gratulationi, dum fervet, dum increbrescit, ecce tibi repentinus optimi Pontificis interitus, simulque

que percussæ civitatis ægritudo, luctus, con-
 sternatio, squallor intercedit. Obiit Sanctissimus ille
 Pontifex Apoplexiâ ictus postremo die mensis
 Aprilis anni MDLV. Pontificatus sui die vigesimo
 secundo, ætatis suæ anno quinquagesimo quarto.
 Omnes Scriptores Sanctitatem hujus Pontificis
Marcelli II. prædicant, *Sadoletus*, & *Bembus*, Car-
 dinales in Epistolis ad ipsum datis, *Paulus Manu-*
tius in ea, quam ad ipsum pariter scripsit, Episto-
 la, *Bzovius*, *Spondanus*, *Odoricus Raynaldus* in
 Annalibus Ecclesiasticis, & alii, quos inter *Onu-*
phrius Panuinius in Vita hujus Pontificis istud ob-
 servatione dignum refert: *Ea, inquit, simplicitate,*
qua privatus cum esset (seu *Marcellus II.*) *edebat,*
habebatque, sive privatim, sive publicè convivaretur,
Anagnoslem in mensa, qui sacros Libros, aut
SS. Patrum Scripta legeret. Post longum in prandia
silentium, recordatus aliquandò ea Hadriani VI. Pa-
pæ verba: Romano Pontifice nemo est miserabilior,
conditione ejus nulla miserior. Totius enim vita læ-
titia & felicitas amaritudo est: Cathedra Romani
Pontificis est spinosa, iter consertum undique aculeis,
pondus tantæ molis, ut robustissimos premat & con-
fringat humeros: manu mensam percutiens dixit:
Non Video, Quomodò, Qui Locum Hunc Altissi-
imum Tenent, Salvari possint. Quæ verba innuunt,
Romanis Pontificibus in suprema illâ dignitate
constitutis arduam, ac difficilem esse ad salutem
viam.

D. *Marcelli II.* Pontificis Maximi morum
 integritatem, atque in profligandis Hæresibus, &
 restaurandâ Ecclesiæ Disciplinâ zelum æmulatus-
 ne est ejus in Sede Romana successor?

M. Justis *Marcello II.* de more persolutis, *Joannes Petrus Carafa*, è clarissimâ Neapolitanâ familiâ ortus, Cardinalis, Episcopus Ostiensis, Sacri Collegii Decanus, Theatinus olim Archiepiscopus, & Ordinis Clericorum Regularium, qui *Theatini* ab ejus Archiepiscopatu dicti sunt, Conditor, electus est Summus Pontifex die *xxiii.* mensis Maji, Ascensionis Christi Domini memorie sacrâ, anni *MDLV.* &, ob beneficia sibi à *Paulo III.* Pontifice Maximo collata, nomen *Pauli IV.* accepit, & Symbolum, seu signum, *Dominus mihi adjutor*, coronatusque est septimo Kalendas Junii ejusdem anni. Hic Pontifex Decessoris sui *Marcelli II.* vestigia pressit, & in eo summa fuerunt omnia, ex quibus undique perfectus, & detractis quibuscumque vitiis, Pontifex cumulatur. Atque ut ex singulis pauca libemus saltem; omnium disciplinarum, ac præsertim Sacrarum Litterarum, linguarumque Latinæ, Græcæ, Hebraicæ accurratæ notitiæ, maximam à teneris annis vitæ integritatem conjunxerat *Paulus IV.* Pontifex Maximus, ac mira illius erat in negotiis cum publicis, tum privatis penitus introspiciendis sagacitas & perspicacia, in extricandis celeritas, in ponderandis maturitas, in gerendis cautio, in conficiendis diligentia, in providendo ne quid Respublica detrimenti caperet singularis prudentia, & in tractandis ingeniis incredibilis dexteritas. Sunt, quorum ætas integra floret, sed, obrepente mox senectute, ingravescit illorum virtus cum corpore pariter, & magis ac magis hebescent in dies, fracta ad extremum effrataque penitus obsolescit. Longè alius fuit is, quem in præsentia laudo, *Paulus*

lus IV. Pontifex Maximus. Quamvis enim annos septuaginta novem natus esset, dum in Sede Sancti *Petri* ad regendam universam Ecclesiam collocatus est, ejus tamen senectus nec iners, nec languida fuit, sed alacris, & ad res gerendas semper actiuosa. Erat his temporibus soluta & ferè collap-
 psa Ecclesiæ Disciplina, moresque ad tantam licentiam increbuerant, ut faciendæ medicinæ vix jam locus superesse videretur. Venit auspicatò *Paulus IV.* Pontifex Maximus, & quæ delapsa jam fluxerant, æquissimis Legibus vinciens, abusus, quos superiorum temporum negligentia pepere-
 rat, sustulit, mores emendavit, restituit discipli-
 nam, veterem castigavit luxum, & ad pristinam sanctimoniam revocavit. At, quia sæpius contingere solet, ut benè cœpta (quæ humana fragili-
 tas est) propedièm obsolescant; huic incommodo prudenter occurrit summus ille Pontifex, multa summæ severitatis Edicta promulgando, quæ ad mores emendandos pertinebant, certasque ad restaurandam Ecclesiæ Disciplinam regulas præscribendo, ex quibus velut ex fonte plurima sacri Concilii Tridentini Decreta promanarunt. Jace-
 bat Dei cultus; ad illum augendum multa sancivit *Paulus IV.* & abrogatis brevioribus precibus, quæ tunc in Curia frequentabantur, statas Deo laudes ex antiquioris Breviarii formâ ab omnibus per-
 solvi iussit. Leges tulit in Judæos in Ditionibus Ecclesiæ degentes, voluitque, ut certis septis à Christianorum habitatione separatis concluderen-
 tur; Pileum crocei coloris Viri, & velum ejusdem coloris fœminæ gererent, quo signo internosce-
 rentur. Sanxit insuper, ut judæi nec nutrices,

ancillasque Christianas, seu Christianos famulos haberent, eisque districte prohibuit, ne Dominicis festisque diebus publice laborarent, ne cum Christianis luderent, comederent, aut ullam cum ipsis familiaritatem haberent, ne mercaturam exercerent, & ne Medici Judæi, etiam vocati & rogati, ad Christianorum curam accederent. Offensioni vulgò erant propudiosi homines, & impuræ mulierculæ pullulantes ubique, & meretricium exercentes; ad excindendam penitus illam pestem *Paulus IV.* Pontifex Maximus in hujusmodi Lenones & Lenas certis in casibus pœnam capitis, in aliis verò fustium & exilii decrevit. Multæ ac perniciosæ Hæreses Catholicam Religionem sæculo decimo sexto infestabant; *Paulus IV.* Summus Pontifex censervandæ, ac vindicandæ Catholicæ Religionis in Anglia, in Scotia, in Gallia, in Germania, in Polonia, in Dania, in Suecia, in Italia, & toto Orbe Christiano, curas omnes ac cogitationes suas impendit. Et primò quidem pro tuenda, ac propaganda Catholicâ fide Legatos misit ad Principes Christianos, Viros doctos cum *Aloysio Lippomano* Sedis Apostolicæ Legato in Poloniam direxit, *Nonnium Barretum* Societatis Jesu Professore, Patriarchali dignitate donatum, ad Regem Abyssinorum legavit, novos Episcopatus in India Orientali instituit, & numerum Episcoporum in Belgio auxit, tresque illius regionis Ecclesias in Metropoles erexit, Camaracensem videlicet, Trajectensem, & Mechlinensem. Novum etiam Testamentum Syriaco idiomate characteribusque Romæ edi curavit, ut facilius sincera germanaque pietas apud Syros radices ageret, & inde

indè se quaquaversùs propagaret. Ad refrænandam verò petulantiam Hæreticorum, qui ubique terrarum impunè volitabant, Tribunali Sacræ Inquisitionis, seu *Sancti Officii*, majorem auctoritatem dedit *Paulus IV.* statuitque, ut non tantùm de Hæresi, sed de quibusdam aliis criminibus etiam cognosceret hujus Tribunalis Cardinalium Cœtus à *Paulo III.* ad id institutus. *Michaelem Ghislerium* Cardinalem Alexandrinum, Ordinis Fratrum Prædicatorum, qui postea fuit Romanus Pontifex, dictus *Pius V.* summum Inquisitorem creavit, voluitque, ut hujus Tribunalis causæ, quæ antehac sex delectorum Cardinalium autoritate terminari solebant, coram Romano Pontifice, semel in hebdomada, statâ die cognoscerentur. Si hujus Tribunalis Sancti Officii Romæ à *Paulo III.* erecti, & à *Paulo IV.* ampliori auctoritate donati originem, progressus, fructus ac commoda, quæ ex ea percepit Italia, scire aveas, legis *Antonium Caracolum*, Clericum Regularem Theatinum, in *Vita Pauli IV.* libro 3. cap. 3. & seq. ubi multos profert hæreticos, aut de hæresi suspectos, qui hujus Tribunalis Sancti Officii beneficio fuerunt in Italia compressi, & in ordinem redacti; additque neminem fuisse, qui, nomine hujus Tribunalis audito, non extimesceret, non se totum colligeret, non fugam, si sibi malè conscius esset, statim arriperet, cùm in nullo Italiæ loco hæretici, malefici, & improbi homines securos se esse posse existimarent, acerbis pœnis in eos ubique animadvertente Sancti Officii Tribunali, juxta hanc *Tertulliani* in *Scorpiaco* capite vigesimo primo præclaram Sententiam: ad officium Hæreticos compelli,

pellī, non illiciti, dignum est; duritia vincenda est, non suadenda. Quān severus non solum errorum, sed & vitiorum censor esset *Paulus IV.* ex eo facile intelligere potes, quod dum suorum Nepotum vitia comperta habuisset, Decretum absque mora ediderit, quo ipsos iussit Romā secedere cum suis cunctis familiis intra duodecim dies, & Cardinalibus, aliisque inhibuerit, ne unquam secum agerent de indulgendā ipsis veniā, pœnāque remittendā. Obiit *Paulus IV.* Optimus Pontifex die XVII. mensis Augusti anni MDLIX. anno ætatis suæ octogesimo quarto, Pontificatus quinto. Post ejus obitum populus Romanus, cui Sancti Officii Tribunal exosum erat, factā manu, atque conglomerato agmine ad Inquisitionis carceres convolvavit, & cæco furore correptus Commissarium hujus Tribunalis ex Ordine Prædicatorum vulneravit, fores perfregit, reos liberavit. Dein, in odium Inquisitionis suo in Dominicanos converso furore, quoscumque obvios habebat, dilaceravit, eorumque Cœnobio *S. Mariæ super Minervam* faces omni procul dubio admovisset, ni *Juliani Casariani* auctoritate prohibitus fuisset. Postremò, in memoriam *Pauli IV.* tanto impetu sæviit efferatus ille populus, & ad incredibilem furorem derepentē traductus, ut Simulachro ejusdem Pontificis, quod ei in Capitolio ob res præclare gestas erectum fuerat, nasum ac brachiū ignominiosè absciderit. At popularis ille furor non potuit tanti Pontificis obscurare gloriam. Vivit, æternūque vivet in omnium Fidelium animis virtutum illius Summi Pontificis infixæ recordatio. Nunquam intermorietur, nunquam intercidet fidelis memoria *Pauli IV.* qui
omnes

omnes suas curas in tuenda contra Hæreticos Fide Catholica, & in emendandis moribus defigens, primus Romanorum Pontificum, Librorum Prohibitorum Indicem anno MDLIX. promulgavit, in quo non solum Hæreticorum libros, sed etiam Catholicorum, quorum Lectio fidelibus perniciosa esset, sub gravissimis pœnis à quoquam legi, vel haberi prohibuit. Hunc zelum vigilantissimi illius Pontificis, qui non agnoscunt, cæci; qui non amplectuntur, ferrei; qui non prædicant, ingrati omninò sunt, & saxa ac scopulos gestant in cordibus suis. Hinc Sanctissimus Pontifex *Clemens XI.* (quem diù Ecclesiæ suæ sospitem & incolumem servet) Statuam *Pauli IV.* à furente Populo Romano dejectam in Capitolio reponi jussit cum hac Inscriptione in basi incisâ:

PAULO IV. PONT. MAX.

SCLERUM VINDICI INTEGERRIMO

CATHOLICÆ FIDEI ACERRIMO PROPUGNATORI

STATUAM OLIM A S. P. R. IN CAPITOLIO ERECTAM

AC DIU OBSCURO LOCO JACENTEM

CLEMENS XI. PONT. MAX.

RESTITUI JUSSIT

ANN. SALUT. MDCCVIII.

D. Agnosco, amplector, etiam atque etiam prædicabo semper eximias virtutes *Pauli IV.* Pontificis Maximi, præsertim, cum à Viris eruditissimis nuperrimè audierim, hunc Summum Pontificem lectioni Operum *S. Thomæ Aquinatis*, quo Magistro gloriatur, ad supremam usque senectutem tantâ

tantâ cum voluptate vacasse, ut ipsum appellare solitus esset *Baculum senectutis sua*, & de eodem Doctore Angelico aliquandò dixerit: *Extinctam in ipso puerperio Neapolim, cum enixa Thomam est*. Quâ sententiâ innuere volebat Summus ille Pontifex, nunquam Urbem Neapolitanam alterum Thomam, seu alterum ingeniorum, doctrinæ, sanctitatisque miraculum par aut simile Orbi Christiano daturam. Addebant insuper Viri illi eruditi, *Paulum IV.* Pontificem Maximum in perpetuam memoriam præcipuæ illius venerationis, quâ *S. Thomam Aquinatem*, civem suum, prosequabatur, statuit singulis annis Sacra solemnia in Ecclesia *S. Mariæ super Minervam* à sacro Cardinalium Collegio die vii. mensis Martii Doctori Angelico dicatâ celebrarentur, eumque ad Purpuratos Patres Concionem in Sancti Doctoris laudem habuisse, cum primùm peracta est eadem, celebritas, cui etiamnum, recurrente quot annis die vii. mensis Martii, interesse solent Eminentissimi Cardinales, ad quos inter missarum solemnia latinam Orationem, in laudem *S. Thomæ* concinnatam, habet in eadem Ecclesia *S. Mariæ super Minervam* juvenis Familiæ Dominicanæ alumnus. Cum igitur de *S. Thoma*, Magistro meo, tam benè meritis sit *Paulus IV.* non possum quin prodire coram, & erumpere quodam modo gestiari meus erga hunc Summum Pontificem gratus animus, ac summa observantia, quâ illum perpetuò colam. Sed dicas, amabo, num impunita manserit atrox illa injuria, quam Populus Romanus in *Pauli IV.* Pontificis Maximi memoriam, familiam, simulacrum, necnon in *S. Officii Tribunal* intulit?

M. Post

M. Post quatuor menses, & sex dies à morte *Pauli IV.* vacationis Sedis Apostolicæ, *Joannes Angelus Medicus*, Mediolanensis, Presbyter Cardinalis Tituli *S. Priscæ*, electus est Pontifex Maximus, dictusque *Pius IV.* qui à clementia, & humanitate Pontificatum orsus, Populo Romano eorum omnium, quæ in *Pauli IV.* marmoreum simulacrum, & Sancti Officii Tribunalis contumeliam, Sede vacante, quàm tumultuosissimè commiserat, veniam condonavit, eâ tamen lege, ut detrimenta illata, suis sumptibus Sanctæ Inquisitionis Officio refarciret. Dein, volens Summus ille Pontifex (ut legere est apud *Onuphrium Panvinum*, & *Ciaconium* in Vita *Pii IV.* necnon apud *Spondanum* ad ann. MDLX. Num. 11.) volens, inquam, Summus Pontifex *Pius IV.* Romanorû Pontificum propinquis salutare exemplum relinquere, ut populos sibi creditos clementer haberent, & publica negotia pro Ecclesiæ dignitate conficerent; in *Carafas*, *Pauli IV.* Nepotes, tanquàm reos læsæ Majestatis, ac perduellionis, pœnâ mortis animadvertit, illiusque jussu *Carolus Carafa* Cardinalis in carcere strangulatus est, *Joannes* ejus Frater, & Comes *Alifanus*, uxoris frater, atque *Leonardus de Cardine* capita perdiderunt, quæ mox in Cælio ponte ad terrorem exposita sunt. Aliquantò mitius cum *Alphonso Carafa* Cardinali, *Pauli IV.* ex fratre pronepote actum est, quippè qui centum aureorum millibus multatus, vitam obtinuit. Memorabile sanè, ut inquit *Spondanus*, spectaculum, & instabilis fortunæ ludibrium; atque in iis, qui secundiori aura altiùs provecti extra omnem sortem se collocatos existimant, amplissimum documentum,

si

si essent qui recogitarent . Observant tamen mox à me laudari Hiltorici, Carafarum, *Pauli IV.* nepotum, causam jussu *Pii V.* Successoris *Pii IV.* fuisse retractatam, & post accuratum Actorum examen, *Pium V.* Sanctissimum Pontificem, memorem beneficiorum, quæ à *Paulo IV.* acceperat, Carafarum familiæ famam, titulos, honores & bona restituisse, eique jus ad Dignitates reddidisse. De Concilio Tridenti restaurando statim à coronatione sua sollicitus *Pius IV.* Pontifex Maximus, Nuntios eâ de re misit ad *Ferdinandum* Imperatorem, ad Regem Catholicum, & ad *Franciscum II.* Galliarum Regem, cæterosque Principes, ac tandem perruptis omnibus difficultatibus, solemnnes Romæ ad impetrandum Dei auxilium supplicationes habuit à Basilica S. Petri usque ad Ecclesiam S. Mariæ super Minervam, universale Jubilæum promulgavit, & in Purpuratorum Patrum Senatu tertio Kalendas Decembris anni MDLX. Diploma edidit, quo Synodi, Tridenti, sublatâ omni suspensione, ad diem Paschatis anni MDLXI. celebrandæ continuationem indixit, misitque Legatos, qui ejus nomine ei præessent. Prima sub *Pio IV.* quæ tamen numeratur à Concilii Tridentini exordio, Sessio decima septima, inita est, invitati sunt etiam Hæretici ut ad Concilium animo pacifico accederent benignè suscipiendi, & audiendi, eâque de causâ promulgatum est publicæ fidei ac securitatis Edictum, seu, ut ajunt, Salvus Conductus, qualis ab initio ejusdem Concilii fuerat jam expeditus sub *Paulo III.* Pontifice Maximo. Tandem post annos viginti septem ab Indictione Concilii Tridentini, peractis viginti quin-

que

que Sessionibus, singulari *Pii IV.* Pontificis Maximi studio & vigilantia, universali Concilio Tridentino finis anno MDLXI I. impositus est; Patribus ita acclamantibus: *Beatissimo Pio Papæ Domino, sanctæ, & universalis Ecclesiæ Pontifici, multi anni, & æterna memoria.* Synodum Tridentinam Diplomate dato VI I. Kal. Februarii anni MDLXIV. confirmavit *Pius IV.* Indicem Librorum prohibitorum à selectis Patribus in Oecumenica Synodo adornatum promulgavit. Episcopis Residentiam in suis Dioccesibus imperavit; non residentium, Bona, ut spolia Sedi Apostolicæ vindicavit. Curia etiam Romanæ disciplinam, & solutos Aulicorum mores emendare pro viribus studuit. In aliquos Episcopos Gallicanos, qui aperte à Fide Catholica defecerant, sed præsertim in *Odetum Castilionæum* Cardinalem & Episcopum Bellovacensem, qui, depositâ purpurâ, ac relictis Episcopatus insignibus, se Comitem Bellovacensem nuncupabat, & Calvinianam Hæresim in sua Diocesi stabilire satagebat, Sententiam in Consistorio Secreto habito anno MDLXI I. pronunciavit *Pius IV.* quâ illos, ob manifestam in Hæresim prolapsionem, Sacerdotiis privavit, *Odetum* verò *Castilionæum*, Cardinalem & Episcopum Bellovacensem, ab omni Cardinalatus commodo, & honore, atque etiam à privilegio Clericali ipso jure depositum, & Ecclesiæ Bellovacensis administratione, ac omnibus beneficiis, officiis, honoribus, dignitatibus, ac prælaturis privatum, & ad illa inhabilem, & perpetuò incapacem declaravit. Hæc Pontificis Sententia habetur in Constitutione sexagesima sexta *Pii IV.* quæ extat in Bullario Romanæ

mano, ejusque meminere *Onuphrius Panuinus*, qui tum temporis Romæ aderat, in *Vita Pii IV. Homerus Tortora* libro 3. *Historiæ Francorum*, *Jacobus Augustus Thuanus* libro 35. suæ *Historiæ*, & *Henricus Spondanus* in *Continuatione Baronii* ad annum MDLXIII. Num. xx. Hujus Sententiæ in se à Pontifice latè nuncium ubi accepisset *Odetus Castilionæus* Cardinalis, & Episcopus Bellovacensis, irâ excaudit, & in contumeliam Pontificis, ut refert *Spondanus* ad annum MDLXIII. Num. XLIX. habitum Cardinalis, quem ante deposuerat, resumpsit, eoque indutus uxorem duxit *Isabellam de Altavilla* Dominam de Lore, & in celebri Principum ac Procerum Regni Conventu (in quo *Carolus IX.* Galliarum Rex, Major in Senatu declaratus, Regni administrationem suscepit) eodem Cardinalitio habitu inter cæteros comparuit, magno Catholicorum scandalo, id ad summum auctoritatis Pontificiæ contemptum, & Ordinis Ecclesiastici derisum pertinere existimantium. His commotior factus *Pius IV.* Pontifex Maximus, ejus privationem ac depositionem, quæ facta fuerat in Consistorio Secreto, die xi. mensis Septembris publicari, & locis consuetis Romæ affigi curavit, eandemque typis mandari, & ejus exemplaria per Gallias disseminari. Hinc factum est, ut *Odetus Castilionæus* Pseudo-Cardinalis, fugiens periculum, quod sibi ob hæresim, quam palam profitebatur, imminabat in Gallia, ubi pessimè apud omnes Catholicos audiebat, in Angliam, jam hæresi infectam, unâ cum suâ pellice anno MDLXVI. secesserit, ut liberiùs viveret sub Regina *Elizabetha*, quæ suo patrocinio hæreticos impensè fovebat, & apud

apud quam prædictus *Odetus Castilionæus* auctoritate & gratiâ, quamdiù vixit, plurimum valuit, ut legere est apud *Ciaconium* in ejus Vita. Dùm in Hæreticorum exterminium, morumque emendationem totus incumberet *Pius IV.* Pontifex vigilantissimus, in morbum incidit, & susceptis magnâ religione ac pietate Sacramentis Ecclesiæ, in verborum Sancti senis Simeonis: *Nunc dimittis Servum tuum Domine secundum Verbum tuum in pace* prolatione, integris sensibus placidèque mortuus est v. Idus Decembris anni MDLXV. Pontificatus anno v. mense xi. die xv. Testatur *Onuphrius Paninus*, hunc Pontificem literarum scientiâ, negotiorum magnâ experienciâ, mirâ animi patientiâ, in laboribus perseverantiâ, eloquentiâ non mediocri, memoriâ singulari, ingenio sagacissimo, aliisque eximiis virtutibus fuisse exornatum. Sed longè majori laude, meâ quidem sententiâ dignus est *Pius IV.* Pontifex Maximus, quòd dederit Ecclesiæ Nepotem suum Cardinalem *Borromæum*, virum pietate in Deum, contemptu rerum mundanarum, zelo propagandæ fidei, & studio reformatæ Ecclesiæ insignem, resumendæ Concilii Tridentini celebrationis præcipuum auctorem, ejusque ad exitum deducendi impulsorem, de quo plura dicemus in quinto Colloquio, ubi Virorum Illustrium Sæculi xvi. Gesta, & Opera referemus. Post *Pii IV.* obitum, ejus corpus sepultum est in Basilica Vaticana juxta Sacellum *Innocentii VIII.* indèque ad Ecclesiam S. Mariæ de Angelis in Thermis apud Carthusianos, quos maximis beneficiis auxerat, die iv. Januarii anni MDLXXXIII. translatum est, ubi visitur ante

Aram maximam ejus Monumentum cum hoc Epitaphio :

D. O. M.

PIUS IIIJ. PONT. MAX.

MEDICES . MEDIOLANENSIS .

SEDIT. ANNOS . V. MENS. XI. DIES . XV.

VIXIT. ANNOS . LVI. MENSES . IX.

OBIIT. V. IDUS. DECEMB. MDLXV.

JOANNES . ANTONIUS . SORBONELLUS .

EPISCOPUS PRÆNESTINUS .

CONSOBRINO .

CAROLUS BORROMÆUS . S. PRAXEDIS .

MEDIOLANENSIS .

M. SITICUS . DE ALTEMPS . GERMANUS .

CONSTANTIENS . S. Mariæ . TRANSTIB.

TITT. PRESBB.

AVVNCULO

S. R. E. CARDDD. POSUERE .

D. Narrabat mihi nudiustertius Vir eruditus , S. *Carolus Borromaum* Cardinalem & Nepotem *Pii IV.* authorem fuisse Cardinalibus , ut post *Pii IV.* Pontificis Maximi obitum, *Michaelem Gbiserium* Cardinalem Ordinis Prædicatorum eligerent in Romanum Pontificem , dictum postea *Pium V.* Sed quo pacto hæc Sanctissimi illius Pontificis *Pii V.* facta fuerit electio, & quibus virtutibus ipse in Pontificatu præsertim eluxerit , scire vehementer aveo .

M. Non tantum certè tibi & mihi otii est , ut omnia , quibus Sanctissimus Pontifex *Pius V.* inclaruit, præclare Gesta possim ipse in hac Historiæ Ecclesiasticæ compendiosa narratione singillatim

tim persequi, velimque opus longi laboris agredi. Abundè itaque sufficiet, præcipua *Pii V.* Pontificis Maximi Gesta percurrere, & è plurimis pauca derivare, quæ tamen, summam etsi enarrata, haud obscurè ostendent, quantâ prudentiâ & sanctitate *Pius V.* universam Ecclesiam gubernarit. In primis, *Pius V.* qui ante Pontificatum appellabatur *Michael Ghislerius*, oriundus erat è Senatoriâ Bononiensi Ghislerianâ familiâ, quæ tamen Bononiâ, civilium turbarum causâ, vel ejecta, vel sponte suâ, domicilium fixit in Oppido agri Alexandrini, dicto *Boscho*, ubi *xvi.* Kalendas Februarii anni *MDIV.* natus est *Michael Ghislerius*, qui piè à parentibus educatus, & litteris excultus, statim ab ipso incuntis ætatis principio, impulsu Spiritus Sancti fugit è patria, & Ordini *S. Dominici* nomen dedit, in quo ita vixit, ut omnibus tanquam exemplum continentiæ, tolerantie, frugalitatis, obedientie, & cæterarum virtutum proponeretur; cumque jam pridem ad summam virtutis perfectionem pervenisse judicaretur, ipso tamen quotidie se ipso melior ac perfectior cerne-
retur. Demandatum sibi Sanctæ Inquisitionis Officium præclarè, & summâ cum laude obivit, & in eo studium conservandæ veræ ac Catholicæ Religionis, & adversus eos, qui illam ullâ ex parte labefactare moliebantur, implacabile odium eluxit. Cum Hæreticis perpetuum bellum gerens, ne punctum quidem temporis in vita ab eis vexandis, & exagitandis conquievit. Exedebat animum ipsius zelus Ecclesiæ, neque quisquam unquam veriùs idem, quod olim *David*, dicere potuit: *Nonne qui oderunt te, Domine, oderam, & su-*

per inimicos tuos tabescebam? Hinc non mirum, si eo in munere in Hæreticos inquirendi impigrè perfungendo, tot Potentum inimicitias, tot minas, tot pericula, tot vitæ ac capitis dimicationes incurrerit, sustinuerit, devorarit, à quibus sapiùs à Deo fuit mirabiliter liberatus. Ob hæc tanta, ac tam præclara in Christianam Rempubli-
cam merita, primùm Episcopus Nepesinus ac Su-
trinus, Dein, à Paulo IV. Pontifice Maximo
Presbyter Cardinalis Tituli S. Mariæ super Miner-
vam, & Supremus Inquisitionis Moderator crea-
tus est, eâque dignitate auctus singularis pruden-
tiæ ad videnda quæ vera & recta essent, infracti
animi, & libertatis ad eadem proferenda, aucto-
ritatis ad ea obtinenda, toti Ecclesiæ multa argu-
menta exhibuit. In dicenda sententiâ non respec-
xit ad carnem & sanguinem, nihil metui aut gra-
tiæ dedit, nunquàm ad cuiusquam voluntatem
orationem suam accommodavit, nunquàm quid-
quam veritate prius aut antiquius habuit. Post
obitum Pii IV. à quo Archiepiscopus Montis-Re-
galis in Subalpinis Michael Ghislerius fuerat insti-
tutus, præter omnium expectationem, nihilquo
tale ipse cogitans, à Cardinalibus in Conclavè
ingressis divino consilio electus est Romanus Pon-
tifex VIII. Idus Januarii anni MDLXVI. dictusque
Pius V. Illicò expaulluit electus in Pontificem,
Pius V., & penè in deliquium incidit, rogatus-
que causam, ingenuè dixit: *Cùm essem Religiosus*
Ordinis S. Dominici optimè sperabam de mea salute;
creatus verò Episcopus capi de ea formidare; nunc
verò electus in Pontificem penè de ea despero. Quomodo
enim Deo rationem tot millionum animarum, quos
sunt

sunt in eo Orbe , reddam , qui vix unius animæ meæ rationem reddere valeo ? Quibus verbis insinuare volebat *Pius V.* quàm ægrè sibi Pontificatus impositum onus suscipiebat . Hujus Sanctissimi Pontificis *Pii V.* electionem potissimum promovit Sanctus *Carolus Borromæus* Cardinalis & *Pii IV.* Pontificis Maximi nepos, qui jam pridem eximias illius virtutes penitus exploratas habebat , eumque præ cæteris dignissimum , cui summa Ecclesiæ potestas deferretur , sapientissimè judicabat . Nec eum , aliosque Electores fefellit eventus . In ea quippè celsissima Sede constitutus *Pius V.* Pontifex Maximus , in id totus incubuit , ut rem Catholicam , si quâ in parte nutaret, constabiliret; labantem fulciret , inclinatham erigeret , stantem firmaret, atque firmatam ornaret : ut Populorum salutē consuleret , egenorum necessitatibus succurreret , omniumque utilitati prospiceret . Eandem in vitâ cultuque parcimoniam , eandem interioris vestitus asperitatem , eandem à certis ciborum generibus abstinentiam , easdem preces , eademque jejunia , quibus à principio se , cùm adhuc in Monasterio esset , assuefecerat, retinuit *Pius V.* Pontifex Maximus . Tota ejus Familia ad exemplum Domini composita , nullâ re magis , quàm modestiâ singulari , & præcipuâ quâdam sanctimoniâ vitæ à vulgaribus familiis discernebatur . Atque hæc privatim . Publicè autem quot & quanta beneficia in hanc Urbem , & in totam Rempubli-
cam Christianam contulit *Pius V.* Summus Pontifex ? Leges Sanctissimas pro bono Urbis regimine sanxit , quibus usuras compescuit , Gladiatorum Spectacula interdixit , Clericis districtè inhibuit ,

ne ludis operam darent, ne lautis comessationibus gulæ indulgerent, ne choreis interessent, ne cauponas adirent, aut quidvis aliud agerent, quod vitæ Clericalis sanctitatem fœdare posset. Judiciorum severitatem, quam jam improbissimus quisque aut eludere, aut perrumpere solebat, renovavit. Adultam ac prævalidam meretricum licentiam cohibuit, & Urbem quibusdam hominum pestibus, & tetrâ colluvione mulierum, quæ, ob turpem, quæstum, unicuique corporis sui copiam facientes, lubricam juventutem blandimentis ad libidinem inescabant, purgavit. Hinc, sicut boni de Pontificatu *Pii V.* summâ alacritate perfundebantur, ita improbi tristes & abjecti erant, dumque illi gaudio triumphantes, quasi in cœlum sublati viderentur, hi ad spectum hominum lucemque fugientes, quasi infrâ terram amandati cernebantur. difficile dictu esset, quot familias inopes sustentarit, quot miseros, quos inopiæ suæ pudebat, adjuverit largitate, quot virigines, quarum pudicitia periclitabatur, constitutâ dote, ab infamia liberaverit *Pius V.* Pontifex Maximus. Hanc Summi illius Pontificis ergâ omnes beneficentiam ac liberalitatem sat superque prædicant & innumerabilium privatorum inopia sublevata, & infinita illa vis pecuniarum, quâ omnibus propè Orbis Christiani partibus, aliquâ difficultate pressis, ac laborantibus, sine ulla cunctatione subvenit. Nullis sumptibus, nullis laboribus pepercit Summus ille Pontifex, ut Catholicam Fidem variis erroribus impetitam ubique terrarum tueri, ac sartam tectam conservare posset. Quid non fecit, ut frangeret in Galliis conatus Calvinistarum, nobilissi-

mun

mum illud Regnum pestibus purgaret, & Hæresis,
 velut Hydræ, in suam & aliorum perniciem con-
 tumacis, assiduè renascentia capita amputaret?
 magnâ vi auri, multisque millibus militum suppe-
 tias tulit *Carolo IX.* Galliarum Regi, qui sui Re-
 gni, Fideique conservationem precibus *Pii V.*
 ejusque sanctitati se acceptam referre palàm pro-
 fessus est. In Belgio quoque, quod perduellium,
 Hæreticorum, quibus Gallia laborabat, furoribus
 vexabatur, rem Catholicam plurimum juvit, la-
 bantem Fidem erexit ac sustentavit, furore hære-
 ticorum, in Religionis Orthodoxæ perniciem ir-
 ruentium, represso. Quid dicam de Angliæ Regno?
 in quo ut Catholicos tueretur adversus insectatio-
 nes Reginæ *Elizabethæ*, quæ in eos crudelitèr desæ-
 viebat, anathemate impiam illâ Reginam perculit,
 & Regno Angliæ jure merito privavit, tum quia
 spuria erat *Henrici VIII.* Angliæ Regis proles, ac
 subindè nec jure nataliū, nec Regni Legibus capax
 in Regiam dignitatem successionis; tum quia etiam
 Regina *Elizabetha* potestate malè partâ ad Catho-
 licæ Religionis eversionem abutebatur, ut potè
 quæ tyrannidem in Catholicos Præsules, Sacerdo-
 tes, & alios orthodoxos exercebat, subditosque
 suos ad ejurandam Romani Pontificis obedientiam
 juramento obstringebat, ac se unam pro Ecclesiæ
 Anglicanæ Capite non minùs superbè, quàm im-
 piè gerebat. Adversus eamdem Reginam *Eliza-
 betham* egregiè *Pius V.* Pontifex Maximus, patro-
 cinium suscepit *Maria Stuarta*, Reginæ Scotiæ,
 eximiâ in Deum pietate, invictâ animi magnitu-
 dine, prudentiâ supra sexum, formâ præstantissi-
 mâ præditæ, & in Catholica Fide constantissimæ,

quam Regina *Elizabetha*, nullâ juris gentium, nullâque fidei publicæ habitâ ratione, in carcerem conjecerat, eamque postea, innocentem licet, oppressit, ac ultimo affecit supplicio, veritate *Maria*, Scotiæ Regina, Catholicorum ope Regnum recuperaret, hæreticosque reprimeret. Prætermitto, ne longior sim, Germaniam, Prussiam, Poloniam, aliasque Orbis Christiani regiones, in quibus nihil non egit Sanctissimus Pontifex *Pius V.* ut rectæ Fidei securitati prospiceret, ac penitus disturbaret consilia, molitionesque Hæreticorum, qui Catholicis negotium facessiebant, atque Ecclesiæ Romanæ exitium parabant. At silentio prætermittere hæud possum immortale, & omnium gentium, omniumque sæculorum prædicatione celebrandum beneficium, quo universam Rempublicam Christianam affecit *Pius V.* re & nomine sanctissimus Pontifex. Nomini Christiano extremam perniciem tum temporis minabantur Turcæ, qui suoapte ingenio feroces, & tum maxime propter recentes victorias spe atque animis inflati, tantos sibi spiritus, tantam arrogantiam sumptserant, ut Classem Christianorum à se unico flatu exsufflatum iri, eâ verò semel disjectâ, quasi januâ quâdam effractâ ac revulsâ, omnes sibi Christianorum portus, omnem oram maritimam apertam fore arbitrarentur. Ad hanc formidandam, Turcarum potentiam conterendam, Cardinalem Alexandrinum, nepotem suum, Summus Pontifex Legatum misit in Hispaniam, in Lusitaniam, in Galliam, ut nihil intentatum relinqueret, quod ad Christi gloriam & Christianorum salutem pertineret. Tandem, initâ cum *Philippo II.* Hispania-

rum,

rum Rege, & cum Venetis belli contra Turcas gerendi societate, Pontificiæ Classi *Marcum Antonium Columnam*, omni præconio majorem, præfecit *Pius V.* Christianorum Classis Turcicam longè potentio rem ad Echinadas Nonis Octob. an. MDLXXI. obviam habuit, & commissio prælio, sine magna Christianorum clade, hostium cæsa quadraginta millia, decem & eò amplius millia capta, centum nonaginta quinque illorum Triremes, aliaque complura navigiorum genera in Christianorum potestatem redacta; plus quindecim Christianorum captivorum millia è barbarica servitute erepta; Verbo dicam, nulla post hominum memoriam parta victoria est, in qua & admirabilis sed divini numinis potentia clariùs ostenderit, & virorum fortium virtus magis præfulserit. Hanc victoriam pepererunt lachrymæ, sacrificia, elemosynæ, preces ac jejünia *Pii V.* Pontificis Maximi, qui, ut alter Moyses, manus in Cælum tollebat, dum *Marcus Antonius Columna*, qui Classi Pontificiæ summo imperio præerat, velut alter *Josue*, profligabat Amalecitas. At, prohi dolor! dum lætitiâ maximè gestit, dum omnes Deo vota nuncupant, & Sanctissimo Pontifici diuturnam vitam apprecantur, tam justæ omnium gratulationi intercessit lethalis morbus *Pii V.* qui vitam sanctissimè actam, non minùs sancto fine conclusit. Per quadraginta totos dies tantam vim doloris perpeßus est, quanta maxima in hominem cadere potest, nunquàm tamen ullam vocem, quæ vim doloris exprimeret, emisit, sed illud in ore frequentissimè habuit: *Domine, adde ad dolorem, sed adde ad patientiam.* Quin, & septem præcipuas Urbis

Urbis Basilicas invifere voluit , & quamquàm viribus corporis gravitate ac diuturnitate morbi difiectis , magnam itineris partem pedibus confecit , apertè proficiens , velle fe eorum reliquias poftremùm videre , quos fe non multò poft vifurum effe fperaret in Cœlo . Obiit *Pius V.* Pontifex Maximus Kalendis Maji anni MDLXXII. eumque in vita & poft mortem miraculis clarum *Clemens X.* anno MDCLXXII. Beatis accenfuit , & *Clemens XI.* quem diu Ecclefiz fuæ fofpitem & incolumem ferveat , Sanctorum Faftis adfcripfit XI. Kalendas Junii anni MDCCXI. Corpus *S. Pii V.* quod humili Sepulchro in *S. Andreae* Sacello primum conditum fuerat , poftèa *Sixtus V.* anno MDLXXXVII. tranftulit in magnificentiffimum Sepulchrum , quod ei in *Basilica S. Mariae Majoris* excitaverat . Tandem Reverendif. Pater *Antoninus Cloche* , totius Ordinis Prædicatorum Magifter Generalis , anno MDCXCVIII. facultatem impetravit , Corpus Sancti *Pii V.* è loco fubterraneo , in quo jacebat , eruendi , illudque reponendi in Arca , quam è nitido marmore ornatam , elaborandam curavit , ubi nunc vifitur , publicæ piorum venerationi in eâdem *Bafilicâ S. Mariae Majoris* expofitum , & frequentiffimo concurfu illius patrociniũ implorantium in dies magis cultum . Si præter hæc pauca , & carptim à me narrata , plura de Vita , Sanctitate , Geflis & miraculis *S. Pii V.* Pontificis Maximi fcire percupias , confule *Gabutium* , & *Bzovium* , qui fuſè de *S. Pio V.* latinè ; *Fueilletum* , qui Gallicè ; *Fuenmajorem* , qui Hispanticè ; *Catenam* , & *Paulum Alexandrum Maphæum* , qui Italicè Sancti *Pii V.* vitam conſcripferunt .

D. Cer-

D. Certè tot virtutum præsidis & ornamentis instructus Sanctissimus Pontifex *Pius V.* rerumque, quas in Pontificatu ad Reipublicæ Christianæ salutem, ad Fidei Catholicæ propagationem, sui que nominis gloriam immortalem præclare gessit, magnitudine clarus, satis suo exemplo ostendit, non adeò difficilem esse sanctitatis cum maiestate conjunctionem, quæ in aliis Principibus laudabilis, in Pontifice verò necessaria omninò videtur. Quare non dubito, quin in locum Sancti *Pii V.* cujus mors gravem Ecclesiæ intulit iacturam, & omnes bonos summo mærore affecit, Cardinales alium suffecerint Pontificem, his virtutibus exornatum, quæ ferendo oneri parem, & isto honoris amplissimi fastigio dignissimum reddiderint.

M. Concordibus quinquaginta duorum Cardinalium suffragiis III. Idus Maji an. MDLXXI. Sancto *Pio V.* datus est successor *Hugo Boncompagnus*, patriâ Bononiensis, Tituli Sancti *Sixti* Presbyter Cardinalis, qui *Gregorius XIII.* fuit in Pontificatu nuncupatus. Hæc subita & concors totius Cardinalium Collegii in hac electione consensus non sine singulari divinæ providentiæ afflatu, & certâ atque exploratâ electi Pontificis opinione, virtutum contingere potuit. Et sanè multis ac præclaris virtutibus emicuit *Gregorius XIII.* Pontifex Maximus, quas inter potissimum eminebant prudentia, quam nihil inflectere; fides & constantia in promissis, quam nulla temporum asperitas labefactare poterat; in colendo Deo pietas sine simulatione, in regendis hominibus severitas sine supercilio; in administrandis negotiis

gotiis & sine festinatione diligentia , & sine tarditate gravitas ; denique in propaganda fide & exterminandis Ecclesiæ hostibus sine ullâ intermissione vigilantia. Ab ipso sui Pontificatus exordio zelum, quo, ad tuendam & in variis Orbis regionibus promovendam Catholicam Religionem flagrabat, prodidit. Ejus adhortationibus, missisque ad Christianos Principes Legationibus, ingens fuit parata Christianorum Classis contra Turcas, quæ tamen, discordiâ & cunctatione Ducum, Christianæ rei adversus Infideles promovendæ inutilis fuit, ac re infectâ discessere fœderati. Misit etiam idem Summus Pontifex ad Magnum Duce[m] Moscovitarum *Joannem Basilii*, ad Japonios, ad Armenos, ad Jacobitas, ad Indos, ad Maronitas, & ad alias nationes, religiosos viros, qui doctrinâ & pietate præstantes, Catholicam Religionem in his regionibus mirificè propagarunt. Verùm, ut candidè fatear, *Gregorii XIII.* in conservanda Catholica Religione zelus nullibi magis quàm in Galliis resplenduit. At enim, sedente eo Pontifice, Galliarum Regnum, quod antehac non à suis tantùm, sed ab aliorum quoque finibus hæreticos, aliosque hostes nominis Christiani tam sæpè, tantâque cum laude depulerat, quod Europam, Asiam, & Africam gestis pro Christi fide bellis nobilitaverat, quod violatam ab aliis Sedis Apostolicæ dignitatem tam sæpè restituerat, tam firmis præfidiis sepserat, tam multis ornamentis affecerat : hoc, inquam, florentissimum Galliarum Regnum, sedente Romano Pontifice *Gregorio XIII.* miserum in modum lacerabatur ab Hæreticis Calvinistis, Sedis Apostolicæ
infen-

infensissimis hostibus, qui, divini numinis metu jam pridem projecto, Legum autem & judiciorum auctoritate contemptâ ac conculcatâ, strages, calamitates, vastitatem, ac crudelissimorum facinorum exempla in Galliarum Regnum intulerunt. Horret ac refugit animus ea memorare, quæ per illas pestes ac furias ab humani generis hoste immixtas contigerunt. Vidisses prophanata everfa, incensa augustissima Tempia; Sacerdotum Aras cæde maculatas; abstractas ex Sedibus suis Virgines Deo Sacras, direptas urbes, excarnificatos homines, campos manantes sanguine, fluviorum cursus humanis corporibus impeditos, plena omnia licentiæ, plena rapinarum, plena scelerum, plena hostium & externorum & domesticorum. Hæc, aliaque id genus gravissima mala non sine lacrymis adspiciens *Gregorius XIII.* Pontifex Optimus, *Henricum III.* Galliarum Regem adversus Hæreticos Calvinistas pecuniâ & copiis adjuvit, atque, præter subsidium decies centenûm millium Librarum Turonensium, quas ex fructibus Ecclesiarum istius Regni exigi permisit, ad subveniendum insuper Regis & Regni necessitatibus, potestatem fecit Cardinalibus & Episcopis ejusdem Regni alienandi bona immobilia Ecclesiarum, ex quibus alia decies centena millia librarum Turonensium redigerentur, *Henrico III.* Regi persolvenda. Hoc *Gregorii XIII.* subsidium, ejusque in conservanda Religione Catholica singulare studium rebus in Galliarum Regno afflictis maximam levationem attulerunt. Catholica Religio multis in locis à quibus exulabat, restituta; Bona sua, & exercendorum munerum suorum facultas Ecclesiæ Ministris

nistris reddita; multorum animi, qui nutabant, confirmati; & adhibita remedia multis malis, quæ superiorum temporum calamitate importata erant. Præter hæc, quæ tuendæ ac propagandæ Catholicæ Religionis studio incensus *Gregorius XIII.* variis in regionibus gessit, alia pauca memorabo. Fratricellorum, qui *Illuminati* dicebantur, Sectam repullulantem extinxit. *Franciscum Toletum*, Societatis Jesu Virum doctissimum, misit Lovanium, ut induceret *Michaellem Bajum*, Facultatis Lovaniensis Doctorem, ad retractandas *LXXIX.* propositiones à se, & à suo Decessore Sancto Pio V. damnatas, quod *Franciscus Toletus* ex animi sententiâ confecit. Cophtos ad Romanam Ecclesiam colendam adduxit *Gregorius XIII.* Neophytis, Græcis, Maronitis, Germanis, Anglis Romæ Collegia crexit. Romanum Collegium Societatis Jesu fundavit, annuis censibus munificentissimè dotavit, ingentibusque Beneficiis ac Privilegiis auxit. Prætermitto varia ornamenta, quibus Summus ille Pontifex Romam novis fontibus, Basilicis, horreis, pontibus, palatiis, viis, porticibus amplificavit, decoravit. Nihil dicam de Emendatione Calendarii jussu ejusdem Romani Pontificis factâ, quia de illâ sat superque disserui in Apparatu Chronologico, quem adjeci ad calcem libri, quem publicâ luce donavi, *De Mysteriis & Annis Christi*. De Religiosis Ordinibus, quos approbavit *Gregorius XIII.* & de Privilegiis, quæ eis concessit, commodius agemus in sexto Colloquio, ubi de Monastica sæculi decimi sexti Disciplinâ sermonem habituri sumus. Omnes itaque *Gregorii XIII.* Pontificis Maximi virtutes coronabo hoc
Elo-

Elogio, quo eum prosequitur *Ciaconii* in *Vitis Pontificum Continuator*: *Erat Gregorius in audiendis negotiis patiens, in transigendis solers, eloquio gravis, responsis opportunus, natura benignus & misericors, victu ac potu temperatissimus: in Pauperes verò & doctos beneficus & mirum in modum liberalis.* Hujus in Viros doctos beneficentiæ egregium argumentum dedit Summus ille Pontifex, dum Imperatorem, & Galliarum Regem monuit, ut ad vacantia Ditionum suarum Beneficia digniores promoverent, jussitque Metropolitanis, ut Catalogum virorum moribus, litteris, & prudentiâ illustrium, quos quisque in finibus haberet, ad se mitterent, ne indignis Ecclesiarum regimen committeret. Nec mirum sanè, quòd in Viros eruditos adeò propensus esset Summus iste Pontifex, cum ipsemet sic litteris esset addictus, ut earum studia, si quandò per negotia licebat, nunquam intermitteret, dicere solitus: *Nullum magis decere plura scire, quàm Pontificem Romanum*: Obiit *Gregorius XIII.* die x. Aprilis anni MDLXXV. ætatis LXXXIV. Pontificatus XII. eique marmoream Statuam in Capitolio crexit grata Romana civitas, multis ab eo cumulata beneficiis.

D. Dùm Sæculi decimi sexti Romanorum Pontificum res præclare gestas mecum tacitus perpendo, faciliè intelligo, illos omnibus his præfuisse dotibus, quibus Sanctus *Antoninus*, quem nuperrimè legebam, Romanum Pontificem præditum esse debere asserit in Oratione, quam habuit ad *Callixtum III.* Pontificem Maximum, quamque inseruit Chronico suo Tit. XXI. Cap. XVI. ubi Romani Pontificis dotes exprimit his verbis: *Decet talem*

talem ac tantum Pontificem pro hominibus assumptum in his, quæ ad Deum sunt, normam fore justitiæ, San-ctimonie speculum, pietatis exemplum, veritatis assertorem, defensorem Fidei, Doctorem gentium, Ducem Christianorum, Amicū Sponsi, Sponsæ Paranympum, Ordinatorem Cleri, Pastorem plebium, Magistrum insipientium, oppressorum refugium, Advocatum pauperum, spem miserorum, Tutorem pupillorum, Judicem Viduarum, oculum cecorum, linguam mutorum, baculum senum, ultorem scelerum, metum malorum, gloriam bonorum, virgam potentium, mal-lem Tyrannorum, Patrem Regum, moderatorem Legum, Canonum Dispensatorem, Orbis terræ lumen, Vicarium Christi, Christum Domini, Deum Pharaonis. Has omnes dotes, quibus, teste S. Antonino, in Ecclesia Romanus Pontifex præcellere debet, cer-nere licet in his Sæculi XVI. Pontificibus, quos hætenus laudasti; nec dubito, quin alii Summi Pontifices, qui post Gregorium XIII. Apostolicam Sedem eodem Sæculo tenuerunt, pari virtutum splendore universam gubernaverint Ecclesiam.

M. Post obitum Gregorii XIII. Cardinales in ejus locum subrogarunt Felicem Peretum de Montealto, Cardinalem ex Ordine Fratrum Con-ventualium Sancti Francisci assumptum, quem die xxiv. Aprilis anni MDLXXXV. Romanum Ponti-ficem elegerunt, dictum Sixtum V. Virum humili quidem loco natum, sed animo excelsum, intrepidum, totique Orbi regendo parem. Reginam Angliæ Elizabetham anathemate perculit Sixtus V. quod impia illa mulier non solum crudeli carnifi-cinâ in omnes Catholicos grassaretur, verum etiam per summam & à Sæculis inauditam perfidiam

diam ultimo supplicio affecisset innocentissimam *Mariam Stuartam*, Reginam Scotiæ, quæ a suis per-
 duellibus subditis exagitata, ad ipsam confugerat. Mærtis Sententiam, solis fultam calumniis, con-
 stanti & impavido animo excepit *Maria Stuarta*,
 atque ad supplicii locum, Crucem ac Rosarium
 manu gestans, quasi ad nuptias comptè ornata,
 perrexit, ubi se Catholicam mori professa, da-
 tisque ad filium suum *Jacobum* sanctissimis docu-
 mentis, caput supposuit trunco, quod ei altero ictu
 rescissum est die XVII. Februarii anni MDLXXXVII.
 ætatis suæ XLV. Sic in odium Fidei Catholicæ à cru-
 deli Reginâ *Elizabetha*, oppressa ac interfecta est
 Regina *Maria Stuarta*, cujus injustam cædem jure
 optimo vindicavit *Sixtus V.* Pontifex Maximus, &
 de cujus oppressione, damnatione, ac triumphali
 morte plura legeris apud *Camdenum* in *Vita Eliza-
 bethæ* Reginæ, & apud *P. Caussinum* Societatis Jesu
 Tomo II. *Aula Sanctæ*. Nec minùs illustre invicti
 animi sui argumentum prodidit idem Summus
 Pontifex, dùm in *Henricum Navarra Regem*, &
 alterum *Henricum* ejus patruelem, Principem *Con-
 daum*, tanquàm in Hæresim relapsos, & Calvini-
 starum Hæreticorum in Galliis Duces ac protecto-
 res, Anathema vibravit, atque in ipsum Galliarum
 Regem *Henricum III.* qui Ducem & Cardinalem
Guissios fratres in Comitibus Blesensibus à sicariis
 trucidari jusserat, & Cardinalem *Borbonium*,
 Archiepiscopum Lugdunensem, in carcere detine-
 bat, Monitorium in solemni Cardinalium Con-
 fessu die v. Maji anni MDLXXXIX. emisit, quo, nar-
 ratâ Cardinalis *Guissi* nece, & *Borbonii* Cardina-
 lis, ac Lugdunensis Archiepiscopi detentione,

Tom. VII. L ipsum

ipsum vehementer hortabatur, ut dictum Cardinalem *Borbonium*, & Archiepiscopum Lugdunensem in pristinam libertatem assereret, &, ni Sedi Apostolicæ pareret, eum, cæterosque omnes, qui iis in rebus consilium, auxilium, aut favorem præstarent, in Censuras Ecclesiasticas incurfuros, & à Fidelium Cætu præcisos fore declarabat. Sæpè contingere solet, ut homines, dum vitam agunt privatam, grati sint, modesti, ac benefici, sed ubi ad altiorem provecti sunt gradum, prioris conditionis, & beneficiorum obliviscantur, injuriarum memores & ultores, qui nolint æquo cum aliis jure vivere, sibi omnia arrogent, ac cæteros homines, fervorum loco habeant. Ab hoc contagio remotissimum multis argumentis se *Sixtus V.* Pontifex Maximus probavit. In eos, à quibus beneficia acceperat, gratus ac liberalis fuit, omnes patienter auscultabat, & quamvis esset fervido ingenio & ad subitos iræ motus pronus, turbidos tamen nunquam admisit, aut ita temperavit, ut hanc naturæ propensionem accomodaret rebus fortiter gerendis, vitiis bello indicendo, & justitiæ splendori à sceleratorum hominum injuriis vindicando. Hæc summa in coercendis vitiis, & in servandis justitiæ Legibus severitas multis enituit exemplis, quibus, ut videre est in vita illius Pontificis, sicut sol exoriens nebulas dispellit, sicut ventus aream purgat, ita & *Sixtus V.* auctoritate suâ dissipavit improbos, cùmque judicaret, acrioribus remediis suum egere Sæculum, propositis etiam acerbioribus suppliciis hominum libidinem audaciamque, judiciorum severitate revocatâ, frænavit ac compescuit. In quo, si qui
sunt,

sunt, qui eum ut nimis severum, ac rigidum culpare audeant, & ut molles ægroti de medicamentorum amaritie conquerantur, facere id non possunt, quin eâdem operâ laudabilem integerrimi iudicis, & optimi Principis in reprimendis malis, quæ impunè grassantur, vigilantiam damnent. Jam verò, quis unquam *Sixto V.* Pontifice Maximo in tota ratione vivendi splendidior, ac magnificentior fuit? quot Romæ, & quàm sumptuosa, ædificia extruxit? Quàm multa, & solertèr excogitata ab antiquis, sed postea per posterorum, ignaviam oblivione obruta, quasque sepulta, revocavit? Quàm multos egregios artifices ad nova excogitanda propositis præmiis excitavit? Sub ejus Pontificatu nova apparuit Urbis Romæ facies, Basilicis ejus munificentiam instauratis, viis in commodum publicum stratis, fontibus deductis, Arcubus, Obeliscis, Columnis erectis, sed præsertim Bibliothecâ Vaticanâ, quæ est sacrum totius eruditionis ærarium, magnificè instructâ & ornatâ, ut videre est in Inscriptione, quæ eidem Bibliothecæ jussu ejusdem Pontificis insculpta hæc habet:

SIXTUS V. PONT. MAX.

Bibliothecam Apostolicam à sanctissimis prioribus illis Pontificibus, qui Beati Petri vocem audierunt, in ipsis adhuc surgentis Ecclesiæ primordiis inchoatam, pace Ecclesiæ reddita, Laterani institutam, à posterioribus deinde in Vaticanum, ut ad usus Pontificios paratior esset, translata; ibique à Nicolao V. auctam, à Sixto IV. insignitèr

excultam, quò Fidei nostræ & veterum Ecclesiastica Disciplina rituum documenta omnibus linguis expressa, & aliorum multiplex sacrorum copia librorum conservaretur ad puram & incorruptam fidei & doctrinæ veritatem, perpetua successione in nos derivandam, toto terrarum Orbe celeberrimam, cùm loco depresso, obscuro, & insalubri sita esset, aula perampla, vestibulo, cubiculis, circum & infra, scalis, porticibus, totoque edificio à fundamentis extructo, subselliis, pluteisque directis, libris dispositis, in hunc editum, perlucidum, salubrem, magisque opportunum locum extulit, picturis illustribus undique ornavit, liberilibusque doctrinis, & publicæ studiorum utilitati dicavit anno 1588. Pontif. 4.

Optimum Versionis Vulgatæ Latinæ ex antiquissimis MSS. Codicibus & ex Hebraicis Grecisque fontibus emendationem adornandi consilium, quod inierat *Pius IV.* & prosequutus fuerat *Sanctus Pius V.* perficere sategit *Sixtus V.* & ardenti studio, magnâque diligentia curavit, ut viri variarum linguarum peritissimi, quos, ut huic emendationi incumberent, Romam acciverat, non solum Scripturæ Sacræ Versionem Vulgatam Latinam, sed etiam Versionem Græcam LXX. Interpretum pristino nitori restituerent. Erat aliquot abhinc annis soluta, & alicubi penè collapsa morum Disciplina. Venit auspicator *Sixtus V.* Pontifex Maximus, & quæ delapsa jam fluxerant, æquissimis legibus vinciens, mores emendavit, restituit Disciplinam, veterem castigavit luxum, Exulum & Sicariorum licentiam compressit. Astrologiam

giam judicariam proscriptit. Triplicem contractum ad usuras viam aperientem damnavit Constitutione, quæ incipit, *Detestabilis*. Simoniam compescuit. Eunuchorum ac Spadonum conjugia prohibuit ac rescidit. In adulteros ac lenones quibusdam in casibus pœnâ capitis animadvertendum sanxit. Abortum quovis modo procurantes, seu fœtus immaturi, tam animati, quàm inanimati, formati vel informis ejectionem, sicut & sterilitatis potiones dantes vel sumentes, homicidii voluntarii pœnis addixit. Præter Sancti Officii Congregationem, quam confirmavit, quatuordecim alias instituit Romæ ad faciliorem universæ Reipublicæ Christianæ, Status Ecclesiastici, atque Romanæ Curie negotiorum expeditionem. Quàm acutè præsentia cernebat *Sixtus V.* Pontifex Maximus, tam cautè futura providebat. Constitutionem promulgavit, quâ sanxit, ut in Collegium Cardinalium quatuor saltèm in sacra Theologia Magistri ex Mendicantium Religiosorum Ordinibus assumerentur. Ad Christianæ verò Reipublicæ commoda trigiesiens centena millia nummum aureorum, quæ etiamnum in Arce S. *Angeli* asservantur, suis successoribus reliquit, certis tantum casibus, & pro Ecclesiæ necessitatibus & utilitate infumenda. Propter hæc, & alia benè multa, quæ in suo Pontificatu præclare gessit *Sixtus V.* ei adhuc viventi Senatus Populusque Romanus Statuam in Capitolio collocavit. Obiit Summus ille Pontifex die xxvi. mensis Augusti anni m^oxc. ætatis suæ anno lxi. Pontificatus sexto per quatuor menses & tres dies inchoato.

D. *Sixtum V.* Pontificem Maximum eo præ-

ferim nomine maximâ veneratione prosequor , quòd S. *Thomam*, Doctorem Angelicum, quem ceu Magistrum meum impensissimè colo, in secretiori Bibliotheca Vaticana, quam nuperrimè perlustravi, depingi cum S. *Hieronymo* Ecclesiæ Doctore iusserit, sinistrâ manu Ecclesiam gestantem, dexterâ verò, quâ scripsit, ingentem luminis splendorem evibrantem cum hac Inscriptione : *Sancti Thomæ de Christo Scripta, à Christo Crucifixo confirmantur*. Sed perge, quæso, aliorum Romanorum Pontificum, qui *Sixto V.* sub finem Sæculi decimi sexti in Sede Apostolica successerunt, seriem gestaque describere.

M. Post obitum *Sixti V.* in throno Apostolico tres Romani Pontifices *Urbanus VII.* *Gregorius XIV.* & *Innocentius IX.* continuâ serie sederunt, sed cum eorum Pontificatus brevissimus fuerit, paucis itidem verbis illorum Gesta complectemur. Et primò quidem, postquàm *Sixto V.* solemni ritu parentatum fuisset, Cardinales *Joannem Baptistam Castaneum*, patriâ Romanum, Tituli Sancti Marcelli Presbyterum, elegerunt in Romanum Pontificem, dictum *Urbanum VII.* moribus castissimum, victu & potu temperantem, ingenio mitem, prudentiæ, justitiæ, religionisque commendatione mirabilem. Magnam quidem toti Ecclesiæ lætitiâ attulit hæc electio, sed in tam secunda omnium adinurmuratione, tantoque plausu, improvise ante coronationem suam morbo correptus ille Pontifex, ad coronam immortalem à Deo vocatus, migravit ex hac vita quinto Kalendas Octobris anni MDXC. ætatis suæ anno LXXVIII. Pontificatus die XII. Mortem lætus adspexit *Urbanus VII.*
gra-

gratiasque Deo egit, quòd ipsum opportuno tempore terris eriperet, quo de suscepto Pontificatus onere rationem non esset redditurus. Omnia bona sua, etiam paterna, ad æstimationem aureorum triginta millium, Sodalitati Beatissimæ Virginis Annunciatæ, in Conventu Minervitano Fratrum Prædicatorum erectæ, in Dotes pauperum & calamitosarum Virginum, legavit. Ægrè tulerunt omnes gravissimam hujus Pontificis, quem Deus terris tantum ostentare voluit, jacturam, & de quo verè dici potest, quod de Sancto Pontifice Cornelio affirmat Sanctus Cyprianus, Episcopus & Martyr, his verbis: *Non iste ad Episcopatum subito pervenit, sed per omnia Ecclesiastica officia promotus, & in divinis administrationibus Dominum sæpè promeritus, ad Sacerdotii sublime fastigium cunctis religionis gradibus ascendit.* Hujus defuncti Summi Pontificis Urbani VII. laudes Pompejus Ugonius celebravit Oratione funebri habitâ ad sacrum Cardinalium Collegium in Basilica Vaticana, in qua præter benè multa, quæ prædictum Pontificem maximè commendant, hæc de eo habet: *Quas ille (seu Urbanus VII.) tam brevi tempore ingentis gloriæ fulgurationes emisit? Quas significationes dedit optimæ de Pontificatu administrando voluntatis? Quantam in spem hanc Urbem, cunctam Italiam, Nationes omnes erexerat? An ille assumpsit sibi honorem, & non accessit vocatus à Deo tanquam Aaron? An tam sublimi fastigio elatus hominem esse se oblitus est? quantum in summa potestate retinuit modum? qua modestia familiam instituerat? quàm parum carni & sanguini tribuebat? quàm nihil penitus pristinos mutaverat mores? Manebat Principi,*

quæ privato humanitas . Jam aditum ad se , etiam infima de plebe hominibus aperuerat , jam ad subueniendum egentibus manum porrexerat , jam virtuti, doctrina, honestisque laboribus præmia ostendebat . Quid illa majora & publica magis, quanta celeritate, quanto ardore animi complexus erat ? Dissidentium Christianorum Regnorum arma pacare , subjectis parcere , superbos debellare , Religionem amplificare , tueri justitiam , misericordiam exaltare . O Consilia præclara , O dignas Christi Vicario cogitationes ! &c . Hanc Orationem à Pompejo Ugonio habitam in Funere Urbani VII. integram edidit *Augustinus Oldoinus* Soc. Jesu in suis Additionibus ad Opus *Ciacconii* de Vitis Romanorum Pontificum Tomo IV. Post obitum Urbani VII. electus est in Summum Pontificem *Nicolaus Sfondratus* , Mediolanensis , Presbyter Cardinalis Tituli Sanctæ Cæcilie , castissimæ vitæ laude , & Christianâ modestiâ spectatissimus , qui *Gregorii XIV.* nomen sibi sumpsit , & confestim ad conservandam in Galliis periclitantem Catholicam Religionem omnem curam ac sollicitudinem adhibuit . At enim, Calvinistarum Hæresis , quæ sub Galliarum Regibus *Francisco I.* *Henrico II.* *Francisco II.* *Carolo IX.* & *Henrico III.* quadantenus compressa ac cohibita fuerat , mortuo tandem *Henrico III.* absque mascula prole , tantos sibi spiritus , ac tantam arrogantiam sumpsit , ut brevi de Catholica Religione in Galliis conclamaturnum iri speraret . Sicut autem aquæ impetus saxorum , lignorumve oppositu diu retentus ac retardatus , si fortè tandem quæ obstabant , aut sublata , aut perrupta & disjecta sunt , multò major ac vehementior esse consuevit ; ita Hæreticorum

corum Calvinistarum omnia in Galliis turbare cupientium Factio, quos ad id tempus legum ac Regum terror tanquam victos frænatosque tenuerat, fractis postremo repagulis, furere ac bacchari per nobilissimum Regnum, & in summa impietate, summam licentiam nacti, divina humanaque omnia cędibus & incendiis miscere cęperunt. Augebat Catholicorum in Galliis timorem potentia *Henrici Borbonii*, Navarræorum Regis, qui in Calviniana Hæresi natus & educatus eam totis viribus propagare hætenus tentaverat, ac subindè grave imminabat periculum, ne, si semel Galliarum Regno potiretur, illam impunè grassari permetteret, suoque foveret patrocínio. Eo zelo servandæ Catholicæ Religionis accensi hi, qui contra *Henricum Borbonium*, Navarræorum Regem, erant fœderati, quique *Carolus Borbonium*, Patrum Regis *Henrici III.* Regem Galliarum salutaverant hujus nominis *Decimum*, palàm declararunt, Gallos non posse tutâ conscientiâ ipsum *Henricum Borbonium*, aliumve Principem fauorem Hæreseos, in Regem admittere, quòd evidens perfidiæ ac subversionis Catholicæ Religionis & Regni immineret periculum. Quin, & illos Martyrii palmam consecuturos significarunt, qui *Henrico Borbonio* ad sanguinis usque profusionem resisterent, eumque à Regio throno arcerent. Hinc enatum intestinum ac domesticum bellum, commissa multa prælia, multa cæsa hominum millia, totaque Gallia gravissimo incendio conflagravit. His malis, quæ in dies ingravescabant, remedium afferre & Calvinianam Hæresim, multorum caput hydram, quæ non paludem aliquam

quam *Lernæam*, sed potentissimū & opulentissimum Galliarum Regnum inficiebat, penitus excindere volens *Gregorius XIV.* consultius esse duxit, ut *Henrico Borbonio*, quem hæresi, quam necdum ejuraverat, patrocinatorum pertimescebat, aditus ad solium Regium præcluderetur. Eam ob rem in auxilium fœderatorum contra *Henricum Borbonium* non solum exercitum misit in Gallias, sed etiam Nuntium Apostolicum, *Marsilium Landrianum*, cum duplici Diplomate, quo omnibus Ordinibus Ecclesiastici Viris præcipiebat, ut infra quindecim dies ab obedientia & comitatu *Henrici Borbonii* recederent, sub pœna Anathematis, & si infra alios quindecim dies eum non deseruissent, sub pœna exauctorationis & privationis Dignitatum ac Beneficiorum: ipse verò *Henricus Borbonius*, uti Hæreticus & Relapsus, excommunicatus denuntiabatur, omnibusque Regnis & Ditionibus privatus. Verum, his turbis in Gallia excitatis, quas nec *Gregorius XIV.* nec *Innocentius IX.* ejus successor, quorum brevissimus Pontificatus fuit, sedare ac componere haud potuerunt, finem tandem imposuit *Clemens VIII.* Pontifex Maximus, & *Innocentii IX.* Successor. Eo quippè sedente Pontifice, Deus Optimus Maximus, qui vulnerat & medetur; percutit & manus ejus sanat; qui mortificat & vivificat; qui deducit ad Inferos & reducit; pro paterna sua misericordia Gallos quidem ad tempus castigavit, sed morti non tradidit eos. Respexit ad lacrymas, ad jejunia, ad eleemosynas, ad preces Ecclesiæ suæ, & cor Galliarum Regis *Henrici IV.* quod habebat in manu sua, ad fidem Catholicam, & Ecclesiæ Romanæ

Com-

Communione convertit. Professionem Catholicæ Fidei ab *Henrico IV.* Rege factam, ejus ejurationem Calvinianæ Hæreseos, & obedientiam Sedi Apostolicæ per Oratores præstitam, cum suscepisset *Clemens VIII.* Regem ab Hæresi & Censuris absolutum in Communionem Ecclesiæ Romanæ admisit, indeque perstreptentes omnes in Gallia tumultus composuit ac placavit, sicut mox, agendo de Pontificatu *Clementis VIII.* latius ostendemus. Sedit *Gregorius XIV.* menses dumtaxat decem & dies decem, obiitque die xv. mensis Octobris anni MDXCI. ætatis LVI. Pileum rubrum Cardinalibus ex Ordinibus Regularium assumptis concessit. Constitutiones perutiles edidit, ac res præclare gessit Summus ille Pontifex, quæ legi possunt in Oratione, quam in ejus Funere ad Cardinales habuit *Vincentius Blasius Garcia*, quamque *Augustinus Oldoinus* edidit in suis Additionibus ad *Ciaconium*.

Post obitum *Gregorii XIV.* summo omnium Cardinalium consensu electus est in Romanum Pontificem *Joannes Antonius Fachinetus*, patriâ Bononiensis, morum integritate, eruditione & civili prudentiâ præstantissimus, & Titull Sanctorum Quatuor Coronatorum Presbyter Cardinalis. Ea quæ in Pontificatu memoriâ digna gessit *Innocentius IX.* latè, juxta ac eleganter prosequitur *Benedictus Justinianus* Societatis Jesu, qui in ejus Funere peroravit, & ex cujus Oratione, quæ extat in *Oldoini* Additionibus ad *Ciaconium*, pauca hic referre sat superque sufficiet. Pontificatus *Innocentii*, inquit, brevis quidem fuit, sed Sacerdotii gloria non vulgaris. Nam cum probè intelligeret, hoc
à se

à se novum Pastoris munus efflagitare, cum ut populos sibi subiectos leniter benignèque tractaret, tum ut veræ Religionis, Christianæque fidei septis aut abductas oves revocaret, aut aberrantes, suis, si opus esset, humeris elatas, ad ovile perduceret; nihil antiquius habuit, quàm ut laxatis Populo Romano liberaliter nuper impositis veltigalibus, de Barbaris ad fidem convocandis, deque Hæreticorum perfidia tollenda piè ac sapienter cogitaret, neque cogitaret solum, sed re ipsa perficere aggrediretur. Siquidem & Japoniorum Ecclesiam impii ac nefarii Tyranni immanitate vexatam, sua liberalitate mirificè recreavit, & Byzantinum Collegium, sive Turcarum conversioni, sive Christianorum institutioni ac solatio jam pridem animo destinatum, tantum non instituit ac fundavit. Mitto quæ de rebus Gallicis ad seditiones sedandas, & civiles Controversias componendas sapienter; ad sublevandam jam propè prostratam Religionem piè; ad pristinam & avitam fidem atque doctrinam revocandam aptè; ad perduelles, & divini humanique juris prædones, atque Archypiratas vel fallendos, vel opprimendos, callidè atque ingeniosè excogitabat &c. Sed hæc præclarè gesta, & alia utilissima Ecclesiæ consilia, quæ menteolvebat Innocentius IX. mors intercepit, & optimum illum Pontificem, cum duos tantummodò menses in Cathedra Sancti Petri sedisset, rapuit die xxx. mensis Decembris anni MDXCI.

D. Ex eâ trium Romanorum Pontificum Urbani VII. Gregorii XIV. & Innocentii IX. præmatura & inopinata morte facilè intelligo, nihil humanis in rebus firmum, nihil stabile, nihil diuturnum reperiri posse, nosque his exemplis interdum

dum à Deo admoneri, terram nobis, non pro domicilio, sed pro diversorio datam; hanc, quæ vita dicitur, non tam vitam esse, quam iter ad Vitam; in Cælo, non in terra, nobis spem definendam ac collocandam. Agitat quippè Deus omnia arbitrato suo, & quæ solida ac firmis nixa radicibus putantur, ea momento temporis vertit, ludens in Orbe terrarum. Sed absolvamus, si placet, seriem & Historiam Summorum Pontificum; qui Sæculo decimo sexto Ecclesiam Romanam gubernarunt.

M. Seriem Summorum Pontificum, qui Sæculo decimo sexto Sedem Romanam tenuerunt, claudet *Clemens VIII.* antea dictus *Hippolytus Aldobrandinus*, patriâ Florentinus, Tituli S. Pancratii Presbyter Cardinalis, qui in Pontificiam Cathedram evectus est tertio Kalendas Februarii anni MDXCI. Inter cætera, quæ summâ cum laude in Pontificatu gessit *Clemens VIII.* tria potissimum commendatione digna ab Historicis referuntur; quæ hic inserere debemus. In primis, contemplans Summus ille Pontifex graves ac diuturnas Christianæ Reipublicæ calamitates, sed præcipuè luctuosum statum nobilissimi & florentissimi Galliarum Regni, quod tot jam annos bellorum civilium serie ita & ab alienis & à suis vexabatur ac diripiebatur, ut de eo verè dici posset, quod scriptum est apud Prophetam: *Residuum cruce comedit locusta, & residuum locustæ comedit bruchus, & residuum bruchi comedit rubigo*; misertus, inquam, *Clemens VIII.* Galliarum Regni, quod summâ rerum perturbatione, & omnium malorum acerbitate conflictabatur, Decretum edidit, quo
ad

ad placandum Deum, & ejus opem impetrandam, statuit perpetuam sine intermissione Orationem, quadraginta Horarum publicè in Urbe certis Ecclesiis & præfinitis diebus celebrari, eâ servatâ Ecclesiarum & temporis distributione, ut diu noctuque, quâvis horâ, toto vertente anno, juges in conspectu Domini orationes piæ animæ in tam gravi Ecclesiæ necessitate fundere possent. Tentavit quidem *Clemens VIII.* sub exordium Pontificatus sui *Henricum IV.* de cujus sincera ad Fidem Catholicam conversione dubitabat, à successione ad Regium Galliarum solium deturbare, aliumque Principem, qui verè Catholicus esset, ejus loco constituere. At postea, re maturiori examine perpensâ, & à *Jacobo Perronio* Ebroicensi Episcopo, & *Arnaldo Ossato*, Regis *Henrici IV.* Oratoribus, qui deinde ad Cardinalitiam dignitatem provecti fuerunt, exoratus Pontifex, diu optatam Absolutionem ab Hæresi & Censuris concessit Regi Galliarum *Henrico IV.* præmissis tamen sexdecim conditionibus, quas ex *Henrico Spondano* ad annum MDXCV. Num. IX. excerptas hîc subjiciam. Primò, ut Procuratores jurarent Regis nomine, se Sanctæ Sedis & mandatis Ecclesiæ parituros. Secundò, coram Pontifice Calvinismum, aliasque omnes Hæreses ejuratos, ac professionem Fidei ei tradituros. Tertiò, quòd Rex in Principatu Bearnensi Religionem Catholicam restitueret, Catholicos Episcopos in eo nominaret, & quousque antiqua bona eis redderentur, de suo eis largiretur, quo se pro dignitate sustentarent. Quartò, ut intra annum Principem Condam è manibus hæreticorum educeret, & in Catholicorum reponeret, à quibus in Religione Catho-

lica

lica & Christiana pietate educaretur. Quintò, Concordata cum Sede Apostolica tam in Beneficiorum nominatione, quàm in omnibus aliis integrè servaret. Sextò, Concilium Tridentinum promulgandum curaret, & servandum in omnibus, iis exceptis, quæ citra publicæ tranquillitatis perturbationem, aut similes considerationes, executioni demandari non possent. Septimò, nullum hæreticum, aut de hæresi suspectum, ad Episcopatus, aut Monasteria, & alia Beneficia Ecclesiastica nominaret. Octavò, præcipuo loco haberet, & in patrocinium susciperet personas Ecclesiasticas, neque eas ab aliis opprimi aut vexari, eorumve bona retineri pateretur. Nonò, si quæ bona aut Castra Ditionis Ecclesiasticæ, beneficii profani titulo cuiquam sive Catholico sive hæretico data essent, revocarentur, & Ecclesiæ restituerentur. Decimò, Rex factò dictoque, ac præcipuè in dispensatione honorum & dignitatum, ostenderet Catholicos sibi præcipuo loco esse, omnesque intelligerent percipere ipsum solam Catholicam Religionem in ipsius Regno vigere. Undecimò, legitimo impedimento cessante, quotidie Rex Coronam Beatissimæ Virginis, quarta quaque Feria Litanias, singulis Sabbatis Rosarium ejusdem Virginis, quam pro patrona sua in Cælis assumet, recitaret: jejunia, & cætera præcepta Ecclesiæ, servaret: quotidie sacrum audiret, & Festis diebus Missæ solemniter interesset. Duodecimò, in singulis Regni sui Provinciis, & in Principatu Bearnensi, unum Monasterium virorum vel sæminarum Religionis Monasticæ, vel Mendicantium ex reformatis edificaret. Decimò tertiò, saltem quater in anno peccata sua sacramentaliter confiteretur, & sacram Eucharistiam publicè sumeret. Decimò quartò, ratam haberet coràm Legato, aut Nuncio

in

in Franciam mittendo, abjuratiōem hæresum, professionem Fidei, & alia à Procuratoribus promissa, & ratihabitionis instrumentum ad Pontificem mitteret. Decimò quintò, ad Principes Catholicos scriberet, gratulans de sua reconciliatione cum Ecclesia Romana, ostendensque se in ea semper perseverare velle. Postremò, juberet Rex per universum Regnum gratias Deo agi pro tam insigni accepto ab eo beneficio. His conditionibus constitutis, Clemens VIII. in Basilicâ S. Petri Regi Henrico IV. absolutionem eâ solemnitate concessit, quam in Cardinalis Perronii Relationibus, & in Annalibus Spondani ad an. MDXCV. Num. x. legere est. Accepti hujus beneficii magnitudinem agnoscens Henricus IV. Galliarum Rex, non solum gratias Deo toto Regno agendas indicxit, verum etiam, litteris ad Clementem VIII. Pontificem Maximum officii & reverentiæ plenis, summum desiderium testatus est Romam advolandi, ut ad genua Pontificis provolutus, ei grates rependeret infinitas, obedientiam, quam debebat, præstaret atque exhiberet, & præstiturum se atque exhibiturum in perpetuum spondêret, nisi gravissimis distentus fuisset impedimentis. Tum verò tumultibus in Galliis omninò pacatis, omni- que factione penitus dissipatâ, confestim ad Regis Henrici IV. fidem & obsequium redierunt Proceres, Provinciæ ac civitates, totaque Gallia diu desideratâ pace potita est.

Ferventissimarum De Auxiliis Divinæ Gratiæ Concertationum inter doctissimos Ordinis Fratrum Prædicatorum & Societatis Jesu Theologos spectator & auditor esse voluit Clemens VIII. easque ut finiret, instituit Romæ Cardinalium &
Con.

Consultorum Congregationem *De Auxiliis*, iussitque ut ejusmodi Controversiæ ad mentem S. *Augustini*, Ecclesiæ Doctoris, expenderentur, ut videre est in Oratione, quam habuit Summus ille Pontifex die xx. mensis Martii anni MDCI. in prima Congregatione de Auxiliis coram eo celebratâ, quæque his verbis concepta est: *Quamvis soli Deo, non autem ulli mortalium, actionum mearum teneat rationem reddere, placet tamen impræsentiarum consilii mei causam aperire: cur, inquam, hanc universam de Auxiliis Divinæ Gratiæ Controversiam ad mentem S. Augustini expendendam duxerim. Etenim S. Prosperum à Rufino hac in re consultum sapientissimè respondisse semper existimavi; si verè de his questionibus instrui desiderabat, sicut desiderare par erat, ipsis S. Augustini disputationibus cognoscendis curam impenderet, ut in confitenda Dei gratia defecatissimam ac saluberrimam Evangelicæ Apostolicæque doctrinæ intelligentiam consequeretur. Quò factum est, ut Summi Pontifices Romani, mei Prædecessores, Zosimus, Bonifacius, Cælestinus, Leo, & Hormisdas S. Augustini doctrinam contra Pelagianos ita laudaverint, ut illius Scripta, quæ intra Gallias à novis Pelagianæ Hæresis sectatoribus reprehendebantur, consultò approbaverint. Quemadmodum enim isti credebant, se omnia authoritatum munimina posse convellere, si hanc pastoralis speculæ validissimam turrin crebra Pelagiani arietis illusione pulsavissent, ita illi considerantes sanctissimum Virum sapientissimè Pelagianorum versutias deprehendisse, & machinas omnes, quibus gratiæ divinæ virtutem effringere & conterere moliebantur, copiosè in multis voluminum disputationibus destruxisse & funditus evertisse, illius*

doctrinae argumentis adversus hujusmodi pestem semper usi sunt. Adeo certe ut Bonifacius Prædecessor meus, cum esset doctissimus, adversus libros tamen Pelagianorum Beati Augustini Episcopi responsa semper poposcerit. Quos si ego in definiendis his questionibus imitarer, id & rationi congruum, & Deo acceptum fore ratus sum: quippe, dum potestatis auctoritate mihi cum illis communi cælitus à Deo concessa utor, & eisdem cum illis vestigiis insisto, & ex eodem fonte, jure hæreditario, defæcatissimam & saluberrimam Evangelicæ Apostolicæque doctrina intelligentiam hauriri volo, & eam, quam ab illis accepi, hæreditariam, Posteris meis relinquo, justissimam Deo facti mei rationem reddam. Quibus omnibus accedit, ita S. Augustinum omnes difficultates, quæ vel à Pelagianis & eorum sectatoribus tunc movebantur, vel potius moveri possent, penetrasse & explicuisse: et ita illorum omnia Sophismata dissolvuisse, ut nihil hac nostra tempestate de Gratia Dei in Controversiam vertatur, quod à Sancto Augustino non fuerit olim jam copiosè pertractatum. Vanum est enim quod à nonnullis dicitur putari, præsentibus questionibus esse recenter à Theologis Scholasticis excogitatas; cum nihil contra Divinæ Gratiæ necessitatem et virtutem à recentioribus quibusdam nunc asseratur, quod à Pelagianis et Semipelagianis olim assertum non fuerit: nihil etiam adversus illos pro ejusdem Divinæ gratiæ virtute atque efficacia & necessitate dici oporteat, quod S. Augustinus ante mille fere et ducentos annos non docuerit. Etenim celebrem illam distinctionem, qua veteres Theologi gratiam partiti sunt in sufficientem et adjuvantem seu efficacem, ex doctrina S. Augustini desumptam fuisse, apparet ex libro

libro de Correctione & Gratia, ubi expressè dicit, adjutoria Divina ita distinguenda esse, ut aliud sit adjutorium sine quo aliquid non fit; & aliud, quo aliquid fit. Unde, inquit, primo homini, &c. Hanc Clementis VIII. Orationem hic inserere necessarium esse duxi, ut indè intelligeres, quanto studio Summus ille Pontifex addictus esset doctrinæ Sancti Augustini, & quàm vehementi desiderio teneretur hisce de Auxiliis Divinæ Gratiæ Controversiis in Congregationibus de Auxiliis coram se habitis ultimam diem imponendi, quas tamen morte præventus suspensas, ac Theologis salvâ & inculpatâ fide hinc indè disputandas permisit. Quam verò in partem propenderit Summus ille Pontifex, sat superque produnt tum illius Scriptum super his Controversiis datum, tum Acta celeberrimæ Congregationis, quæ Romæ in Bibliotheca Angelicâ Eremitarum S. Augustini, & Lutetiæ Parisiorum in Bibliotheca Colbertina MSS. servantur, quæque nuperrimè à nostro Jacobo Hyacintho Serry, Doctore Sorbonico, in publicam lucem edita sunt, tum denique Acta nostri Thomæ de Lemos, quæ itidem paucis abhinc annis publici juris fecit doctissimus Canonicus Regularis in Galliis Congregationis S. Genovefæ. Sed his missis, certissimè constat, Clementem VIII. Pontificem Maximum, Fratres Prædicatores, & Patres Societatis Jesu, incolumi semper amicitia, & charitate factâ tectâ jugiter perseverante, inter se disputantes: singulari amore ac benevolentia fuisse complexum. Dominicanos multis beneficiis sibi devinxit, Beatos Raymundum & Hyacinthum ejusdem Ordinis in Sanctorum nume-

rum adscripsit. Beatum *Ambrosium Senensem*, ejusdem Ordinis, Martyrologio Romano inscribi jussit, *Agneti à Monte Politiano*, Virgini, quæ eundem Ordinem professa est, sacros honores decrevit. Quanto autem affectu Patres Societatis Jesu complecteretur *Clemens VIII.* probant impensa universæ societati beneficia, & *Stanislae Koskæ*, Polono, ejusdem Societatis alumno, sacri sanciti honores: probat *Toleto*, ac *Bellarmino* ejusdem Societatis, non ad Principum gratiam, sed sponte suâ, atque intimo cordis ac voluntatis affectu, delata à Summo illo Pontifice Purpura: sed longè felicius probat paterna illa, verèque Pontificia sollicitudo, quâ Societatem Jesu è Gallia pulsam restitui curavit, & animum Regis *Henrici IV.* qui de restituenda Societate sæpè rogatus, assensum præbere noluerat (ut videre est in ea Epistola, quam Christianissimus ille Rex ad suum Oratorem in Curia Romana Ducem *De Luxembourg* scripsit die xvii. mensis Augusti anni MDXCVIII. & in Documentis ad Historiam Cardinalis *De Joyeuse* spectantibus, quæ à Clarissimo Viro *Auberio*, Senatus Galliarum Advocato, publicæ luci data sunt anno MDCLIV.) precibus ac repetitis officiis repugnantem, inquam, Regis *Henrici IV.* animum ita flexit, & exitu adeò secundo devicit *Clemens VIII.* ut Patres Societatis Jesu non modo in *Henrici IV.* gratiam redierint universi, verùm etiam inusitatis Regiæ munificentia monumentis supra votum aucti fuerint, sicut jam in primo Colloquio obiter observavimus.

Postremò, plurimùm commendari debet summa illa vigilantia, quâ *Clemens VIII.* toto sui Pon-

Pontificatus tempore multa pro bono Ecclesiæ regimine infatigabili zelo peregit. Sacrorum Bibliorum Editionem *Sixti V.* autoritate adornatam perfici, & castigatissimam prodire sategit. Indicem librorum prohibitorum à *Pio IV.* promulgatum, cum supplemento; Pontificale Romanum, & Cœremoniale Episcoporum, auctoritate suâ recognita & emendata, approbavit, & Vaticanis Typis excudi jussit. Opinionem de Confessione per litteras absenti Sacerdoti factâ, & Absolutione ab eodem absente datâ, damnavit Summus ille Pontifex ut ad minus falsam, temerariam, & scandalosam, ac districtè vetuit, ne deinceps publicè, privatisque Lectionibus & Concionibus, quasi unquam aliquo casu probabilis, defenderetur; cùmque, post hujus Pontificii Decreti evulgationem, *Franciscus Suarez*, insignis Societatis Jesu Theologus, 3. part. disput. 21. sect. 4. scripsisset, corporalem præsentiam pœnitentis & confitentis cum Sacerdote absolvente non esse essentialem Pœnitentiæ Sacramento, Censurâ à *Clemente VIII.* notatus est, sicut refert *Isambertus*, Doctor Sorbonicus, in Tractatu de Pœnitentia, Disputatione 18. Art. 7. his verbis: *Die 18. Augusti an. 1605. Sanctissimus decrevit ex Tomo quarto Patris Suarez, Jesuitæ in 3. par. D. Thomæ Disputationem vigesimam primam de Confessione Sacramentali, cui titulus est: Utrum de necessitate Confessionis sit, ut Pœnitens Sacerdoti absenti immediatè & per ipsum revelet peccata sua? totam esse amovendam, nec aliam esse subrogandam. Hic tamen obiter advertere debes, hoc Decretum, cujus mentionem facit Isambertus, non fuisse datum sub Clemente VIII. sed sub Paulo V.*

eius Successore, die xiv. mensis Junii anni mdcv. Cum enim doctrinam de Confessione per litteras & Internuntium factâ proscriptisset *Clemens VIII.* velletque *Suárezius* in posteriori Operum suorum Editione hanc doctrinam speciosis expositionibus emollire, & ostendere opinionem suam eo telo petitam minime fuisse, meruit sub *Paulo V.* Pontifice maximo fulmen secundum, ut videre est in hocce Decreto, quod ad Facti hujus historici veritatem magis illustrandam integrum hic subjicere non abs re erit.

Feria v. die 14. Julii 1605. in generali Congregatione Sanctæ Romanæ & universalis Inquisitionis habita Romæ in Palatio Apostolico, in Monte Quirinali, coram S. D. N. Paulo V. ac Illustrissimis & Reverendissimis DD. Cardinalibus, contra hæreticam pravitatem generalibus Inquisitoribus: proposita causa Patris Francisci Suares Jesuitæ, & consideratis his quæ scripsit Tomo 4. in 3. part. S. Thomæ sectione 4. disp. 21. interpretando Decretum felicitis recordationis Clementis Papæ VIII. die 20. Junii 1602. quo damnavit hanc propositionem, videlicet, licere per litteras, seu Internuntium, Confessario absenti peccata Sacramentaliter confiteri, & ab eodem absolutionem obtinere: ac etiam maturè discussis his, quæ idem P. Suares adduxit in defensionem suæ interpretationis: auditis votis Illustrissimorum Dominorum Cardinalium, Sanctissimus decrevit, dictam interpretationem non subsistere, & idèò amovendam esse ab ejus libris, juxta Decreta aliàs facta à felicitis recordationis Clemente Papæ VIII. de quibus in actis Sancti Officii.

Regularem Disciplinam in Religiosis Ordinibus collabentem instauravit *Clemens VIII.* eorum-

rumque Privilegia circa administrationem Sacramenti Pœnitentiæ tempore Paschali, quæ Parochi in Belgio violare attentabant, confirmavit, sicut & Constitutionem *Gregorii XIII.* quâ prohibetur Fratribus Prædicatoribus, ne favore cujuscumque personæ extra Ordinem constitutæ ad honorum gradus aditum sibi patefaciant. Quæ Sanctissima lex, omnem ambitioni & Procerum commendationibus viam præcludens, utinam in Ordine nostro jugiter observetur. Græcorum, Japoniorum, Sinarum, & Indiarum Orientalium Gentium saluti consuluit *Clemens VIII.* Pro Natione Scotiæ Collegium Romæ fundavit, Viros eruditos fovit, & beneficiis cumulavit, ac tandem tempore Jubilæi anno millesimo sexcentesimo multa admirandæ pietatis exempla ac documenta dedit Religiosissimus ille Pontifex, quæ *Henricus Spondanus* ad annum MDC. Num. II. describit his verbis: *Advenisse quoque Romam, dùm anno MDC. Jubilæum celebraretur, Turcas aliquos, tradunt, & baptismum suscepisse: plurimosque hæreticos, qui curiositate videndi ducti (inter quos etiam fuisse dicitur Fridericus Dux Witembergicus) consideratis sanctis operibus, quæ passim fiebant, ac præcipuè Clementis VIII. qui pedes peregrinorum lavabat, tergebat, & osculabatur, egenos pecuniis sublevabat, accumbentibus ministrabat, Confessiones audiebat, omnes consolabatur, singulis benefaciebat, Ecclesias frequentissimè visitabat, & Cardinales, aliosque Prælatos, ac Principes & Proceres Romanos ad eadem præstanda verbo, et exemplo egregiè invitabat: his, inquam, consideratis, non pauci ex iisdem hæreticis à curiositate in admirationem rapti, deposita omni iniqua et*

M 4

inepta

inepta ministrorum suorum criminatione , quòd Pontifex sit Antichristus , et Roma Babyloniam ; ejerata hæresi, fidem Romanam amplexi sunt . Inter quos Stephanus Calvinus, pestilentissimi illius Hæresiarchæ affinis, qui postea Ordinem Carmelitarum Discalceatorum ingressus , multa in eo pietatis et in ministeriis ei creditis prudentiæ opera exhibuit , ac demùm felici exitu vitam terminavit . Sedit Clemens VIII. annos tredecim & triginta tribus diebus , & meritis , quàm annis longè cumulatior , cùm vixisset annos sexaginta novem, in Cælum migravit quinto Nonas Martii anni millesimi sexcentissimi quinti . Sed hætenùs satis dictum sit de Summis Pontificibus, qui Sæculo decimo sexto Romanam Ecclesiam gubernarunt .

D. Me , patriâ Romanum , valdè in primis oblectat Romanorum Imperatorum , & Summorum Pontificum , qui Romæ sederunt , Historia , cum qua nequit alterius Gentis , aut magnitudine aut pulchritudine , aut majestate , aut loci sanctitate , omnisque generis illustrium exemplorum , copiâ & varietate contendere Historia . Certè , quantum voluptatis & utilitatis ex assiduo Historiæ studio percipiatur , facilè nunc experior, quipè qui illius ope ac beneficio ea, quæ in præteritis Sæculis gesta sunt , perindè modò calleo , ac si omnibus ætatibus vixissem , omnes regiones perlustrassem, omnibus publicis consiliis interfuissem , & omnia , quæ unquam in retroactis Sæculis contigerunt , præsens spectassem atque annotassem . Cum igitur , juxta Poëtam , *trahit sua quemque voluptas* , ipse deinceps totus incumbam studio Historiæ , quæ facilitate omnes allicit , aures tenet,

net, animos mulcet, & à qua si quis abhorrere, se dicat, parùm abest, quin se barbarum hominem quidem esse fateatur. Quid enim aliud est, meâ quidem sententiâ, Barbarorum ritu vivere, quam in Historiâ Sacrà, Ecclesiasticâ, ac Prophanâ, cujus studium cordato cuique tot nominibus longè antiquissimum debet esse, peregrinum & hospitem esse, aut rudem ac tyronem velle consensere.

M. Rectè quidè & appositè dicis. Nam si nulla Gens est, quantumvis remotissima, quæ non in rebus Gestis Romanorum Pontificum, & Imperatorum cognoscendis plurimum operæ atque studii collocet, quid te, sodes, facere oportet, qui Romæ vivis, qui è Romano cœlo spiritum ducis, qui tot antiquæ virtutis, avitæ pietatis, ac majestatis monumenta quotidie intueris, & quâcumque ingrediaris intra hujus Urbis mœnia, in sacram aliquam historiam vestigium ponis? An, dùm tam multos ingeniosos & eruditos homines, in remotissimis gentibus natos, tam longinqua itinera suscipere, tantos sumptus facere, tam multis se laboribus ac periculis exponere cernimus, ut Romam videant, quòd ita judicant, se meliùs ac perfectiùs Historiam Ecclesiasticam ac prophanam intellecturos, si ipsum Urbis situm, ipsa mœnia, ipsas veterum arcuum, trophæorum, templorum quamvis laceras & disjectas reliquias, ipsos tot olim nobilitatos victoriis colles, sacras Basilicas, veteres Cryptas, Martyrum sepulchra, & alia sexcenta id genus monumenta propriis oculis inspexerint; soli Romani, quibus hæc omnia in oculos assidue occurrunt,

negli-

negligent tam utilem , tam jucundam ac fructuosam cognitionem rerum , quibus , velut delitiis , Doctorum hilarantur epulæ , Præsulum convivia condiuntur , & omnes , qui Historiæ tam Ecclesiasticæ , quàm prophanæ sunt studiosi , maximâ voluptate pascuntur . Certè , quàm gloriosum fuit Romanis Pontificibus tot res ad perpetuum Reipublicæ Christianæ decus ac ornamentum præclare gessisse , aut in earum partem venisse , vide ne tibi tam turpe sit , si , quorundam aliorum sequutus exemplum , otio indulgeas , & immortalia Romanorum Pontificum Gesta ne primoribus quidem labiis degustare curaveris . Sed opus non est , ut tibi jam in Historiæ Ecclesiasticæ stadio spontè currenti calcaria addam . Finem itaque præsentì Colloquio imponamus , aliud postridiè habituri de erroribus & Hæresibus , quæ Sæculo Ecclesiæ decimo sexto variis in locis fruticantes gravissima Ecclesiæ Catholicæ damna intulerunt .

COLLOQUIUM TERTIUM,

*De erroribus & Hæresibus, quæ Sæculo
decimo sexto variis in locis enatæ
Ecclesiam Catholicam miserum
in modum dilacerarunt.*

DISCI-
PULUS .

QUorsum, amabo, charissime Magister, te solitò mæstiores video? quid sibi volunt istæ lacrymæ quibus te conficis? nunquid tot calamitates, quibus Sæculo decimo sexto fuit afflicta Ecclesia gravissimis Hæresum agitata procellis, te ad lacrymandum provocant? cedo, si placet, causam doloris tui, ut officium meum tibi, à quo persæpè meo in luctu fui amantissimè confirmatus, vicissim in tuo tristissimo casu exhibere possim.

M. Si piæ reputantur hæ lacrymæ, quas in obitu majorum suorum virtute præstantium, profundunt illi, qui cum eis conjunctè amantèr-que vixerunt; quantò magis piæ, justæ ac sinceræ censerì debent illæ lacrymæ, quas ab oculis meis elicit amantissimi Patris mei, Reverendissimi *Antonini Cloche*, totius Ordinis Fratrum Prædicatorum Generalis Magistri, inopinata mors, quæ heri die vigesimâ sextâ Februarii anni MDCCLXX, eò me dolore perculit, qui omnem consolationem vincit. Quid autem in tam gravi jactura aliud agere possum, quàm ut modis omnibus tester dolorem meum,

meum, & quod vitæ reliquum est in mærore ac lacrymis transigam, orbatuſ ac deſtitutuſ Patre, poſt hominum memoriã optimo, qui licet eò progreſſuſ eſſet ætatiſ, ad annuſ ſcilicet nonageſimuſ tertiuſ, ut à vita, tanquã ex arbore fruſtuſ, non per vim evulſuſ, ſed ſuo tempore ipſã maturitate collapſuſ videatur, illiuſ tamen moſ eò me acerbiori dolore affecit, quò ejuſ vita diuturnior, & mihi & omnibuſ utilior viſa ſit, illòque meliorem Patrem nemo noſtrũ aliquandò viſuruſ ſit, nec parem unquam poſteri noſtri ſint habituri. Collegerat quippè Reverendiſſimuſ Pater *Antoninuſ Cloche*, natione Galluſ, ſumma omnia, ex quibuſ undique perfectuſ, & detractiſ quibuſcuſque vitiſ, Præpoſituſ Generaliſ cumulari debet, eãque ſapientiã ac felicitate Prædicatorum Ordinem per triginta quatuor annoſ rexit, ut ad ſummaſ reruſ adminiſtrationem natus eſſe videretur. Atque, ad lenienduſ utcuſque doloreſ meoſ, ut ex ſinguliſ pauca libemuſ, revoca, quæſo, in memoriã tuã, chariſſime, Diſcipule, quæ fuerit illiuſ in negotiſ cum publiciſ, tũ privatiſ penitũ introſpiciendiſ ſagacitaſ ac perſpicacia, quæ celeritaſ in extricandiſ, in ponderandiſ maturitaſ, in gerendiſ cautio, in confiſcendiſ diligentia, quæ Viſ, quod animi robuſ in ſuſtinen-diſ; quæ tenax & adamantina memoria, quã omnia retroacti temporis negotia, ſingula, quæ illa ſpectare poterant, puncta, apiceſ, minutiffima quæque perſequebatur, & quã facile præterita recordabatur, tã acutè cernebat præſentia, tã cautè futura providebat. Mirifica feliciſ ejuſ ingeniũ indoleſ ita exulta erat

præ-

præclaris tum humaniorum, tum severiorum literarum studiis, ut extempore implicatissimos Theologorum nodos solvere & explicare soleret, quod sæpius Romæ in solemnibus disputationibus patuit, in quibus de omni re, quæcumque se offerrent, elegantè, accuratè & copiosè dicebat; eâ facilitate omnia proposita argumenta resumebat atque diluebat, tam amplâ eruditione intimos Theologiæ fontes aperiebat, & reconditos antiquitatis thesauros referabat, ut omnibus admirationem moveret, ejusque oratio non facta, sed nata; non quæsita sed inventa; recitata de scripto, non ex uberrimo locupletis ingenii ac doctrinæ penu deprompta videretur. Tu ipse in blandissimis ejus Colloquiis, quibus interdum fruebaris, suspicere solebas ejus animi candorem, fuci & fallaciarum expertem, ingenuitatem sermonis sine verborum circuitu, doctrinam absque supercilio, senectutem non languidam & inertem, sed alacrem & ætuosam, cujus ætatem virilem non pœniteret; gratam simplicitatem, lautam, tamen elegantiam in excipiendis, qui ad se ventitabant, Principibus; summam denique comitatem, affabilitatem, atque humanitatem, quæ tanta in eo erat, ut omnium horarum homo cuilibet vacuas aures patienter commodaret, verbis ornaret beneficia, omnium preces obviâ benignitate gestiret antevertere, singulorum Pòstulata libentèr cognoscere, nihil justa petentibus denegare, & si quid negare cogeбatur, eâ sermonis uteretur lenitate, eoque humanitatis condimento deliniret, ut eos quoque, quibus negabat, æquos à se placatosque dimitteret. Eâ affabilitate, quâ ama-

amabilior ne voto quidem fingi poterat, eâ propensissimâ de omnibus bene merendi voluntate, Regum, Principum, ac Magnatum sibi conciliavit benevolentiam, multitudinem verò, cujus erat in oculis, fecit omninò suam, & omnium Fratrum suorum corda ac voluntates ita ad se rapuit, ut vix unus uni carior sit, quàm ille esset his omnibus, quorum curam ei Deus crediderat. Quid? cæteræ virtutes, quales in eo, & quàm singulares fuerunt? Quis unquàm in acceptis beneficiis magnificentior fuit? Quàm sumptuosum Cardinalis *Hieronymi Casanate*, de illo & de toto suo Prædicatorum Ordine bene meriti, Mausoleum in Basilica *S. Joannis Lateranensis* excitavit, quàmve elegantē & affabrè elaboratam ejusdem Cardinalis Statuam, velut monumentum ære perrennius, in vestibulo insignis apud Prædicatores Minervitanos Bibliothecæ Casanatensis erigi ac collocari curavit? Quid dicam de singulari ejus pietate, quam etiamnum testantur Sacræ Ordinis Prædicatorum Virgines, ac multi Beati, quos ad illius preces, piamque sollicitudinem, Beatorum ac Sanctorum Fastis adscripsit Ecclesia, quos inter eminet Sanctus *Pius V.* Pontifex Maximus, cujus Corpus in Arca nitidissimo marmore adornatâ, ad implendum debitæ pietatis suæ officium, apud Basilicam Sanctæ Mariæ Majoris reposuit ille religiosissimus Ord. Prædicatorum Magister, ut nihil in præsentia dicam de insigni illâ Statuâ, quam ex marmore altitudinis palmarum Romanarum xx. Sancto *Dominico*, Ordinis Prædicatorum Fundatori, in Templo Vaticano posuit. Postremò, ut mittam alia benemulta, quæ non solum amplam satis ad dicendum

dum suppeditarent materiem, sed singula libros integros desiderarent, nihil toto ac diuturno Præfecturæ suæ tempore antiquius habuit Reverendissimus Pater *Antoninus Cloche*, quàm ut tùm Epistolis Encyclicis, tùm Comitiiis Generalibus, quæ Romæ, ac deindè Bononiæ celebravit, Disciplinam Regularem sartam tectam in suo Ordine conservaret, eamque sibi constanti ac perpetuâ ratione vivendi in se exprimeret. Hinc non mirum, si statim ac sibi ex hac vita migrandum esse sensit, nihil territus, mortem irretortis oculis adspexerit, & omnem spem sibi in divina bonitate & misericordia constitutam esse ostendens, Sacramenta Ecclesiæ summâ cum pietate, jam æternitatis candidatus, suscepit, & post brevem, sed gravem, ac piam ad suos Fratres, quos in suo sinu gestabat, habitam Concionem (quæ à me lacrymis persuso arrectis auribus audita, & statim scripto consignata, mox typis edita est) cum incredibili eorum omnium, qui aderant, Fratrum dolore, extremum Deo, quem unicè in vita dilexerat, spiritum reddiderit. Quod ubi percipuit, quæ tùm totius Urbis consternatio, qui plangor omnium, quæ complorationes, quæ lamentationes fuerint, tute, Charissime Discipule, sat superque vidisti & audisti. Sed ô me infelicem! quantò mihi res secùs cecidit, quàm à principio cogitaram? Brevis enim hæc virtutum Reverendiss. Patris *Antonini Cloche*, Patris mei amantissimi, commemoratio, quam mihi solatio & levamini fore speraveram, ea mihi pectus effodit, ea vulnùs adegit altius, ea dolorem dolore cumulavit.

D. Est omninò difficilè, fateor, mortem
Re-

Reverendissimi Patris *Antonini Cloche* non deslere, non graviter ferre, si tamen fas est aut flere, aut omnino mortem vocare, quâ tanti viri mortalitas magis finita, quàm vita est. Vivit enim adhuc, crede mihi, vivetque semper, atque etiam latius in memoria hominum, & sermone versabitur, postquàm ab oculis recessit. Quin, asserere non dubitaverim, nos ei potius gratulari debere, quàm lugere; quia terram Cœlo, laborem quiete, mortalitatem immortalitatem mutavit. Quod mortuus est, humanæ fragilitatis est, quòd ita mortuus, divinæ cujusdam felicitatis. Bonum certamen certavit, cursum consummavit, fidem servavit, eumque tandem Deus ex hoc inquieto ac turbulento Salo, in illum, ut quidem spes est, placidissimum portum perpetuæ quietis ac tranquillitatis eduxit. Eâ spe recreati nostrum debemus delinire dolorem, cui tempus sensim sine sensu, ut fieri assolet, callum tandem obducet. Interim, nostrum incipiamus Colloquium de Hæresibus, quæ Sæculo decimo sexto Ecclesiam exagitarunt, easque singillatim, juxta ordinem Chronologicum, expendamus.

M. Ordinemur à Lutherana Hæresi, cujus Author fuit *Martinus Lutherus*, Islebii in Saxonia plebeis parentibus natus sub finem Sæculi decimi quinti seu anno MCCCCLXXXI I. Litteris humanioribus imbutus, dumque ruri esset, icu repentini fulminis in unum è suis sodalibus immisissimè perterritus, Ordini Eremitarum Sancti *Augustini* anno ætatis suæ vigesimo secundo in Cœnobio Erfordiensis nomen dedit, non quidem *libens et cupiens*, ut ipsemet ad Patrem suum scribit in-

Præ-

Præfatione Libri *De Votis Monasticis*, sed terrore & agone mortis subitæ circumvallatus, emisit coactum & necessarium votum. Laureâ Doctorali in Academia Witembergenſi donatus, ac Theologiæ Professor creatus, acer ac vehemens in disputando, humanæque gloriæ percupidus, à regia viâ, & tritis Theologorum semitis recessit, nactusque occasionem declamandi contra Indulgentias (quas *Leo X.* Pontifex Maximus, sicut in superiori Colloquio observavimus, ad perficiendam Fabricam Templi Sancti Petri Romæ, quam *Julius II.* inceperat, per Orbem Christianum prædicari jusserat) suos cœpit evomere errores, iisque magnam Germaniæ partem infecit.

D. antequàm referas errores *Martini Lutheri*, rem mihi gratissimam faceres, si cum nativis coloribus depingere velles, ut hoc pacto scire possim, quis & qualis fuerit ille Hæresiarcha, qui, sub specioso obtentu reformandi mores Ecclesiæ, tot ac tantas excitavit tragædias, quibus sùs deque totum Orbem miscuit.

M. Quis & qualis fuerit *Martinus Lutherus*, sat superque produnt ea, quæ virulento calamo scripsit, Opera, ex quibus palàm dignoscitur, eum fuisse subdoli & versipellis ingenii virum, Diaboli Discipulum, superbum, impudentem, maledicum, effræni libidini deditum. In primis, apparet subdolum ac versatile *Lutheri* ingenium in ea Epistola, quam scripsit ad *Leonem X.* Pontificem Maximum, in qua, ut videre est apud *Olemborgium* in *Vita Lutheri* Cap. 2. summâ animi demissione sic Romanum illum Pontificem alloquitur Lutherus: *Beatissime Pater, prostratum me*

Beatitudinis tuæ pedibus offero cum omnibus , quæ sum , & habeo. Vivifica, occide, voca, revoca, approba, reproba, ut placuerit: Vocem tuam vocem Christi in te præsentis, & loquentis agnoscam. Si mortem merni, mortem non recusabo. Sed quàm fucato ac simulato animo hæc scriberet *Lutherus* , statim ipsemet declaravit in Responsione , quam scripsit contra librum , quem noster *Sylvester Prieras* , Sacri Palatii Apostolici Magister , in lucem emiserat . In ea quippè Responsione *Lutherus* in hæc impia verba , quæ loco mox à me laudato refert *Vlembergius* , contra Summum Pontificem , & omnes Cardinales prorumpit : *Quid enim ? mihi videtur , si sic pergit furor Romanistarum , nullum reliquum est remedium , quàm ut Imperator, Reges , & Principes , vi & armis accincti aggrediantur has pestes Orbis terrarum , remque non jam verbis , sed ferro decernant. & , paucis interjectis , subdit : Si fures furca , si latrones gladio , si hæreticos igne plectimus , cur non magis hos magistros perditionis , hos Cardinales , hos Papas , & totam istam Romanæ Sodomæ colluviem , quæ Ecclesiam Dei sine fine corrumpit, omnibus armis impetimus , & manus nostras in sanguine istorum lavamus , tanquàm à communi & omnium periculosissimo incendio nos , nostrosque liberaturi . Quæ verba Lutheri expendens ibidem jam à me citatus *Vlembergius* , ait : Conferat nunc inter se , qui volet , ista , quæ eodem anno & forsan eodem mense scripta sunt . Lutherum videbit ad Pedes Pontificis humiliter prostratum , & supplices tendentem manus , illas ipsas , inquam , manus , quas secreto mentis desiderio in ejusdem Pontificis sanguine lavare cupiebat. Has blasphemias voces omni procùl dubio suggestit *Luthero**

Dia-

Diabolus, cujus ipsemet fatetur, se fuisse discipulum. Ait quippè in libro de *Angulari Missa*, *Diabolum nocte quadam eum à somno excitasse, & ad scribendum contra Sacrificium Altaris suasse*. Refert etiam *Clochæus* in *Actis & Scriptis Lutheri*, solitum fuisse hunc Hæresiarchâ dictitare, se *Diabolo familiarem esse, seque cum ipso plusquàm unum modum salis comedisse*. Quod etiam idem *Joannes Cochleus* confirmat his verbis: *Sunt & alia non pauca hac de re argumenta, quòd etiam corporaliter visus quibusdam fuerit Dæmon cum eo, seu Luthero, conversatus*. In Diaboli schola edoctus *Lutherus*, milliès in suis *Scriptis* nomen Diaboli inculcat, tanquam furiosus scribit, passim suam & superbiam & impudentiam ostentans. Quanto superbiæ typho tumidus esset *Lutherus*, facile ex ejus verbis, & factis, quorum pauca hic subjiciam, perspectum ac exploratum habere poteris. Pestiferum librum, quem de *Captivitate Babylonica* scripturavit *Lutherus*, his verbis concludit: *Audio paratas esse denuò in me Bullas, et diras Papisticas, quibus ad revocationem urgear, aut hæreticus declarer. Quæ si vera sunt, hunc libellum volo partem esse revocationis meæ futuræ, ne suam tyrannidem frustra inflatam querantur*. Reliquam partem propediem editurus sum talem, Christo propitio, qualem hætenus non viderit nec audierit *Romana Sedes*, obedientiam meam abundè testaturus. Nec verbis contentus *Lutherus*, *Corpus Juris Canonici* in ignem *Witembergæ* projecit, hæc superba proferendo verba: *Quia conturbasti Sanctum Domini, Deus te consumat igne æterno*. Quæ *Lutheri* verba expendens *Odoricus Raynaldus* in *Annal. Eccl. ad an. MDXX. Num. XVI.*

ait : *Scilicet Lutherus scelestissimus , qui palam adulteria , incesta , et scortationes consulit , ipso iudice fuit Sanctus Domini conturbatus in Sacris Canonibus à Christo , Apostolis et Sanctis Patribus , à quibus ejus doctrina impia damnatur ; et Folia Sacros Canones continentia , ac docentia , quæ sit vera scriptura , ignes æternos passura sunt , ac non ipse flammis exurendus sempiternis . Intolerabili superbix summam in suis Scriptis impudentiam adjunxit Lutherus , quippè qui in Responsione , quam edidit ad librum , quo ejus errores egregiè confutaverat Henricus VIII. tum temporis Catholicæ Fidei defensor , omni contumeliarum , probrorum , convitiisque genere Regiam Majestatem proscindit his verbis : Nescias , inquit , an ipsa mania sic insanire possit , aut ipsa stoliditas tam stolidam sit , quàm et caput hoc Henrici nostri . Fortè ut verum faciat proverbium : Aut Regem , aut fatuum nasci oportuit Cum prudens et sciens mendacia componat adversus mei Regis Majestatem in Cælis ; damnabilis putredo ista et vermis , jus erit pro meo Rege , et Majestatem Anglicam luto suo et stercore conspergere , et Coronam istam blasphemam in Christum pedibus conculcare . Dein , inflatis tibiis , & quasi totus spiritu fatidico plenus , hæc subjungit : Certus sum , ait , Dogmata mea habere me de Cælo , quæ etiam adversus eum triumphavi , qui in ungue novissimo plus habet virtutis et astutiæ quàm omnes Papæ , et Reges , et Doctores , ut nihil agant , qui bullas nominum et titulorum contra me jactant , et libellos suos Regiis inscriptionibus venditant . Dogmata mea stabunt , et Papa cadet , invitis omnibus portis inferi , et potestatibus æris , terræ et maris Sic placet in Christo in dies magis*

magis ac magis superbire adversus istos insulsos, et ineptos Basiliscos, quò magis ipsi furunt Hæc sunt arma, quibus Hæretici vincuntur hodie, ignis et furor insulsiſsimorum asinorum, et Thomisticorum porcorum. Sed pergant porci illi, et, si audeant, exurant me. Hic sum, et expectabo eos, cineribus solis post mortem etiam in mille maria projectis, prosequar et fatigabo hoc abominabile vulgus. Summa, vivens Papatus hostis ero, exustus bis hostis ero. Facite Porci Thomistæ, quod potestis. Lutherum habebitis Ursam in via, et Leenam in semita, undique vobis occurret, et pacem habere non sinet, donec ferreas vestras cervices et areas frontes contriverit. Talis fuit impii Lutheri calami amarulentia, & effrænis convitiandi libido, ac plusquàm scurrilis diſteriorum, sannarumque petulantia, quâ impudentissimus ille Hæresiarcha maledicentiæ suæ fulmen in illos omnes contorquebat, qui virulentæ ejus dogmata impugnarent. Hinc *Desiderius Erasmus*, cujus testimonium Lutheranis suspectum esse non debet, in *Diatriba Hyperaspistes*, quæ extat Tomo x. ejus Operum nuperrimæ Editionis Lugduni Batavorum anno MDCCVI. adornatæ, sic Lutherum affatur: Novi aliquot viros, qui initio non inviti legebant tuas lucubrationes cognoscendi judicandique studio: tandem coacti sunt rejicere, quodd faterentur sese infici tot sannis, scommatis, diſleriis, convitiis & calumniis. Et cum videas quantum malorum in Orbem invexerit ista tua ferocia, cum toties admonitus sis, tamen usque proficis in deterius. Innumeros abstraxisti à suis Prælatiſ, qui nunc oberrant velut oves dissipatæ non habentes pastorem, præsertim cum videant tuam Ecclesiam tantis diſſidiis concuti &

intestinis bellis tumultuari . Et inter hæc adhuc vacat tibi tantos libros , tam operosè maledicos scribere & convitiis debacchari . Hinc incipis , per hæc pergis , in hæc desinis &c. Jam verò , quanta esset Lutheri morum spurcicies ac salacitas , disce ex Sermone de Matrimonio , quem scelestus ille Hæresiarcha Witembergæ habuit , & extat Tomo V. ejus Operum Editionis Witembergensis , ubi hæc habet : Ut non est in meis viribus situm ut vir non sim , tam non est etiam mei juris , ut absque muliere sim Verbum hoc , quod Deus ait : Crescite & multiplicamini , non est præceptum , sed plusquam præceptum divinum , putà opus , quod non est nostrarum virium ut impediatur , vel ut omittatur , sed tam est necessarium , quàm ut masculus sim , magisque necessarium , quàm edere , bibere , pargare , mucum emungere , somno , & excubiis intentum esse . Insita est natura & indoles , aequè ac membra , quæ eò pertinent . Hinc salacissimus ille Hæresiarcha (uti referunt Scriptores coævi , testesque locupletissimi) tria plaustra lascivis Deo dicatis Virginibus onusta è Monasterio Nimicensi per Leonardum Koppen , raptorem incestuosum , abduxit , eas Witembergam ad stupra rapuit , formâ venustiore ex illis , Catharinam de Borè , jam gravidam , sibi copulavit , quæ illi altero mense à nuptiis partum edidit , ac tandem eò audaciæ & impietatis prorupit Lutherus , ut prædictum Deo Sacrarum Virginum Raptorem Panegyricâ Oratione in Ecclesia celebrarit , eumque cum Christo , in Limbum descendente & animas ex Inferorum potestatibus eripiente , contulerit , Sacrilegis his verbis : Felicem Raptorem ! sicut Christus raptor erat in mundo , quando per mortem ,
Princi-

Principi mundi auferebat arma & vasa sua, ipsumque ducebat captivum, ita & tu has miseras animas ex carcere humanæ tyrannidis eduxisti: & quidem opportunissimo tempore, in Pascha, quo Christus suorum quoque captivitatem captivam duxit. Tres filios, Joannem, Martinum, & Paulum ex sua pelli- ce Catharina de Borè suscepit Lutherus, obiitque anno MDXLVI. die XVI. mensis Februarii, Islebii, noctu, cum serò præcedenti oppiparè cœnasset, & facetiis pro more indulisset. Hoc Epitaphium, teste Joanne Pomerano, suo tumulo inscribi voluit Lutherus: Pestis eram vivus, moriens mors ero tua, Papa. Ejus Opera, septem Tomis in Folio comprehensa, Witembergæ anno MDLVI. edita sunt, in quibus apertè se præbet magnum Ardelionem, Proteo mutabiliorem, totius Christianismi infensissimum hostem, verbisque suis nihil aliud declarat, quàm se in corde Lucianum, aut alium quemdam de grege Epicuri porcum, grandem inhalantem crapulam, aluisse. Certè, innumeris erroribus à capite ad calcem scatent Hæresiarchæ Lutheri libri, in quos (ut phrasi utar Senecæ in libello de morte Claudii Cæsaris) si incidisses, valdè fortis licet tibi videaris, maluisses cloacas Augiæ purgare, multò plus ego stercoris exhausti.

D. Profectò Hercules non sum, ut possim repurgare Augiæ stabulum, quod, ut nuperrimè legebam apud Lucianum in *Pseudomante*, tantum fimi ac stercoris congesti habebat, quantum ter mille boves pluribus annis reddere potuissent. Sed quamvis haud possim Augiæ stabulum, eoque longè fæculentiorē Martini Lutheri doctrinam repurgare, præcipuos tamen scire vellem errores,

in quos impegit *Lutherus*, qui, ut mox narrabas, vitæ religiosæ, quam professus fuerat, nauseans Regulam, exuto & ad urticas pulso cucullo, lapsus est in Apostasiam, & ex Apostasia in Hæresim, ex Hæresi in magnum, & sceleribus famosum evasit hæresiarcham, qui, temerè sparsâ impiæ ac sacrilegæ religionis novitate, dissensiones, cædes, bella, strages, parricidia ubique terrarum excitavit, Scētamque conflavit, quæ etiamnum pluribus in locis viget ac veram fidem corrumpit.

M. In suis libris *Martinus Lutherus* cram-
bem dumtaxat recoxit, & antiquos errores jam
consepultos, suisque natalitiis tenebris ab Eccle-
sia damnatos, è bustis veterum Hæresiarcharum
postliminiò revocavit, sicut nullo negotio tu ipse-
met colligere poteris ex impiis dogmatibus, quæ
hic scelestissimus Hæresiarcha passim in suis Ope-
ribus perfrictæ frontis audaciâ docet, quæque præ-
cipuè ad ista septemdecim capita, ex quibus alii
innumeri pullulant errores, reduci possunt. Primò,
docet *Martinus Lutherus*, liberum hominis arbitrium
per *Adæ peccatum extinctum omninò esse, et esse rem
de mero titulo*. Secundò, *Nullum esse hominis meri-
tum ad gloriam, sive salutem*. Tertiò, *Hominem
sola fide, eaque inamissibili, sine operibus justificari*.
Quartò, *Sacramenta novæ legis nec gratiam conferre,
nec caracterem imprimere*. Quintò, *Confessionem
Auricularem inventum esse humanum*. Sextò, *In
Eucharistiæ Sacramento post consecrationem remanere
panem*. Septimò, *Corpus Christi in Sacramento non
semper esse, sed in solo usu*. Octavò, *Ab omnibus
etiam Laicis sub utraque specie sumendum esse Eucha-
ristiæ Sacramentum*. Nonò, *Missam nec à Christo
insti-*

institutam, nec Sacrificium esse . Decimò, Sacerdotes ad Cēlibatum non teneri, verbo & exemplo confirmavit . Undecimò, Vota Monastica, tanquàm nova hominum commenta explodit, ac sugillat . Duodecimò, Indulgentias reprobatur, & pias fidelium fraudes vocat . Decimo tertio, Contritionem ex metu gehennæ conceptam, peccatum esse. Decimo quarto, Sanctos nec colendos, nec invocandos esse . Decimo quinto, Ecclesiam solis constare bonis, & è suo sinu malos, seu peccatores & reprobos excludere pertendit . Decimo sexto, Purgatorium ex Scriptura Sacra probari baud posse asseverat . Postremò, Deum hominibus impossibilia præcipere, eumque esse authorem peccati sacrilego ore effutire non dubitat . Præter illos septemdecim capitales errores, alios non minus infestos evomuit Lutherus, quos inter, censentur isti: Primatus Romani Pontificis non est ex jure Divino: Hæreticos comburi, est contra voluntatem spiritus: Præliari adversus Turcas, est repugnare Deo visitantem iniquitates nostras per illos: Prælati Ecclesiastici, & Principes seculares non malè facerent, si omnes saccos mendicitatis delerent: Duo tantum sunt in Ecclesia Sacramenta, Baptismus & Panis: Christiani æqualiter sunt Sacerdotes &c. Leges Diploma Pontificium Leonis X. quod incipit his verbis: exurge Domine, & habetur Tomo xiv. Conciliorum Labbeanæ Editionis pag. 390. & Tomo 2. Bullarii pag. 614. datum xvii. Kalendas Julii anni mxxx. in quo Romanus ille Pontifex Lutheri errorum xli. capita confixit.

D. Mittamus, quæso, illam Lutheri errorum colluviem, illum calumniarum gurgitem, contumeliarumque sentinam, quæ agitari diutius sine nau-

nausea non potest, & ostende, si placet, an Hæresiarchæ *Lutheri* discipuli in unam Sectam coaluerint, vel in plures Sectas sint divisi?

M. In tres diversas Sectas distracti sunt *Lutheri* discipuli, quarum prima est Anabaptistarum, qui Baptismum parvulis nihil prodesse putant, eosque denuò baptizant, dum ad ætatem adultam pervenerunt. Altera Secta est eorum, qui *Lutheri* Placitis alia de suo plura miscuerunt; & hanc Sectam componunt *Sacramentarii*, seu illi, qui *Berengarii*, *Sacramentariorum* parentis, renovantes errorem, docent, Corpus Christi Domini in Eucharistia non esse, quod cum *Martini Lutheri* doctrinæ adversetur, ideò non Lutherani, sed *Sacramentarii* appellantur. Tertia Secta conflatur *Confessionistis*, seu illis, qui Confessionem Augustanam sectari se jactant & protestantur, unde *Protestantes* dicti sunt. Porro, hi Lutherani dicti *Confessionistæ*, in tres adhuc Classes distinguuntur. Alii quippè sunt *Rigidi*, alii *Molles*, alii *Extravagantes*. Hi, qui puris adhærent *Lutheri* erroribus, *Rigidi* vocantur; *Molles* verò, qui Confessionem *Witembergensem* sequuntur; *Extravagantes* denique appellantur hi, qui Confessioni Augustanæ subscripserunt, ut Principum favorem aucuparentur, seque *Lutheranos* dicunt, licèt secèntur dogmata *Luthero* contraria.

D. Varias illas Sectas, in quas Hæresiarchæ *Lutheri* distracti sunt discipuli, singillatim expendamus, & primò quidem de Anabaptistarum Sectæ exordio, Auctore, erroribus, & de aliis hujusmodi, quæ ad ipsam pertinere possunt, breviter disseramus.

M. An-

M. Anno circiter MDXXII. prodiit fanatica Anabaptistarum Secta procusa à *Nicolao Storkio*, sive *Pelargo* dicto, Silesio, qui, cum antehac *Luthero* adhæsisset, ab eo postea deficiens, & insolitas Revelationes sibi factas, secretaque Mysteria, quasi ab Archangelo *Michaele* accepta, temerè venditans, Witembergâ pulsus est, & per Thuringiam incertis sedibus oberrans, rusticos homines ad Sectam suam pertraxit, iisque sequentes errores, teste *Joanne Cochlaeo* in *Actis Lutheri*, instillavit. Præcipuum hujus Sectæ Dogma est, Parvulis usu rationis carentibus nihil omninò prodesse Baptisma, hincque illi Sectarii dicebantur *Anabaptistæ*, tum quòd ipsi rebaptizarentur, tum quòd rebaptizarent alios, adultos scilicèt, qui extra eorum Sectam necdùm rationis usu donati Baptismum susceperant. Præter hunc capitalem errorem, Anabaptistæ realem Corporis Christi præsentiam & manducationem corporalem in Cœna Domini negant; Imagines execrantur; solam scripturam recipiunt, Magistratum abjiciunt, jurare, litigare, arma tractare, Magistratum gerere, Christianis illicitum esse volunt. His, & aliis erroribus, falsis revelationibus, suisque entusiasmis cum promiscuæ plebis, ac stolidorum rusticorum ingentem multitudinem decepisset *Nicolaus Storkius*, cœpit are ciere viros, martemque accendere cantu, quo animati ejus Sectarii, eos omnes, qui rebaptizari nolebant, ex Urbibus expulerunt, aut cæciderunt, cultum Dei extinxerunt, expilarunt Ecclesias, Episcopos, & Pastores trucidarunt, bona eorum diripuerunt, Monasteria diruerunt, sacras Virgines violarunt,

Scua-

Senatum pro suo arbitrio mutarunt, tamque magnos concitarunt tumultus, ut tandem, missis ad eos debellandos copiis, centum & triginta effectorum illorum Rusticorum millia commisso prælio anno MDXXV. perierint, ut videre est in *Petri Criniti* de hoc Bello Rusticorum Commentario, qui Tomo secundo Rerum Germanicarum *Marquardi Freheri* editus est. Anabaptistæ fuerunt divisi in varias Sectas, quæ vel ab Auctoribus suis, vel à locis, vel à doctrina, vel à vitæ instituto varia traxere nomina, quæ hic indigitare sufficiet. Primò, inter Anabaptistas, alii appellabantur *Muntzeriani* à *Thoma Muntzerio*, Alstensi in Thuringia Concionatore, qui è Sacerdote Catholico Lutheranus factus, ita scitè Enthusiastam egit, tamque egregiè sanctitatis speciem mentitus, Sectam Anabaptistarum dilatavit, ut ejus Author haberetur. Secundò, Anabaptistæ dicebantur *Huttitæ* à *Joanne Hut*, & hi spontaneam paupertatem profitebantur, visiones jactabant. Tertiò, Anabaptistæ vocabantur *Augustiniani*, ab *Augustino Bohemo*; *Bukoldiani*, à *Joanne Bukold*; *Melchioritæ*, à *Melchiore*; *Hofmannianni*, ab *Hofmanno*: *Mennonitæ*, à *Mennone Simonis*, oriundo ex quodam pago Frisiæ; *Gabrielitæ*, à *Gabriele*; *Hutteriani*, ab *Huttero*; *Servetiani*, à *Serveto Hispano*, qui combustus est Genevæ anno MDXLIV. *Davidiani*, seu *Georgiani*, à *Davide Georgio Amersfordiensi*, qui sese tertium esse *Davidem*, verumque Messiam, effutiebatur. Dicti sunt etiam Anabaptistæ, *Francistæ*, à *Sebastiano Frank*; *Scuvenkfeldtiani*, à *Gaspacre Scuvenkfeldio*. Præter hæc nomina, quæ Anabaptistæ traxerunt ab Auctoribus, qui eorum

Se-

Sectam vel propagarunt, vel in varia schismata
 distraxerunt, alia insuper nomina vel à doctrina,
 vel à diverso Vitæ Instituto sortiti sunt, ac deno-
 minati primò *Adamitæ*, quòd nudi incederent, ut
 sic innocentiam Adami simularent. Secundò, *Apo-*
stolici, quòd absque calceis, perâ, & pecuniâ hæc
 illac vagarentur. Tertiò, *Cathari*, quòd se puros,
 spirituales ac perfectos dicitarent. Quartò, *Clan-*
cularii, seu *Silentarii*, quòd latere studerent,
 suamque fidem manifestare nollent. Quintò, *Dæ-*
moniacy, quòd putarent, Dæmones post finem
 mundi salvandos esse. Sextò, *Communia habentes*,
 quia uxores, liberos, & alia omnia communia
 esse volebant. Septimò, *Condormientes*, quòd in-
 ter illos promiscuè Viri & fœminæ simul habita-
 rent & dormirent. Octavò, *Lachrymantes*, sive
Ejulantes, quia sibi persuadebant, nihil Deo tam
 gratum & acceptum à se offerri posse, quàm si su-
 bindè lacrymas copiosè funderent. Nonò, *Poly-*
gamistæ, quòd plures simul uxores habere licitum
 esse affirmarent. Decimò, *Euchitæ*, *Enthusiastæ*,
 & *Extatici* appellabantur, eò quòd inter Anaba-
 ptistas alii essent, qui non secus ac Hæretici *Eu-*
chitæ, contendebant, soli Orationi vacandum esse,
 nec media conquirenda ad vitam temporalem ne-
 cessaria, sed à Deo omnia expectanda; alii verò,
 qui, perindè ac *Enthusiastæ* seu *Extatici*, inspiratio-
 nes divinas, extases, & secreta cum Deo colloquia
 jactarent. Undecimò, nonnulli inter Anabap-
 tistas dicebantur *Libertini*, qui à Divinis & Politi-
 cis Legibus, Decimis, tributis &c. se per Chri-
 stum immunes esse gloriabantur. Denique, Ana-
 baptistæ à locis, undè prodierunt, vel in quibus
 suam

suam sedem fixerunt, alia traxere nomina, quæ hic recensere supervacaneum omninò foret.

D. Diversa illa nomina, quæ variis Anabaptistarum Sectis indita sunt, nihil planè moror. sed scire velim nomen Authoris Hæresis *Sacramentariorum*, qui, ut mox dicebas, *Berengarii* dudum damnatam & sopitam renovantes Hæresim, negant realem Corporis & Sanguinis Christi in augustissimo Eucharistiæ Sacramento præsentiam.

M. Primus hujus Sacramentariorum Hæresis Author fuit *Andreas Carlostadius*, natione Germanus; & Archidiaconus Witembergenfis, qui etiam primus Reformatorum sacrilegas nuptias contraxit, quas non puduit Lutheranos Witembergenfes publicè laudare & approbare hac speciali Oratione, quam in proprio Missæ Officio recitarunt: *Oramus: Deus, qui, post tam longam & impiam Sacerdotum tuorum cecitatem, Beatum Andreæ Carlostadium ea gratia donare dignatus es, ut primus, nulla habita Papistici juris ratione, uxorem ducere ausus fuerit; da quæsumus, ut omnes Sacerdotes; recepta sana mente, ejus vestigia sequentes, ejus concubinis, aut eisdem ductis, ad legitimum consortium thori convertantur. Quæ certè Oratio debet jure merito appellari totius impietatis monumentum, & lasciviæ impudentissimæ trophæum. Hæresiarchæ Lutheri cœtaneus & familiaris fuit Andreas Carlostadius, sed orto inter ipsum & Lutherum de Cœna Domini dissidio, cœpit Carlostadius apertè negare, Corpus & Sanguinem Christi reipsâ & secundum substantiam contineri in Eucharistiæ Sacramento, cui librum contra Cælestes Pro-*

Prophetas, seu fanaticos statim opposuit Lutherus, & Sacramentarium errorem semper detestatus est. Hunc Sacramentarium errorem latissimè in Helvetia propagavit Huldricus Zuinglius, in pago Doggtorum in Helvetia natus, eique multos alios addidit, quos inter præcipuos hic subjiciemus. Primò asseribat, Missam non esse Sacrificium, sed Sacrificii in Cruce semel oblatis commemorationem, & quasi sigillum redemptionis per Christum exhibita. Secundò, affirmabat, Nobis extra hanc vitam intercessore, præter Christum, nullo opus esse. Tertiò, dicebat, Christum esse nostram justitiam, ex quo inferebat, opera nostra eatenus esse bona, quatenus sunt Christi, quatenus verò nostra, non esse verè bona. Quartò, docebat, Christianorum nullum ad ea opera, quæ Christus non præcepit, adstringi, & quolibet tempore licitum esse, quolibet cibo vesci. Quintò, contendebat, justè fieri quidquid Deus non vetat & permittit, ac subindè Matrimonium ex aquo omnibus convenire. Sextò, asleverabat, eos, qui Ecclesiastici vulgò, seu spirituales vocantur, peccare, dùm pesteaquàm senserint castitatem sibi à Deo negatam, non uxores ducunt, aut nubunt. Septimò, Castitatis votum damnabat. Octavò, Potestatem, quam Papa, & Episcopi sibi vindicant, nullum in sacris litteris, & Christi doctrina firmamentum habere effutiebatur. Nonò, opera satisfactionis à Sacerdote imposita, tanquàm humanæ traditionis figmentum explodebat. Decimò, censebat, Confessionem, quæ fit Sacerdoti, non remittere peccata. Undecimò, Nullum post hanc vitam Purgatorium admittebat. Duodecimò, Characterem Sacramentalem, tanquàm à Theologis scholasticis recens excogitatum, repudiabat. Decimo tertio,

tertiò, *Eos dumtaxat Presbyteros aut Sacerdotes agnoscebat, qui Verbum Dei prædicabant.* Hos & alios hujusmodi errores expressit *Zuinglius* in Summa suæ doctrinæ, quam Articulis *LXVIII.* comprehensam obtulit Senatui Populoque Tigurino in Pseudo-Synodo anno *MDXIX.* congregatis. Examinatâ ac disculsâ *Zuinglii* doctrinâ, Magistratus Tigurinus apertè ei favit, ad librum pro defensione Catholicæ Religionis ab Episcopo Constantiensi porrectum aures obturavit, oculos animi clausit, & promulgato Edicto, solemnem Eucharistiæ circumgestionem prohibuit, Sanctorum Reliquias sustulit, Missam abrogavit, novumque Sacramentariæ Cœnæ Ritum institui jussit. Tigurinis à Catholica Religione ad *Zuinglii* Sectam deficientibus sese quidam Helvetiorum Pagi (*Cantones* vulgò vocant) anno *MDXXVIII.* adjunxerunt, videlicet Bernates, & Constantienses, quos deinde secuti sunt Basileenses, Schafhusiani, Santgalenses, Mulhusani, & Bielenenses. At in Catholica fide quinque aliæ Helvetiorum Tribus (*Cantones* vocant,) constantèr perstiterunt, seu Lucernates, Urienses, Suitenses, Undervallenses, & Zugenses, qui ob Religionem Catholicam, quam profitebantur, cum malè à Tigurinis, & Bernatibus, Sacramentariis hæreticis, acciperentur, bellum eis anno *MDXXXI.* denunciarunt, illosque licèt numero plures, & Basileensium, ac Schafhusianorum, auxilio fultos, quatuor confertis præliis vicerunt, prostrarunt ac profligarunt, quos inter *Zuinglius*, eorum Ductor, & Sectæ Coriphæus, accepto lethali vulnere, captus, & oblatus judicibus tanquam proditor & Hæreticus, flammis exustus est, annum
agens

agens ætatis suæ quadragesimum octavum. His victoriis, quas Catholici de Hæreticis Sacramentariis tum temporis feliciter reportarunt, non obscuro signo Deus tum declaravit, quinam essent illi, qui suum defenderent Evangelium; cum paucis admodum, et eis inopia rerum omnium pressis: victoriam concessit de suis et Evangelii hostibus, quos et numero militum et viribus, et armis, et rebus omnibus ad bellum gerendum necessariis, multò fuisse constat instructiores: ut non homines, verum ipse Deus pro suis Fidelibus in aliquot illis præliis pugnasse videretur, verba sunt Cardinalis Stanislai Hosii in iudicio & Censurâ de adoranda Trinitate. Paulò post Zuinglii obitum, Joannes Oecolampadius, Ordinis S. Brigittæ Apostata, & Zuinglii fidus Achates, qui eandem Sacramentariorum Hæresim Basileæ prædicabat, è vivis sublatus est, & in lecto suo, sive à scœmina, quam incestis polluerat nuptiis, & ex qua tres procreatos liberos reliquit, sive à Dæmone, ut alii dicunt, suffocatus, aut alio quocumque modo exanimis repertus est an. MDXXXI. ætatis suæ anno quadragesimo nono.

D. Expone, quæso, uberius quid sibi velint isti *Confessionistæ*, ex quibus, ut mox ajebas, conflata est tertia Hæresiarchæ Martini Lutheri Discipulorum Secta?

M. Confessionistæ apud Lutheranos dicuntur hi, qui Confessionem Augustanam profitentur & tenent. Hæc autem Augustana Confessio nihil aliud est, quam Lutheranorum Fidei Professio, quæ ann. MDXXX. in Comitibus Augustanis Carolo V. Imperatori fuit oblata à Philippo Melancthone, præcipuo illius Auctore, qui, ut Sectæ suæ Lutheranz

invidiam facilius detrahere posset, consultò in prædictâ Fidei Professione prætermisit, vel emolliuit, quantum fieri potuit, odiosas *Lutheri* opiniones. Duas partes complectebatur ea Confessio. Prior pars continebat unum supra viginti articulos de *Lutheranorum* Fide, in quibus se cum Catholicis consentire palàm profitebantur. At posterior pars constabat septem Articulis, doctrinæ Ecclesiæ Catholicæ oppositis. Primus, Communionem sub utrâque specie præcipiebat, & Sanctissimæ Eucharistiæ processionem, seu circumgestionem inhibebat. Alter, Sacerdotum Cœlibatum damnabat. Tertius, privatas abolebat Missas. Quartus, necessitatem confitendi peccatorum numerum negabat. Quintus, Traditiones rejiciebat. Sextus, Monastica Vota improbabat. Septimus, potestatem Ecclesiasticam limitabat ad solam Evangelii prædicationem, & Sacramentorum administrationem. Hi igitur Hæretici *Lutherani*, qui hanc Confessionem Augustanam, à *Philippo Melancthone* adornatâ, profitebantur, *Confessionista*, *Adiaphorista*, seu *Indifferentes*, & *Lutherani Molles* appellabantur, ad discrimen horumce *Lutheranorum*, qui *Rigidi* nuncupantur, & quorum Antesignanus fuit *Matthias Flaccus Illyricus*, *Magdeburgensis Pseudo-Minister*, qui plurimis Scriptis, & calamo tartareo veneno infecto propugnare ausus est, peccatum originale esse ipsam hominis substantiam. Mirto alias Sectas, in quas divisi sunt *Lutherani*, tum à *Joanne Brentio*, origine Suevo, qui *Lutheri* Placitis nova, sed perinde infesta dogmata addidit, tum ab *Andrea Osiandro*, qui Schisma in Secta *Lutherana* fecit, atterendo hominem

justi-

justificari non fide, sed eâdem essentiali iustitiâ, quâ Deus justus est, quæ est ipse Deus, infunditurque hominibus, adeò ut Christianus non gratiâ, sed naturâ justus sit; tum denique à Martino Buce-ro, natione Germano, Ordinis Dominicani Apostatâ, qui unâ cum Paulo Fagio, & Petro Vermilio, vulgò Martyre nuncupato, Canonicorum Regularium Ordinis Sancti Augustini Apostatâ, in Angliam venit, novam Apostaticæ Reformationis disciplinam condidit, ac præ cæteris, quos propinavit, erroribus, asseruit, Corpus & Sanguinem Christi substantialitèr præsentia in Eucharistia, non esse extra usum Sacramenti, nec in ipso usu ore corporis manducari, sed contemplatione Fidei percipi, undè inferebat, impios, idest, qui fidem non habent, solum panem & vinum, non Christi Corpus et Sanguinem sumere. Has, & alias hujusmodi varias Sectas, in quas distracti sunt Lutherani, ne longior sim, in præsentia missas faciam, de quibus si plura scire desideres, leges Lindanum Ruremundensem in Dubitantii sui Dialogo II.

D. Cùm solemne sit Hæreticis Lutheranis suæ Sectæ Duces tanquàm egregios Ecclesiæ Reformatores, intrepidus Evangelii Præcones, ac purioris Moralis Christianæ sectatores magnificis celebrare encomiis, optarem, antequàm ad alias Sæculi decimi sexti Hæreses progrediamur, ut graphicè describeres mores illius Sectæ Principum qui se Evangelicos falsò jactabant, artesque itidè indicares, quibus usi sunt ad suam propagandam Sectam, fidemque conciliandam suis erroribus, quos jam in antiquis Hæreticis ab Ecclesia pro-

stratos ac extinctos, denuò suscitaverunt, latissimèque diffuderunt.

M. Sicut fructus naturam arborum sequuntur, ita liberi Parentum, & Discipuli Magistrorum mores imitari, simillimamque indolem referre solent. Hinc quales fuerint mores illorum, qui nascentem Lutheranam Hæresim disseminaverunt, foverunt, promoverunt, facilè admodum dignoscere poteris ex moribus, quos paulò antè perstrinxi, impii Hæresiarchæ *Lutheri*, eorum Parentis ac Magistri, qui ventri, gulæ, & libidini totus deditus, necessitatem bonorum operum, Sacramenti pœnitentiæ rigorem sustulit, omnem rigoris Ecclesiastici disciplinam ad nihilum redegit, solemnia Religionis vota Deo nuncupata dissolvit, Monachis & Sacerdotibus connubia indulgit, & excusso debitæ Romano Pontifici, & Episcopis obedientiæ jugo, necnon contemptâ sanctorum Patrum, ac sacrorum Conciliorum venerandâ autoritate, Sectarios suos Religionis, doctrinæ ac fidei suæ judices & Arbitros constituit, sicque, ut eos faceret liberos, reddidit & sacrilegos. Sed, ut magis compertos habeas mores eorum, qui primi Sectæ Lutherani initium aut incrementum dederunt, proferam locupletissimum testimonium Scriptoris coævi, seu *Desiderii Erasmi*, quem ipsimet Lutherani magnis laudibus efferunt, eumque, renitentem licet, in suas partes trahere moliuntur. His autem nativis coloribus illos, si superis placet, Ecclesiæ Reformatores depingit *Erasmus* in sua Epistola in *Pseudo-Evangelicos*, quæ extat pag. 1574. Tomi x. postremæ Editionis Lugduni Batavorum ann. MDCCVI. adornatæ,
ubi

ubi Pseudo-Evangelicos sui temporis atro carbone notans hæc habet: *Nunquam illorum, seu Lutheranorum, quos Pseudo-Evangelicos appellat, Ecclesias sum ingressus, sed aliquandò vidi redeuntes à Concione veluti malo spiritu afflatos, vultibus omnium iracundiam ac ferociam præ se ferentibus. Quis unquam vidit in illorum Concionibus, quemquam pro peccatis suis fundentem lachrymas, tundentem pectus, aut ingemiscentem? Abrogata est Confessio, sed interim, ne Deo quidem confitentur plurimi. Abiectus est cum jejuniis ciborum delectus, sed interim graviter indulgetur crapula, & ita quidam effugerunt judaismum, ut cæperint esse Epicurei..... Sic excutiunt jugum hominum, qui vestro Evangelio submitunt cervicem. Magis vereor, ne plerique pro gravi jugo hominum portent gravius jugum Diaboli. Excussa est obedientia Episcoporum, sed ita, ut ne prophanis quidem Magistratibus pareatur. Olim Christiani sub Ethnicis Principibus quietè vivebant, studiosè caventes, ne quam seditionis occasionem darent, at iste populus tam Evangelicus, etiam Turcarum Principi dicitur detestabilis, quem ait seditioni natum. Quos subinde tumultus excitat? quotiès quàm levibus de causis procurrit ad arma? ne suis quidem Ecclesiasticis obtemperans, nisi dicant blanda auribus; profligandi etiam, si liberius in vitam illorum invehantur, aut ab opinione dissentiant. Novam verò libertatem Evangelicam, impunè facere, sentireque, quod cuique libitum est. Paulus jubet tradi Satanae eum, qui contra naturæ pudorem, novercam duxerat uxorem, bortaturque discipulos, ut subtrahant sese à consuetudine fratris inordinatè ambulantis. Cum his verò, qui manifestis vitiis infames*

O 3

sunt,

sunt, ne mensam quidē vult haberi communem. Nunc circumspecte mihi sodalitatem istam Evangelicam, quot habet adulteros, quot temulentos, quot aleatores, quot decoctores, quot aliis vitiis infames. Et hos quidem habent etiam in delitiis, tantum abest ut vitent. Apostoli, quod magis vacarent Evangelio, aut abstinebant ab uxoribus, quas ducere tum licebat, aut legitimè ductas vertebant in Sorores. Nunc floret Evangelium, quod Sacerdotes & Monachi contra professionem suam ducunt uxores. Sed circumspecte num castiora sint eorum conjugia, quàm aliorum, quos ducunt pro Ethnicis. Agnoscis, opinor, quas hic fabulas tibi possim referre si libeat. Neque enim necesse est ut notissima referam, quæ vel Magistratus, vel plebes, reclamante aut connivente Magistratu, publicitus designavit. Atque interim dum neminem amant præter sese, dum nec Deo, nec Episcopis, nec Principibus ac Magistratibus obtemperant, dum mammonæ, gulæ, ventri & inguini serviunt, postulant haberi pro Evangelicis. Jam vereor ne sub isto nomine multi nobis oriantur Pagani quod magis etiam sint liberi, si nec Cælum credant esse, nec Inferos, nec animos à morte corporis superesse. Atqui interim isti jactant liberatas conscientias. Perfecta pietas habet quietam conscientiam, sed habet & summa impietas. Legelis hanc integram Desiderii Erasmi Epistolam, & confestim intelliges, quàm pessimis moribus imbuti fuerint, isti Pseudo-Evangelici, qui Sectam Lutheranam conflarunt, Dei cultum, libertatem Evangelicam, & Ecclesiæ Reformationem ubique falso obtendentes, sicut ipsemet eorum antesignanus hæresiarcha *Lutherus* in Lipsica Disputatione à *Joanne Eckio*, fortissimo Fidei

Fidei Catholicæ Athletâ, victus, fassus est his verbis : *Hæc causa non propter Deum cæpta, nec propter Deum finietur*. Jam verò, me pudet pigetque referre nefarias artes, quibus egregii isti Ecclesiæ Reformatores per summum nefas usi sunt ad suam Sectam propagandam. In primis, Romanos Pontifices, & Episcopos innumeris calumniis prosciderunt, ut eis apud imperitum & suspiciosum vulgus odium & invidiam conflare possent. Secundò, ex quibusdam abusibus, qui in Ecclesiam itrepserant, occasionem arripuerunt Fidei Dogmata oppugnandi, & palàm asserendi, Ecclesiam annis mille quadringentis caruisse Christo, eamque pro Deo coluisse larvas & Idola, in sacris Litteris enarrandis fuisse prorsus cæcam, miracula Sanctorum nihil aliud fuisse, quàm præstigias Dæmonum, doctrinam antiquorum Patrum adeò obscuram, totque refertam esse erroribus, ut eos nihil de doctrina & Religione scisse videretur, seque solos, quasi cornicum confixissent oculos, & sanctis Patribus multò oculatiores essent, audiendos esse. Tertiò, Temporales Principes sibi devinxerunt Lutherani, eos locupletando bonis, quibus Ecclesias spoliaverunt, eisque potestatem faciendo plures simul uxores habendi. Quartò, Monachis, Monialibus, & Sacerdotibus, qui impositam Cœlibatus legem ægerrimè ferebant, Sectam suam impleverunt, Vota Monastica dissolvendo, & omnibus indiscriminatim facultatem permittentes matrimonia contrahendi. Quintò, homines libidini, aliisque vitiis deditos suæ Sectæ addixerunt, eis persuadendo, bona opera non esse necessaria ad salutem, totumque illum, qui est

in Ecclesia Romana, pœnitentiæ rigorem, & apparatus, esse purum putumque hominum figmentum, ad excarnificandas conscientias excogitatum. Sextò, tumultuantes populos, & jugi ferendi impatientes, in suam Sectam pertraxerunt Lutherani, eos eximendo ab obedientia debitâ Romano Pontifici, & Episcopis, eos constituendo judices Conciliorum, sanctorum Patrum, totius Antiquitatis, doctrinæ, & Religionis, eisque amplissimam licentiam indulgendo legendi & interpretandi pro nutu & arbitrio suo Scripturam Sacram. Denique Lutherani, quò latius suam diffunderent Sectam, excitarunt scelestos quosdam homines, ad bella & seditiones proclives, qui statim ac novæ illius Sectæ Religionisque quasi musto quodam incaluisse, classicum in Catholicos Principes canere cœperunt, furore atque amentia præcipientes, conscripserunt ex omnibus ordinibus innumerabiles copias, summis, mediis, infimis, ad arma, tanquam ad sacra convolantibus; omnesque ab Antesignanis novæ suæ Religionis ferro armati, innumeras clades, calamitates, & inaudita crudelissimorum facinorum exempla, intulerunt in Germaniam, quâ gente antehac nulla erat in orbe terrarum beatior, nulla aut statu pacatior, aut abundantior opibus, aut imperio potentior, & ex eâ beatam illam pacis & otii tranquillitatem expulerunt, exhausserunt illam opum amplitudinem, illos potentiæ nervos eliderunt, & avitam Religionem multis in locis extinxerunt. His, & aliis id genus, malis artibus, pestiferæ Lutheranz Sectæ adeò succrovit impietas, còque sensim ad Catholicæ Religionis exitium provocata est.

est, ut Regna ac Provincias, proh dolor! absorbuerit, & in his etiamnum impunè dominetur.

D. Præclaros sanè mihi narras Viros Evangelicos, & Ecclesiæ Reformatores! quorum vita ac doctrina longè latèque discrepat à vita & doctrinâ Apostolorum, qui Evangelium Christi per totum Orbem propagarunt. At enim, ut obiter dicam, Apostoli mores habebant castos, puros, & undiquaque inculpatos. Eorum doctrinam commendabant non solum præsentanea miraculorum vis, perpetuus dogmatum consensus, & spiritus ille igneus, qui sese illorum moribus, vultu, & oculis promebat, sed etiam imperturbata, in afflictionibus alacritas, in perferendis injuriis lenitas, animus simplex, mansuetus, nulli malum cogitans, & de omnibus benè mereri studens, omnibus humanis rebus superior, & vitæ contemptor. At novi isti Pseudo-Evangelici Lutherani, fungorum instar, unâ nocte procreati, dum strenuè clamant in mores Romanorum Pontificum, Episcoporum, Sacerdotum, Monachorum, & Theologorum; dum in preces, jejunia & Missas debacchantur, & ubique crepant Ecclesiæ reformationem, interim tamen luxui, libidini, ventri & pecuniæ indulgent, totam fiduciam suam in improborum conspiratione, in seditiosis tumultibus, in maledicis libellis, in armis, in fucis & technis reponunt; nullo unquam miraculo suam Pseudo-Evangelicam doctrinam probarunt, nec minùs vitæ sanctitate quemquam in sua Secta ex comensatore sobrium, ex feroci mansuetum, ex rapaci leberalem, ex superbo modestum, ex impudico verecundum reddiderunt, sed potius flagitiosæ vi-

ta exemplis omnes deteriores efficiunt. Quin, nec eadem loquuntur, sed inter se dissentientes, variant linguis ac sententiis, subindèque novant, figunt & refigunt ritus pariter & dogmata, mutant quadrata rotundis, & rotunda quadratis. Sed mittamus perditissimos illos ac vanissimos nebulones, qui se falsò venditantes Evangelii titulo innumera damna Ecclesiæ Catholicæ intulerunt, Canonicos depellendo à Collegiis, Monachos è Monasteriis, Abbates & Episcopos ditione spoliando, Cives Magistratu amovendo, & virulentis ac dentatissimis libellis in Summorum Pontificum, Regum, ac Principum capita sæviendo, quosque Catholica Ecclesia, postquam, ut pia mater, quod sui muneris erat, gravitèr adhibuisset, monens, obsecrans, arguens, revincens, jugulans gladio spiritus: insanabiles demùm, & in hæresi pertinaces à Christi Corpore segregavit. Missis itaque Hæreticis Lutheranis, eorumque variis Sectis in quas abierunt, prosequere, quæso, Historiam aliarum Hæresum, quibus Sæculo XVI. agitata fuit, & tanquam fluctibus ac procellis diu multùmque jactata est Ecclesia.

M. Dùm suos errores spargeret *Lutherus* in Germania, *Zuinglius* in Helvetia, Rex *Henricus VIII.* in Anglia & in Scotia, eorumque sequaces Lituaniam, Sueciam, Daniam, Præssiam pestiferâ doctrinâ inficerent, novam incendii facem accendit in Gallia Hæresiarcha *Joannes Calvinus*, Novioduni Veromanduorum sexto Idus Junii anni MDIX. patre *Gerardo Chauvino* Procuratore, & matre *Joanna Franka*, Catholicis parentibus natus. Lutetiam Parisiorum à Patre missus *Joannes Calvinus*, studiorum suorum cursum tum in Col-

Collegio Marchiano, tum Montis Acuti Gymnasio peregit, indeque Aureliam veniens, ad jurisprudentiæ studium sub *Petro Stella*, insigni Jurisconsulto, animum applicuit. At *Calvinus* novâ & falsâ à suis Præceptoribus afflatus doctrinâ, nuncium remisit Vitæ Clericali, quam amplexus fuerat jubente patre suo, qui ei ab Episcopo Noviodunensi, cujus Actuarius erat, duo obtinuerat Beneficia, primum Capellam Beatæ Mariæ Virginis de Partu in Ecclesia Cathedrali, deinde Parochiæ loci, dicti *Pontis-Episcopalis*, propè Noviodunum, Curationem. Nec vitæ dumtaxat genus mutavit, sed & ipsum nomen, relictoque *Chauvini*, seu *Calvini* nomine, ineptâ metathesi sese *Alcuinum* dixit. Profectus deinde Avaricum Biturigum *Calvinus*, à *Melchiore Vuolmaro*, Germano, publico Græcarum litterarum Professore Lutherano, qui tamen Catholici speciem præ se ferebat, novæ hæreseos principia hausit, quam postea in patria sua, ubi sacrilegâ nundinatione duo illa Beneficia, quæ Pater ipsi ab Episcopo Noviodunensi procuraverat, vendidit, & Parisiis disseminare tentans, ultimum discrimen subiit, & igne exustus esset, ni maturâ fugâ periclitanti vitæ suæ consulisset. *Hieronymus Bolsesus*, Catholicæ Religionis Apostata, & *Calvini* individuus comes, qui tamen, divinâ adspirante gratiâ, ad gremium Ecclesiæ reversus, scripsit vitam *Calvini*, testatur, hunc hæresiarcham ob turpe, quo se fœdaverat, Sodomix crimen, lilii candentis ad humerum inustione, & exilio multatum fuisse, additque *Damnationis illius instrumentum adhuc Novioduni asservari*, ibique à *Genevensis Reipublicæ Secretario Berthelero*, illuc misso, ut in

ut in rei veritatem inquireret, visum esse. Id tamen non omninò certum esse Spondanus ad an. MDXXXIV. Numero XI. innuit his verbis: *Quod verò traditur vulgò, eum, seu Calvinum, in turpe crimen sodomie incidisse, ac propterea in vitæ discrimen, nisi pœnæ moderationem Episcopus impetrasset, lilii candentis ad humerum inustionem & exilium à patria: hoc Papius Massonus, vitæ Calvinii Scriptor, tacet; solamque abeundi in exilium causam, hæresim fuisse ait &c.* Sed, utut sit de hoc accusationis capite, certum est, *Calvinum* Pariliis degentem, pannorum lineorum ope è Collegio *Forteti* per fenestram evasisse, & Engolismam secessisse, ubi per triennium vendicatione Linguz Græcæ, cujus aliquâ notitiâ à laudato jam *Melchiore Vuolmaro* imbutus fuerat, & sumptibus *Ludovici Tilii*, Canonici Engolismensis, & Curionis Claixensis, adjutus, suos Institutionum libros ex locis communibus *Philippi Melancthonis*, ex Operibus *Oecolampadii*, & ex aliis id genus Sectariorum hujus temporis quisquiliis delineavit, eosque, ut omnes ad illorum lectionem alliceret, purioris latinitatis elegantiam adornavit. Cum *Tilio* amico suo in Germaniam se contulit *Calvinus*, ubi postquam plerisque Sæctæ Lutheranae antesignanos visitasset, à *Martino Bucero* adductus est ad *Desiderium Erasmus*, qui, statim ac eum de aliquot Religionis capitibus disserentem audisset, ex ungue Leonem agnoscens, *Bucero* dixit, *videre se magnam pestem oriri in Ecclesia contra Ecclesiam*, ut videre est apud *Spondanum* loco mox à me citato. In Galliam reversus *Calvinus*, Pictavium perrexit, ibique virus suæ hæreseos effundere cœpit in hortis Pi-

Ætaviensibus, colloquia de Religionis Dogmatibus, & præcipuè de Eucharistiâ, miscens cum nunnulis litteratis, ex quibus tres potissimum, quasi novæ suæ Sectæ Apostolos, selegit, *Vermonium* videlicet, qui pravam doctrinam disseminavit Pictavii & in vicino agro; *Ramassorum*, qui eodem veneno Santones; & Engolismenses infecit; & *Bonum Hominem*, qui in reliquam Aquitaniam, & Tolosam hanc pestilentem induxit Hæresim. Ex his tenuibus initiis exorta lues, tot bellorum, incendiorum, cladum per Europam, & maximè per Galliam Seminarium fuit. Interim, *Calvinus*, jam novæ suæ Sectæ erumpente famâ, coactus est, ne deprehenderetur, sæpius mutare loca, tandem Genevam pervenit, quæ Civitas, & à Sabaudix Ducis obedientiâ, & à Religione Catholica nuper ad Sacramentarium Hæresim defecerat. In hac civitate *Calvinus* unâ cum *Guillelmo Farello*, & *Petro Vireto* suos errores disseminavit, Senatum, populumque Genevensem suæ Sectæ addixit, indeque feralis illa hydra per plures Galliarum Regni civitates grassans, Sacerdotum exuviis, populorum sanguine, Provinciarum cladibus & exitio satiata, irrupit in Forum, in scholas, in aulam, castra, arces, templa. Munera, Dignitates, Synodos & Cætus habuit, parùmque abfuit, quin ex toto Regno verum Dei cultum, quo uno æternæ vitæ spes continetur, exterminaret, in vectis innumeris impietatibus, malis, ac sacrilegiis, quæ hic memorare horret refugitque animus.

D. Noli, quæto, renovare sopitum dolorem nostrum, & obductam vulneri cicatricem refricare recordatione funestissimorum temporum, quorum adhuc

adhuc nos ipsi partim incendia , partim fumantes cernimus reliquias, ex quibus heu nimium ! intelligimus, Galliam tum temporis eo fascino delusam, his pestibus ab humani generis hoste immissis infectam, in se ipsam conjuratam pugnasse, suis opibus consumptam, suis fractam viribus, quæ alienis semper invicta fuerat , nec tantum à suis , sed ab aliorum quoque finibus hæreticos, aliosque hostes nominis Christiani tam sæpè depulerat, tam multis ornamentis Sedem Apostolicam affecerat, totque Bellis pro Christi fide præclare gestis Europam , Africam , Asiam nobilitaverat . Galliz itaque parcamus, & inquiramus in mores *Joannis Calvinii* , omnium horumce malorum Auctoris , quem Hæresiarchæ *Martino Lutbero* turpitudine vitæ , vitiorumque sentinâ similem fuisse, facile adducor ut credam .

M. *Martinus Lutherus* , & *Joannes Calvinus* malitiâ , impietate , superbiâ , fastu , & audacia pares quidem fuerunt , sed naturâ, ingenio , & indole omninò dissimiles . At enim, *Calvinus* naturâ melancholicus fuit , & taciturnus ; cibi & potus abstinens ob ventriculi debilitatem , & hemicraniam , quibus laborabat , ideòque tenui & macilentio corpore ; summam in gestibus affectans gravitatem , dissimulandi artifex eximius, & non minus consilio , quàm audaciâ promptus . At *Lutherus* , Vir erat abdomini natus , crasso corpore , genio indulgens , luxuriosus , ebrius , ganeo , qui per summam hilaritatem tempus transigebat , còque semper trahebatur , quò libido rapiebat , quò intemperantia , quò vinolentia . *Calvinus* multa animo volvebat , quæ cautè dissimulabat , nec ore pro-

promebat; *Lutherus* autem linguæ suæ moderari nesciebat, nihil celabat, sed quæcumque animus suggererat, aut quidquid in buccam veniebat, evomebat, ac temerè effutiebat. *Calvinus* nullâ actionis elegantiam inter loquendum instructus, tædium auditoribus sæpè afferebat, sed culto, puro, ac terso stylo scribebat. *Lutherus* verò patriâ suâ linguâ Orator quidem fuit disertus & vehemens, sed in scribendo, rudi, incompto, ac imposito sermone usus est. *Calvinus* etiam cum amicis adeò superciliosus ac morosus erat, ut *Bucerus* ejus amicus, cum, *canem rabidum*, vocaverit, *Melancthon* præfractam ejus *Morositatem* vituperaverit, ac ipsimet Genevenses, apud quos degebat *Calvinus*, vulgò dicere solerent, malle se apud Inferos cum *Theodoro Beza*, Discipulo *Calvini*, esse, qui festivis jocos eos in mediis flammis exhilarasset, quàm apud Superos cum *Calvino*, sicut refert *Papirius Massonus* in *Vita Calvinii*. Contrà verò *Lutherus* solebat cum amicis indulgere facetiis, frontem exporrigere, eratque, instar *Luciani*, Deum, hominumque irrisor. Hinc *Lutherus*, sicut superius observavimus, postquàm serò cum amicis lautè cœnasset, & animum suum facietis, festivisque sermonibus pro more exhilarasset, nocte sequenti repentinâ morte extinctus est. E diverso *Calvinus*, naturâ, ut diximus, melancholicus ac morosus, postquàm vixisset annos quinquaginta quatuor, menses decem, dies septemdecim, obiit in desperationem actus, Dæmones invocando, dejerando, execrando, vitæ suæ diras imprecando, & suis studiis & Scriptis maledicendo, & ex suis ulceribus intolerabilem foetorem einit-

emittendo, sicut *Hieronymus Bolfecus* in *Vita Calvinii*, & multi alii scribunt, frustra licet reclamante *Theodoro Beza*, qui *Calvinum*, cujus erat discipulus, quique ei in Caliphatu Genevensi successit, placidissimè ex hac vita migrasse affirmat, impotenti excœcatus studio assentandi palpandique Magistro suo. Ex ea, quam hic breviter indicavimus, *Lutheri*, & *Calvini* morum dissimilitudine enata est inter utrumque Hæresiarcham animorum itidem dissensio, quam apertè declarat *Calvinus* tum in Epistola LVII. ad *Bullingerum*, in qua asserit, *Lutherum* magnis laborare vitiis, plurimùm ei obfuisse adulatores, illumque naturâ ad indulgendum sibi nimis propensum fuisse; tum etiâ in Epistola LXIII. ad *Melancthonem*, in qua *Lutherum* appellat *Periclem*, ad fulminandum nimîâ intemperie raptum, ibidèmq; invenitur in vehemens *Lutheri* ingenium, & impetus violentos, quibus omnem libertatem auferre, & tyrannidem inferre gesticbat. Undè faciliè intelligere potes (ut verbis utar *Henrici Spondani* ad ann. MDXLIV. Num. XVII.) quæ fuerit *Reformatorum* hujusmodi concordia, & quàm quique *Primates* sibi asserere ambierint, quem, post *Lutherum*, *Calvinus* insignitè artificiis suis, ac subdolis fraudibus, & quesivit, & obtinuit.

D. Cedo nunc, si placet, errores, quos docuit Hæresiarcha *Calvinus*, & quibus multas florentissimi Galliarum Regni Provincias infecit.

M. Complures errores profudit *Calvinus*, qui tamen ad hæc viginti præcipua capita revocari possunt. Primò negat realem præsentiam Corporis,

poris, & Sanguinis Christi in Eucharistiæ Sacramento. *Transubstantiationem*, velut figmentū, rejicit; Eucharistiam adorandam, asservandam, circumferendam, & extra usum ac manducationem, Sacramentum esse inficiatur. Secundò, docet, hominem solâ fide sine operibus justificari, eamque fidem, nullo quantūvis gravi delicto, excepto infidelitatis peccato, amitti unquam posse. Ex quo pestilentissimo dogmate palâm sequitur, Fornicarios, Adulteros, Homicidas, & alios scelestos homines ex justitia semel acceptâ in utero matris fidelis nunquâm excidere, modò habeant Fidem in Christum Mediatorem. Tertiò, asserit *Calvinus*, hominem justificari per solam Christi justitiam imputatam. Quartò, pertendit, omne peccatum esse mortale, sed Fidelium peccata esse venialia, non quòd mortem non mereantur, sed quia Dei misericordiâ nulla est condemnatio in his qui sunt in Christo Jesu, seu quia justis non imputantur, sed veniâ delentur. Quintò, dicit, mandata Dei esse hominibus impossibilia, sicque crudelem facit Deū, qui hominibus impossibilia præcipiat. Sextò, affirmat, extinctum omnino esse post primigenium protoparentis peccatum liberum hominis arbitrium, ex quo sequitur Deū esse Authorem peccati, ad quod Deum efficaci voluntate motuque concurrere disertis verbis docet *Calvinus*. Septimò, negat, ullum esse opus hominis vitæ æternæ meritorium. Octavò, Missam nec à Christo institutam, nec Sacrificium, nec bonum opus esse dicitur. Nonò, Baptismum Joannis Baptistæ ejusdem esse virtutis cum Baptismo Christi. Decimò, Baptismum Christi absolutè

ad salutem non requiri, fideliumque pueros posse sine eo salvari. Undecimò, peccata post Baptismum commissa Baptismi suscepti recordatione deleri. Duodecimò, nec Confirmationem, nec Extremam Unctionem Sacramenta esse. Decimo tertio, Clericos nec ad Cœlibatum, nec ad continentiam teneri. Decimo quarto, Vota omnia, inutilia esse, & nihil prodesse, omnesque generali præcepto adstringi ad nuptias contrahendas. Decimo quinto, exsufflat tanquam nugatoriam Fidei formatæ, & informis distinctionem; Quadragésimale jejunium inter superstitiosas observationes enumerat, & ait, Monasteria esse Lupanaria, potiùs quam castitatis sacraria, & non aliter porcos in hâris saginari, quàm Monachos in Cœnobiis. Decimo sexto, asserit, Romanæ Sedis Primatum neque ex Christi instituto, neque ex Ecclesiæ veteris usu sumpsisse originem. Romanum Pontificem appellat *Antichristum*. Concilia Generalia in tradendis Fidei dogmatibus, & Scripturæ Sacræ interpretatione, errare posse ogganit, & auctoritatem judicandi de vero sensu, & interpretatione Sacrarum Scripturarum omnibus promiscuè, etiàm mulierculis, adjudicat. Decimo septimò, in Traditiones, & Constitutiones Ecclesiasticas, ceu in Tyrannidem, quæ sub Ecclesiæ titulo superciliosè ingeritur, debacchatur. Decimo octavò, dicit, preces fundi non debere pro mortuis, & Purgatorium exitiale Satanz esse commentum, quod Christi Crucem evacuat, contumeliam Dei misericordiæ non ferendam irrogat, & fidem nostram labefacit ac evertit. Decimo nonò, Indulgentias damnat tanquàm pias fraudes,

quæ-

quæstuosas nundinationes, Sanguinis Christi profanationem, Satanæque ludibrium, quo Christianus populus à Dei gratia, à Vita, quæ est in Christo, abducatur, & à vera salutis via avertatur. Denique, Imaginum usum, & cultum à Satana manasse, & merâ idololatriam esse impiè asseverat, cultum Religiosum, etiam Dulæ, Angelis, & Sanctis hominibus absque damnandâ superstitione exhiberi non posse, & Sanctos cum Christo in in Cœlis viventes pro nobis non intercedere, nec absque Sacrilegio, & superstitione invocari posse affirmat. Mitto alios *Calvini* errores, necnon blasphemiam, quam evomit in Christum Dominum, asserendo, lib. 2. *Institutionum* cap. 16. & in suâ *Harmonia Evangelica* ad Caput xxvi. *Matthæi*, eum damnatorum pœnas in suo ad Inferos descensu passum, & cum Inferorum copiis, æternæque mortis horrore, quasi confertis manibus, luctatum esse. Si plura de erroribus Hæresiarchæ *Joannis Calvini* scire desideres, legis *Franciscum Fervardentium*, Ordinis Minorum, Sacræ facultatis Parisiensis Doctorem Theologum, qui mille, & quadringentos Sectæ *Calvini* errores in sua *Theomachia Calvinistica* excussit, ac confutavit. *Calvini* etiâ deliria prolixius persecutus est *Florimundus Ramondus*, Senator Burdegalensis, in libro septimo Historiæ suæ de Ortu, progressu, & inclinatione Hæresum ex probatis Auctoribus collectæ, & de forma Calvinianæ Synagogæ, deque institutione, & œconomiâ sacrorum, ac disciplinæ ab ipso *Calvino* fabricatæ diligentissimè disserit in libro octavo ejusdem Historiæ. Consulere etiam poteris doctissimos Cardinales *Bellarminum*, *Per-*

P 2

ronium,

ronium, Richelium, necnon illustres Antistites *Nicolaum Coëffetaum*, Ordinis Prædicatorum, *Masiliensem* Episcopum designatum, & *Benignum Bossuet*, Meldentium Episcopum, qui eruditis suis lucubrationibus impiam *Calvini* doctrinam impugnarunt.

D. Audiebam nuperrimè eruditum quemdam Theologum falsè ridentem hæreticos Calvinistas, qui ex doctrina sui Pseudo-Magistri *Calvini* sex sibi vindicant Immunitates, quæ eos à peccato, ab errore, ab omni salutis periculo, & à servandis divinis, & humanis legibus penitus eximunt. Cum enim *Calvinus*, ut mox observasti, doceat, solam fidem in Christum mediatorem, sine bonis operibus justificare, eamque esse inamissibilem; deinde, peccata non imputari Fidelibus, ac denique, Baptismum nec ad salutem, nec ad delendum peccatum Originale necessarium esse pueris, qui ex patre, & matre Fidem, seu Christianismum profitentibus, nati sunt; ex his tribus capitalibus *Calvini* erroribus, tanquàm ex virulento fonte sex immunitates hauriunt, sibi que arrogant hæretici Calvinistæ, quas sequenti ordine mihi referebat Vir ille eruditus. Primò, ajunt hæretici Calvinistæ, se solâ à parentibus Christianis, seu qui fidem habent in Christum mediatorem, originæ, primo conceptionis momento, ita sanctos & puros, & à Deo edoctos esse, ut nunquàm in posterum vel à gratia excidere, vel aliquo errore à fide deficere possint, & maternus uterus, etiam incestus, etiam adulter, modò Christianismum mater, aut pater profiteatur, sit illis instar primi Baptisterii, quo jure communi se habere

bere ajunt Calvinistæ omnes, ut à peccato originali sint immunes. Secundò, idem uterus maternus est illis hæreticis Calvinistis Cœnaculum Hierosolymitanum, quò delabitur Spiritus Sanctus, & eos, sicut in die Pentecostes Apostolos, ita in gratia firmat, ut ab ea nunquam in posterum excidere queant. Tertiò, idem uterus maternus est illis Sacrarium, ubi omnes unguuntur in Sacerdotes, quò spirituales hostias Deo offerant. Quartò, Calvinistis uterus maternus est Tribunal Confessionis, ubi in antecessum ita ab omnibus peccatis futuris absolvuntur, ut nullum illis imputetur unquam ad damnationem. Quintò, est illis Academia, ubi à Deo irà imbuuntur notitiâ Fidei Doctrinæ, quæ ad salutem necessaria est, ut nec ab Ecclesia, nec à Conciliis, nec à Sanctis Patribus, nec ab Episcopis edoceri opus habeant. Postremò, Calvinistis maternus uterus est velut amplissima Cancellaria, undè litteras habent, quibus immunes fiunt à jejuniis Quadragesimali, à pœnitentia, à votis, à bonis operibus, à legibus Principum, & etiã à lege Divinâ, hoc saltèm sensu, ut licet in illam peccent, nullum ex eo peccato salutis periculum, aut damnum creetur, quia Calvinistis peccata, quantumvis gravissima, non imputantur, suntque dumtaxat venialia. Has sex Calvinistarum Immunitates, quæ infinitam, & horribilem in hominum mores invehunt corruptelam, dùm mihi narraret eruditus ille Theologus, dubius paululùm hæsi, quærens cum *Tertulliano* libro 2. ad *Nationes* cap. 12, *Rideam vanitatem, an exprobrem eam citatem?* Tandem seriò intellexi, prætersam illam Ecclesiæ Reformationem, quam, ut facilius fucum faceret,

obtendebat *Calvinus*, tendere dumtaxat ad effrenem morum licentiam, ad divinarum, & humanarum legum contemptum, ad ambitionem intolerabilem, quâ abreptus ille scelestus Hæresiarcha se unum dumtaxat sapere, ac tanto reformandæ Ecclesiæ muneri parem insulse putaret, cæterosque tot sæculorum, tot gentium, tot Academiarum, eruditione juxta & Sanctitate præstantes viros desipere judicaret. Perturbanda fuit publica quies, perrumpendæ leges, sacra violanda, corrumpendi mores, innumeræ excitandæ tragædiæ, miscenda cuncta procellis, ut pestilentissimi illius Novatoris Secta, nomenque vigeret. Sed, quod magis dolendum est, necdum pestifera illa *Calvini* Secta extincta est, sed adhuc ad perniciem animarum latè grassatur, & instar Hydræ pluræ capita habet, seu ex variis Sectis conflata est, quæ quo pacto prodierint, & qui earum Autores extiterint, rogo te ut nunc breviter exponas.

M. Præcipuæ inter Calvinistas Sectæ sunt quatuor. Prima est eorum, qui se *Reformatos* dicunt, quique impiam *Calvini* doctrinam ad amulsum sequuntur. Altera illorum est, qui nuncupantur *Anglo-Calviniani*: Tertia est *Piscatorianorum*, & quarta *Arminianorum*, de quibus singillatim pauca dicemus. In primis, Secta illorum, qui *Calvini* doctrinam studiosè sequuntur, olim vigeat in Gallia, & nunc viget in Palatinatu, & in Helvetia, ubi illi Sectarii vocantur *Reformati*. Eadem Secta in Anglia, & in Scotia serpit, ubi hi Sectarii nominantur *Puritani*. Ab illis *Reformatis*, seu *Puritanis*, differunt *Anglo-Calviniani*, qui alteram Sectam in Anglia constituunt. Ordinem quipè

pè Episcopalem non solum admittunt, sed eum jure divino Presbyteratus ordine superiorem esse profitentur; quod Calvinistæ, dicti *Reformati*, aut *Puritani*, præfractè negant. Præterea, *Anglo-Calviniani* suas habent Cathedralis Ecclesias, in quibus sunt Canonici, seu Præbendarii, qui Matutinas ac Vespertinas preces celebrant, Liturgiam suo ritu diebus sacris peragunt, & in functionibus suis obeundis superpelliceo utuntur; quæ omnia Calvinistæ *Reformati*, seu *Puritani*, rejiciunt. Tertiò, *Anglo-Calviniani* Cruci, quæ Christum Dominum Crucifixum repræsentat, honorem deferunt, & in Sacramentorum, præcipuè Baptismi administratione, signum Crucis adhibent. At Calviniani *Reformati*, seu *Puritani*, signum Crucis execrantur, & Cruces ubique evertunt, frangunt, ac demoliuntur. Demùm *Anglo-Calviniani*, juxta leges Reginæ Elizabethæ, Summum Ecclesiæ Anglicanæ Caput ac Gubernatorem Regem Angliæ agnoscunt, quod negant alii Calvinistæ, qui in Regno Angliæ vocantur *Puritani*, ad quos proximè accedunt alii Sectarii, qui in eodem Regno dicuntur *Presbyteriani*, & *Independentes*, quique in Calviniana Superstitione à *Puritanorum* Fidei confessione non dissentiant. Hic autem obiter observare debes, Regnum Angliæ, postquam sub Rege Henrico VIII. ab Ecclesiæ Romanæ communionem funesto schismate fuit separatum, non solum istis Calvinianæ superstitionis Sectis aditum præbuisse, sed etiam varias alias Sectas in eo impune grassandi licentiam habuisse, quas inter censentur primò Secta *Anabaptistarum*, cujus superius meminimus. Secundò, Secta *Antinomorum*, qui

Legem & totum Vetus Testamentum rejiciunt ; Tertiò , Secta *Antiscripturiorum* , qui se , non secus ac Prophetas & Apostolos , Spiritum Sanctum habere gloriantes , totam Scripturam Sacram contemptui habent ; Quartò , Secta *Quakerorum* , qui inter orandum toto corpore contremiscunt , seque sæpius in ecstases rapi , & in hac vita plenè perfectos , & à peccato mundos esse jactitant ; Quintò , Secta *Ranterorum* , qui ex hara Epicuri prodeuntes , nihil turpe putant , ad quod naturæ quamvis corruptæ , & carnis illecebris titillatæ , sentiunt incitamentum ; Sextò , Secta *Levelliorum* , qui Politici regiminis sunt jurati hostes , dùmque naturalem hominum æqualitatem , quâ nec opibus , nec honore , nec potestate alter alteri antecellat , inducere gestiunt , ad excitandas adversus Magistratus seditiones pronos promptosque se se exhibent . Quod quidem ne putes , aut à me gratis , aut ad infamiam Angliæ inurendam dictum esse , referam hîc quæ nuperrimè legi in libris ipsorummet hæreticorum , qui de hodierno Statu Religionis in Angliæ Regno scripserunt . *Honorius Reggius* Kemnatenensis hæreticus in libro *De hodierno Ecclesiarum Anglicanarum Statu* , quem Danzici anno MDCXLVI I. edidit , hæc habet : Anglia facta est Colluvies , & Lerna omnium errorum ac Sectarum . Nulla à condito Orbe Provincia tam parvo spatio tot monstrosas Hæreses protulit , atque hæc . Episcoporum tempora intra LX. annos nonnisi quatuor Sectas protulerunt , *Puritanos* , *Bronswistas* , *Familistas* , & *Anabaptistas* . Postea , abolitâ Hierarchiâ Episcopali , prodierunt *Presbyterianorum* , & *Independentium* Sectæ .

Indepen-

pendentes vix in suas Classes dividi possunt, tanta est varietas, & pugna. Præcipua genera sunt: *Anabaptistæ*, *Libertini*, *Antiscripturarii*, *Chiliasæ*, seu *Millenarii*, *Antinomi*, *Manifestarii*, sive *Arminiani*, *Familistæ*, *Enthusiastæ*, *Querentes*, seu *Expectantes*, *Perfectistæ*, *Sociniani*, *Antitrinitarii*, *Sceptici*, à quibus innumeræ aliæ pullularunt Sæctæ, quæ quotidie latius diffunduntur, quarumve errores producit laudatus ille Scriptor hæreticus, ostenditque, omnium, quæ in Anglia serpunt, Sæctarum pessimam esse *Independentium*. Alter Scriptor hæreticus, qui itidem deplorat hodiernum Ecclesiarum Anglicanarum Statum, est *Thomas Eduardus*, Anglus, & Londinensium Pastor, qui in libro, cui titulum *Gangrena* fecit, per censet centum, & octoginta hæreses, seu errores, qui in præsentia vigent in Anglia, & postea subdit: *Nulla Hæresis, blasphemia, confusio est, quæ non inveniatur in Anglia, vel oriatur. Reformatio ab uno extremo ad aliud collapsa est. A Scylla in Charybdim ventum. Damnandæ Hæreses, horribiles blasphemie, Libertinismus, & tremenda Anarchia est. Non ablata mala, sed aucta. Diabolo pejor Spiritus successit. Jam & ipsam abnegant Scripturam, & tam enormis omnium Religionum libertas propugnatur, ut etiam blasphemia, & Atheismus includantur. Et hoc publicis scriptis fit in conspectu Parlamenti, quod tolerat horrendos Sæctarios in ipsa Urbe, & permittit ut libros publicent. Ingens numerus Opificum concionatorum, & rudissimorum nebulonum. Etiam sæmina, & pueri concionantur. A condito Orbe non fuerunt tot monstrosa opiniones, quot nunc in Anglia. Postremo, Authores Annotationum in*
Bi-

Biblia Anglicana ad Caput x. *Geneseos*, de misero Religiosis in Anglia Statu lamentantur in hunc modum: *Quot causas habemus liberos, qui nascuntur, Pelegos, seu divisos, vocandi? Quàm divisi sumus non in linguas tantum, ut Babylone factum; sed capita, corda, manus? Quantæ divisiones, non tantum Rubenis, ut judicum cap. 5. V. 15. sed omnium tribuum Israelis nostri? Et O si tantum divisi essemus! jam verò subdivisi sumus in complures factiones Reipublica, in varia schismata Ecclesiæ. Sic pro dolor! Deus inscrutabili judicio Anglos, ab Ecclesia Romana extorres, tradidit in reprobum sensum, ut omnium gentium serviant erroribus, & magnam sibi videantur assumpsisse Religionem, quia nullam respuunt falsitatem. Sed, missis Anglis, quibus meliorem mentem precamur, redeamus ad alias Calvinianæ Superstitionis Sectas, quarum tertia est *Piscatorianorum*, cui nomen dedit *Joannes Piscator*, Argentinenfis, in Gymnasio Herbornensi Calvinianæ Theologiæ Professor, homo arrogans, superciliosus, & rerum novandarum cupidissimus. Hic quippè, præter multos errores, quos circa Cœnam Dominicam, Prædestinationem, pœnitentiam, & satisfactionem Christi sparsit: docuit, Fideles justificari quidem per justitiam Christi, quæ ipsis imputatur, non tamen per eam justitiam, quam Christus, dum viveret, ex legis obedientia, vitæque sanctimoniâ habebat; sed per eam justitiam, solam, quam Christus passione, & morte suâ acquisivit. Hanc Joannis Piscatoris doctrinam (ut videre est apud Illustrissimum *Benignum Bossuet* Meldensem Episcopum libro xii. *Historia Variatio-**

num *Ecclesiarum Protestantium*) alii inter Calvinistas tanquàm hæreticam, spiritui ac doctrinæ *Calvini* omninò contrariam damnarunt, ipsumque *Joannem Piscatorem* Anathemate perculerunt; alii verò doctrinam *Joannis Piscatoris* approbarunt, indèque factum est, ut gliscente illo dissidio, nova inter Calvinistas eruperit Secta *Piscatorianorum*. Postrema Calvinistarum Secta est *Arminianorum*, sic dicta à *Jacobo Arminio*, ejus Authore, Amstelodamensi quondam Ministro, postea Lugduni Batavorum Theologiæ Professore, qui in materia de gratia Dei, & libero arbitrio, de justificatione, de Prædestinatione, & reprobatione, de perseverantia &c. cum multis excitasset Controversias, nactus est suæ doctrinæ adversarium *Franciscum Gomarum* doctrinæ *Calvini* addictissimum, à quo profecta est Secta *Gomaristarum*, qui etiam dicti sunt *Rigidi Calviniani*, & *Contraremonstrantes*, ad discrimen *Arminianorum*, qui dicebantur *Calviniani molles*, & *Remonstrantes*. Cane pejus, & angue Calvinistæ *Gomaristæ* oderant *Arminianos*, quos ubique Pelagianismi insimulabant. Versâ vice Calvinistæ *Arminiani* diris devovebant *Gomaristas*, ipsisque exprobrabant, quòd gratiam irresistibilem seu necessitantem admitterent, & negarent cooperationem liberi arbitrii. Vicerunt tamen *Gomaristæ*, & in Synodo Dordrechtanâ habitâ anno mdcxviii. damnarunt *Arminianos*, qui Decretis prædictæ Synodi cum parère detrectarent, Magistratum auctoritate oppressi sunt. Hic tamen diligenter observare debes, recentiores Calvinistas, Catholicorum Theologorum Polemistarum disputationibus convictos, emollitis,
ne

ne dicam penitus explosis, Magistrorum suorum
 pristinis aberrationibus, ad Ecclesiæ Catholicæ
 doctrinam de Prædestinatione, gratiâ & libero
 arbitrio, propius accessisse, eosque ultrò fateri,
 gratiam, quantumvis se ipsâ efficacem, non tol-
 lere consensum & liberi arbitrii cooperationem.
 Ad hanc sanam Ecclesiæ Catholicæ doctrinam tan-
 dem aliquandò recentiores Calvinistas, semotis
 pristinis *Calvini*, suorumque Magistrorum præju-
 diciis, convolasse, disertè testantur doctissimi The-
 ologi Catholici Polemistæ, quorum verba hic lu-
 benti animo subjungam, ut indè intelligas, recen-
 tiores Calvinistas, antiquo posthabito Magistro-
 rum suorum errore, Catholicis eo saltem in Capi-
 te penè cōsentire. In primis Cardinalis *de Richelieu*
 in Tractatus, quem gallicè pro hæreticorum con-
 versione edidit, libro 3. *de libero arbitrio* sic habet:
Recentiores hæretici majorum suorum doctrinam de
prædestinatione, gratia & libero arbitrio ita emolli-
runt ac temperarunt, ut vix ullum iis in capitibus (si
accuratè loqui velimus) eos inter & nos diffidium
extet. Illustrissimus *Jacobus Benignus Bossuetus*,
 Meldensium Episcopus, & egregius Calvinianæ
 Sectæ Triumphator, libro octavo *Historiæ variatio-*
num Ecclesiarum Protestantium datâ operâ ostendit,
 recentiores Calvinianos, repudiâtâ Magistrorum
 suorum sententiâ, ultrò nunc profiteri liberi arbi-
 trii cooperationem, & capite quinquagesimo pri-
 mo totam præcedentium narrationem ita conclu-
 dit: *Modò bona fide & concordî consilio res agatur,*
ne levem quidem inter nos diffidii umbram experior,
quoad illam de liberi arbitrii cooperatione controver-
siam. Idem asserit Illustrissimus ille Antistes, exi-
 mus

mius antiquæ Ecclesiæ interpretes, & novæ acerrimus vindex, in *Expositione Fidei Catholicæ* Cap. 7. ubi agit de Gratia & libero arbitrio in negotio justificationis. Hanc recentiorum Calvinistarum de Prædestinatione, de Gratia & libero arbitrio doctrinam prolixius adhuc ac distinctius explicant Illustrissimi Episcopi ac fratres germani *Adrianus*, & *Petrus de Walenburch* Tomo 2. *Contrroversiarum* Tractatu I. Capite quinquagesimo septimo, cui hunc titulum præfixerunt: *Appropinquatio Protestantium ad doctrinam Catholicam*. Ibi quippe doctissimi illi Polemistæ, post adducta præcipuorum Sectæ Calvinianæ super hac re testimonia, sic scribunt: *Atque hæc sententia nunc est inter Reformatos communissima. Neque hoc tempore dicunt, Gratiā ita esse à se ipsa efficacem, ut excludant motionem moralem, quæ est per consilia & suasiones. Similiter hoc tempore non docent, Deum ita efficaciter movere voluntatem, ut postea non sit nostræ electionis, motioni ejus aut obtemperare, aut refragari; tenent enim facultatem dissentendi consistere cum gratia efficaci, & id ipsum tradunt quod Thomistæ: libenter etiam fatentur, Deum per gratiam, vel motionem ita operari in nobis velle, & nos ad se ipsum convertere, ut gratiæ prævenienti nostrum arbitrium pedissequa voluntate obsequatur liberè. Non igitur est necesse indagare, quid Calvinus, quid alii antehac senserint: Sufficit eos nunc cum Catholicis Doctoribus sentire, & loqui. Idem confirmant hi duo illustrissimi Præsules capite sexagesimo, cui titulus: *Hominem liberè consentire gratiæ Dei*. His doctissimis Polemicis Scriptoribus Catholicis quatuor alios perinde eruditos adjungam, qui eundem testantur, recen-*

tio-

tiores Calvinistas ad saniora tandem consilia venisse, & ad Catholicorum doctrinam de gratia & libero arbitrio propius accessisse. *Vincentius Baronius* in libro, cui titulus est: *Hæresis devicta*, asserit, ad Catholicos tandem Theologos in doctrina de gratia, & libero arbitrio accedere quotquot inter Calvinistas altiori eruditionis famâ valent. Eruditus *P. Veronius* 3. part. Controversiarum cap. 2. de libero arbitrio, expolitis variis hæreticorum Protestantium Confessionibus, Galliz scilicet, Bataviæ, Scotiz, Angliz, Helvetiæ, Augustanz, & Saxoniz, quibus liberi arbitrii cooperationem profitentur & explicant, ait: *Magistrorum suorum doctrinam abnegant* (recentiores hæretici Protestantes) *suosque articulos tot interpretationibus emolliunt, ut nihil jam adversus Ecclesiæ Romanæ doctrinam doceant. Satis nobis illorum professio sit. Atque utinam in aliis errorum capitibus, ita se gererent.* Auctor libri cui titulus est: *Iusta adversus Calvinianos Præjudicia*, cap. xi. variis Calvinianæ Sectæ Ministrorum testimoniis probat, fateri tandem aliquandò cōactos fuisse Calvinianos, dissidium in doctrina de Gratia & libero arbitrio Ecclesiam inter & Calvinianos excitatum, verbis potius stetisse, quàm aebus ipsis: seu primos ipsimet sensus exuerint, ut ad Catholicorum sententiam accederent, seu Ecclesiæ doctrinam, sibi licet ignotam, audaci cæcitate damnasent. Denique, doctissimus *le Fenre* Theologus Parisiensis in libro, cui titulum præfixit: *Momenta invicta ad convincendos falsi nominis Ecclesiæ reformatæ sectatores*, sole clariùs evincit, primos Hæresiarum Calviniz sensus circa doctrinam de gratia, & libero arbitrio vel plurimum emollitos ac temperatos

ratos , vel planè dimissos ac explosos fuisse à celebrioribus Sēctæ Calvinianæ Scriptoribus , quos inter enumerat *Amesium* , *Perkinsium* , *Antonium de Dominis* , *Guilielmum Forbesium* , *Petrum du Moulin* , *Buxtorfium* , *Tuifium* , aliosque benè multos . Hæc te præmonere operæ pretium duxi , ut inde intelligas , recentiores Calvinistas , habitis cum Catholicis Theologis disputationibus , expensisque sinceris Catholicæ Ecclesiæ Dogmatum expositionibus , sua in controversiis de gratia & libero arbitrio falsa reliquisse præjudicia , à Calvino , primisque suæ Sēctæ Principibus defecisse , & ad doctrinam Ecclesiæ Catholicæ de gratia , & libero arbitrio propius accessisse .

D. Hanc recentium Calvinistarum in quibusdam Fidei Controversiis à Calvino , cæterisque suæ Sēctæ Principibus defectionem , ac veterum Dogmatum ejurationem jam probè noveram ex ea Disputatione , quam *Martinus Becanus* , Societatis Jesu Theologus , qui cum Heterodoxis collato veluti pede sæpius certavit , se cum *Davide Paræo* , Calvinianæ factionis in Germania pseudo-Ministro habuisse narrat Tomo I. Summæ Theologiæ capite decimo sexto his verbis: *Noster Serrarius & ego eramus autumnno superiore apud Accidulas Schwalbucenses , ibi commodè incidimus in Davidem Paræum Calvinistam , Professorem Heidelbergensem . Salutavimus hominem perhumaniter , & ille vicissim nos . In progressu amicè & modestè mihi objecit , quod in quadam disputatione , quæ typis edita est , scripsissem , Deum Calvinistarum esse autorem peccati . Respondi , me solidè id probasse ex verbis , & sentiis Calvini . Tum ille , Esto sanè , inquit , sit ista Calvini sententia ,*
& non

& non Calvinistarum . Hic subridens Serrarius , ita subjecit : Domine Paræ , hæc lis facile inter vos , ut video , componetur : Sola particula , Starum , expungatur , & res erit salva . Placuit hoc Paræo , & Colloquium solutum est . Vix Moguntiam reversi eramus , cum ecce Paræus ad me Epistolam dat , in qua monet nos officii nostri hoc Carmine :

Vos quoque promissi memores delete liturâ ingenuâ , Starum , impegistis quod malè nostris .

Hoc autem Disticho apertè David Paræus innuere voluit , Calvinum in multis doctrinæ suæ Capitibus à recentioribus Calvinistis desertum ac damnatum fuisse . Faxit Deus Optimus Maximus , ut Calviniani ab omnibus præjudiciis liberi veritatem tandem agnoscant , eamque ad gremium Ecclesiæ Catholicæ reversi diligant , & amplectantur . Id maximè in votis habeo , eosque , ut omnia Calvinii , aliorumque suæ Sectæ Principum impia dogmata sinceris animis ejurent ac detestentur , his verbis Scripturæ Sacræ lib. 2. Paralipomenon capite trigésimo vehementer adhortor ; *Filii Israël revertimini ad Dominum Deum Abraham , & Isaac , & Israel . . . Nolite fieri sicut patres vestri , & fratres , qui recesserunt à Domino Deo patrum suorum , qui tradidit eos in interitum , ut ipsi cernitis . Nolite indurare cervices vestras , sicut patres vestri : tradite manus vestras Domino , & venite ad Sanctuarium ejus , quod sanctificavit in æternum &c.* Sed hætenus de Calvinii Hæresi , ejusque variis Sectis sat superque dictum sit , & de aliarum Hæresum , quæ sæculo xvi. prodierunt , exordio , progressu , ac interitu paululùm disseramus .

M. Sæ.

M. Sæculò XVI. erupit Hæresis adeò execrabilis, ut ipsimet *Lutherus*, & *Calvinus*, Scelestissimi licet Hæresiarchæ, tam tetram, tam horribilem, tam infestam Religioni pestem exhorruerint. Hujus detestabilis Hæresis Author fuit *Michaël Servetus*, Hispanus, Tarraconensis, qui *Pauli Samosatani*, *Arii*, *Macedonii*, divinitatem Filii, & Spiritus Sancti negantium, impietates ac blasphemias recoxit in septem libris, quos scripturavit *De Trinitatis Erroribus*. Effutiebat impudentissimus ille Hæreticus, uti videre est apud *Hosium* libro I. de *Hæresibus*, & apud *Prateolum* in *Michaele Serveto*, Patrem solum, non Filium, non Spiritum Sanctum, verum Deum esse, ac Trinitatem esse figmentum triceps monstrum, aut Cerberum quoddam tripartitum. Filium Dei non esse secundam personam Divinitatis, sed Christum hominem esse personam tunc factam, cum homo fieret. Spiritum Sanctum non esse simpliciter Deum, sed aliquid ex essentia Dei, levem solummodò, & tenuem aliquam auram, quæ in creatione Mundi primum prodierit: nunquam fuisse in lege Deum adoratum, sed Angelos Deum adumbrantes, hosque fuisse ab initio realiter, & restoration: aliqua indiguissè, postquam illorum Caput factus est Christus: Spiritum & animam hominis esse Dei substantiam: regeneratos verò aliam, quàm ante habuerint, animam, quæ insitam Deitatem contineat, accipere: ob peccatum originis neminem damnari, cum corpore tantum à serpente occupato, anima libera sit, quæ ante vigesimum annum peccare nequeat: homines sine agnitione Christi salvari posse sub Evangelio & justificari. Turcas per orationes suas, quæ bonæ sint, promissiones Christi consequi. Hos, & alios ejusmodi errores nefandos sparsit, sed potissimum

simum in sanctissimam Trinitatem invecus est *Michaël Servetus*, vir, ut ait *Joannes Cochlaus* in *Actis Lutheri*, acris ac vehementis ingenii, qui *Græca* quoque ac *Hebraica* linguæ peritus videbatur; sed hic est communis omnium verè novorum Theologorum morbus, ut linguarum peritia tumidi, ac litterali *Scripturæ sensui*, quem non ex probatis Doctores, sed ex capite suo sibi effingunt, innitentes, contemptis *Sanctorum Patrum expositionibus*, & solidis *Scholarum Theologorum informationibus*, suæ confidant *prudentiæ*, & pro mobilitate ingenii instabiles, facili momento per novam adinventionem priorem sententiam suam, quam primo inventionis calore laudaverunt, mutant, variant, aut augeant, aut minuant, juxta illud *Jacobi Apostoli*: Vir duplex animo inconstans est in omnibus viis suis. Tot *Blasphemias*, quas in Sanctissimam Trinitatem evomit, non impunè tulit *Michael Servetus*, repertus quippè *Genevæ*, ab *Hæretiarcho Calvino* in carcerè compingi jussus ex *Senatus Genevensis Sententiâ* vivus exultus est die xxvii. Octobris anni MDLIII. Hic autem rem, singulari sanè observatione dignam diligenter advertas velim, videlicet *Calvinum* in *Refutatione errorum Michaelis Serveti*, fusè, omnique argumentorum genere probare, *Hæreticos* jure gladii coercendos & extremo supplicio esse afficiendos, ne mortale venenum longius serpat, & *impii* eorum errores impunè gratulentur. Ita sentit *Calvinus* in *Causa Michaelis Serveti*. At veritus ille *Hæretiarcho* ne hæc doctrina sibi, suæque *Sectæ* professoribus ultimum afferret exitium, contendit in eadem *Refutatione errorum Michaelis Serveti*, gladium à *Principibus*, & *Magistratibus* in *Calvinianæ* do-

ctri-

Ærinæ professores distringi non posse, quemadmodum in *Michael Servetum*, & Antitrinitarios distringi potuit, quia, inquit, *Michael Servetus* & alii Antitrinitarii hæretici erant, eorumque doctrina jam ab Ecclesia in *Ario*, & in *Macedonio* fuerat profligata; Cōtrā verò Calvinistarum doctrina verbo Dei consentanea est. Ex quo infert scelestus ille Hæresiarcha, jure optimo *Michael Servetum* ex Senatus Genevensis Sententiā è medio sublatum, ac vivum fuisse combustum; sed versā vice, Catholicos Magistratus & Judices, qui capitali supplicio Calvinistas damnant, esse *Papæ carnifices*, & incendiarios. Qua in re *Calvinum* sibi minime constare video, & ut habetur in paræmia, *lupum utraque aure teneo*. Nam primò, quis non videt, esse ineptissimum asserere, quòd *Calvinus* potuerit damnare *Michael Servetum*, eumque hæreseos convictum sæculari tradere Magistratui ut vivus exureretur, *Calvinum* verò, ejusque Sectæ professores damnare, eosque insanabiles Principum ac piorum Magistratum potestati, ut desperati capite plectantur, permittere non possit Ecclesia Catholica, cujus fidem violarunt, impugnarunt, & à cujus communione sacrilego schismate recesserunt. At, inquit *Calvinus*, extremo supplicio dignus erat *Michael Servetus*, quia hæreticus erat, ejusque doctrina Verbo Dei, erat contraria; Calvinistæ verò non sunt hæretici, eorumque doctrina Verbo Dei consentanea est. At, numquid itidē *Michael Servetus* palàm inficiabatur, se esse hæreticum, & Scripturam sacram à se stare conclamabat? Quis ergò istarum Controversiarum Judex & arbiter sedebit? Numquid privatus co-

rum, qui hæreseos accusantur, Spiritus? Aut Ecclesia? à qua hæretici recesserunt, vel recedunt. Si privatus Spiritus eorum, qui hæreseos insinulantur, harumce controversiarum Judex sit, iniquè sanè *Calvinus* egit cum *Michaelē Serveto*, quippè qui ex suo privato spiritu judicabat & asseribat, se non esse hæreticum, suamque doctrinam esse Verbo Dei consentaneam. Si verò Ecclesia, à qua recesserunt, vel recedunt hæretici, sit Judex harum, quæ in fide emergere possunt, Controversiarum, sicut reverà est; res planè confecta est, & omninò actum atque conclamatum de *Michaelē Serveto*, de *Luthero*, de *Calvino*, & de aliis nefariis hæreticis, quia sicut *Michael Servetus* fuit jure merito damnatus & vivus exustus tanquam hæreticus, eò quòd contrà Sanctissimam Trinitatem antiquos suscitaret *Arii*, & *Macedonii* errores jam ab Ecclesia universà in Conciliis Generalibus Nicæno I. & Constantinopolitano I. damnatos; ita pari quoque jure tanquàm hæretici haberi & puniri debent *Lutherus*, *Calvinus*, eorumque sectarii, ut potè qui revocant, ac pertinaciter tutantur obsoletos antiquorum Hæresiarcharum Manichæorum, Iconoclastarum, Berengarianorum, Wicleffistarum, & aliorum errores jam pridem ab universa Ecclesia in Conciliis Æcumenicis confixos, quosque etiam hoc sæculo xvi. proscripsit Catholica Ecclesia in Concilio Generali Tridentino congregata. Quapropter, Hæresiarcha *Calvinus* dum, in Causa *Michaelis Serveti*, quem ad rogam damnari procuravit, acriter propugnavit, hæreticos extremo supplicio afficiendos esse, volens nolens, se, suæque Sectæ professores proprio mucrone confodit. Nec solum

Calvi-

Calvinus, sed *Lutherus*, *Brentius*, *Bucerus*, aliique Sectarū Sæculi decimi sexti Coriphæi eādem Sententiam in se, suosque sectarios, ita permittente Deo, protulerunt. *Theodorus* siquidem *Beza*, discipulus *Calvini*, post *Michaelis Serveti* vivicomburium, scripsit librum *De Hæreticis à Civili Magistratu puniendis*, quo non solum propugnat, Hæreticos à Civili Magistratu capitali supplicio mulctari posse, sed etiam hujus sententiæ suffragatores citat *Lutherum* in postillis minoribus, *Dominicā* post *Epiphaniam* quintā, *Melancthonē* libro de Officio Principis, *Urbanum Reginum*; *saxonicas* (ut vocat) Ecclesias in Confessione, quam Tridentino Concilio obtulerunt, *Brentium* in libello De Republica bene administrandā; *Bucerum* Enarratione in caput XII. *Matthæi*; *Capitonem* in libro de jure Magistratus in Religionem; *Bullingerum* Decadis 2. sermonibus VII. & VIII. *Musculum* Commentario in Psalmum secundum, & *Calvinum*, in libro, quem in Causa *Michaelis Serveti* hæretici eo de argumento lucubavit. Hæc Hæreticorum confessio, quam ab ipsis vis veritatis extorsit, apertè prodit ipsorum inconstantiam, quā postea Protheo mutabiliores, & suæ causæ inservire volentes, suæ Sectæ professores, ob hæresim Ediētis piorum Principum & Catholicorum Magistratuum justè punitos, immensis laudibus celebrarunt, & honorifico Martyrum titulo ornare ausi sunt. Sic apud Hæreticos mentitur sibi iniquitas, & perspecta veritas, dominante spiritu vertiginis, profigatur.

D. Flammis consumpto *Michaële Serveto*, fuitne simul cum eo extincta pestifera illa, quam invexit Antitrinitariorum hæresis?

M. Adhuc calebant *Michaelis Serveti* cineres, cum *Valentinus Gentilis*, *Georgius Blandrata*, *Alciatus*, *Bernardinus Ochinus*, *Gribaldus*, & *Franciscus David*, tanto supplicio non deterriti, eandem Antitrinitariorum Hæresim in Poloniam, Transylvaniam & Hungariam intulerunt, quique omnes, ut constabit ex his, quæ mox dicturus sum, miserrimè perierunt. In primis, *Valentinus Gentilis*, patriâ Neapolitanus, hanc Antitrinitariorum Hæresim, cui etiam multos addidit errores, dum palàm Genevæ doceret, captus & in carcerem conjectus est, ubi extremum sibi imminere supplicium seriò cogitans, penitentiam simulavit, palinodiâ cecinit, omnesque errores suos revocavit. E carcere dimissus, Genevâ contra fidem datam se se clam proripuit, variisque in locis petulantius, quàm antehac in Sacram Triadem debacchari cepit. Tandem, Bernæ in Helvetia comprehensus, capitali supplicio affectus est anno MDLXVI. *Georgius Blandrata*, Medicus Italus, ejusdem Hæresis in Polonia & in Transylvania propagator, miserrimè trucidatus est in Transylvania ab uno cognatorum suorum, qui ejus bonis inhiabat. *Gribaldus* peste sublati est, & *Franciscus David* ruente repente domo oppressus. *Alciatus* Mediolanensis ad Mahometanos defecit. De sorte *Bernardini Ochini* non convenit inter Scriptores. *Zacharias* siquidem *Boverius* in Annalibus Capucinatorum ad annum MDXLIII. num. 43. licèt fateatur, *Bernardinum Ochinum* fuisse tertium Generalem Ministrum Ordinis Capucinatorum, eumque à fide Catholica ad Hæresim Antitrinitariorum defecisse, & errorem etiam de licitâ promiscuè omnibus polygamia docuisse,

con

contendit attamen, eum non fuisse Authorem, ut quibusdam per errorem obrepfit, Ordinis Capucinatorum, sed dumtaxat tertium illius Generalem. Probat etiam ad eundem annum num. 46. & sequentibus, ideam Annalista, ac pluribus Scriptorum testimoniis confirmat, *Bernardinum Ochinum* in extremo vitæ suæ discrimine resipuisse, Hæreses omnes Genevæ recantasse, atque pugionibus interfectum pro Catholica fide occubuisse. At *Antonius Maria Gratianus* cap. 8. libri primi Vitæ, quam descripsit, *Joannis Francisci Commendonis* Cardinalis, plura refert de *Bernardino Ochino*, quæ hic compendiosè perstringam, ut facilius qualis fuerit *Ochinus*, & quem vitæ exitum nactus sit, intelligere possis. In *Ochino*, inquit ille Scriptor, præter eloquentiæ famam, Italicæ linguæ elegantiam & cultum, ætas, genus vitæ, horridus ille pœnitentiæ habitus, promissa & fluens infra pectus barba, argentea canities, pallor ac macies oris, & magno studio arteque simulata corporis imbecillitas & sanctitatis opinio, propè excesserant humanæ admirationis modum. Omnes ad ejus Conciones certatim confluebant, intentique ora tenebant. His hominum in se studiis inflatus, elatusque *Ochinus*, adeò sibi placere, sese amare, ac tanti suam æstimare fortunam cepit, ut altiora se querens, nec tamen à Romano Pontifice, qui illum intus & in cute noverat, altiorum honoris gradum impetrare valens, excussâ cucullâ, ad hæreticos confugerit, & cum puellâ incestas nuptias inierit homo sexagenarius. Præter errores *Lutheri* & *Calvini*, quibus adhæsit *Ochinus*, Hæresim *Arii*, contra Consubstantialitatem Verbi Divini revocavit, &

polygiam omnibus licitam esse docuit. Apud Helvetios primum confedit, dein, omnem pervagatus Germaniam atque Britanniam, seu Angliam, atque undique explosus, postremò se in Poloniam contulit, ubi cum *Joannes Franciscus Commendonus*, Cardinalis & Sedis Apostolicæ Legatus, Edictum à Poloniæ Rege obtinuisset, quo exteri omnes hæretici à Regno abire jubebantur, *Ochinus* mutare Sedem & è Polonia excedere cõatus est. Sed omnibus jam terris extorris ac profugus, cum in vili Moraviæ pago à veteri amico fuisset hospitio exceptus, ibi senio fessus, cum uxore, ac duabus filiabus, filioque uno, peste interiit. Hic fuit juxtà *Antonium Mariam Gratianum*, loco mox à me laudato, infelix Vite *Bernardini Ochini* exitus. At, cum *Zacharias Boverius* in Annalibus Capucinatorum prober, *Bernardinum Ochinum*, suos ejurasse errores, & peccatorum confessionem Catholico ritu ante mortem edidisse, cõsultius esse duco cum *Spondano* ad annum MDCXLVII. num. XXII. meum hic non interponere judicium, remque totam, in qua inter Scriptores non convenit, in medio relinquere. Hoc unum dumtaxat in præsentia certissimè affirmabo, Apostasiã *Bernardini Ochini*, qui Senis in Etruria natus est, nihil omninò derogasse splendori ac sanctitati inclyti Capucinatorum Ordinis, qui semper Ecclesiæ utilissimus fuit, & cujus eximiã pietatem, arctissimæ disciplinæ regularis studium, atque præclara in Ecclesiam promerita, fusè in colloquio sexto, agendo de Monastica Disciplinâ, commodius referemus.

D. Miror sanè, quòd inter illos Sectæ Antitrinitariorum Antesignanos non reposueris *Laelium*

lium Socinum, & *Fauſtum Socinum*, Italos, patriâ Senenſes, qui contra Sacram Triadem itidem, blaſphemarunt, ſuumque nomen indiderunt nove Sæctæ *Socinianorum*, quæ etiamnùm viget, quæque nihil aliud eſt, ut audiui à Viris eruditis, quàm quædam Sabellianæ, Arianæ, Macedonianæ, Photinianæ, Pelagianæ, Lutheranæ, & Calvinianæ doctrinæ colluvies. De his itaque duobus Sæctæ Socinianorum Primipilis, & de præcipuis eorum erroribus, pauca hic ſubjungere debes, ut plenam illius Sæctæ Authorum, & errorum notitiam habere poſſim.

M. Adeò celebre fuit apud Antitrinitarios *Lalii*, & *Fauſti Socinorum* nomen, ut ab illis eorum Sæcta non aliter nunc vocetur, quàm Sæcta *Socinianorum*. *Lalius Socinus*, Senis oriundus, annuagens circiter vigefimum ſecundum, relicta patriâ, ubi ſuos errores abſque vitæ ſuæ discrimine diſſeminare haud poterat, Galliam, Britanniam, Germaniam univerſam, Belgium, Helvetiam, Tranſylvaniam & Poloniam peragravit, cùmque diſſimulandi peritus eſſet artifex, Hæreſim, quàm contra Sanctiſſimam Trinitatem ex *Michaele Serveto*, Genevæ, ut diximus, exuſto, hauſerat, propalare auſus non eſt, amicitiam tamen iniit cum *Calvino*, *Melancthone*, *Beza*, *Muſculo*, *Bullingero*, *Munſtero*, *Petro Martyre*, alijsque doctrinæ Evangelicæ corruptoribus, ut videre eſt in eorum ad ipſum Epiſtolis, quæ liquidò probant, *Lalio Socino* magnam cum illis peſtibus neceſſitudinem interceſſiſſe. Obiit *Lalius Socinus* Tigurii apud Helvetios anno MDLXI I. ætatis ſuæ xxxvii I. Multos reliquit manuſcriptos Codices, impiis erroribus
reſe-

refertos , quos post ejus obitum *Faustus Socinus* ,
 ejus nepos , sibi vindicavit , in lucem edidit , im-
 piamque hæresim , quâ à patruo suo fuerat jam af-
 flatus, in Transylvania potissimum , & in Polonia
 pro viribus propalare studuit , quâ privatis collo-
 quiis , quâ multis virulentis Operibus , quæ ipse
 proprio Marte procudit ac publicavit , adeò ut
 verè dici possit , *Lalium Socinum* posuisse ova , quæ
 postea ejus nepos *Faustus Socinus* , patriâ itidem
 Senensis , in perniciem Catholicæ Ecclesiæ exclu-
 sit . Huius Socinianorum Sectæ latè à *Fausto Socino*
 propagatæ pertinacissimi defensores fuerunt *Joannes*
Crellius , *Jonas Slinchtingius à Buccovietz* , & *Jo-*
annes Ludovicus Wolzogenius , quorum pestilentis-
 sima Opera , unâ cum *Lalii* , & *Fausti Socinorum* li-
 bris , in unum corpus redacta sunt , sub hoc titu-
 lo : *Bibliotheca Fratrum Polonorum , quos Unitarios*
vocant , & septem Tomis in Folio comprehensa ,
 magno Christianæ Religionis damno apud Bata-
 vos typis excusa prodierunt . Hic autem velim
 obiter observes , Calvinismum duxisse hujusmodi
 hæreticos ad Arianismum , seu ad illam Sectam
 Antitrinitariorum , sicut probat *Henricus Sponda-*
nus in *Annalibus Ecclesiæ* ad annum MDLXXIV. ex
Relatione Gerlachii , Viri licet Lutherani , qui ,
 dum Constantinopoli esset , & in *Adamum Neuse-*
rum , Ministrum olim Heidelbergensem , qui ex
 Calvinismo in Arianismum , hincque in Turcismum
 prolapsus erat, incidisset , atque eum inter-
 rogasset , quomodo eò errorum devenisset : res-
 pondit ille , id sibi , quod Calvinista factus esset ,
 accidisse : neminem enim eo sæculo Arianum fa-
 ctum , qui non fuisset prius Calvinista : quales ex-
 ti-

titissent *Servetus*, *Blandrata*, *Alciatus*, *Franciscus Davidis*, *Valentinus Gentilis*, *Gribaldus*, *Silvanus*, & alii. Sicut autem hi omnes tandem infelici fine perierunt, ita hic *Adamus Neuserus* ibidem Constantinopoli paulò post mortuus est ex desperatione in disenteria, eodem propemodùm mortis genere, quo *Arius* extinctus est. Id narrat *Gerlachius* in *Historia*, quam edidit, *Sacramentariorum*, undè facile intelligere potes, quàm pestifera sit hæc Calviniana Secta, quæ viam sternit ad Arianismum, ipsosque Socinianos, Sacræ Triadis osiores, in sua Societate aliquandò admisit. Sociniani siquidem cum Calvinianis in Polonia & Transylvania Templis & communione erant olim juncti, tum postea Conventus suos seorsum agere cœperunt Cracoviæ, donec tandem Sociniani anno MDCLVIII. in Comitibus Regni habitis Varsoviæ, tanquàm Ariani e Polonia fuere ejecti.

D. Quinam sunt præcipui Socinianorum errores?

M. Præcipui Socinianorum errores ad istos sequentes revocari possunt. Primò docent, in essentia Divina unicam esse Personam Patris, & contradictionem implicare, Deum unum esse in essentia, & trinum in personis. Secundò, negant, Filium Dei, seu Christum, esse personam divinam, vel Deum; illum tamen appellant Deum metaphoricè, & improprie, ob sublimem potestatem à Patre æterno participatam, nimirum ut esset Deum inter & homines mediator. Tertiò, dicunt, Christum ante Mariam Virginem non extitisse, eumque ratione personæ esse hominem verum, non tamen purum, quia divinâ filiatione ab ortu fuit

fuit insignitus, quatenus divini Spiritus virtute, absque ullâ Viri ope, in Virginis utero conceptus est, in quo sensu appellatur Filius Dei proprius, & unigenitus, quia nullus alius sic virtute divini Spiritus absque ullo Viri concursu in utero matris conceptus unquam fuit, & ab ortu Filius Dei vocatus. Quartò, ajunt, Jesum Christum ideò esse Servatorem nostrum, quia nobis æternæ salutis viam ostendit, vitæque suæ exemplis confirmavit; Divinæ autem justitiæ, per quam peccatores damnari mererentur, neque illum satisfecisse, neque ut satisfaceret, opus fuisse. Quintò, pertendunt, Christum non fuisse Sacerdotem antequàm in Cælos ascenderet, & nequidem Sacerdotis munus obisse, cum pendêret in Cruce. Christi mortem non fuisse Sacrificium, sed viam quamdam, & præparationem ad illud peragendum in Cœlis. Sextò, asserunt, Christum propriâ virtute à mortuis non surrexisse. Septimò, dicunt, Baptismum aquæ à Christo præceptum non fuisse, eoque hominem Christianum absque ullo salutis æternæ dispendio catêre, & ab eo abstinere posse. Octavò, sentiunt cum *Pelagio*, nullum esse peccatum originale, nullamque Dei gratiam interiorē ad opera supernaturalia necessariam esse. Nonò, affirmant, in sumptione panis, & vini, quæ sit in Cœna Domini, nihil præter panem, & vinum sive à credentibus, sive à non credentibus accipi, meramque esse cœremoniam in memoriam mortis Domini. Decimò, effutiant, animas à morte non superesse; homines impios penitus annihilari, & Resurrectionem impiorum nullam futuram. Undecimò, Primatum Romani Pontificis negant, cum

eum Antichristum appellant, & Ecclesiam Romanam acerrimo odio prosequuntur. Duodecimò, *Zuinglium*, *Lutherum*, & *Oecolampadium*, velut Ecclesię reformationis Auctores, summis laudibus extollunt, Conciliis Oecumenicis, præsertim Concilio Nicæno contra *Arium* habito, fidem omninò abrogant; *S. Athanasii*, strenui Consubstantialitatis Verbi divini Assertoris, aliorumque Patrum auctoritatem explodunt. Hos, & alios ejusmodi errores, tuentur Sociniani, quos *Faustus Socinus*, eorum Antesignanus, disseminavit, & expressit in suis libris, potissimum in suis Commentariis in Scripturam Sacram, in Tractatu de Ecclesia; in suis Epistolis; in Prælectionibus Theologicis, in libro de Iustificatione Fide & Operibus; in Elenchis Sophisticis; in Institutione Religionis Christianę; in libris De Baptismo, De Cœna Domini, De Deo Christo, & Spiritu Sancto; De Christo Servatore contra *Covetum*, & in diversis aliis Tractatibus de variis materiis ad Christianam Religionem pertinentibus.

D. Infelices profectò Hæresiarchæ, qui semel à solida veritate desistentes, in variis erroribus per omnes Sectarum flexus & anfractus vagantur, & suis somniis delusi, nunc huc feruntur, nunc illuc, ac Deum non ex ipsius natura, nec ex arcanarum testimonio litterarum, & ex Ecclesiæ Catholicæ, ut par est, sensu, sed ex arbitrio suo metiuntur; quos si urgeas disputatione, mussant, dissimulant, tergiversantur, tentant elabendi aditum, & Prothei in morem, semet in omnia vertunt. Inter se sunt divisi, & ad Romanam, seu Catholicam persequendam Ecclesiam

con-

concordes , juxta illud Psalmi LXXXI. *Super populum tuum malignaverunt consilium , & cogitaverunt adversus Sanctos tuos . Dixerunt , venite , & disperdamus eos de gente , & non memoretur Israel ultra ; quoniam cogitaverunt unanimiter , simul adversum te testamentum disposuerunt : Tabernacula Idumeorum & Ismaelita , & Moab , & Agareni , Gebal , & Ammon , & Amalech , alienigenæ cum habitantibus Tyrum .* Hæc omnia Hæreticorum Tabernacula , has Synagogas Satanæ detestatur Romana Ecclesia , cujus antiquitas omnem transcendit memoriam , duratio finem nescit , amplitudo metas omnes prætergreditur , filiorum multitudo arenam superat maris & stellas Cœli ; in qua regnat cœlestis veritas , exuberat pax exsuperans omnem sensum , fervet charitas fuci nescia , triumphat fides invicta , nulla est Dogmatum dissensio ; quæ denique ab omni portarum Inferi concussione secura redditur per Christum , Sponsum suum , ad quem ipsa adversitatibus exagitata , & Hæreticorum irruptionibus laceSSita confugit , eumque ad prosternendos fidei hostes exorat his verbis ejusdem psalmi : *Deus meus pone illos ut rotam , & sicut stipulam ante faciem venti . Sicut ignis , qui comburit silvam , & sicut flamma comburens montes ; ita persequeris illos in tempestate tua , & in ira tua turbabis eos . Imple facies eorum ignominia , & quærens nomen tuum Domine . Erubescant , & conturbentur in saculum sæculi , & confundantur , & pereant , & cognoscant quia nomen tibi Dominus : Tu solus altissimus in omni terra .* Eo potentissimo Sponsi sui adjuncta præsidio Ecclesia Romana semper vincit , semper triumphat , tot ornata palmis , quot fuit

Hæ-

Hæreticorum armis, & invasionibus impetita. Sed percesse, quæso, alios triumphos, quos Sæculo XVI. de erroribus, vel Hæresibus reportavit Ecclesia.

M. Præter præcipuos illos Sæcularum Antesignanos, quos hætenus memoravi, quique novis, falsis ac peregrinis suis doctrinis totum Orbem commoverunt, alii fuerunt hæretici, qui eodem Sæculo decimo sexto errores disseminarunt, quos breviter hic referam, ut intelligas, quod quemadmodum Christus Salvator noster cuncta, quæ perfidi Judæi Reges ac Principes terræ adversus ipsum moliti sunt, vertit in ornamentum ac fidem suæ victoriæ, cœlesti consilio deludens humanam astutiam, invictâ mansuetudine superans impiorum ferociam, & moriendo mortis tyrannidem abolens; sic omnes Hæreticos, qui in perniciem Ecclesiæ Catholicæ conjurati fuerunt, machinationes dirupit, impia consilia dissipavit, & omnes tumultus convertit in bonum Ecclesiæ Sponsæ suæ, & in cumulum felicitatis æternæ. Hinc Ecclesiæ suæ perpetuam promittit assistentiam: *Et ego vobiscum sum usque ad consummationem sæculi*; hostibus verò Fidei æternum comminatur exitium his verbis, quæ leguntur in Psalmis: *Qui in Calis est, irridebit eos, & Dominus subsannabit eos. Tunc loquetur ad eos in ira sua, & in furore suo conturbabit eos. Et comminuam eos ut pulverem antè faciem ventī, & ut lutum platearum delebo eos.* Inter illos Hæreticos, quorum, necdum indicavi errores, primò recensendus venit Joannes Brentius, patriâ Suevus, qui ex Canonico Witembergensi

& Sacerdote , factus est apostata & uxoratus . Hic docuit, Corpus Christi ex vi unionis hypostaticæ, seu personæ Verbi Divini , esse ubique , adeoque & in Pane Eucharistico ante consecrationem ; indeque ortum habuit Secta *Ubiquistarum* , qui asserunt , Christi humanitatem ab initio Incarnationis fuisse semper ubique . *David Georgius* , Delphis in Batavia natus , ausus est asserere , se esse eximium Prophetam , & Christo *Jesu* majorem , & anno tertio post mortem resurrecturum , & Regnum Israël restitutum , at necdum surrexit , quia cum aliis impostoribus in inferno æternis gehennæ ignibus cruciatur . *Gaspar Scuvensfeldius* , nobilis Silesius , contendit humanam Christi naturam , post Ascensionem , in Divinam esse mutatam , & novam condidit Sectam , quam specioso nomine *Confessorum Christi* adornavit . *Joannes Agricola* Legem Mosaicam tanquam prorsus inutilem damnavit , & est parens *Antinomorum* Sectæ , quæ est stirps Lutheranæ , ut videre est apud *Hosium* in libro *De Hæresibus nostri temporis* , & apud *Lindanum* in Dialogo 11. *Dubitantii* . Ex eadem Secta Lutherana prodiit *Matthias Flaccus Illyricus* , Magdeburgensis Minister , qui , ut superius diximus , plurimis Scriptis pertinaciter propugnavit , Peccatum Originale esse ipsam hominis substantiam , & in hanc Hæresim , quæ Manichæorum est , multos pertraxit Lutheranos , qui ab eo Dogmate *Substantialistæ* , & ab Authore *Flacciani* sunt appellati . Hic obiter observare debes , hunc *Matthiam Flaccum Illyricum* edidisse Historiam Ecclesiasticam , *Centuriarum* nomine insignitam & Tomis tredecim comprehensam , ad quam concinna-

na-

nandam multos sibi adjunxit laboris Socios . At istud malè confarcinatum Opus , erroribus , calumniis & mendaciis in Ecclesiam Romanam à capite ad calcem refertum , quàmplurimi Catholici Scriptores variis lucubrationibus confutarunt ; palmam tamen omnibus præripuit Eminentissimus , & omni laude superior Cardinalis *Cæsar Baronius* , qui istud natalitiis tenebris damnandum Opus solidissimè ac dilucidissimè dispunxit , cribravit , & in pulverem redegit , insigni illo , nec unquàm satis laudato Opere *Annalium Ecclesiasticorum* , quod perduxit usque ad annum MDCXCVIII . illudque post ejus obitum continuarunt tres doctissimi Viri , *Henricus Spondanus* , Appamiarum , in Gallia Narbonnensi Episcopus , *Abrahamus Bzovius* , Ordinis Prædicatorum , & *Odoricus Raynaldus* , Congregationis Oratorii *Jesu* Presbyter . Novum errorem Sæculo XVI . sparsit *Franciscus Stancarus* , Mantuanus , affirmans Christum non divinæ , sed humanæ tantummodò naturæ ratione esse justitiam nostram , undè colligebat , Christum , non quâ Deus , sed quâ homo est , esse Mediatorem Dei & hominum . Hunc errorem plerique Catholici , Controversiarum , & Theologorum Dogmatum Tractatores , strenuè oppugnarunt , præsertim Cardinalis *Bellarminus* libro V. *De Christo Mediatore* , & doctissimus *Petavius* , Societatis *Jesu* Theologus , libro XII. *De Incarnatione* capite IV. & sequentibus Tomi V. *Theologorum Dogmatum* , ubi invictis momentis probant , Christum , quâ Deus , & homo est , esse Salvatorem , totius humani generis Redemptorem , & mediatorem Dei , & hominum . Postremò , Sectam Libertinorum

Tom. VII. R rum

rum Sæculo XVI. in Galliis fuscitarunt *Quintinus*, & *Antonius Pocquius*, qui docebant, unicum tantum spiritum immortalem esse, scilicet Spiritum Dei, qui sit ac vivat in omnibus creaturis: Angelos esse inspirationes essentia vacuas; Diabolum, & peccatum, imaginationes inanes & frivolas assererebant. Unicum spiritum immortalem omnia efficere, adeo ut ipsa peccata Deo imputanda sint, nec ullius amplius rei conscientia moveri quisquam debeat, nec fas sit quidquam improbare. Christum ex Spiritu Dei & opinatiōe esse compositum. In eo positam redemptionem nostram, quod Christus solum velut typus fuit, in quo contemblemur ea, quæ ad salutem nostram Scriptura requirit. Regenerationem esse restitutionem innocentia, in qua Adam, antequam peccasset, constitutus erat. Hunc autem innocentia statum sic accipiebant, ut semel regenerati, quasi mali cogitatione sublata, nihil discernere debeant, sed puerorum more naturalem sensum atque inclinationem sequi. Libertatem Christianam in eo sitam esse, ut omnia homini sine exceptione licita sint. Propriam cujuscunque ad malum propensionem esse vocationem, in qua, secundum Apostoli mandatum, permanere debeat. Matrimonium, etiam solemni ritu initum coram hominibus, carnale esse, nisi Spiritus bene convenient, adeoque Christianum hominem ad illud adstrictum non esse, sed solum inter Christianos hoc matrimonium firmum esse debere, in quo utrique simul cum altero bene est. Communionem Sanctorum esse, si nemo quidquam possideat tanquam suum, sed unusquisque, undecumque nancisci poterit, ad se rapiat. Resurrectionem jam esse factam. Fas esse dissimulare Religionem. Litteræ Scripturæ Sacrae minimè nos obnoxios esse, sed spiritum, qui vivificat,

vificat, sequi oportere. Sed mittamus illos Libertinos, qui, jam victâ prorsus, & obrutâ conscientia, ex turpibus factis laudem sibi quærentes, vitiiis callum obduxerant, in summis malis, perinde ut summis bonis acquiescebant, & contaminatâ undique vitâ, pestilentibus exemplis, pestilenti doctrinâ proximum quemque, velut contagio morbi, inficiebant, atque gloriantes in malitiâ, potentes in iniquitate, piorum hominum simplicitatem ludibriis incessentes, in omnia turpissima facinora præcipientes ferebantur.

D. Ex ea insanâ tot hæreticorum in Ecclesiam Sæculo decimo sexto insurgentium conspiratione facile intelligo, voluisse Christum Dominum, ut Ecclesia, sponsa sua, eandem ac ipse sortem experiretur, & persecutionibus impeteretur, ut indè gloriosior evaderet. At enim, sicut Pontifices, Scribæ, Pharisei, Reges, Principes, populi que armati, in Christi Domini, Salvatoris tam benefici, tam amabilis, perniciem conjurarunt omnes, qui tamen in mundum venerat, ut salutiferâ doctrinâ blandè ac placidè monstraret omnibus æternæ felicitatis viam; ita Christus Dominus permisit, ut Ethnici, Judæi, & Hæretici, Religione licet & Sectis inter se discordes, adversus Ecclesiam congregarentur, & omnia sua consilia, totas opes & vires, & quidquid auctoritate, quidquid potentiâ, quidquid ingenio, fraudeve possent, in unum conferrent, eamque persecutionibus exagitarent. Verum, sicut ille Christus, quem tot ignominiiis onerarunt Judæi, nunc est in gloria Dei Patris, quem mortuum existimabant, revixit, victurus in æternum; quem infra omnes homines dejece-

R 2

rant,

rant, in toto Orbe Deus & homo colitur & adoratur: ejus Crux priùs ignominiosa, nunc gloria est Principum ac fidelium omnium; ad nomen *Jesu*, quod illi moliebantur abolere, flectitur omne genu, seque submittit omnis celsitudo cœli ac terræ, videntque modò perfidi Judæi templum, suum funditùs dirutum, Religionem penè extinctam, Sacerdotium, Legem, Principatum, Urbes, Gentem, locum, breviter, nihil superesse, præter paucos vagos & exules, veteris infantiæ calamitatibusque testes: sicut, inquam, Judæi cæco furore abrepti Christum persequendo nihil aliud effecerunt, nisi quod & suam amentiam & livorem prodiderunt, & Christi gloriam illustrarunt, atque auctoritatem confirmarunt, ita etiam Judæorum perversitas, Principum crudelitas, Philosophorum supercilium, Rhetorum eloquentia, Hæreticorum pertinacia, omnes in Ecclesiæ Catholicæ exitium conjurantes, quid tandem vinculis, carceribus, lapidibus, flagris, eculeis, ungulis, ignibus, quid tot horrendis tormentorum generibus, & cædibus, quid tot flagitiosis doctrinis, & atrocibus persecutionibus profecerunt? innumeros Martyres Ecclesiæ dederunt, sibi Gehennæ cruciatus conduplicarunt, ac, inviti licet, confirmarunt veritatem Catholicæ Ecclesiæ, quæ æternum stabit, & adversus quam, ut promissit Christus, qui nec falli, nec fallere potest, *Portæ Inferi non prævalent*. Sed quorsum, amabo, inter Novatores Sæculi decimi sexti non percensuisti *Michaelem Bajum*, Lovaniensis Academix Doctorem, quem in multos errores prorupisse monuit me nuperri-
mè vir apprimate eruditus, qui tamen candidè fa-
teba-

tebatur , se planè ignorare , cur Bullæ Pontificiæ , quâ Sanctus *Pius V. LXXIX. Michaelis Baii* Propositiones damnavit , nullam omninò mentionem fecerint *Hieronymus Catena*, & *Joannes Antonius Gabutius* , qui vitam & res à Sancto *Pio V. Pontifice* Maximo præclarè gestas memoriæ prodiderunt ; cur verò etiam hæc eadem Bulla Pontificia Bullario Romano inter alia Diplomata ejusdem S. Pontificis *Pii V.* necdùm fuerit inserta ? Ostende itaque , si placet , primò , quis & qualis fuerit iste , *Michael Bajus* ? Secundò , quo anno à *S. Pio V.* proscriptæ fuerint septuaginta novem illæ propositiones *Michaelis Baii* . Denique , cur hæc Bulla sanctissimi illius Pontificis , vulgò dicta *Piana* , à *Catena* , & *Gabutio* , Vitæ *Pii V.* Scriptoribus , fuerit silentio prætermissa , & Bullario Romano nondùm sit inserta ?

M. Quamvis negari haud possit, *Michaelem Bajum* fuisse virum doctissimum , ut potè *Academix Lovaniensis Doctorem ac Professore* , & unum ex Theologis à *Philippo II. Hispaniarum Rege* , ad Concilium Tridentinum missis , certum tamen est , eum nonnullos de gratia & libero arbitrio , de justificatione & operibus , de concupiscentia & aliis Articulis docuisse errores , qui in Belgio dissidia excitantes occasionem dederunt *Pio V. Pontifici* Maximo Causam ad se Romam , evocandi , & septuaginta novem *Michaelis Baii* propositiones configendi Diplomate , quod incipit *Ex omnibus* , quodque Romæ datum est Kalendis mensis Octobris anni MDLXVI. Hoc Diploma , quod , vivente *Pio V.* non fuerat publicatum , sed dumtaxat , majoris lenitatis gratiâ , privatim Lovaniensi

Academiæ ab Archiepiscopo Mechliniensi denuntiatur, & eâ de causâ à *Catena*, & *Gabutio* in Vita *Pii V.* prætermisum, tandem *Gregorius XIII.* successor *Pii V.* Romæ solemniter promulgavit quarto Kalendas Februarii anni MDLXXIX. illudque ad Lovaniensem Academiam, & ad *Michaelem Bajum* per *Franciscum Toletum*, Societatis Jesu doctissimum Theologum, tunc Pontificium Concionatorem, postea S. R. E. Cardinalem, deferendum curavit. Ut autem *Sedis Apostolicæ* judicio acquiesceret *Michael Bajus*, perpaucis Colloquiis, teste Cardinali *Palavicino* lib. 15. Concilii Tridentini cap. 7. Num. 17. obtinuit *Toletus*, qui tam eximiam hujus Doctoris modestiam suspiciens, ait: *Michaele Bajō, nihil doctius, nihil humilior.* Retractionem errorum suorum edidit *Michael Bajus* his verbis conceptam: *Ego Michael de Baii Cancellarius Universitatis Lovaniensis agnosco, & profiteor, me ex variis Colloquiis & communicationibus habitis cum Reverendiss. Patre Domino Francisco Toletō Concionatore suæ Sanctitatis, & ad hanc rem specialiter misso, super diversis sententiis, & propositionibus jam olim à Sanctissimo Domino Nostro Pio V. fel. record. sub data Kal. Octob. anno 1567. & nuper à Gregorio XIII. moderno Pontifice Max. sub data Kal. Febr. ann. 1579. iteratò damnatis, & prohibitis, ita motum & eductum esse, ut planè mihi habeam persuasum, earum omnium sententiarum damnationem, atque prohibitionem jure meritoque, ac non nisi maturo judicio, & diligentissima excussione præmissis factam atque decretam esse. Fateor insuper, plurimas ex iisdem sententiis in nonnullis libellis à me olim, & ante emanatam Sedis Apostolicæ super iis Censuram conscriptis, & in*

& in lucem editis, contineri, & defendi, etiam in eo sensu, in quo reprobantur. Denique, declaro, me impresentiarum ab iis omnibus recedere, & damnationi à S. Sede factæ acquiescere, neque posthac illas docere, asserere, ac defendere velle. Datum Lovanii die 24. Martii anni 1580. Multi Scriptores, præcipuè *Aubertus Miræus*, *Possevinus Societatis Jesu*, & *Cardinalis Palavicinus*, modestiam, aliasque virtutes *Michaelis Baii* post retractationem à se factam plurimum laudant. Primus, seu *Aubertus Miræus* in suâ Bibliotheca Scriptorum Ecclesiasticorum ait, in *Michaele Bajo* duas res enituisse, quæ in unum eundemque hominem raro admodum convenire solent, præstans videlicet ingenium, & summam animi modestiam, & ita enituisse, ut de illo ornando certasse inter sese videantur: Eum quotidie sacris tampiè operatum fuisse, ut inter sacrificandum & lacrymas effunderet frequenter, & easdem aliis excuteret; morientem suas facultates pauperibus testamento legavisse, Collegio Lovanii sub patrocinio *Beati Augustini*, quem religiosè semper coluit, excitato. Denique, *Cardinalis Palavicinus* lib. 15. *Historiæ Conc. Trid.* cap. 7. num. 17. postquam retulit promptam obedientiam, quam *Michael Bajus* Sedi Apostolicæ exhibuit, hæc subdit: Atque hoc pacto *Bajus* non solum illatus perstitit, sed ipsius etiam nomini verba *Diplomatis* pepercerunt. Quin per illud ejus errores manum tam mitem experti sunt, ut vix viderentur errores: cum aliqua ex proscriptis positionibus, nullis certis in hac exceptione adnotatis, dicerentur posse sustineri in aliqua minus propria significatione. Circa hæc ultima *Cardinalis Palavicini* verba observare debes, *Sanctum Pium V.* eo in *Diplomate*,

quo septuaginta novem propositiones damnavit, non solum pepercisse nomini *Michaelis Baji*, sed etiam declarasse, quasdam ex confixis propositionibus, nullis tamen certis in hac exceptione adnotatis, sustineri posse: *Quas quidem sententias*, inquit mansuetissimus ille Pontifex, *quanquam nonnullæ aliquo pacto sustineri possent, in rigore, & proprio verborum sensu ab assertoribus intento, hæreticas, erroneas, suspectas, temerarias, scandalosas, & in pias aures offensionem immittentes, respectivè præsentium auctoritate condemnamus &c.* Hinc quidam primi subsellii Catholici Theologi, præcipue Cardinalis *Norifus* in *Vindiciis Augustinianis* Cap. 3. Parag. 2. *Gabriel Vasques* Societatis Jesu, primæ secundæ Disput. 190. Cap. 18. & *Contensonus*, Ordinis Prædicatorum, in Tractatu De Gratia, asserunt, aliquas ex his septuaginta novem propositionibus à Sancto Pio V. proscriptis, fuisse damnatas, non ob illarum falsitatem, seu ob errorem, quem contineant, sed solum ob nimium acres & asperas oppositarum censuras, idque ab ipsomet *Tolet*o, qui à Summo Pontifice *Gregorio XIII.* missus fuerat, ut Pontificium Diploma ab Academia Lovaniensi recipi curaret, se accepisse testatur ibidem *Vasques*, asserens apud se adhuc esse exemplar, cui ad faciendam hujus rei fidem propriam manu subscripsit *Francoiscus Toletus*. Sed, ut ut sit de hac Theologorum, quos citavi, sententiâ, quam certè hic discutiendam non suscipio, omnes proscriptas propositiones damno & optarem vehementissimè, ut Scriptores, quorum libri justâ Censurâ à Sede Apostolica fuerunt semel confixi, imitarentur *Michaelis Baji* modestiam, quam ipse

ipſemet *Theophilus Raynaudus* Societatis Jeſu, vir licèt ruſoſæ frontis, & obducti ſupercilii Cenſor, impenſè laudat in Claufula Operis *de libris confiſgendis* Num. 571. ubi de humilitate poſt juſtam librorum confixionem tenendâ ſermonem habens, inquit: *Quo in genere Michael Bajus æternum quibufvis Scriptoribus exemplum ſapientiæ ac virtutis ſtatuit. Cum confixis à Francisco Toletto per Pontificem ad id delegato nonnullis ejus libris, oblataque Cenſura, an aquieſceret rogatus, malle ſe dixit, porcos paſcere, quàm cujuſcumque per Eccleſiam delectâ judicio de ſcriptionibus ſuis pervicacitè obluſtari.* Præter hoc exemplum *Michaelis Baji*, qui Sæc. XVI. ſuos ſummâ cum modeltia abdicavit errores, aliud ejufdem Sæculi Novatoris, ſeu *Guillelmi Poſtelli*, qui ante mortem ſuorum errorum palinodiam cecinit, & in pace Eccleſiæ deceſſit, exemplum ſuppeditat *Henricus Spondanus* in Annalibus Eccleſiæ ad annum MDLXXXI. Num. XVI. Barentoni vico Normanniæ in Galliis natus iſte *Guillelmus Poſtellus*, Philoſophiæ & Mathematicarum artium ſtudia primùm profeſſus eſt, deinde, longinquis peregrinationibus perfectam linguarum exoticarum ac maximè orientalium cognitionem adeptus, Venetias ſe contulit, ubi cùm non exigua pietatis documenta præberet, ad tyrocinium Societ. Jeſu admiſſus eſt à Sancto Ignatio, ejus Fundatore, ſicut ſcribit *Orlandinus* libro quinto Annalium Societatis Jeſu Num. 3. Verùm, ex eâdem Societate non multò poſt ob ingenti petulantiam dimiſſus, à Quæſitore Fidei perpetuo carcere damnatus eſt, ex quo elapſus in Gallias rediit, & in maximo honore habitus eſt à Chriſtianiſſimo Rege *Franciſco I.* qui

qui viros litteratos colebat, à maximis Dynastis, qui eum tanquam Mundi miraculum suspiciebant, & ab omni doctorum hominum natione ita laudatus, ut de ipso dici soleret, tot apophtegmata & oracula, quot verba ex ipsius ore prodire. At eruditus ille vir præ nimiam Rabbiorum Lectione, & Astrorum contemplatione in absurdos errores prorupit, multaque scripsit deliriis & erroribus passim inspersa, nimirum *De Trinitate Mundi, Corporis & Animarum: De Christo intoxicato: De Matrice Mundi: De salvandis universis omnis generis hominum Sæctis: De Clave absconditorum à Sæculo, quæ nec Apostoli, nec ipsa Ecclesia portare potuissent: De Mysteriis sibi per Angelum Raziel revelatis &c.* Sunt etiam nonnulli Scriptores, qui dicunt, *Guillelmum Postellum* in hunc errorem adeò delirum incidisse, ut ausus sit asserere, Jesum Christum in Mundum denuò venturum, & in hoc secundo Christi adventu Virginem quamdam Venetam, sibi cognitam, scæminarum Redemptricem fore, quemadmodum Jesus Christus Virorum Redemptor fuerat. Librum de hoc argumento à *Guillelmo Postello* editum fuisse, & ab ipso inscriptum; *De Virgine Veneta*, affirmant quidam Scriptores, quos tamen hac in re fuisse deceptos observat *Florimundus Ramundus* libro 2. *De Origine Hæresum* Cap. 15, ubi ait, hunc librum à *Guillelmo Postello* non aliò consilio fuisse scriptum, quàm ut Venetæ cujusdam Virginis Benefactricis suæ, à quâ subsidia ad suas longinquas peregrinationes peragendas acceperat, laudes celebraret. Sæpiùs *Guillelmus Postellus*, dum Parisiis esset, à Theologis Parisiensibus, & Magistratu increpitus, quòd inaudita ex Rabbi-

norum

norum & Talmudistarum, & ex propriis sui cerebri somniis proferret commenta, nec tamen respiscere vellet, in Monasterium Sancti Martini à Campis secedere iussus est, ubi immensâ Dei misericordiâ errores suos abdicavit, omnia, quæ vel docuerat, vel scripserat, Ecclesiæ judicio & correctioni subdidit, atque, post multa exhibita per aliquot annos veræ pœnitentiæ signa, in fide & pace Ecclesiæ Catholicæ ex hac vita migravit dñe VII. Septembris anni MDLXXXI. natus annorum circiter centum, & prosperâ semper valetudine usus. Extât adhuc haud parùm utilis liber à *Guillelmo Postello* editus, & inscriptus: *De Orbis Concordia*, in quo Ethnicos, Mahometanos, Judæos, Hæreticosque omnes refellit, & adversus illos Religionis Christianæ, & Catholicæ veritatem omni argumentorum genere demonstrat ac vindicat. Sed hætenus satis diximus de Hæreticis & Novatoribus Sæculi decimi sexti in quos verè quadrat id quod *Theodoretus* cap. 4. libri I. *Historiæ Ecclesiasticæ* ait de nonnullis, qui neminem volunt ex antiquis Patribus sibi comparari, neque illos, quibus nos ab ineunte ætate usi sumus, præceptoribus, sibi pares existimari sinunt, immò verò ne unum quidem Collegarum nostrorum vel ad mediocrem sapientiam pervenisse censent: sed se solos ipsos sapientes, & sibi solis ea doctrinæ patefacta Mysteria, quæ in nullius unquam sub sole cognitionem ac mentem venerint, arbitrantur.

D. Fueruntne aliquæ Sæculo decimo sexto agitatæ inter Catholicos Theologos Controversiæ, quæ turbas in Ecclesiâ excitarent?

M. Tres Controversiæ Sæculo decimo sexto
inter

inter Catholicos Theologos habitæ sunt , quarum prima originem habuit in Belgio ; Altera in Hispania ; Tertia in Germania . Primæ Controversiæ , quæ enata est in Belgio, locum & occasionem dederunt *Leonardus Lessius* , & *Joannes Hamelius* , Lovanii in Collegio Societatis Jesu Sacræ Theologiæ Professores , qui annis MDLXXXV. & MDLXXXVI. triginta quatuor Propositiones in publicis Læctionibus docuerunt, quas celeberrima Academia Lovaniensis censurâ confixit. Tres ex his propositionibus erant de Scriptura Sacra , & his verbis conceptæ : *Ut aliquid sit Scriptura Sacra, non est necessarium singula ejus verba inspirata esse à Spiritu Sancto . II. Non est necessarium , ut singule veritates & sententiæ sint immediatè à Spiritu Sancto ipsi Scriptori inspiratæ . III. Liber aliquis (qualis fortè est secundus Machabæorum) humana industria sine assistentia Spiritus Sancti scriptus , si Spiritus Sanctus postea testetur, ibi nihil esse falsum, dicitur Scriptura Sacra.* Reliquæ aliæ xxxi. Propositiones spectabant Providentiam divinam, Prædestinationem , Reprobationem , Gratiam , Justificationem , quas Doctores Lovanienses postquàm maturo examine in suis Comitibus Generalibus discussissent , & à doctrina Sancti *Augustini* alienas judicassent , eas, unà cum tribus aliis propositionibus de Scriptura Sacra, proscripserunt in Censura datâ anno MDLXXXVI. quam anno sequenti acriter defenderunt in libro Apologetico , cui titulus est : *Justificatio , seu Defensio Censuræ facultatis S. Theologiæ Academiæ Lovaniensis .* Eodem anno MDLXXXVI. die xx. mensis Januarii Duacensis Academia easdem xxxiv. propositiones confixit in sua Censura , quam

cate-

exterorum Doctorum nomine & auctoritate, adornavit *Guillelmus Estius*, suâ Orbi Christiano famâ notissimus. Verùm, cùm inde suborirentur gravissimæ contentiones, quæ exitiale damnum, Ecclesiæ Catholicæ afferre poterant, *Sixtus V.* Pontifex Maximus per Breve Apostolicum datum die xv. Aprilis anni MDLXXXVI. hanc Causam ad se evocavit, mandavitque *Ostasio Frangipani*, Catalano Episcopo, in Germania simul ac Belgio Nuncio Apostolico, ut omni charitatis officio studiosissimè ageret, ut earum contentionum ac dissensionum finem omninò facerent universi ac singuli, qui de iis articulis tam graviter inter se dissidebant, & utrique parti imponeret silentium, præciperetque omnibus, ut ab hisce opinionum dissidiis & contentionibus penitè abstinere, propositâ excommunicationis latæ Sententiæ pœnâ, & aliis Censuris, & invocato etiam, si opus fuisset, brachii sæcularis auxilio, non obstantibus quibuscumque. Hoc pacto composita est illa Controversia, sed in suarum Censurarum defensione semper invictè perstiterunt duæ illustrissimæ Academicæ, quæ illas annis MDCXIII. MDCXLVIII. MDCXLIX. MDCLXXIX. MDCXC. renovarunt, novumque robur eis addiderunt. Quin, & Summi Pontifices, quod maximè observare debes, Doctores Universitatis Lovaniensis, adhortati sunt, ut Doctrinæ Sanctorum *Augustini* & *Thomæ de Gratia*, & Prædestinatione, quam à suis Majoribus acceperant, firmitè hærerent, & ab ea ne latum quidem unguem desciscerent. Sic enim *Alexander VII.* Pontifex Maximus, in Brevi ad Lovanienses dato die VII. mensis Augusti anni MDCLX. Scripsit:

Non

Non dubitamus quin vos pro singulari scientiæ pietatisque studio, sanam & incorruptam, qualem tot Apostolicæ Sedis declarationes & Sanctorum Patrum traditiones requirunt, doctrinam semper amplexuri, & adversus Orthodoxæ Religionis hostes defensuri sitis: necnon Præclarissimorum Ecclesiæ Catholicæ Doctorem Augustini & Thomæ Aquinatis inconcussa tutissimaque dogmata sequi semper, ut asseritis, ac impensè revereri velitis. Quorum profectò Sanctissimorum Virorum, penès Catholicos universos ingentia, & omnem laudem supergressa nomina novi præconii commendatione non egent. Fuerunt quidem nonnulli, qui ausi sunt asserere, Alexandrum VII. Pontificem Maximum, nunquam laudatum illud Breve vidisse; quos falsi convincunt Christianus Lupus in Epistola Apologetica de Attritione & Contritione Cap. v. Cardinalis Norisius in Vindiciis Augustin. Cap. 6. Cardinalis Raymundus Capissuchus in Appendice, ubi hæc habet: Quod quidem Diploma ab eodem Alexandro, Pontifice Maximo, perlectum, observatum, commendatum & probatum fuit, cum sibi annulo Piscatoris signandum exhiberetur à Francisco Nerlio, Brevitum ad Principes tunc Secretario, postmodum S. R. E. Cardinali, ut idem Cardinalis Nerlius mihi testatus est. Aliud Breve Apostolicum præcedenti geminum, quod incipit: Dilecti Filii salutem &c. ad Doctores Lovanienses direxit Innocentius XII. Pontifex Maximus, in quo eos ad doctrinam Sanctorum Augustini, & Thomæ in materia Divinorum Auxiliorum propugnandam etiam atque etiam adhortatur his verbis: Apostolicæ vos primùm auctoritate monemus, ut, sublati contentionibus, sapientiæ, quæ desursum atque pacifica est,

est, vacetis; profitentes, sicut asseritis, doctrinam præclarissimorum Doctorum Augustini & Thomæ, quorum ille tantæ scientiæ fuit, ut inter Magistros optimos etiam à nostris Prædecessoribus haberetur, & cujus doctrinam, secundum eorundem Prædecessorum Statuta, Romana sequitur & servat Ecclesia: Alter verò mira eruditione eandem Dei Ecclesiam clarificat, & sanctâ operatione fecundat. Hos dum Universitas vestra doctrinæ duces secuta fuerit, securè pugnabit contra hostes orthodoxæ fidei, in Ecclesiæ gloriam & adificationem, excitabitque in dies hanc Apostolicam Sedem ut cumulatiùs ei præstet paternæ charitatis officium. Vobisque interim Apostolicam Benedictionem peramanter impertimur. Datum Romæ die 6. Februarii anni 1694. Hæc referre operæ pretium duxi, ut intelligeres, has celebres Universitates Lovaniensem & Duacensem in doctrina de Gratia & Prædestinatione non alios sibi adsciscere Duces ac patronos, quàm Sanctos Patres Augustinum & Thomam, easque etiamnùm cum Scholâ Thomistica, quæ utriusque Doctoris patrocinio itidem gloriatur, arctissimo fœdere jungi.

D. In quo potissimùm sita erat illa Controversia, quam sæculo decimo sexto in Hispania excitatam fuisse mox asserebas?

M. Nondùm erat omninò sedata, hæc, quam modò memoravi, suborta in Belgio Controversia, cum nova in Hispania excitata est an. MDLXXXVIII. quo Ludovicus Molina, Eborensis Academiæ Professor, Societatis Jesu, meditatam ab annis circiter triginta novam liberi arbitrii cum Divina Gratia Concordiam vulgare cœpit. Hæc semel publicata Ludovici Molina Concordia non solum FF. Prædi-

cato-

catores, acerrimos doctrinæ Sanctorum *Augustini* & *Thomæ* defensores, nata est adversarios, verum etiam malè habita est à viris in Ecclesia maximi momenti, quos inter, unum instar omnium, & omni exceptione majorem, hic laudabo Eminentissimum Cardinalem *Baronium*, Annalium Ecclesiæ parentem, qui eâ de re Epistolam scripsit ad Illustrissimum virum *Petrum de Villars*, Archiepiscopum Viennensem in Galliis, quam refert noster *Joannes Baptista Gonet* in sua *Apologia Thomistarum*, quamque *Petrus Matthæus* in *Historia septem annorum pacis*, quam gallico idiomate anno 1604. adornavit, Lib. 7. Narratione 4. ait se vidisse propriâ manu Cardinalis *Baronii* subscriptam. Hic autem est hujus Epistolæ Cardinalis *Baronii* tenor:

Illustrissimo Domine, ignoscas si tardiùs quàm par est, ad literas Reverendissimæ Dominationis vestræ rescribo, quas ut puras & orthodoxas in omnibus exosculatus sum, à quibus absit ut vel in minimo apice vel puncto dissentiam. Tantummodò de libris *Molinae* remanet controversia. Legi eos, sed non sine stomacho, cum in his nihil potentius agere præ se ferat, quàm *S. Augustino* adversari (licet sanctum nunquam nominet) eumque oscitantia redarguere, se que illo in iis disputationibus vigilantiorē acutiorēque jactare. Quis potest eum talia loquentem absque nausea tolerare? Licet ut anguis effugiat, & è manibus facilè elabatur; ut, etsi temerarium quis inveniatur, haud facilè possit hæresis convincere & sugillare. Non hujusmodi commentatoribus indiget Ecclesia Dei, quæ puritate, candore, nitore delectari tantummodò consuevit, ipsa non habens maculam neque rugam. Legi, inquam, eum
 & ad

& ad quinquaginta & amplius notavi propositiones, verba, phrasas, quas vel saltem affines esse erroribus Pelagianorum sive Semipelagianorum (licet ipse cautius intra Catholicæ fidei limites, vel protestando salutem, se contineat) nemo puto, qui absque affectu illa perlegerit, negabit omnino. Quid Ecclesia indiget hujus Molinae libris, ut discat quæ à tot Sanctis Patribus Conciliis, atque Decretis, jam ante tot sæcula didicit atque docuit? Quod ad ipsum D.N. Clementem Papam attinet, hoc ipsi in proposita est, hoc in voto, hoc denique in decreto, ut nec latum quidem unguem à vestigiis Prædecessorum recedat, sed iisdem insistat quàm firmissimè. Scit planè, tot Sanctos Pontifices Innocentium, Sixtum, Celestinum, Hormisdam, ac deniquè Felicem, cujus sunt Canones Concilii Aransicani, hoc professos suis scriptis esse, atque testatos, Romanam Ecclesiam, in iis, quæ spectant ad Gratiam, & Liberum Arbitrium, sequi semper consuevisse S. Augustinum. Testatur equidè id tot verbis Hormisdas suis litteris; adeò ut alio judicio opus non sit, cum jam præjudicatum sit. Laborat nunc in discutiendo Molinae Volumine, de quo abjiciendo, vel purgando, vel retinendo, adhuc sub judice lis est. Mea siquidem sententiâ, eo non indiget Ecclesia Catholica, in quo vel saltem quadam auditui horridula essent corrigenda. Monui Reverendos Patres meos societatis Jesu, ne existimationem eorum in defensione librorum ejus periclitari sinant, & in discrimen adduci. Colo ipsos omnes, Deus scit, ut Patres, ut de illis illud usurpem. Opprobria exprobrantium tibi ceciderunt super me. Vale, Pater amantissime, atque doctissime, Lucerna pedibus meis, cum per obscura contigerit ambulare. Romæ Idibus Martii anni Domini 1603. Vestra Illustrissima Dominationis Fra-

ter & servus . Cesar Cardinalis Baronius . Ex eâ Epistolâ facilè intelligere potes, hanc novam *Ludovici Molinæ Concordiam* probatam non fuisse Eminentiſſimo & de univerſali Eccleſiâ optimè merito Cardinali *Baronio* , ac ſubindè mirari minimè debes , quòd , occasione iſtius novæ *Concordiæ* liberi Arbitrii cum Divina Gratiâ à *Ludovico Molinæ* editæ , multæ in Hiſpania fuerint excitatæ turbæ , & graviffimæ habitæ doctiſſimos Patres Societatis Jeſu Theologos inter & FF. Prædicatores Concerationes , quæ tamen cum nimium fervèrent in Hiſpania , vetuit ſummus Pontifex *Clemens VIII.* tranſmiſſo die x. Januarii anni mdcxvi. ad ſupremam Caſtellæ Inquiſitionem Brevi Apoſtolico, ne Sententiam diceret, aut quidquam eâ in re defini-ret, juſſitque ut Academiarum , Epiſcoporum , ac Theologorum Cenſuræ, necnon Patrum Societatis Jeſu, ac FF. Prædicatorum Lucubrationes Romam quantocius mitterentur , ubi per ſeſe Cauſam finire meditabatur. Addidit etiam Summus Pontifex novas in eos interminationes, qui de Divina gratia, affinibusque quæſtionibus, in Scholis, Pulpitis , editiſque libris agerent, donec alitèr foret ab Apoſtolica ſede definitum . Audivit quidem ſæpiùs Sanctiſſimus ille Pontifex in celeberrimis Congregationibus *De Auxiliis* , quas eam in rem Romæ inſtituit, doctiſſimos tum Societatis Jeſu, tum Ordinis FF. Prædicatorum Theologos, hinc indè magno animorum æſtu diſputantes , & in Lectione Operum *S. Auguſtini* aſſiduus , eruditorum conſilium de controverſis quæſtionibus exploravit, atque nonnullorum Conſultorum lucubrationes hoc de argumento adornatas ſedulò perlegit , ut his di-

disputationibus propediem finem imponere posset. Sed alia sunt hominum, alia Dei Consilia. Hanc quippè Controversiam Divina Providentia, cujus sunt inscrutabilia judicia, obitu *Clementis VIII.* qui inter hæc accidit, suspensam manere voluit, & Theologorum disceptationibus salvâ & inculpatâ fide permissam. *Paulus V.* successor *Clementis VIII.* resumpsit quidè examen ejusdem Controversiæ, novasque Congregationes *De Auxiliis Romæ* instituit, sed tandè occultis rationibus permotus, litem omnem in suspenso posuit, & ad se vocatis Præpositis Ordinum FF. Prædicatorum, & Societatis Jesu, nec non disputantibus ac Consultoribus significavit, posse illos reverti ad propria, dixitque, se opportuno tempore promulgaturum declarationem ac determinationem suam. Atque interim quàm seriò injunxit, ut in hujusce argumenti tractatione; nullus partem alteram notâ aliquâ, vel Censurâ notare audeat. Jussit insuper tam Prædicatoribus, quàm Jesuitis, ut si quis hoc in capite deliquerit, severè puniatur. Ita quippè suum istud Decretum servari vult. Suo ergò officio non deerit Pater-nitas vestra, ut ejus observantiæ invigilet. Singulariter verò datâ occasione, significabit quid quid in hoc executioni demandaverit, ut de iis sue sanctitati ratio reddi valeat.

D. Expone, quæso, uberius, quænam sint præcipua illa Capita, in quibus *Ludovicus Molina* in suâ *Concordia Liberi Arbitrii cum Divina Gratia* à Schola Augustino-Thomisticâ dissidebat, & quid in Congregationibus de Auxiliis sub *Clemente VIII.* & *Paulo V.* habitis super hac controversiâ statutum sit?

M. Hic multa quidē pararam in laudem Familæ Dominicanæ, quæ in celeberrimis Congregationibus *De Auxiliis* corā *Clemente VIII.* & *Paulo V.* Supremis Catholicæ Ecclesiæ Hierarchis, doctrinam de Divina Gratia, à Sanctis *Augustino*, & *Thoma* ad se transmissam, per suos alumnos *Didacum Alvaresium*, & *Thomam Lemosium*, Deus bone quos Viros! maximā gloriā propugnavit, quæ tamen silentio prætermittere necessarium omninō duxi, ut obtemperarem Decretis Romanorum Pontificum *Pauli V.* *Urbani VIII.* *Innocentii X.* & *Innocentii XII.* qui hanc de Divina gratia Controversiam, rerumque in Congregationibus *De Auxiliis* gestarum, aut ventilatarum Historiam ne quis in publicam lucem emittat, prudentissimè prohibuerunt. Cū enim ex eā Controversiā multa sint orta scandala, gravissimæ dissensiones, amaræ disputationes, & periculosæ timerentur perturbationes, consultius in rem Ecclesiæ visum est Romanis Pontificibus, ut Theologi paci silentio hinc indè litarent, & hanc de Divina Gratia, Controversiam intra Scholarum umbras liberè quidem agitare possent, sed nullis editis libris, aut scriptionibus, ob disputantium æstus, propalare auderent. Ea igitur, quæ altè animo meo infidet, ergā Sedem Apostolicam reverentia, & ex oculata obedientia conceptum sermonem continere præcipit, quia melior est obedientia, quàm Victima, & Scholæ Thomisticæ, cui me totum addictum profiteor, proprius character est, amare non rixas, sed pacem, publicas vitare dissensiones, & ab amaris disputantium Controversiis penitus abhorrere. Cæterum, licet Schola Thomi-

mistica , ob reverentiam Decretis Romanorum Pontificum debitam , uno silentii , patientiæ , & modestiæ clypeo nunc se se tutetur , non tamen Gratiæ Divinæ , quàm à Sanctis *Augustino & Thoma* accepit , tutelam ac defensionem abjecit , quæ tot ei defensores aluit , & etiamnum instruit , eorum manus docens ad prælium. Nunquàm profectò hoc cœleste sibi commissum Depositum , in cujus defensionem omnis Dominicanus miles est , deferet Schola Thomistica , defendendæ Sancto-
rum Augustini , & Thomæ doctrinæ solemnijura-
mento obstricta , sed paci ac modestiæ consulens ,
jussum ac judicium Romani Pontificis patienter prætolabitur , eadem usurpans verba , quibus Sanctissimus ejus Doctor Angelicus *Thomas Aquinas* usus est in Epistola *Catenæ Auræ* præfixâ , & ad *Urbanum IV.* Pontificem Maximum directâ :
Suscipiat vestra Sanctitas præsens Opus vestro discutiendum , corrigendumque judicio , vestræ sollicitudinis , obedientiæ meæ fructum , ut dum à vobis emanavit præceptum , & vobis reservetur finale judicium ; ad locum enim undè exeunt flumina , revertuntur . Huic itaque silentii legi , quam Schola Thomistica suis Discipulis in hac de Gratiâ Divina Controversia sapientissimè imposuit , morem ipse in præsentia geram , qui ejus doctrinæ lac , à Doctoribus Divinæ Gratiæ *Augustino & Thoma* propinatum , ferè ab uberibus suxi , & nunc gusto suaviter , medullitis retineo , ardentèr prosequor , & intrepidè tutari semper gloriabor . Quod si verò , me hanc silentii legem ad summos juris apices observare volente , vehementer tamen desideres perspectam habere Historiam Congregatio-

num De Auxiliis, digitum ad fontem intendam, ubi sitim tuam ad satietatem usque explere poteris. Extant quippè omnia Acta Congregationum De Auxiliis Thomæ Lemosii typis edita Lovanii sub hoc Titulo: *Omnia Acta Congregationum ac Disputationum, quæ coràm Clemente VIII. & Paulo V. Summis Pontificibus sunt celebratæ in Causa, & Controversia illa magna De Auxiliis Divinæ Gratiæ, quas Disputationes ego F. Thomas de Lemos sustinui. Lovanii apud Ægidium Denique anno MDCCII.* Prodiit etiam Antuerpiæ anno MDCCIX. altera editio, sed auctior & locupletior, *Historiæ Congregationum De Auxiliis Divinæ Gratiæ sub Summis Pontificibus Clemente VIII. & Paulo V.,* quam secundis curis adornavit Clarissimus noster *Jacobus Hyacinthus Serry*, Sacræ Facultatis Parisiensis Doctor, & in Serenissimæ Reipublicæ Venetæ Academia Patavina Theologus Primarius. Plura de hac Controversia non dicam, sed instar Harpocratis, digito labiis impresso, penitus silebo.

D. Indica, si placet, causam, & Authores istius Controversiæ, quam Sæculo decimo sexto in Germania enatam fuisse paulò antè observasti?

M. Huic Controversiæ sub initium Sæculi decimi sexti in Germania excitatæ initium dedit *Joannes Reuchlinus*, vulgò dictus *Capnio*, cujus jam mentionem fecimus in Colloquio V. in Historiam Sæculi XV. Plurimum linguarum callentissimus fuit *Joannes Reuchlinus*, variis disciplinis expositus, ornamentis pulcherrimis cumulatus, variis ad *Alexandrum VI.* Summum Pontificem, ad

Im-

Imperatorem *Maximilianum*, & ad Principes Germaniæ Legationibus summâ cum laude perfunctus, libris editis clarus, & toti Orbi notissimus: uno verbo, *Reuchlinus Vir Magnus*, nisi linguę hebraicę mysteria Cabalisticis nugamentis maculasset, ut ait *Genebrardus* in Appendice in *Innocentio VIII.* Pontifice Maximo, à *Spondano* relatus ad annum MCCCXCVII. Num. XII. At enim, Hebraicę Cabalę Mysteriis initiatus *Reuchlinus*, adeo se Judæorum nugis & insomniis devovit, ut librum anno MDXI. in lucem emiseric, contra *Jacobum Hogstratum*, seu ut alii vocant, *Hogofstratum*, Ordinis Prędicatorum, & hæreticę pravitatis per Coloniensem, Moguntinam, & Trevirensẽ Provincias Fidei Inquisitorem, qui eum redarguerat, quod in perniciem Ecclesię Catholicę judaismo plus æquò faveret. Eo itaque libro, quem vulgaverat *Reuchlinus*, & in quo Judæorum libros non esse cremandos pertendebat, haud parum offensus *Jacobus Hogofstratus*, eum multorum errorum apud Theologos Academię Colonienfis accusavit. Datus est liber *Reuchlini* examinandus Doctori *Arnoldo De Tungaris*, qui postea ad Doctores retulit, quæ in libro notaverat Censurâ perstringenda. De his, quæ aliquid sinistri protendebant, certior factus *Reuchlinus*, litteras protinus scripsit ad Doctorem *Arnoldum De Tungaris*, & *Conradum Kollin*, Ordinis Pręd. Professore Coloniensem, ut eos sibi divinciret. Has *Reuchlini* litteras inseruit *Egassius Bulaus* Tomo VI. *Historiæ Universitatis Parisiensis*. Nihil tamen his litteris promovere potuit *Joannes Reuchlinus*, sed anno sequenti, seu MDXI. Academia Colonienfis eum

per literas castigavit, quòd temerariè quædam in suo *Oculari Speculo* effudisset, admonuitque ut retractaret quasdam propositiones, quarum catalogum numero XLIII. misit, ut videre est in his Universitatis Colonienſis literis, quas in citato Tomo refert *Egaffius Bulaeus*. Ad has Universitatis Colonienſis litteras respondit quidem *Reuchlinus*, sed cùm errorum suorum palinodiam cantare noller, tandem Academia Colonienſis in eum Sententiam tulit, ejusque librum inscriptum: *speculum oculare*, damnavit & exuri jussit anno MDXIV. Hanc Academia Colonienſis Sententiam approbarunt Facultates Parisienſis, Lovanienſis, Erphordienſis, & Moguntina, quarum tamen Censuras ut inanes redderet *Reuchlinus*, edidit *Epistolas obscurorum Virorum*, multo quidem facetiarum lepore conditas, quibus ad excitandum risum, Theologorum Scholaſticorum & Monachorum, barbarè latinâ linguâ scribentium, stylum expressit. Sed hunc satyricum Epistolarum librum confixit *Leo X.* Pontifex Maximus, jussitque omnibus fidelibus, ut à dicti libelli, ejusque exemplarium lectione perpetuò abſtinerent, illaque igne comburerent. Eo Interdicto Pontificio nihil planè deterritus *Reuchlinus*, secundum ejusdem farinæ Epistolarum Volumen sub titulo *Clarorum virorum*, tanquàm ex titulo minimè prohibitum, sed priori multò aculeatius, ac magis salitum & piperatum publicavit, eumque Imperatoris *Maximiliani*, ac multorum Germaniæ Procerum patrocinio frueretur, obtinuit à Romano Pontifice *Leone X.* Judices, qui Romæ Causam ejus cognoscerent, à quibus tamen post longas disceptationes, nec à Sententia damnatio-

tio.

tionis in se latâ absolvi, nec innocens unquam declarari potuit. Non me fugit, *Desiderium Erasmus* passim in suis libris & Epistolis acriter invehi in Monachos, ac præsertim Dominicanos, à quibus ait injustè vexatum fuisse *Joannem Reuchlinum*, ut videre est præcipuè in Epistola, quam anno MDXV. scripsit ad Cardinalem *Dominicum Grimaldi*, quæque in recenti ejus Operum Editione Lugduni Batavorum anno MDCCIII. adornatâ extat ordine centesima sexagesima septima, in qua hæc habet: Id quod nuper in summo illo Viro *Joanne Reuchlino*, non sine summo animi dolore conspeximus. Jam par erat, jam tempus erat, ut homo venerande senectutis, suis pulcherrimis studiis fueretur, ex honestissima juvenili semente laborum, suavissimam carperet messem. Conveniebat, ut vir tot linguis, tot disciplinis instructus, hoc velut ætatis autumnus divitem ingenii proventum in universum orbem effunderet. Ad hoc erat laudibus exstimulandus, præmiis invitandus, studio inflammandus. Et exortos audio, nescio quos, qui cum ipsi nihil præclarum efficere possint, perversissimâ viâ gratiam affectant. Deum immortalem, quàm frivolis ex nugis quantas Tragedias excitarunt! Quorsum igitur attinebat virum, & litteris & ætate venerabilem, ob rem nihili in bujusmodi pertrahi turbas, in quibus jam septimum, opinor, perdit annum, & molestissimis involvitur litibus, non mediocri Doctorum omnium, immò totius Germaniæ dolore & stomacho. Sic in gratiam *Joannis Reuchlini* perorat *Desiderius Erasmus*, cui tamen hac in re nulla fides habenda est. Primò, quia cum *Joanne Reuchlino* arctissimâ necessitudine devinctus erat, ut patet ex variis Epistolis, quas ultrò citròque scripserunt,

& ex

& ex eâ Apotheosi, quâ demortuum *Reuchlinum* in Cælum extulit *Erasmus* in suis *Colloquiis Familiaribus*. Secundò, magis standum est Sententiæ, quam in *Joannem Reuchlinum* tulerunt *Academiæ Parisiensis, Erphordiensis & Moguntina*, quàm iudicio *Desiderii Erasmi*, qui non erat Theologus, sed dumtaxat Grammaticus, ut ipsemet sæpiùs candidè fatetur, præcipuè in Epistola ad *Albertum Pium*, Principem Carpensensem, quæ est ordine trecentesima trigesima tertia, in qua hæc scribit: *Complures consentientibus vocibus narrant, Romæ quemdam esse Principem Carpensensem, doctum, magnæque apud purpuratos Patres auctoritatis, qui passim ac palam deprædicet, Erasmus nec esse Philosophum, nec Theologum, nec ullius solidæ doctrinæ. Atque hætenus nihil commoveor, si quis ea de me prædicet, quæ ipse tum dictis, tum scriptis ingenuè profiteor, nullis magis indignans, quàm his, qui me falsis & invidiosis laudibus onerant. Si me venditarem pro magno Theologo, aut Philosopho, meritò mihi detrahet aliquis leonis exuvium. Quis autem Erasmi aliorumque Grammaticorum, quibus abundabat Sæculum XVI. declamationes præferre velit doctrinali iudicio tot Academiarum, & doctissimorum Theologorum, à quibus damnatus est Joannes Reuchlinus? Tertiò, Erasmus in omnibus ferè suis Epistolis, & libris, quos attento animo perlegi, impenitus, quàm par esset, laudat Grammaticos, & ad nauseâ usque debacchatur in Theologos Scholasticos & Monachos, maximè Dominicanos, eò quòd, cum essent Fidei Quæsitores, atro carbone notarent & Joannis Reuchlini, & aliorum id ætatis Grammaticorum libros, in quibus Theologiæ planè rudes*

des multa proferebant, quæ novitatem sapiebant, & à Decretis Theologorum longè latèque discrepabant. Eam ob rem, Erasmi animum in Dominicanos exulceratum fuisse, facile colligitur tum ex ejus Epistola cccclii. quam scripsit ad *Jacobum Hochstratum* Dominicanum, & in Germania Fidei Inquisitorem, qui *Joannis Reuchlini* libros confixerat; tum etiam ex Epistola cccclxxvi. quam direxit ad *Albertum* Cardinalem, Archiepiscopum & Principem Moguntinum, ubi Dominicanos, Fidei Inquisitores, multis calumniis insectatur, eosque his verbis canino dente mordet: *Jam pridem malè habet istos efflorescere bonas litteras, efflorescere linguas, reviviscere veteres auctores, quos antehàc exedebant tineæ, pulvere opertos, mundum ad fontes ipsos revocari. Timent suis Lacunis, nolunt videri quidquam nescire, metuunt, ne quid ipsorum majestati decedat. . . . Porro rem non sincero animo geri, vel ex eo licet coniecere; cùm ipsi fateantur nullum esse, neque veterum, neque recentium auctorem, in quo non reperiantur errores, etiam hæreticum facturum, si quis pertinacitè defendat: cur cæteris omissis, in unum tantum aut alterum inquirunt tam odiosè? Non insciantur in multis errasse *Alvarum*, in multis Cardinalem *S. Sixti*, in multis *Sylvestrum Prieratem*, de his nulla mentio, quia *Dominicani* sunt. In unum *Capnionem*, seu *Joannem Reuchlinum*, clamar, quia linguas callet. . . . Multa scripsit *Lutherus* imprudentèr magis quàm impiè, quorum hoc istos, seu Dominicanos, habet pessimè, quòd *Thomæ* non multum tribuit, quòd minuit quæstum veniarum, quòd Ordinibus Mendicantium parum tribuit, quòd Scholasticis dogmatibus non tantum defert, quantum Evan-*

geli

gelicis, quòd negligit humanas disputatorum argutias. Hæ nimirum sunt hæreses intolerabiles. Sed his diffimulatis, prætexunt invidiosa apud Pontificem, homines, tantum ad nocendum, & concordēs, & callidi Quidquid non placet; quidquid non intelligunt, hæresis est. Græcè scire, hæresis est, expolitè loqui, hæresis est, quidquid ipsi non faciunt, hæresis est. Mitto putidas alias calumnias, quibus ibidè Dominicanos incessit *Erasmus*, eo solo nomine, quòd *Martini Lutheri*, *Joannis Reuchlini*, & infelto quorundam aliorum Grammaticorum libros improbarint, damnarint, confutarint. Verum, Dominicanos non ex odio & livore, sed ex solo tuendæ ac vindicandæ veritatis studio id egisse sat superque comprobavit eventus. Dum enim *Joannes Reuchlinus*, *Desiderius Erasmus*, aliique illius temporis Grammatici, qui magis verba curabant, quàm Religionis Mysteria, & quibus magis placebat verborum elegantia, quàm Theologia, passim in suis libris contra Theologos & Monachos blaterarent, eosque, tanquàm Musarum, & bonarum litterarum, otores, traducerent, exortus est *Martinus Lutherus*, qui sese his Grammaticis socium adjunxit, oleum camino addidit, classicum contra Theologos & Monachos cecinit, multòque graviolem in Ecclesia excitavit tragædiam, ut ipsemet fatetur *Desiderius Erasmus* in laudata jam Epistola ad *Albertum Pium*, Principem Carpensẽ, his verbis: *Principiò erat bellum cum Linguis ac Latinis litteris, his ego hætenus favi, ut admissæ ornarent juvarentque recepta studia, non ut veteres professores de ponte, quod ajunt, deicerent & servirent gloriæ Christi, non ut veterem Paganismum nobis revocarent. Hic cum ancipiti mar-*
te de-

te decertaretur, res per Monachos detracta est ad negotium fidei. Non dubito, quin audita tibi sit Reuchlinica tragædia. Hic cæpit in illos incrudescere Doctorum odium: mox fervente adhuc bello inter mystas & osiores Musarum, exortus est Lutherus. Ita gradibus quibusdam res alterius partis semper in pectus vergentis pervicacia, tum alterius quorundam odiis, & intempestivis clamoribus hucusque progressa est tragædia. Habes nunc exordium & infaultum exitum hujus Controversiæ Reuchlinicæ, quam paulò fusiùs hîc descripsi, tum ut intelligeres, linguarum peritiam, etsi per se utilem, absque tamen studio Theologiæ posse aliquandò perniciosam evadere; tum etiam ut vindicarem Dominicanos, non solùm contra *Desiderium Erasmus*, sed etiam contra duos recentiores Scriptores, Joannem Henricum Majum, & Theophilum Raynaudum, quorum primus in vita Joannis Reuchlini Phorcensis, typis editâ Durlaci anno MDCI. XXXVII. Alter verò in suis Diatribis *De Immunitatibus Cyriacorum*, magno sed inani labore persuadere inoliuntur, Joannem Reuchlinum, fuisse insontem, & Dominicanos illum solo livore infectatos esse, quod sanè, ut ostendi, oppidò falsum est, nec à viris Catholicis in dubium revocari potest, postquàm Concilium Generale Tridentinum libros Cabbalistarum, maximè Joannis Reuchlini, confixit.

COLLOQUIUM QUARTUM,

*De Conciliis tam Oecumenicis , quàm
Nationalibus, quæ vel ad profligandas
Hereses , vel ad resarciendam Ec-
clesiæ Disciplinam fuerunt Sæ-
culo decimo sexto celebrata .*

DISCIPULUS. **J**AM scio , Concilium Oecume-
nicum Tridentinum ad extirpan-
das Lutheri , Calvini , aliorumque
hujus furfuris Heterodoxorum Hæreses, fuisse Sæ-
culo decimo sexto convocatum . At , cùm non
dubitem , quin privati Conventus , & aliquæ Sy-
nodi indictæ fuerint antè Concilium Generale Tri-
dentinum, tum in causa Lutheranæ , vel Calvinia-
næ Hæreseos , tùm etiam in causa Reformationis
Disciplinæ Ecclesiasticæ ; optarem , ut in isto Col-
loquio juxta Ordinem Chronologicum primo lo-
co percereres Conventus , Acta , Colloquia , &
Concilia Nationalia, quæ in Causa Lutheranæ Hæ-
reseos Sæculo decimo sexto ante Concilium Tri-
dentinum habita sunt . Dein , subnecteres Collo-
quia & Concilia Provincialia , quæ Sæculo itidem
decimo sexto in Causa Calvinianæ Hæreseos fue-
runt celebrata . Tertio loco eas Synodos Natio-
nales & Provinciales constitueres , quæ ante Con-
cilium Tridentinum in Causa Fidei & Reforma-
tionis Ecclesiasticæ Disciplinæ coactæ sunt . Po-
stremò,

stremò , de his omnibus , quæ in sacra Œcumenica Synodo Tridentinâ statuta ac definita sunt , differeres , necnon de aliis Conciliis Nationalibus , quæ Episcopi post Generalem Synodum Tridentinam , ad ejus executionem & observantiam promovendam , variis in locis congregaverunt .

M. Hic juxta Ordinem Chronologicum referam ea quæ gessit Romanus Pontifex *Leo X.* per suum Legatum *Thomam de Vio Cajetanum* Cardinalem , Ordinis Prædicatorum , in Germaniam missum , antequàm suam contra errores *Lutheri* Bullam publicaret , quibus adjiciam Disputationes , quas Catholici Doctores habuerunt cum *Luthero* , Censuras Academiarum adversùs errores illius Hæresiarchæ , ac tandem singula , quæ contra eundem *Lutherum* in variis Conventibus seu Comitiiis Germaniæ à *Carolo V.* Imperatore & aliis Principibus ante celebrationem Concilii Tridentini acta sunt , prout referuntur à *Joanne Cochlaeo* in *Actis Lutheri* , ex quibus facili negotio intelliges , quàm multiplici & tortuoso ingenio præditus fuerit hæresiarcha *Lutherus* , qui licèt sæpiùs damnatus ac victus , nunquàm tamen resipiscere voluit , sed suos impunè per Germaniam errores latè diffudit . In primis , *Lutherus* anno MDXVII. contra doctrinam Ecclesiæ Romanæ de Indulgentiis vexillum erigere cœpit , & nonaginta quinque Propositiones adversùs Indulgentias edidit , quas Foribus Templi omnium Sanctorum Witemburgi affixit die xxxi. mensis Octobris ejusdem anni . His *Lutheri* nonaginta quinque contra Indulgentias Propositionibus *Tetzelius* , Ordinis Prædicatorum

torum Theologus doctissimus, centum & sex Propositiones opposuit. De his certior factus Summus Pontifex *Leo X.* iussit *Luthero* ut Romam veniret, eique iudices dedit *Sylvestrum Prieratem* Ordinis Prædicatorum, Sacri Palatii Apostolici Magistrum, & *Hieronymum de Genutiis* Episcopum Asculanum. At *Luthero*, sibi malè conscio, Romam venire detrectante, consensit tandem Summus Pontifex (exoratus à *Friderico* Duce Saxoniz, qui impensius *Luthero* favebat) ut causam *Lutheri* examinaret *Thomas de Vio Cajetanus* Cardinalis, Sedis Apostolicæ in Germania Legatus, eique Apostolico Diplomate præcepit, ut si *Lutherus* spontè se sisteret, erroresque suos damnavet, in Ecclesiæ Communionem cum reciperet, sin minùs, accito Principum auxilio, cum, abjectâ omni cunctatione, carceri manciparet. *Lutherus*, homo vafer & subdolanus, fide à *Maximiliano* Imperatore acceptâ, *Augustæ* coram Cardinali *Cajetano*, Summi Pontificis Legato, comparuit, à quo humanissimè exceptus est, eique certam spem conversionis fecit. Posteriâ die ad ipsum rediit, & stipatus publico scribâ, quatuor Senatoribus, & *Joanne Staupitio*, Vicario Generali sui Ordinis in Germania, porrexit Legato Pontificis Confessionem Fidei, seque submitit Decretis Universitatum, præsertim Parisiensis, quam appellavit Studiorum Parentem, & ab antiquo semper Christianissimam, ac in Theologia florentissimam Universitatem. Confessionem Fidei *Lutheri* his verbis conceptâ fuisse asserit *Joannes Cochleus* in Actis & Scriptis *Lutheri*: Ego Fr. Martinus Luther Augustinianus, protestor me colere & sequi Sanctam Romanam Ecclesiam in omnibus meis dictis & factis.

factis, presentibus, præteritis & futuris. Quod si quid contra vel aliter dictum fuit, vel fuerit, pro non dicto haberi & habere volo. Verum, ficta ac simulata fuit hæc Lutheri Confessio, non secus ac ipsius protestatio, quâ per Epistolam ad eundem Legatum Apostolicum scriptam significavit, velle se auctoritati Ecclesiæ subicere, his verbis: Nunc Reverendissime in Christo Pater, fateor, sicut & aliàs fassus sum, me fuisse certè nimis indiscretum, aerem & irreverentem in nomen Summi Pontificis. Et licet acerrimè fuerim in hanc irreverentiam provocatus, tamen meum fuisse nunc intelligo, modestius, humiliter & reverentius hanc materiam tractare, & non ita respondere stulto, ut ei similis efficerer. De qua sincerissimè doleo, & veniam peto; & per omnia pulpita in vulgus promulgabo, sicut & sæpius jam feci; daboque deinceps operam, ut alius sim & aliter loquar, Deo miserente. Immo promptissimus sum, atque facillimè promitto, me posthac materiam de Indulgentiis non tractare, atque his finitis quiescere, modò illis quoque modus imponatur aut sermonis, aut silentii, qui me in hanc tragædiam suscitaverunt. Sic, ut fucum Cardinali Legato faceret, morasque neceret, pœnitentiam mentiebatur Hæresiarcha ille, Causæ suæ malè conscius, qui tamen paulò post, impetrato à Cæsarianis Salvoconductu, unâ cum Joanne Staupitio, Ordinis sui Vicario Generali, clam aufugit, & à Cardinali Legato ad Papam, & postea à Papa ad futurum Concilium Generale appellavit. Interim anno MDXIX. habita est Lipsiæ insignis illa & toto Orbe Christiano celeberrima Concertatio Joannem Eckium inter & Andream Carlostadium, & Martinum Lutherum. Erat Eckius Theologiæ Pro-

fessor Ingolstadii & Friburgi, magnumque Disputatoris nomen Tubingæ, Viennæ, atque etiam Bononiæ adeptus fuerat; quam laudem *Lutherus*, & *Carlostadius* ei præripere conabantur. Occasio hujus Lipsiæ Disputationis hæc fuit: Nonaginta quinque adversus Indulgentias Propositiones, ut jam diximus, propugnandas susceperat *Lutherus*, harum nonnullis Animadversiones, seu Notas reprehensorias apposuit *Eckius*, fidei Catholicæ Causam agens. Id iniquo animo tulit *Carlostadius*, Archidiaconus Witembergensis, & hanc injuriam, ut putabat, ulturus, atque amico suo *Luthero*, qui Witembergæ Prælector ordinarius erat, patrocinator, *Eckium* ad disputationem provocavit. Certamen subire non detrectavit *Eckius* de victoria jam securus. Campum itaque disputationis mutuo consensu *Lipsiam* Urbem elegerunt, mercatu & Universitate insignem, annuente *Georgio* Duce Saxonie, & frustra repugnantibus Episcopo Mersburgensi loci ordinario, & Theologis Lipsiensibus, qui Disputationem ejusmodi prohiberi maluissent, & omitti, quam haberi. Magnis igitur animis concurrunt strenuissimi Concertatores, prius tamen solemniter professi, se ne vel larum, quidem unguem ab Ecclesia Catholica discessuros, nec Eruditorum judicio præituros, nec Universitatum auctoritati præjudicatu- At, inter disputandum *Carlostadius*, cujus antea in oculis tanta erat gravitas, tanta frontis contractio, ut illo supercilio alter quasi *Rhadamantus* videretur, expertus est, curtam nimis esse doctrinæ suæ suppellectilem, seque imparem esse viribus adversarii sui *Joannis Eckii*, qui erat vir ingenio, & alacritate vivi-

vividus, summâ eruditione præditus, memoriæ tenacitate ac singulari dono felix. Quocirca, *Carlostadius*, post aliquot dies receptui canens, cessit, eique successit *Lutherus*, qui in ea Concertatione sæpius à *Joanne Eckio* ad incitas redactus, volens nolens, coactus est multa de Indulgentiis, de Pœnitentia & Absolutione Sacerdotis fateri, quæ antea infrunito ore negaverat. Fatigato tandem *Luthero*, iterum *Carlostadius*, ne omnino obmutuisse videretur, in arenam descendit disputaturus cum *Joanne Eckio* invicto adversario, & tandem die xv. mensis Julii ejusdem an. MDXIX. omne certamen finitum est, Causaque permissa iudicibus, qui victoriam *Joanni Eckio*, fortissimo Fidei Catholicæ Athletæ adjudicarunt. A *Lutheri* verò & *Carlostadii* partibus steterunt dumtaxat Poëtæ, Grammatici, Rhetores, alique, qui Theologos Scholasticos & Monachos, tanquam politiorum litterarum osiores, acriter insectabantur. Eâ *Joannis Eckii* victoriâ excitatæ anno sequenti, seu MDXX. Academiæ Lovaniensis & Colonienfis, plurimos Hæresiarchæ *Martini Lutheri* libros flammis dignos pronuntiarunt. Quod quidem animum *Lutheri* adeò exulceravit, ut protinus edito famoso libello in eas petulanti stylo exarserit, totumque suæ acerbitalis virus effuderit, in hæc verba prorumpens: *Cum semel malus semper præsumatur malus juxta juris Regulam, nusquam, nunquam, in nulla re credendum erit Magistris nostris quibuslibet; quorum judicium constat jam à multis annis fuisse non modo inconstans ac præcept, sed & erroneum, hæreticum, temerarium & cæcum, cui nemo fidere debeat tunc, nisi quem Deus iratus operationibus erroris man-*

det illudi. Sic effrontem illum Hæresiarcham clarissimis Academiis insultare, & in eas gravissimis contumeliis ac conviciis invehi non puduit. Substitit aliquandiū omnium Princeps Academia Parisiensis, nec statim super Propositionibus *Martini Lutheri* quidquam statuit. Hinc *Desiderius Erasmus* in Epistola ad *Laurentium Campegium* Cardinalem sic scribebat: *Expectatur Sententia Parisiensis Academia, quæ semper in re Theologica Principem tenuit locum*. Ad Academiam Parisiensem *Fridericus*, Saxonum Dux, *Lutheri* fautor, scripsit, eamque consuluit, quid de *Lutheri* doctrina sentiendum putaret. Nihil tamen hoc anno MDXX. contra *Lutherum* publicavit Academia Parisiensis, quod illius libros accurato examine ponderare, suamque Censuram maturare vellet. At *Leo X.* Pontifex Maximus Diploma eodem anno MDXX. Romæ promulgavit, quo XI. *Lutheri* Propositiones damnavit, ipsumque diris devovit. Tunc irâ ex-candescens *Lutherus*, & Pontificiæ authoritati bellum aperto Marte indicens, Jus Pontificium palam *Witembergæ* combussit, Summum Pontificem sacrilego ore vocavit temerarium, vrsanum, tyrannum, & ab eo ad Concilium provocavit. Laicos Principes Epistolis hortatus est ad excutiendum Papale, ut aiebat, jugum, ediditque execrabilem librum, cui *Captivitatis Babylonice* titulum fecit, in quo furiis invehit Summum Pontificem, & Catholicam, Romanam Ecclesiam, instar rabi-di canis, mordet, dilacerat, multisque injuriis & calumniis infectatur. Hinc magnum per Germaniam excitatum est incendium, ad quod reslinguendum habita sunt eodem an. MDXX. *Wormatiæ* Impe-

Imperii Comitia, & ad ea *Lutherus*, datâ Cæsaris fide, accitus est, ubi coràm Imperatore *Carolo V.* de multis interrogatus à *Joanne Eckio*, tandèm, perfriçtâ fronte respondit, se neque Conciliorum Decretis posse suæ Causæ decisionem submittere, quia sæpè falluntur, sed soli Scripturæ Sacræ stare velle. Ad hanc *Lutheri* responsionem horrore perculsus est Imperator, & actutùm ad hunc Hæresiarcham in ordinem redigendum promulgavit Edictum, quo *Lutherum* tanquàm Hæreticum proscripsit, ejus libros flammis absumi jussit, & gravissimas pœnas denunciavit his, qui cum aut hospitio excipere, defendere, sustentare, fovere dicto aut scripto præsumerent. Suum etiam anno sequenti, seu MDXXI. contra Assertiones ex variis *Lutheri* libris excerptas Doctrinale judicium dedit celeberrima Parisiensis Academia, quo *Lutheri* doctrinam erroribus contra fidem & mores scatentem damnavit, ipsumque *Lutherum* ad suos ejurandos errores modis omnibus compellendum esse censuit.

D. Sic igitur *Lutherus* à Summo Pontifice; ab Academiis Parisiensi, Lovaniensi & Colonienfi damnatus, ab Imperatore *Carolo V.* in Conventu Wormatiensi proscriptus, in ordinem tandem reductus est, eique omninò adempta facultas suos latius spargendi errores?

M. De *Luthero* certè actum prorsus ac conclamatum fuisset, nisi ejus fautor *Fridericus*, Saxonum Dux, illum in Arce Alstadiana abscondisset, ubi scelestus ille Hæresiarcha multos infestos scripsit libros, quibus summâ pervicaciâ pestiferam suam doctrinam defendit ac disseminavit.

In Judicium Doctrinale sacræ Facultatis Parisiensis, cui se adhæsurum promiserat *Lutherus*, confestim insurrexit, & per *Philippum Malanchtonem*, sibi addictissimum, Apologiam concinnavit, cui hunc præfixit titulum: *Adversus furiosum Parisiensium Theologorum Decretum*, & in ea Theologos Parisienses vocat Sophistas & calumniatores, aitque, Lutetiæ natam esse prophanam illam Scholasticen, quâ admittâ nihil reliquum sit, Evangelium obscuratum, Fides extincta; recepta operû doctrina: *Academia Parisiensis*, inquit impius ille Hæresiarcha, in parte suprema, quæ Facultas Theologiæ nuncupatur, est à vertice usque ad plantam, lepra veræ, novissima, Antichristianæque & Capitalis hæreseos, Mater omnium errorum in Christianitate, maxima meretrix spiritualis, quam Sol unquam vidit, & vera postica Inferni. Prophetatum est, temporibus Antichristi omnes hæreses in unam Camerinam confluxuras, mundumque perdituras. Id ego ostendere intendo de Parisiis, Papæ veri Antichristi maximo fornicationis cubiculo, atque probare eos esse pejores Montanis, Ebionitis, & omnibus, quos commemoraverunt, hæreticis. His conviciis Hæresiarcha *Lutherus*, ejusque sectarii celeberrimam Academiam Parisiensem, proscindebant, à quibus tamen vituperari magna ejus gloria fuit.

D. Nunquid *Carolus V.* Imperator Diploma Summi Pontificis *Leonis X.* suumque Imperiale Edictum, quo in Comitibus Wormatiensibus *Lutherum* proscriperat, executioni mandari jussit, illosque omnes suâ autoritate compressit tumultus, quos in Germania *Lutherus* excitabat?

M. Cùm

M. Cùm nonnullos Germaniæ Principes *Lutherus* suis jam partibus addidisset, *Carolus V.* Imperator in executione cùm Pontificii Diplomatis *Leonis X.* tùm Imperialis sui Ediçti contra *Lutherum* gravissimas difficultates naçtus est, quas ullo pacto superare haud potuit. Mortuo siquidem *Leone X.* Pontifice Maximo, ad Conventum Imperialem Norimbergæ, qui absente Imperatore anno MDXIII. habitus est, *Hadrianus VI.* successor *Leonis X.* Nuntium destinavit *Franciscum Cheregatum*, Episcopum Aprutinum, eique duo potissimum negotia injunxit, nimirùm Hungariæ à Turcarum incursibus defensionem, & Germaniæ à Lutheranâ Lue liberationem. Huic Legato Pontificis responderunt Germaniæ Principes in hoc Conventu Norimbergenfi congregati, necessarium esse ut intra annum à Summo Pontifice de consensu Cæsaris in aliqua Urbe Germaniæ convocaretur Concilium, & interim se daturos operam, ut Saxonix Dux, in cujus ditionem *Lutherus*, aliique ejus Affecçæ sese receperant, eis prohiberet, ne quidquam de excitatis Controversiis scriberent, aut publicâ luce donarent. Verùm, multos ex his Germaniæ Principibus, qui huic Conventui Norimbergenfi interfuerunt, Lutheranæ hæreseos labe fuisse afflatos, proclive est conjicere ex lectione libelli, qui, post discessum Nuncii, ad *Hadrianum VI.* Pontificem Maximum missus est, quique est editus apud *Goldastii* Tom.I. *Constitutionum Imperialium* sub hoc titulo: *Centum Gravamina Sedis Apostolicæ, non ferenda Germanis.* Unus præsertim inter illos hujus Conventus Norimbergenfis Principes, videlicet *Fridericus Saxonum* Dux

Dux, omnes Nuncii Apostolici conatus elusit, quem proinde, ut *Luthero* favere desineret, movit *Hadrianus VI.* gravissimis litteris, quæ extant apud *Odoricum Raynaldum* ad annum MDXXIII. & Tomo II. Bullarii Romani. Alter Germaniæ Principum Conventus Norimbergæ anno MDXXIV. habitus est, ad quem *Clemens VII.* qui in locum *Hadriani VI.* Pontificis Maximi successus est, Legatum Apostolicum misit *Laurentium Campegium* Cardinalem, qui veris Catholicæ Religionis incrementis intentus, cum animadverteret, Principes Germaniæ, in varias partes distractos, nolle in hocce Conventu opportuna ad deprimendam Lutheranam audaciam adhibere remedia, Principes cum Ecclesiasticos, tum Laicos secum consentientes Ratisponæ collegit, à quibus in rem Ecclesiæ Catholicæ jussum est, ut Wormatiense Imperatoris *Caroli V.* Edictum executioni mandaretur, in Missæ celebratione nihil mutaretur, Monachi Apostatæ punirentur, & ut Legati Apostolici Constitutio de Cleri Germanici Reformatione triginta, quinque capitibus comprehensa sedulò observaretur. Pro conservandâ etiam apud Helvetios Catholica Religione habitus est anno MDXXV. in Oppido *Baden* percelebris Conventus, in quo Catholicos inter & Lutheranos instituta fuit Disputatio. Quod quidem ut clariùs intelligas, observare debes, *Uldricum Zuinglium*, cujus in superiori Colloquio mentionem fecimus, Pagum Tigurinum, qui unus est ex tredecim Pagis, seu, ut ajunt, Helvetiæ Cantonibus, pestiferâ Hæresi corrupisse, Sacras Imagines evertisse, Missam & Eucharistiæ adorationem abrogasse, novumque Sacramentariæ

Cœnæ

Cœnæ , annuente Senatu Populoque Tigurino , ritum instituisse . Ea sacrilega novitas ubi aliis duodecim Pagis , seu Cantonibus , innotuisset , statim , ne in tota Helvetia periclitaretur Catholica Religio , Conventum indixerunt in Oppido *Baden* Helvetiorum , ut de præcipuis Religionis Controversiis Catholicos inter & Lutheranos haberetur Disputatio . Qui pro Lutheranorū doctrina disputare debebant , erant *Uldricus Zuinglius* , & *Joannes Oecolampadius* . Catholicorum verò partes defensori erant *Joannes Faber* , Constantiensis Episcopi Vicarius Generalis , & *Joannes Eckius* , qui , ut antea diximus , Lipsiæ cum Hæresiarcha *Luthero* publicè disputavit ; & *Thomas Murrenus* , vel *Murnerus* . Hæc Disputatio , communi duodecim Helvetiæ Pagorum , seu Cantonum , calculo instituta , & quatuor Episcoporum consensu fuit approbata . At *Uldricus Zuinglius* , rejecta omni fide publica , & Salvoconductu , qui ei offerebatur , nunquam accedere voluit , ei tamen ex parte Lutheranorum adfuerunt *Oecolampadius* , *Imel* , *Berchtoldus* , *Hallerus* , & *Ultricus Studerius* , cum quibus strenuè disputavit ex parte Catholicorum *Joannes Eckius* , ac Victor semper evasit . Quò factum est , ut publico Helvetiorum Decreto & Edicto sequentes istæ Catholicæ fidei propositiones in hoc Conventu *Baden* fuerint confirmatæ . I. *Verum Christi Corpus ejusque Sanguis præsentia sunt in Sacramento Altaris* . II. *Quæ & verè offeruntur in Officio Missæ pro Vivis & Defunctis* . III. *Virgo Maria , alique Sancti Calicolæ invocandi sunt ut intercessores* . IV. *Domini Nostri Jesu Christi , ejusque Sanctorum Imagines delendæ non sunt* . V. *Post hanc Vitam Purgatorius est*

est ignis . VI. Pueri etiam Christianorum in peccato Originali nascuntur . VII. Baptismus Christi , non Joannis , tollit Originale peccatum . His ergò facta est conformis publici Decreti Sententia , quâ , ut ait Joannes Cochleus , doctrina Lutheri , velut per-versa , multisque judiciis solemniter condemna-ta per Leonem Decimum Pontificem Maximum , per præclaras Universitates Parisiensem , Lova-niensem , Coloniensem &c. Helvetiæ plebi duode-cim Pagorum , seu Cantonum interdicta est , & an-tiqua Catholicæ fidei observatio approbata , veti-tumque , ne quid immutaretur temerè in Missa , in Sacramentorum administratione , in Sacris Cœ-remoniarum Ritibus , Jejuniis , Orationum , Confessionum , Feriarum , Oblationum , Invocatio-num , Exequiarumque pro Defunctis . His semel statutis , duodecim illi Helvetiæ Catholici Pagi , seu Cantones , Oratores miserunt ad Tigurinos , ut dolorem suum de abjectâ ab eis fide Catholica , Hæresique susceptâ illis significarent . Sed tam-justæ Catholicorum expostulationis nullam pror-sus rationem habuerunt Tigurini , & ad omnia co-rum Monita aures obturarunt , & Hæreseos tenebris excæcati oculos clauferunt . Quin , quod magis deplorandum est , duo alii Helvetiæ Pagi , seu Can-tones , Bernenses videlicet & Constantienses , an-no MDXXVIII. à Catholica Religione ad Zuinglii Sectam defecerunt , quos postea secuti sunt Basi-leenses , Schaffhusiani , Santgallenses , Mulhusani , & Bielenenses , adeò ut ex tredecim Helvetiæ Pagis , seu Cantonibus , quinque dumtaxat Pagi , seu Can-tones , in Fide Catholica constantèr perseverave-rint , qui tamen numero licet & armis inferiores ,
divi-

divinâ eis opitulante protectione , septem alios Pagos , seu Cantones Helvetiæ , quos Hæretici occupabant , confertis præliis sæpius vicerunt ac debellarunt . Horum quinque Helvetiæ Cantonum in Fide constantiæ , in præliis fortitudinis , in exponendo se suaque omnia pro avita Religione Catholicâ asserendâ magnanimitatis memoriam , laudem & gloriam nullo ævo intermorituram , leges apud *Odoricum Raynaldum* , & *Henricum Spondanum* ad annum MDXXXI. Testatur etiam Cardinalis *Palavinus* lib. 3. Historiæ Concilii Tridentini cap. 8. num. 2. horum quinque Helvetiæ Cantonum , quæ Fidei Catholicæ indivulsè adhæserunt , bellicæ virtutitribuendum esse , quod nunc septem sint Helvetiæ Pagi , seu Cantones , qui Catholicam Religionem publicè profitentur , & in uno ex sex aliis Pagis seu Cantonibus , qui dominio hæreticorum subjiuntur , longè plures numero sint Catholici , quàm hæretici . Hic autem obiter observare debes , *Zuinglium* , cujus Secta in sex Helvetiæ Cantonibus etiamnum dominatur , gravissimam cum *Luthero* dissensionem habuisse occasione doctrinæ de reali Præsentia Corporis & Sanguinis Christi in Eucharistiæ Sacramento , quam *Lutherus* admittebat , *Zuinglius* verò negabat . Tentavit quidem *Philippus Hassiæ* Lantgravius concordiam Lutheranos inter & Zuinglianos procurare , & eam ob rem Conventum Marpurgensem anno MDXXXIX. convocavit , ad quem convenère *Zuinglius* , *Oecolampadius* , *Eucerus* , & *Hedio* ex una parte , ex altera verò *Lutherus* , *Melanchton* , *Justus Jonas* , *Osiander* , *Brentius* , & *Agricola* , qui tamen de Cœna Domini nunquam consentire potuerunt , ut constat ex illius

Mar-

Marpurgensis Conventus Actis, quæ prolixè refert & exponit *Hospinianus* Part. II. *Historiæ Sacramentariæ* pag. 119. & sequentibus.

D. Quem tandem exitum habuerunt illi Conventus, quos *Carolus V.* Imperator, ac Germaniæ Principes in Causa Lutherana ante celebrationem Concilii Tridentini convocarunt?

M. Infaustum sanè exitum habuerunt illi Conventus, in quibus tandem Lutherani suæ Sectæ in Germania publicè profitendæ libertatem obtinuerunt. In Conventu siquidem Germaniæ Principum, jussu *Caroli V.* Imperatoris anno MDXXIX. Spiræ cōactō, cui adfuit nomine Pontificio *Joannes Thomas* Comes Mirandulanus, noluerunt Principes Lutherani, scilicet *Joannes* Saxonix Semptemvir, *Georgius* Brandeburgensis Elector, *Ernestus* & *Franciscus* Luneburgi Duces, *Philippus* Hassiæ Lantgravius, & *Wolfgangus*, Princeps Anhaltinus, parère Decreto, quo à Catholicis Principibus hujusce Conventus Spirensis sancitum erat, ut Hereticorum Sacramentarium & Anabaptistarum Sectæ undique pellerentur, ut Missæ celebratio ubique libera esset, in iis etiam regionibus, ubi Lutherana labes grassabatur, & ut Evangelium exponeretur ex Patrum, quos Ecclesia approbaverat, interpretatione. Huic, inquam, Catholicorum Principum Decreto palàm contestati sunt citati Principes Lutherani, sibi integrum non esse obtemperare, dicuntantes; illud esse Evangelicæ veritati contrarium, indèque, ut asserunt viri eruditi, Lutheranis inditum est *Protestantium* nomen. Eò laïcorum suæ Sectæ Principum auxilio fulti Lutherani, audaciores facti, suam Fidei professionem à *Philippo*
Me-

Melanchtone adornatam obtulerunt *Carolo V.* Imperatori in Comitibus Augustanis habitis anno MDXXX. Huic Fidei professioni, quæ *Confessio Augustana* fuit nuncupata, subscripserunt mox memorati Principes Germaniæ Lutherani, ac paulò post, seu anno MDXXXI. ad suæ Sectæ libertatem, armis tuendam *Smalkadæ* fædus inierunt, quod *Smalkadicum* à loco fuit appellatum. Eò Lutheranorum Germaniæ Principum fædere, & formidoloso armorum *Solimani* Turcarum Imperatoris adversus Germaniam apparatu territus *Carolus V.* Imperator, Comitibus indixit anno MDXXXII. Ratisponæ, in quibus, ne irritaret crabrones, concessit Lutheranis inducias, constituitque, ut nemini usque ad Concilium Generale in Causa Religionis faceretur negotium. Quin, idem Imperator, ut jam in primo Colloquio observavimus, excessit in Causa Lutheranâ suæ auctoritatis limites. Nam, postquam Concilium Generale Tridentinum, indictum à *Paulo III.* Pontifice Maximo, jam esset inchoatum anno MDXLV. sed biennio post, ob contagiosum morbum, qui Tridenti grassabatur, Bononiam (reclamantibus Hispaniæ Episcopis, & Cæsareis Oratoribus) esset translatum, adeoque occasione illius dissidii maneret suspensum, *Carolus V.* durante adhuc eâ Concilii Tridentini suspensione, inconsulto Romano Pontifice, promulgavit in Comitibus Augustanis anno MDXLVII. Libellum, *Interim* nuncupatum, solâ imperiali auctoritate proculsum, in quo formulam doctrinæ & cæremoniarum in Germania tenendarum interim præscribebat, donec de universis Religionis Controversiis in Concilio Oecumenico decretum esset.

esset . At hic intempestivè à *Carolo V.* Imperatore editus Libellus , *Interim* appellatus , statim ab Ecclesia Catholica fuit reprobatus , novasque inter Lutheranos Germaniæ turbas , ac Sectas excitavit , sicut jam observavimus in præcedentibus Colloquiis . En , proh dolor ! infelicem exitum , quem habuerunt tot Conventus , seu Comitia Imperii , quæ in Germania ante Concilium Tridentinum , celebrata sunt , de quibus verè dici potest : *Parturiunt montes , nascetur ridiculus mus .*

D. Percense nunc Acta, Colloquia, Statuta & Concilia Nationalia , quæ Sæculo XVI. in Causa Calviniana in Galliarum Regno fuerunt convocata .

M. Laudabo in primis celeberrimæ Academiæ Parisiensis in tuenda Catholica Religione indefessum studium , insignemque illam , quam non modò Galliarum Regno , sed toti Ecclesiæ in Calvinianæ Hæreseos extirpatione præstitit operam , sine qua profectò grave impendisset periculum , ne idem malum Galliarum Regno accideret , quod Sæculo XVI. contigisse dolemus Regnis Germanico , Bohemico , & Anglicano , ubi Universitates Witembergensis , Pragensis , & Oxoniensis cum fuerint in confutandis Hæreticis remissiores , Hæresis tandem invaluit , & avitam fidem exulare cœgit . Vix in Galliis emerferat Calviniana Hæresis , cum Facultas Parisiensis viginti quinque Articulos ei è diametro oppositos , quasi Formulam Catholicæ doctrinæ , die x. mensis Martii anni MDCXLII. publicavit , omnesque sui Ordinis Doctores & Baccalaureos ad subscribendum iis obstrinxit , iussitque rex Christianissimus *Franciscus I.* ut omnes
 Paro-

Parochi Sacra illa Catholicæ doctrinæ Axiomata, Fidelibus exponerent. Editi sunt isti viginti quinque Sacræ Facultatis Parisiensis Articuli apud *Fontanonem* Tomo IV. Collectionis Regiarum Constitutionum, eosque ad præmuniendos Fideles contra Calvinianam Hæresim Concilium Narbonense celebratum anno MDLI. promulgari præcepit his verbis: *In lucem edita sunt à Dominis Doctoribus Facultatis Sorbonæ Parisiensis Christianæ Legis Axiomata die X. Martii anni salutis nostræ MDXLII. facta: quibus quæcumque hætenus dicta sunt, consentanea intelligi, speciatim exprimi, & promulgari volumus. Quæ quidem tanquam vera, Orthodoxa, & Christianæ Religioni consona recipimus, eaque prædicari, & palam exponi in Sacrificio Missæ faciendo, & Concionibus habendis exactè jubemus. Quod qui factum noluerit, veluti refractarium, ex Christianorum communitate exterminandum judicamus. Quantum suæ Sectæ in Galliis propagandæ officerent viginti quinque illi Articuli à Sacra Facultate Parisiensi super Capitibus Fidei nostræ controversis editi, probè intellexit Hæresiarcha Calvinus, qui subindè gravitèr stomachatus, Antidotum, contra prædictos illos Articulos scripsit petulantissimum, insipidis salibus, scurrilibus jocis, & injuriis à capite ad calcem scatens, in quo Parisienses Theologos, acerrimos illos ac fortissimos Fidei Catholicæ defensores, & errorum, quos disseminabat, insectatores, *Gregem porcorum* appellat virulentissimus ille Hæresiarcha. Cùm igitur Sacra Parisiensis Facultas impiæ Calvinæ doctrinæ sese tanquam murum æneum opposeret, non potuit nefanda illius Hæresiarchæ Secta sub Regibus Christianissimis*

mis *Francisco I. Henrico II. & Francisco II.* altas in Galliis agere radices. At, mortuo Rege *Francisco II.* die v. mensis Decembris anni MDLX. & in ejus locum succedente ejus fratre *Carolo IX.* qui annos dumtaxat decem natus, administrationi Regni impar erat, Princeps *Condéus*, Hæreticorum Calvinistarum in Galliis Dux, è carcere, in quem sub Rege *Francisco II.* conjectus fuerat, liberatus est, ejusque frater *Henricus* Rex Navarrus, Calvinianæ Hærescos labe infectus, cum *Catharina Medicæ*, Regis *Caroli IX.* matre, suis, quàm Ecclesiæ commodis magis addictâ, & in Calvinistas propendente, totum Galliarum Imperium divisit. Hinc Catholica Fides in Galliis vacillare ac periclitari cæpit, admissis ad concionandum Calvinianis Ministris, & irrepentibus in Aulam Viris Nobilibus, qui Calvinianæ Sectæ favebant. Ingruente itaque periculo, ne juvenis adhuc rex *Carolus IX.* eorum rationibus persuasus, sineret aliquid in damnum Fidei decerni, Rector Universitatis Parisiensis, vehementer dolens, Ecclesiasticam pacem in Galliis perturbari, avitam Religionem labefactari, ac violari Catholicam Fidem, his malis obviam eundum ratus, habito consilio, Regem adiit, Libellum supplicem ei porrecturus. Sed Aulicorum sibilis explosus, vixque ad Regis Colloquium admissus, tandem ad selectorum quorundam Cætum, qui negotia Regni tractabant, remissus est. Interea, *Catharina Medicæ* Regina mater, futuri eventus spe pendula fluitans, ut sibi, suoque filio *Carolo IX.* Imperium firmaret, utrique parti æquam se præstabat, tempus magis opportunum expectans. Ferventibus tamen hinc inde Disputationibus, concessit

cessit Regina Colloquium Catholicos inter & Novatores apud *San-Germanum*, Regiam Villam propè Parisios, quod tamen parùm utile fuit, cùm in eo Novatorum pertinacia vinci haud potuerit. Eo *San-Germano* Colloquio aliud, nihilò Ecclesiæ utilius, Hæretici à *Catharina* Reginâ matre, quæ eis ob politicas rationes & privata commoda nimium favebat, obtinuerunt Colloquium anno MDLXI. habendum *Poissiaci*, quod est Oppidum ad Sequanam flumen, Lutetiâ distans septem circiter milliaribus Gallicis, ubi insigne ac Regium est Monasteriû Virginum Ordinis *S. Dominici*. Tentavit quidem Sacra Facultas Parisiënsis impedire, ne hoc Colloquium Ministris Hæreticis errores suos defensoris concederetur, utque ad synodum Tridentinam Oecumenicam remitterentur. Verùm, in ea tam justa postulatione repulsam passa est celeberrima Facultas, & preces Ministrorum Calvinistarum à Regina matre *Catharina* admittæ sunt. Quapropter, die nonâ mensis. Septembris ejusdem anni MDLXI. in prædicto Monasterio Virginum Ordinis *S. Dominici* huic Colloquio *Poissiacensi* initium datum est, eique interfuerunt cum Adolescente Rege *Carolo IX.* & Reginâ *Catharina* ejus matre, Rege *Navarræ*, aliisque Principibus regii sanguinis, lex *S. R. E.* Cardinales, *Borbonius*, *Turnonius*, *Castillioneus*, *Lotharingius*, *Armeniacus*, & *Guissus*, ac quadraginta circiter Episcopi, cum delectis Theologis Parisiënsibus *Claudio Espenceo*, *Claudio Sanctesio* Canonico Regulari, & aliis. Ex parte verò hæreticorum adfuerunt tredecim ejusdem abominationis homines Zuingliani & Calviniani Sacramentarii, quos inter eminebant *Theodorus Beza*, præcipuus *Calvini* discipulus, *Au-*

gustinus Marloratus, Joannes Malo, Petrus Martyr, & Joannes Spina, omnes ferè Regularium Ordinum Apostata. Sed omnium impudentissimum sese prodidit *Theodorus Beza*, quippè qui Communiſtrorum nomine perorans, & de Eucharistia verba faciens, in hanc execrandam prorupit blasphemiam: *Tantum à Sacramento Eucharistiæ distare Corpus Christi, quantum supremum cælum à terra. Ad quam Beza blasphemiam Præſulum Corona, omnesque Catholici inhorruerunt, & non secus ac Patres Concilii Nicæni ad Hæresiarchæ Arii contra consubstantialitatem Verbi Divini blasphemias, aures suas obturarunt. Cùm dicendi finem Beza fecisset, Cardinalis Turnonius ad Regem conversus, eum vehementer adhortatus est, ut, spretis Beza Declamationibus, in avita Religione, quam Galliæ Reges à Clodoveo professi fuerant, & in qua erat ipse institutus, constanter permaneret, addiditque, Catholicos Antistites hanc Beza Pseudo-Ministri Orationem tam luculenter confuturos, ut sole clarius Calvinianæ Religionis omnibus pateſceret falsitas, & Catholicæ Fidei confirmaretur veritas. Id reapse ita contigit. Die siquidem xvi. Septembris Cardinalis Lotharingius, totius Ecclesiastici Ordinis nomine Orationem habuit de Ecclesiæ Auctoritate, & de præsentia reali Corporis, & Sanguinis Christi in augustissimo Eucharistiæ Sacramento, in qua multa tam copiose, tam eruditè, tam præclare dixit, ut illos omnes, qui Sectæ Calvinianæ studio non erant obcæcati, in admirationem rapuerit, suumque adversarium *Bezam*, tum Causæ, quam defendebat, meritis, tum ingenii vi, eruditionis ubertate, argumentorum*

pon-

pondere, & eloquentiæ efficaciam, longo intervallo superavit. Noluit attamen obstinatissimus *Theodorus Beza* confessas veritati præbere manus, & *Victori* porrigere herbam, sed, consentiente Regina matre *Catharina*, diebus xxiv. & xxvi. ejusdem mensis Septembris, de natura, auctoritate & Notis Ecclesiæ & de aliis Capitibus disputationem instituit, in qua *Claudius Espenceus*, & *Claudius Sanctesius*, Sacræ Facultatis Parisiensis Theologi, quidquid ille hæreticus contra Catholica Dogmata temerè effutierat, eruditissimè confutarunt. Tunc *Jacobus Laines*, Societatis Jesu Præpositus Generalis, vir non minus doctrinâ, quàm pietate conspicuus, & Cardinalis Ferrariensis Legati Apostolici, qui præsens aderat, Theologus, hanc Hæreticorum audaciam ac pervicaciam diutius ferre non valens, italico Idiomate peroravit, & incredibili libertate Regine ostendit, perniciosa esse, ista Hæreticorum cum Catholicis Colloquia, ad Concilium Tridentinum Oecumenicum hosce Ministros hæreticos esse remittendos, ad quos erudiendos & ad veritatis Confessionem, Ecclesiæque unitatem revocandos, si Collationibus, Colloquiis & Disputationibus Catholicorum opus esset, his tamen actionibus nec Reginam, nec Principes Laicos, sed solos Præsules & Doctores interesse debere. Hunc in modum finito eo Colloquio Poissiac, Ministri hæretici, jubente Regina, suam condiderunt Formulam Fidei circa Eucharistiæ Sacramentum, quæ est vestigio Theologorum Parisiensium judicio permixta, ab illis post accuratum examen repudiata est, tanquàm insufficientis, captiosa, hæretica, erroresque plurimos contra Sanctissimi Sacramenti

Altaris institutionem continens. Hanc Parisiensem Theologorum Censuram omnes ad unum Præsules Ecclesiæ Gallicanæ approbarunt, & die ix. mensis Octobris ejusdem anni MDLXI. ad Reginam scripserunt, se unanimi consensu decrevisse, *Theodorum Beza*, ejusque Socios in suis erroribus & damnatis opinionibus pertinaciter perseverantes, non esse ampliùs audiendo, nisi antehac subscriberent huic Catholicæ Fidei de Sacramento Altaris Formulæ his verbis conceptæ: *Credimus & confitemur in Sacramento Altaris verum Corpus & Sanguinem Jesu Christi existere realiter & transsubstantialiter sub speciebus panis & vini, vi & potentia Divini Verbi prolati à Sacerdote, solo Ministro ad hunc effectum ordinato, secundùm institutionem & mandatum Domini nostri Jesu Christi.* Huic Catholicæ Fidei Formulæ subscribere detrectarunt Ministri Calviniani, qui, ut mox dixi, omnes fermè perditissimi erant Regularium Ordinum Apostatæ, quos tamen malitiâ & nefandis turpitudinibus longè superabat *Theodorus Beza*, vir nequissimus, qui ob præposteram libidinem, seu Sodomiam, de qua apud Senatum Parisiensem accusatus, sibi que timens, è Gallia, unâ cum sua concubina aufugit Genevam, omnium scelerum sentinam, & sceleratorum perfugium, ubi Hæresiarcham Joannem Calvinum habuit Magistrum, dignum sanè patellâ operculum, & pessimi corvi malum ovum. Si plura de *Theodori Beza* vitæ turpitudine, lascivis versibus, erroribus, seditiosis consiliis, stragibus in Catholicos editis, bellicis agitationibus, aliisque ad eum spectantibus, scire desideres, legelis Scriptores probatissimæ fidei *Claudius Sanctesimus* in Respon-

sponsione ad Apologiam *Bezae*, *Balduinum* in alia
 Responsione ad ejus calumnias, *Bolsenum* in ejus vi-
 ta, *Flortmundum Ræmundum* in Ortu Hæresum, &
 alios, quos *Rescius* receuset in *Evangelicorum Se-*
ctarum Centuriis.

D. Sic igitur absque ullo fructu solutum
 est istud Poissiacense Colloquium?

M. Catholicam veritatem de Calviniana
 Hæresi in Colloquio Poissiacensi triumphante faci-
 le colligitur, ex dolis, malisque artibus, quas
 ad dissimulandam fidem suam adhibuerunt Mini-
 stri Calviniani. Observat quippè *Lucas Osiander*
 (hæreticus licet lutheranus) in sua *Historia Eccle-*
siastica Epitome, Calvinistas, cum antè aliquot
 annos pax publica data esset Lutheranis, qui in
 Germania Confessionem Augustanam profiteban-
 tur, dictitasse, eam pacem ad se etiam pertinere,
 quod & ipsi Confessionem Augustanam itidem
 amplecterentur; at cum in Colloquio Poissiacensi
 Ministri Calviniani à Cardinali Lotharingio, aliis-
 que Prælatis & Doctoribus urgerentur, ut Con-
 fessionem Augustanæ subscriberent, illos assentiri
 noluisse, eò quod in ea Confessione Augustana
 admitteretur Dogma de reali præsentia Corpo-
 ris & Sanguinis Christi in Eucharistia, quod ipsi
 inficiabantur. Sic omnibus palàm innotuit, Se-
 ctæ Calvinianæ Pseudo-Ministros calidum & fri-
 gidum simul ex eodem ore perflare, & circa Eu-
 charistiæ Sacramentum aliam in Germania, aliam
 in Gallia profiteri fidem.

D. Nunquid Ministri Calviniani susceptæ
 in hoc Colloquio Poissiacensi ignominie pudore
 suffusi, hæc tandem abjurarunt, suosque se-

etarios ad Catholicæ Religionis veritatem revocarunt?

M. Solent Hæresiarchæ, ut sæpiùs te monui, nova suæ doctrinæ figmenta perditè amare, pugnaciùsque defendere, se suaque mirari, & impensè jactare: quæcumque senserint aut cogitarint, tenacissimè credere, credique ab omnibus tanquam ex oraculo dicta velle; secùs quique sentiant, iis nihil esse vilius, imperitius, prophanius affirmare. Quò fit, ut, cum omnes acre ingenium habeant, quod adusta quædam bilis inflamat, acuit superbia & amor excellentiæ, labor, vehemensque studium obfirmat, nunquam velint, licèt convicti, ab errore resilire & ad meliorem frugem sese recipere. Tales fuerunt Ministri Calviniani, qui, licèt in Colloquio Poissiacensi victi fuissent ac confusi, tantùm tamen abest, ut palinodiam decantare voluerint, ut potius sibi intùs canentes, victoriam sibi vindicaverint, ut constat ex thraſonicis illis Epistolis, quas *Theodorus Beza* ad Hæresiarcham *Joannem Calvinum* scripsit. Sed hanc inanem jactantiam *Theodori Beza*, hominis, præter ingentem audaciam, insigniter impudentis ac temerarii, repressit in suis de Colloquio Poissiacensi Commentariis *Claudius Spenceus*, Theologus Parisiensis, qui præsens aderat, & Catholicorum Victoriæ testis oculatus fuit. Huic Catholicorum victoriæ aliam hic adjungere placet, quam doctissimus *Jacobus Dany Perronius* Ebroicensis Episcopus, & paulò post Cardinalis, de *Philippo Mornao Plessio*, Nobili Normanno, Salmuri Præfecto, præcipui inter Calvinistas nominis, & Ecclesiæ Romanæ infensissimq

ssumo hoste , retulit in altero Colloquio seu Col-
 latione , quæ coram Christianissimo Rege *Henri-*
co IV. & selectis ex utraque parte iudicibus habita
 est ad Fontembellaqueum propè Parisios . Huic
 Collationi , seu Disputationi locum dedit liber,
 quem Gallico idiomate edidit *Morneus Plessius* De
 Missæ abusibus , eleganti quidem stylo , & polituli
 sermonis comptus elegantiss, sed innumeris Patrū
 testimoniis aut falsis , aut interpolatis , aut in si-
 nistrum sensum detortis scatens, in quibus citan-
 dis *Morneus Plessius* deceptus fuerat à suis Mini-
 stris, qui ejus calamo abutentes suggererant ei
 loca Patrum falsata , corrupta , truncata , & con-
 trario penitus sensu relata , quæ ipse , absque ulla
 alia discussione , suo operi intexuerat . Hunc li-
 brum malè confarcinatum cū *Jacobus Perronius*
 perlegisset , ut erat in Sanctorum Petrum lectio-
 ne , & in tractandis Controversiis solertissimus ,
 ac versatissimus , quingenta ampliùs loca ex Pa-
 tribus antiquis & Scholasticis Doctoribus eo in
 libro adulterata ac falsò citata esse se demonstra-
 turum recepit . Id iniquo animo tulit *Morneus*
Plessius , & à Rege *Henrico IV.* postulavit , ut Col-
 lationem indiceret , Judices probitatis ac doctri-
 næ perspectæ nominaret , qui citata ab ipso Pa-
 trum testimonia accurato criterio examinarent .
 Annuit Rex , Collationem apud Fontembella-
 queum indixit , integerrimos & doctissimos Judi-
 ces hinc inde selegit , suâque præsentia hanc Col-
 lationem cohonestare ac dignari voluit . Produ-
 ctis itaque in medium Sanctorum Patrum Operi-
 bus , *Jacobus Perronius* Plurima eorum testimo-
 nia perperam à *Morneo Plessio* citata , de indu-
 striâ

striâ vitiata, & corrupta oculis Judicum subjecit. Quò factum est, ut *Mornæus Plessius*, quasi repentino fulmine ictus, & vehementissimo lapsuum suorum dedecore confusus, in gravissimum morbum cùm vomitu & membrorum tremore inciderit, & ad curandam valetudinem suam Salmurum sese receperit. Sed, ne *Mornæus Plessius*, secutus exemplum *Theodori Beza*, sibi triumphum accineret, & ea, quæ in hac celebri Collatione facta fuerant, inficias ire, aut eludere posset, *Jacobus Perronius*, immortale Ecclesiæ Gallicanæ decus, ad ora hæreticorum obstruenda, luce publicâ donavit Acta celebris hujus Collationis regiâ auctoritate & approbatione munita, in quibus Calvinistæ perpetuam ignominia suæ memoriam, Catholici verò tam insignis victoriæ monumentum habebunt ære perennius. Cœterum, quòd maximè dolendum est, Calviniana Hæresis, etsi à Catholicis Doctoribus sæpius in Colloquiis, Disputationibus ac Collationibus victa ac profligata fuisset, instar tamen Hydræ suis rediviva cladibus latè per Gallias propagabatur. Conscendebant fidentèr Calviniani Ministri in Templorum pulpita, Buccinatores exitiosæ doctrinæ, ludimagistros captabant, quorum operâ teneræ puerorum mentes occuparentur; propria Gymnasia, tanquam emporia doctrinæ suæ, sibi vindicabant, Doctores Catholicos vexabant calumniis, appetebant contumeliis, modis omnibus infamare studebant, præsertim viros professione vitæ ac nomine Religiosos, quos omni apud populum auctoritate spoliabant. Uno verbo, nullus erat locus tam clausus, tamque diligenti cu-

sto,

stodiâ munitus, in quem aditum, qualicumque modo, non reperiret Calviniana Hæresis, divitum opibus & potentiis instructa; in Aulam Regis, in Palatia Principum, in Forum, in Scholas, in Muliercularum circulos, in Officinas opificum irrepererat, ac concitatis intestinis Bellis ultimum Galliarum Regno exitium propediem allatura erat, nisi Christianissimi Reges divino protecti auxilio, cum in lenioribus remediis jam per Episcopos & Theologos tentatis nulla spes esset, ad acriora descendissent, Calvinianæ Hæresi omnia pestilenti afflatu suo contaminanti, & teterrimum virus suum longè latèque spargenti bellum indixissent, atque Hæreticorum ruinâ ignem extinxissent, ne tota Gallia eodem incendio conflagraret.

D. De Comitibus & Collationibus, necnon de Disputationibus & Colloquiis, quæ tam in Germania Sæculo XVI. in Causa Lutherana, quàm in Gallia in Causa Calviniana habita sunt, satis hætenus differuimus; nunc recto Ordine ea Concilia percensere debes, quæ eodem Sæculo variis in locis, sive ad vindicandam contra Hæreticos Catholicam Fidem, sive ad restaurandam collapsam Ecclesiæ Disciplinam indicta sunt, antequàm celebraretur Oecumenicum Concilium Tridentinum, cujus fuerunt veluti præludia.

M. Incipiam à Synodo Generali Lateranensi V. cujus historiam quò magis perspectam habere possis, rem paulò altiùs repetere necesse est. Exorto inter *Julium II.* Pontificem Maximum & *Ludovicum XII.* Galliarum Regem gravissimo dissidio, cujus causam jam aperuimus in præcedenti

dentibus Colloquiis , pax Ecclesiæ perturbata est , & Bellum hinc inde exarsit acerrimum, quod occasionem dedit novem Cardinalibus , jam iratis Summo Pontifici , & auctoritate *Maximiliani* Imperatoris , & *Ludovici XII.* Regis Christianissimi , fultis , Concilium Pisane contra *Julium II.* anno MDXI. convocandi, eo videlicet prætextu, quod Summus ille Pontifex non staret promissis , nec juramento suâ in electione præstito , de Generali convocando Concilio , intra primum à sua consecratione biennium, pro reformandis Ecclesiæ moribus , & ineundâ inter Principes Christianos concordia. In eo itaque Concilio Pisano congregati pauci illi Cardinales, & omnia ex pravis tantum animi motibus agentes , celebrarunt tres Sessiones , quibus peractis , Concilium istud Pisane transulere Mediolanum , ubi , postquam Sessiones quartam & quintam absolvisset, tandem in Sessionibus sextâ, septimâ, & octavâ , quæ ultima fuit , eò audaciæ proruperunt , ut excusso penitus obedientiæ jugo , Pontificem Maximum *Julium II.* citarint, contumaciæ accusaverint, eumque ab omni Pontificatus administratione tam in spiritualibus, quàm in temporalibus suspenderint. Quibus peractis , cum Mediolani non essent tuti , Lugdunum in Galliis confugere compulsi sunt .

D. Verè istud Concilium Pisane appellari debet Schismaticorum Conciliabulum, nec dubito , quin ab universa Ecclesia repudientur , ac damnentur omnia , quæ in eo gesta ac statuta sunt .

M. Rectè dicis , ac semper Ecclesia Catholica prædictum Pisane Conciliabulum justis de causis

causis rejiciendum planè ac damnandum censuit. Primo, quia hujus Conventus Pisani tumultuaria convocatio à pauciori numero Cardinalium *Julio II.* legitimo Pontifici infensorum facta est, eo repugnante, cui tamen ex jure & officio incumbit convocare Concilium Generale, quale esse Concilium Pisanum pertendebant segreges illi Cardinales, sicut ipsis exprobrat idem Summus Pontifex in suis litteris convocationis Concilii V. Generalis Lateranensis his verbis: *revolvant Sanctorum Patrum & Romanorum vitas Pontificum, & antiquum morem indicendi & convocandi & celebrandi Concilium: Traditiones & leges super his editas à Patribus inspiciant: videbunt hujusmodi Concilia à solis Romanis Pontificibus esse indicta, & aliter indicta, rata non fuisse.* Secundò, in iisdem Concilii V. Lateranensis convocatoriis litteris disertè ostendit *Julius II.* Concilium Generale, quod in suà ad Pontificatum electione celebrandum promiserat, non suà culpà, ut perperam asseriebant segreges Cardinales, sed ob infelicitatem temporum fuisse hætenus à se dilatum: *Nulla nostra culpa, inquit, neque Sanctæ Romanæ Ecclesiæ Cardinalium, dilata est Generalis Concilii indictio, convocatio & celebratio. Distulit hæc infelicitas temporum, quæ sub Alexandro Prædecessore nostro vexare cepit Italiam, & adhuc vexare non cessat; & instans necessitas recuperandi Terras & jura ejusdem Romanæ Ecclesiæ. Nam propositum nostrum semper ad Concilii celebrationem promptissimum atque intentissimum fuit.* Addit etiam Summus Pontifex, segreges Cardinales in litteris Indictionis Concilii sui Pisani, trium dumtaxat mensium, & quatuordecim dierum tempus pro termino Congrega-

gregationis assignasse, quod tamen tam breve temporis intervallum ad Oecumenicū Concilium congregandum minimè sufficit. Tertiò, segreges Cardinales falsò jaçtabant, suum Conventum Pisanum repræsentare universalem Ecclesiam, cū tamen ei nec interfuerint Hispaniæ Episcopi, nec Germaniæ Antistites, qui potius in Synodo Augustæ habitā Concilium istud Pisanum, tanquam Schismaticum, damnarunt. Non interfuerunt etiam huic Concilio Pisano Italiæ Episcopi, præter quosdam è Ducatu Mediolanensi, qui tunc *Ludovico XII.* Galliarum Regi, hujus Conciliabuli, ob similitudines, quas cum *Julio II.* gerebat, promotori, parebat. Quin, ex tota Gallia, quantumvis Rex Christianissimus bellum *Julio II.* indixisset, seque adversus ipsum armis tueretur, duo duntaxat Archiepiscopi Lugdunensis & Senonensis, quatuordecim Episcopi, nonnulli Abbates, Doctores & Procuratores Academiarum huic Concilio Pisano adfuerunt. Nemo autem dicet unquam, eo tam exiguo numero Prælatorum, qui ad hoc Concilium Pisanum accesserunt, quique à legitimo Capite, seu Romano Pontifice, Christi in terris Vicario, erant avulsi, universalem potuisse repræsentari Ecclesiam. Quartò, Regna Catholica, Ecclesiæ particulares, Christiani Principes ac Reges, præsertim *Ludovicus XII.* qui Pisano Conventui adhæserant, eum postea quasi Conciliabulum ejurarunt, & Synodo Lateranensi quintæ à *Julio II.* convocatæ, velut legitimæ adhæserunt, ut mox ostendemus agendo de his quæ in hac Synodo Lateranensi quinta proposita ac definita fuerunt. Quintò, Cardinales, qui *Julio II.* legitimo Romano Pontifici fuerant

contumaces , & purpurâ ab eo exuti , postea pœnitentiâ ducti , ad *Leonem X.* qui in locum *Julii II.* Romani Pontificis , in Synodo Lateranensi quinta demortui , successus est , confugerunt , ejusque benignitatem supplices implorantes , ac veste induti non purpureâ , sed privatâ , in Pontificio Consistorio Pisanum Concilium uti spurium solemniter de testati , veniam & pristinam dignitatem impetrarunt , atque Concilii Lateranensis quinti Decreta approbarunt . Postremò *Julius II.* Pontifex Maximus , in suis Concilii Lateranensis quinti litteris Convocatoriiis indiçtionem & convocationem Concilii Pisani nullam , irritam & inanem esse declaravit , atque in Sessionibus secunda & tertia ejusdem Concilii Lateranensis quinti Synodum Pisanam , omniaque ejus Acta Pontificio Diplomate reprobavit sacro approbante Lateranensi Concilio . Ex quibus momentis liquidò patet , Synodum Pisanam , indiçtam à paucis segregibus Cardinalibus , esse prorsùs spuriam , Synodum verò Lateranensem V. à *Julio II.* Romano Pontifice convocatam , legitimam censerì debere .

D. Quâ de causâ *Julius II.* Pontifex Maximus hanc Synodum V. Lateranensem convocavit? quid verò præcipuè in ea gestum ac definitum est?

M. Hanc Synodum V. Lateranensem indiçxit *Julius II.* tum ut mederetur malo schismatis , cui originem dare , illudque fovere poterat Conciliabulum Pisanum à segregibus Cardinalibus convocatum ; tum etiam ad reformandos Ecclesiæ mores , pacem inter Principes Christianos ineundam , & promovendam in Turcas Expeditionem

San-

Sanctam. Inchoatum porrò est istud Concilium Lateranense V. die x. mensis Maji anni MDXII. ei-
 que præfuit *Julius II.* ad quartam usque Sessionem,
 quâ finitâ, ipso ægrotante *Julio II.* Pontifice Ma-
 ximo, quintæ Sessioni præfuit *Raphael* Cardinalis,
 Episcopus Ostiensis, cæteris septem sequentibus
 Sessionibus præfuit *Leo X.* recens electus Pontifex
 Maximus. In his duodecim Concilii Lateranensis
 V. Session. plurima gesta, statuta ac definita sunt, in-
 ter quæ quatuor potissimum singulari observatio-
 nè digna hîc annorabo. Primò, in Sessione septima
 Summus Pontifex *Leo X.* eos, qui asserabant, Ani-
 mam intellectivam esse mortalem, aut unicam in
 cunctis hominibus, sacro approbante Concilio,
 damnavit, & Legatos ad Reges & Principes mit-
 tere decrevit, ad pacem inter eos conciliandam,
 ut deindè adversus Turcarum Tyrannum, com-
 munem Fidei hostem, arma viresque conjunctim
 converterent. Secundò, in Sessione nonâ promul-
 gata est Constitutio de Reformatione Curie, quâ
 statuitur, ut Cardinales vitæ munditiâ, ac virtut-
 um splendore cunctis præfulgeant, sint omnes vi-
 giles ac Divinis Officiis, Missarumque celebratio-
 nibus intenti: in domibus, familiâ, mensâ, sup-
 pellectili, sint modestiæ & frugalitatis speculum,
 omnique diligentiam sedandis & componendis inter
 quoscumque litibus vacent incumbantque ab omni
 privato affectu semoti. Deindè, in eadem Sessione
 decernuntur pœnæ in Clericos & Laicos blasphem-
 mos, nefarii criminis reos, concubinarios, &
 Simoniacos. Statuitur etiam, ut *quilibet habens*
Beneficium cum cura, vel sine cura, si post sex menses
ab obtento Beneficio Divinum Officium non dixerit,
legi-

legitimo impedimento cessante, Beneficiorum suorum, fructus suos non faciat, pro rata omissionis recitationis Officii, & tempore, sed eos tanquam injustè perceptos, in fabricas hujusmodi Beneficiorum, vel pauperum eleemosynas erogare teneatur; si verò ultrà dictum tempus in simili negligentia contumacitè contempserit, legitima monitione procedente, Beneficio privetur, cum propter Officium detur Beneficium. Tertiò, in Sessione decimà edita est Constitutio declarans, Montes, qui dicuntur, Pietatis, justos & licitos esse, prohibetque universis sub pœna excommunicationis latè Sententiæ illorum damnare usum, vel vitii usuræ insimulare, quia etsi Rectores ejusmodi Montium Pietatis aliquid à mutuatariis exigant præter sortem, ea tamen exactio nullatenus est ad lucrum, sed ad indemnitatē, propter necessarias expensas, sine quibus diù stare haud posset istud pietatis Institutum; eo autem corridente, gravi subsidio fraudarentur inopes mutuatæ pecuniæ, quâ ipsorum necessitates sublevantur. Docent tamen periti Casuistæ, quòd si in fine anni post compensationem omnium expensarum, quæ in Monte pietatis factæ sunt, supersit aliqua Summa ex interesse, ut vocant, quod exactum fuit, ea Summa inservire non debet ad augendum Montem pietatis, sed restitui debet illis, à quibus accepta est, si commodè inveniri possint, aut minuendum est interesse alterius anni, ita ut Mons pietatis nullum lucrum ex hujusmodi interesse sentiat, quia si aliquid lucri indè perciperet, totum interesse, quod sumptum est ultrà sortem principalem, non exactum fuisset ad solam expensarum compensationem, sed ad lucrum aliquod ex mutuo proveniens, quod

quod divinæ legi contrarium est, & Constitutioni promulgatæ pro Montibus pietatis à Leone X. in Concilio Lateranensi quinto. Denique, Sessione XI. Concilii Lateranensis V. promulgata est abolitio Pragmaticæ Sanctionis, cujus in locū pacta Bononiæ Concordata inter Leonem X. Pontificem Maximum, & Franciscum I. Regem Christianissimum, substituta sunt, de quibus latè differemus in Colloquio sexto, ubi Disciplinæ Ecclesiasticæ sæculi decimi sexti selecta capita exponemus. Hic dumtaxat cū Illust. Petro de Marca Archiepiscopo Parisiensi obiter dicam, Sanctionis Pragmaticæ abrogationem, & Concordata, quæ Leonem X. & Franciscum I. inita sunt, magnam Ecclesiæ Gallicanæ attulisse utilitatem, quia *Episcopatum Electiones* (verba sunt illius Archipræsulis libri VI. de *Concordia Sacerdotii & Imperii* Cap. IX. Num. XIIII.) *Capitulorum ambitu fiebant, eisque persæpè vim inferebant Regum preces à Pragmatica Sanctione approbatæ: adeò ut Guillelmus Benedicti, celeberrimus illa ætate jurisconsultus, affirmet, preces illas habuisse & habere debuisse vim imperii apud Canonicos Electores. Concordata igitur abolent electiones, & in earum locum substituunt jus Nominationis, quod Regi tribuunt. Quod jus viam præcludit ambitioni & Simoniam, quæ exercebatur ad emenda suffragia Canonico- rum. Attamen Nominationis jus sic conceditur Principi, ut ad Summum Pontificem pertineat confirmatio Electionum, quæ potiebatur absque ulla controversia ante Pragmaticam Sanctionem editam.*

D. Huic Synodo V. Lateranensi adhæseruntne Principes Christiani, præsertim Maximilianus Imperator, & Ludovicus XII. Galliarum Rex,

Rex, qui propter simulates, quas cum *Julio II.* Pontifice Maximo, exercebant, Conciliabuli Pisanî adversus eundem Pontificem indictionem ac celebrationem promoverant?

M. Principes Christiani, præcipuè *Maximilianus* Imperator, & Christianissimus Rex *Ludovicus XII.* rejectâ penitus tanquàm spurîâ Synodo Pisanâ, Concilio Lateran. V. tandem adheferunt. In primis, *Ferdinandus*, Rex Aragonum & Siciliæ, suo, & *Joanna* Castellæ Reginæ nomine, jussit *Hieronymo de Vich*, suo in Romana Curia Oratori, ut operam daret, ne Pisanum Conciliabulum longiùs protraheretur, sed tanquàm injuriâ, perperâ & iniquè congregatum dissolveretur & evanesceret, & perniciosissimum schisma tolleretur, & ut Concilio Lateranensi, ceu legitimo, interesset. Idem præcepit *Maximilianus* Imperator *Matthæo* Episcopo Gurcensi ac Principi, qui nomine Imperatoris Pisanum Conventum reprobavit, & Concilio Lateranensi adhæsit. Consensum itidè suum eidem Concilio Lateranensi adjunxerunt *Emmanuel* Rex Lusitaniz, *Sigismundus* Rex Poloniz, *Leonardus* Dux Venetorum & Serenissima Respublica, *Lucensium* ac *Florentinorum* Respublicæ, Dux *Medio-*
Janensis, *Marchio Mantuz*, *Marchiones Brandeburgensis* & *Montis ferrati*, Dux *Sabaudiz*, alique Principes, quorum exemplum tandem secutus est *Ludovicus XII.* Galliarum Rex, qui, *Julio II.* mortuo, dum celebraretur Concilium Lateranense, quintum, ac subindè causâ omnis odii & simultatum, quas cum illo Pontifice gesserat, omninò sublata, amicitiam *Leonis X.* qui in eodem Lateranensi Concilio in locum *Julii II.* successus est, sibi con-

ciliare studuit, & per Oratores suos *Fridericum Cardinalem, de Sancto Severino, Claudium de Seyfello, Massiliensem Episcopum electum, & Ludovicum de Forbin Dominum de Soleris, à pratenso Pisano Concilio penitus discessit, illique plenariè renuntiavit, ac purè, liberè, & simpliciter sacrosancto Lateranensi Concilio, tanquàm vero, unico, & legitimo adhæsit.* Quin, Regem Christianissimum *Ludovicum XII.* nunquàm ex animi sententiâ Conciliabulo Pisano adhæsisse, probat *Spondanus* ad ann. MDX I. num. XVI II. ex *Epistolis Anglerii*, qui ex Urbe *Burgis Hispaniæ*, ubi apud Regem *Ferdinandum* degibat, scribens ad Marchionem *Bellecensem* ait, cùm *Hieronymus Cabanilla, Valentinus Eques, & Ferdinandi* tunc apud *Galliarum Regem Ludovicum XII.* Orator, conquereretur, quòd Conciliabulariis contra Pontificem faveret; Regem subridendo respondisse, larvam esse ac jocosam declamationem, figmentumque inane, illorum consilia, occasionemque sumptam ab eis, ut Pontificem deterrent, *farsam*, hoc est, mimicum ludum esse, seque tantùm ista fovere, ut Pontificis animum aversum attraheret. Quam politicam Principum agendi rationem deplorans idem *Annalista*, ait: *Miseram Principum conditionem! pro quantilla re, quantis tribulationibus & se ipsos & innocentes subditos conficiunt! pro minima parte puncti terræ acquirenda per fas & nefas, plerùmque immensam amplitudinem cæli amittentes. O iterùm miseram hujusmodi Principum conditionem! Habeant apud homines excusationes suas, quantum voluerint, Dominus justus Judex nullas admittet nisi justas. Sed satis hætenus de quinta Synodo Lateranensi Oecumenicâ, quæ*
incho-

Inchoata die x. Maji anni MDXII. feliciter conclusa est die xiii. Martii anni MDXVII.

D. Sæpius audiui, non debere Reges ac Principes Sæculi thuribulum attingere, hoc est, Sacerdotalem auctoritatem, ac judicium de rebus sacris sibi assumere, nec in negotiis ad regimen Ecclesiæ spectantibus sese ingerere, sed eos potius religiosissimorum Imperatorum *Constantini, Valentiniani, ac Theodosii Magni*, qui integrum de rebus sacris judicium Pastoribus Ecclesiæ, ut par est, reliquerunt, vestigiis insistere oportere, ne illis contingat, quod *Ozia* Judæorum Regi accidisse memorat Scriptura Sacra. Ille quippè Rex, ut nuperrimè legebam lib. 2. Paralip. cap. xxvi. ingressus templum Domini, adolere voluit incensum super altare thymiamatis, eique Sacerdotes restiterunt, atque dixerunt: Non est tui officii, *Ozia*, ut adoleas incensum Domino, sed Sacerdotum, hoc est, filiorum *Aaron*, qui consecrati sunt ad hujusmodi ministerium: egredere de Sanctuario, ne contempseris, quia non reputabitur tibi in gloriam hoc à Domino Deo: Iratusque *Ozias*, tenens in manu thuribulum, ut adoleret incensum, minabatur Sacerdotibus, statimque orta est lepra in fronte ejus coram Sacerdotibus, & festinatò expulerunt eum. Sed & ipse perterritus, acceleravit egredi, eò quòd sensisset illicò plagam Domini. Fuit *Ozias* Rex leprosus usque ad diem mortis sue, & habitavit in domo separata plenus lepra, ob quam ejectus fuerat de domo Domini. Sed, ne in his congerendis divinæ vindictæ exemplis tempus frustra conteramus, perge, quæso, alia referre Concilia, quæ antè Oecumenicam Synodum Tridentinam Sæculo decimo sexto tam in causa Fidei,

quàm pro refarciendâ Ecclesiæ Disciplinâ fuerunt celebrata .

M. Septem Concilia Provincialia , sive ad asserendam contra hæreticos Fidem Catholicam , sive ad emendandos fidelium mores, variis in locis antè Generalem Synodum Tridentinam Sæculo decimo sexto habita sunt , videlicèt Bituricense , Senonense , Colonienſia duo , Moguntinum , Treverense , & Narbonense , quorum dumtaxat Præsides, Decretorum numerum, breviter hic perstringere sufficiet , ne si singula eorum Decreta , quæ sanè plurima sunt , & in eisdem penè argumentis versantur , percensere vellem , nimiam prolixitate , ac frequenti repetitione te defatigare . Primum Provinciale Concilium , seu *Bituricense* , anno Christi MXXVIII. habitum est , Præsidente *Francisco Turnonio* , Archiepiscopo Bituricensi ac Primate Aquitanie , & in eo edita sunt Decreta triginta duo , quorum primo statuitur , ut *damnatum dogma Lutheri & sequacium à Sacro Sancta Sede Apostolica jampridem reprobatum, in publicis concionibus , locis & temporibus opportunis , prout expediens Ordinariis locorum videbitur , generaliter tantum reprobetur , non declaratis sigillatim erroribus , nisi locus aliquis fuerit, ad quem pervenerint damnati aliqui errores .* Damnantur itidem eodem Decreto ac omninò prohibentur *Lutheri & Lutherano-*rum libri. In aliis viginti duobus Decretis sequentibus emendatur ac restituitur collapsa Ecclesiæ Disciplina. Sex alia sequentia Decreta libertati ac reformationi jurisdictionis Ecclesiasticæ consulant . Denique , in reliquis postremis Decretis imperatur ad biennium collectio Decimarum , quæ
ab

ab omnibus Beneficiariis, Communitatibus, & Ecclesiæ Fabricis exigerentur pro redemptione, seu liberatione filiorum *Francisci I.* Christianissimi Regis, qui in Hispania pro Patre suo obsides à *Carolo V.* Hispaniæ Rege tenebantur. Alterum Concilium Provinciale, seu Senonense eodem anno MDXXXVIII. Parisiis celebratum est, Præsidente *Antonio d Prato* S.R. E. Cardinali, Archiepiscopo Senonensi, & Franciæ Cancellario, & in eo Lutherana Hæresis confixa est sexdecim Decretis de Fide editis. Primum est *De unitate & infallibilitate Ecclesiæ*. 2. *Quòd Ecclesia non sit invisibilis*. 3. *De Auctoritate Sacrorum Conciliorum*. 4. *Quòd ad Ecclesiam spectet determinare qui libri sint Canonici*. 5. *Quòd aliqua sint firmitè credenda, qua non continentur expressè in Scriptura Sacra*. 6. *De Constitutionibus humanis*. 7. *De Jeuniis Ecclesiasticis*. 8. *De Cælibatu Sacerdotum*. 9. *De votis, & præsertim Monasticis*. 10. *De septem Sacramentis*. 11. *De Sacrificio Missæ*. 12. *De satisfactione, Purgatorio, & commemoratione Defunctorum*. 13. *De veneratione Sanctorum*. 14. *De Veneratione Sacrarum Imaginum*. 15. *De libero arbitrio*. 16. *De Fide & Operibus*. Verita pariter est sub pœna Excommunicationis lectio librorum *Lutheri* & *Lutheranorum*. Præter hæc sexdecim Decreta, quibus Lutherana impietas, quæ tum temporis in Galliis pullulare ac invalescere cœperat, profligata est; alia quadraginta Decreta ad resarciendam Ecclesiæ Disciplinam eodè in Concilio Senonensi edita sunt, quæ publicâ luce donavit, Notisque doctissimis illustravit *Jodocus Clichtoveus*, Sacræ Facultatis Parisiensis Doctor Theologus, qui Lutheranos acriter insectatus

est & voce & Scriptis, atque contra eos complura edidit Opuscula. Primum ex duobus Conciliis Colonienſibus, quæ Sæculo decimo ſexto indiſta ſunt, celebravit anno milleſimo quingentefimo trigefimo ſexto *Hermannus* Archiepiſcopus Colonienſis, illudque in quatuordecim partes diſtributum eſt, quarum unaquæque præclara & ſaluberrima complectitur Decreta, quæ ordinavit ac digeſſit *Joannes Gropper*, Juris Pontificii Doctor inſignis, Theologus itidẽ celeberrimus, & Lutheranorum acerrimus impugnator. Hic autem obiter advertere debes, hunc *Hermannum* Archiepiſcopum Colonienſem, à quo iſtud Concilium, fuit convocatum, ſuâ Sede fuiſſe abdicatum, poſtquam compertum omnibus fuit, eum à Catholica Fide Apoſtataſſe evaſiſſe, omniſque ſtudio laborare, ut Lutheranorum impietatem in ſua Diœceſi ſtabiliret ac propagaret, Lutheranos Concionatores undique accerſendo, *Melancthonem*, *Bucerum*, alioſque doctrinæ peſtilentis viros, quorum conſilio utebatur, eiſque ad ſeducendum populum prædicandi provinciam demandabat, alios verò ſinceræ pietatis & Catholicæ doctrinæ Concionatores calidè ſubmovendo. Quò factum eſt, ut à *Paulo III.* Pontifice Maximo Sede ſuâ motus, nec iudicio ſiſtere auſus, fugâ ſe ſubripuerit, & apud Lutheranos hæreſim apertè profeſſus, reliquum vitæ exegerit. Quocircà ejus in locum electus eſt *Adolphus* ex Comitibus Schavemburgenſibus, qui ad collapſam penè in hac Provincia Catholicam Religionem, & reſtaurandam maximè depravatam Eccleſiæ Diſciplinam, alterum Concilium Colonienſe anno MDXLIX. convocavit, in quo, cùm exactior

anti

antiquorum Canonum severitas in usum absque aliquo graviore motu revocari haud posset, consultius visum est sex potissimum seligere media, quibus Clerus & populus sensim sine sensu & absque ullo strepitu ad pleniorum reformationem perducerentur. Qua in re Patres istius Concilii Colonienſis sapientissimè se gesserunt. Nam sicut facilè serpunt abusus, ita difficilè tolluntur, nec minùs damnandi sunt illi, qui eos dissimulant, quandò paulatim tollere possent, quàm illi, qui magno quidem zelo, sed non secundum scientiam, eos intempestivè exagitant, dum minore Religionis incommodo dissimulare præstaret. Prioribus contingit, quod solet illis, qui morbum exasperant, dum ei, quandò expediret, medicinam admoveere cunctantur: aliis verò evenit, quod solet imperitis Medicis, qui, dum parùm dextrè adhibent remedia, pro morbo extinguunt hominem, aut ex leviori malo reddunt immedicabile. Hæc, inquam, duo extrema perindè caventes Patres istius Concilii Colonienſis, sex opportuna selegerunt media, sacris quidem Canonibus consentanea, sed non ad rigidiorum Disciplinam exacta, quorum primum, est *Studiorum*, præsertim *Sacrorum*, *instauratio*. Alterum, *Examen Ordinandorum ad sacra Ministeria, & Prælaturas instituendorum*. Tertium, *Officiorum, seu munerum susceptorum sedula perfunctio*. Quartum, *Visitatio Archiepiscopalis, Episcopalis, Archidiaconalis, & eorum, quibus id oneris incumbit*. Quintum, *Synodorum frequens celebratio*. Sextum, *Jurisdictionis Ecclesiasticæ, multum labefactatæ & abusibus depravatæ, restitutio*. De his sex Mediis, quæ ad efficacem, diùque permanſuram reformationis

executionem plurimum momenti asferre posse judicarunt Patres hujusce Concilii Colonienſis, latè diſſerit *Joannes Cabaffutius* in ſua *Notitia Eccleſiaſtica Conciliorum* pag. 571. & ſequentibus. Præter iſtud Concilium Colonienſe, quod anno MDXLIX. habitum eſt, alia duo Concilia Provincialia, ſeu Moguntinum, & Treverenſe eodem anno celebrata ſunt. Præſuit Concilio Moguntino *Sebaſtianus* Archiepiſcopus, & Sacri Imperii Princeps Elector, & in eo ad reſtaurandam collapſam Eccleſiæ Diſciplinam, & ad damnandam Lutheranam Hæreſim, quæ dirè totâ, quâ latè patet, Germaniâ graſſabatur, multi conditi ſunt Canones. Primam partem hujus Concilii Moguntini occupant Canones quadraginta ſeptem, quibus hæretica *Lutheri* dogmata proſcribuntur. Altera verò Concilii Moguntini pars Canonibus ſeptem & quinquaginta conſtat, qui ad morum, & Eccleſiaſticæ Diſciplinæ reformationem ſpectant, de quibus legiſis jam citatum *Cabaffutium* pag. 575. & ſeq. Alteri Concilio, ſeu Treverenſi, quod eodem anno indictum eſt, præſuit *Joannes* Archiepiſcopus Treverenſis, & Princeps Germanici Imperii Elector, in quo ut videre eſt apud eundem *Cabaffutium* pag. 577. & ſeqq. multa contra Hæreticos Lutheranos, & pro reformatione Eccleſiaſticæ Diſciplinæ ſaluberrima edita ſunt Decreta *De Fide Catholica & Romanæ Eccleſiæ fideliter & firmiter tenenda: De Verbi Divini Prædicatoribus: De cultu Divino diligenter & Religioſè exequendo: De Horis Canonicis: De Miſſæ Officio riſè peragendo: De Feſtorum numero minuendo: De Monachis & Sæcimonialibus: De Parochiis: De Scholis: De Eccleſiaſtica libertate & immunitate:*

De

De Vita & honestate Clericorum, & de aliis id genus, quæ Disciplinæ Ecclesiasticæ instaurationem promoverè poterant. Denique, non multò post istud Concilium Treverense, aliud in Galliis, seu Concilium Narbonense, anno MDLI. coactum est, ei-que præfuit *Alexander Zerbinatis*, Sedis Apostolicæ Protonotarius, *Francisci* Cardinalis *A Pisanis* Narbonensis Archiepiscopi Vicarius Generalis. In eo Provinciali Concilio Narbonensi Catholica Fides contra novas serpentes Hæreses explicata ac stabilita est, damnati sunt tanquam hæretici quicumque aliud docent, quàm Romana credit & profitetur Ecclesia, atque Canones sexaginta quatuor de morum emendatione, & sanciendâ Ecclesiæ Disciplina conditi sunt. Sed satis hæc hactenus dictum sit de Conciliis, quæ ante, vel paulò post convocationem Concilii Oecumenici Tridentini in Causa fidei & Disciplinæ Ecclesiasticæ reformationis Sæculo XVI. variis in locis indicta ac celebrata fuerunt.

D. Pertexe nunc Historiam Concilii Generalis Tridentini, cujus convocatio profligandis hæresibus, vindicandæ Fidei Catholicæ, purgandis in deteriora lapsis Catholicorum moribus, reparandis Reipublicæ Christianæ ruinis, & labefactæ Ecclesiasticæ Disciplinæ restaurandæ pernecessaria fuit, atque omnium proborum votis exoptatissima. Priusquàm tamen in ea, quæ in Synodo Oecumenica Tridentina gesta ac definita sunt, inquiramus, obsecro te, ut in antecessum referas, & eâdem operâ refellas rationes, quibus hæretici Concilio Tridentino refragantur, illudque Generale ac Oecumenicum fuisse inficiantur.

M. Per-

M. Pervicaces Hæretici, Romanorum Pontificum auctoritati parère detrectantes, Concilium Generale impensè expetere se fingebant, utque illud propedièm celebraretur Insolentèr provocabant. At, ubi primùm celebrari cæpit Concilium Tridentinum, tunc sibi malè conscii hæretici refugerunt, pedem retraherunt, contra Concilium Tridentinum allatarunt, illudque non pro Oecumenico habendum esse, sibi, aliisque persuadere tentarunt nonnullis rationibus, quarum præcipuas, hic referam, easque vanas ac planè futesse esse breviter commonstrabo. In primis, obiciebant hæretici, Concilium Generale non Tridenti, sed in Germania celebrari debuisse, cum adversus Germaniæ *Protestantes* esset indictum. Sed hæc ratio omninò frivola est. Nulla quippè est necessitas celebrandi Concilia Generalia his in locis, Provinciis, aut Regnis, in quibus enatæ sunt Hæreses. Hinc *Ariana* Hæresis, licèt Alexandria in Ægypto ab *Ario* Presbytero inventa, non tamen in Ægypto, sed Niceæ in Bithynia in Concilio Generali Nicæno proscripta est. Nestoriana Hæresis, à *Nestorio* Episcopo Constantinopolitano propalata, non Constantinopoli, ubi emerferat, nec in Thracia, sed Ephesi damnata est. Donatistarum Hæresis, in Africa nata, in Concilio Romano sub *Melchiade* Papa, & in Arelateni Synodo confixa est. Perperam igitur conqueruntur hæretici, quòd Synodus Generalis contra Germaniæ *Protestantes* indicta, Tridenti fuerit celebrata; maxime, cum ipsimet Germaniæ Principes in Conventu Spirensi, anno MDXLII. habito, ultrò consensissent, ut in Civitate Tridentina, quæ Germaniæ est contermina,

ac subindè Germanis commoda, cæterisque Nationibus non suspecta, Concilium Generale contra Germaniæ *Protestantes* celebraretur. Secundò, dictabant Hæretici, non debuisse Romanum Pontificem Concilium Generale in hoc Reformationis negotio convocare, nec minùs ei præesse, quia nemo iudex est in propria Causâ, omniaque jura cùm divina, tum humana, prohibent, ne quis in eadem Causa personam judiciis, partisque simul disceptatricis sustineat. Porro, Romanum Pontificem in hoc Reformationis negotio partis disceptatricis locum tenere aiebant hæretici, eò quòd de multis morum, sanctorisque disciplinæ postularetur. Non debuit ergò Romanus Pontifex in Concilio Generali, pro reformatione Ecclesiæ indicto, tanquam iudex & Arbiter sedere. Verùm, hæc hæreticorum objectio utroque genu claudicat. Nam primò certum est, Concilii Generalis convocationem semper ad Romanum Pontificem, velut ad visibile Ecclesiæ Caput, pertinuisse, nullumque Concilium Oecumenicum sive in Oriente, sive in Occidente unquàm fuisse coactum, nisi jubente, vel saltem volente & consentiente Romano Pontifice, quod sanè multis exemplis & antiquis monumentis nullo negotio evincere possem, nisi res esset manifesta his, qui Historiam Ecclesiasticam primoribus libris prælibarunt. Quorsùm ergò Hæretici Concilium Tridentinum, more veterum Conciliorum Generalium indictum, Oecumenicâ authoritate spoliare moliuntur? Ludicrum autem est, quod aiebant hæretici, videlicet Romanum Pontificem in Concilio Tridentino sedisse tanquam iudicem in propria Causa. Nec enim Romani Pontificis, sed

sed Religionis & Fidei Causa in Concilio Tridentino agebatur, quam Romanus Pontifex pro sui Primatus officio tueri, & Ecclesiæ Disciplinam, sanctam rectam conservare tenetur, cum sit visibile Ecclesiæ Caput & universalis Pastor. Sanè, si quid ponderis haberet hæc Hæreticorum objectio, in tuto essent omnes Novatores, Hæresiarchæ, & perfidæ cujuscumque Sectæ Auctores, quippè qui nunquam legitimè damnari possent, sicque absolvi deberent *Arius*, *Macedonius*, *Nestorius*, *Eutyches*, aliique tam veteres, quam recentes Hæresiarchæ, qui perindè Ecclesiam, quæ ipsos damnavit, novitatis & corruptelæ circà fidem insinularunt, contra Concilia reclamationum, & Romanos Pontifices, aliosque Antistites, suis erroribus infestos, noluerunt in propria sua Causa tanquàm legitimos judices agnoscere. Præterquàm quòd, à modernis hæreticis percontari vellem, quem judicem in sua Causa legitimum agnovissent? numquid se ipsos, qui ob hæresim in jus vocabantur? At id non solum rationi, & juri naturali ac positivo repugnasset, sed nec etiam fieri potuisset; cum Lutherani & Calvinistæ, qui in jus vocabantur, concordēs in doctrina non essent, ac proindè Lutherani contra Calvinistas reclamassent, & versâ vice Calvinistæ noluisse, ut Lutherani in eorum Causa quidquam, velut legitimi & competentes judices, pronuntiarent. Numquid Imperatorem, & Reges Catholicos, tanquàm legitimos judices hæretici in sua Causa agnovissent? minimè gentium. Imperatori si quidem Catholico, & Regibus, Romanæ Communioni addictis, idem objecissent, quod Romano Pontifici, & Episcopis oppo-

ne.

nebant , nimirum rem illorum agi , illosque iudicium & partium personam in eadem Causa sustinere haud posse . Nec etiam voluissent Imperator , ac Principes Catholici Jus sibi arrogare fidei controversias dirimendi , quod non Principibus Laicis , sed solis Ecclesie Pastoribus à Deo fuisse cõcessum Religiosissimi Imperatores *Theodosius* , *Valentinianus* , alique sæpius declararunt . Velint itaque nolint , fateri debent Hæretici Lutherani & Calvinistæ , nullum se in Ecclesia agnoscere iudicem , à quo legitimè damnari possint , adeoque non tantum se , sed & alios Hæreticos , quos hætenus Ecclesia proscripsit , nec justè , nec legitimè fuisse ab ipsa damnatos ; quod sanè , ut nemo non videt , summæ superbiæ & deploratæ eorum cæcitatibus evidētissimum est argumentum .

D. Hanc Hæreticorum , nullum in Ecclesia , præter se ipsos , iudicem agnoscere volentium , intolerabilem superbiam memini me lēgisse graphicè descriptam in aureo *Vincentii Lirinensis* Commonitorio adversus Hæreses , ubi elegantissimus ille Scriptor de Hæresiarcha *Nestorio* hæc habet : *Invecti sumus in Nestorii sceleratam præsumptionem , quod Sacram scripturam se primum & solum intelligere : & omnes eos ignorasse jactaret , quicumque antè se Magisterii munere præditi Divina Eloquia tractavissent : totam postremò etiam nunc errare & semper errasse Ecclesiam , quæ (ut ipsi videbatur) ignaros , erroneosque Doctores & secuta est , & sequeretur . Sed perge , quæso , alias proferre , falsique convincere rationes , quas etiamnum Hæretici ad elevandam auctoritatem Concilii Tridentini obtrudere solent .*

M. Tri-

M. Tribus aliis ficulneis argumentis auctoritatem Concilii Tridentini impetere solent hæretici, quæ hic levi brachio perstringam, & unico flatu exsufflabo; nec enim tanti sunt, ut in his diluendis diutius immorari, oleumque & operam perdere debeamus. Negant Hæretici, Concilium Tridentinum fuisse Oecumenicum, quia Lutherani, dicti Protestantes, Civitatum Germaniæ, Principes Augustanæ Confessionis ei non interfuerunt, immò ab eo sunt exclusi, & tamen contra eos, licet absentes, nec auditos, latum est iudicium, quod nullum censeri debet, utpotè datum non vocatâ & auditâ parte disceptatrice. Præterea, ajunt Hæretici, Synodum Tridentinam non fuisse liberam, cum in ea nihil à Legatis proponeretur, nisi quod antehac Romano Pontifici placuisset, indeque popolare istud increbuisse scomma: *Spiritum Sanctum Romæ Tridentum in mantica deferri*. Postremò, acriter invehuntur in omnes Antistites in Concilio Tridentino congregatos, asseruntque, illos apertè odia exercuisse cum Lutheranis & Calvinistis, qui in jus vocabantur, eorumque controversa Dogmata citra ullam discussionem, livore percitos & partium studio abreptos, confixisse. Hæ sunt in summâ Hæreticorum adversus Concilium Tridentinum objectiones, seu potius putide calumniæ ac imposturæ, quæ quàm crasso filo sint confutæ breviter hic demonstrabo. Prima Impostura, quâ confidenter affirmant hæretici, Civitatum Germaniæ Protestantes, & Confessionis Augustanæ Principes non fuisse ad Concilium Tridentinum vocatos & invitatos, falsi palam convincitur ex litteris publicæ fidei, seu salvi conductus

Aus quibus Synodus Tridentina Sefsionibus XIII.
 XV. & XVIII. liberam Protestantibus & cæteris alia-
 rum Nationum hominibus, à Romanæ Ecclesiæ
 Communione alienis, facultatem & securitatem,
 dedit *Tridentum veniendi, ibidemque manendi, standi,*
morandi, proponendi, loquendi una cum ipsa Synodo
de quibuscumque negotiis tractandi, examinandi, di-
scutiendi, ac omnia quæcumque ipsis libuisset, ac Ar-
ticulos quoslibet, tam scripto quàm verbo liberè offe-
rendi, propalandi, & cum iis, qui à Concilio delecti
fuerint, disputandi, &c. Id ipsum testatur Didacus
 Payua, insignis Theologus Lusitanus, qui Conci-
 lio Tridentino præfens aderat, libro 1. *Defensionis*
Tridentinæ Fidei; ubi Hereticum Kemnitium his
 verbis compellat. *Vestrum adventum vehementer*
exoptarunt (Patres Concilii Tridentini) diligen-
tissimè procurarunt, cum Cæsare non modo ipsi, sed
Romanus etiam Pontifex, & per Legatos sæpè & per
litteras frequenter egit, ut vos ad veniendum indu-
ceret. Adventum mendaciis & cavillationibus diffe-
rentes diutissimè expectarunt, ex vestris etiam aut
clam, aut palam adventantes benignè ac liberaliter
exceperunt, humanissimèque tractarunt, illos, ut cau-
sam suam palam & confidenter tuerentur, valdè obno-
xiè rogarunt, tuas ac tuorum lucubrationes venales
exponi curarunt, legendasque illis tradiderunt, qui
de vestra Fide aut disputare, aut judicare debuissent,
ut quòd à vobis precibus impetrare nunquàm potue-
runt, à nobis studio ac diligentia præstaretur. Quâ
frontè ergò audent heretici asserere, Germaniæ
Protestantes, & reliquarum Nationum homines
ad Synodum Tridentinum vocatos ac invitatos
non fuisse? Ecquid mirum, quod illi novæ refor-
 ma-

mationis Archite&ti ad Synodum venire detre-
 stantes, tanquam contumaces hæretici, ab eadem
 Synodo fuerint proscripti? Nec minus facile al-
 tera Hæreticorum impostura, quâ dicunt, Syno-
 dum Tridentinam non fuisse liberam, dissipatur ac
 dissipatur verbis ejusdem Theologi *Didaci Payue*, te-
 stis oculati, qui, loco mox à me laudato, *Kemnitium*
 hæreticum sic affatur: *An dubitas, te ac tuos Triden-*
tinum Concilium tutò adire, confidenter alloqui, &
liberè in eo versari potuisse? Testari certè ipse possum,
nihil fuisse à Patribus magis exoptatum, à Legatisque
vigilantiùs procuratum, quàm ut: nihil in eo non libe-
rè, non pacatè atque legitimè fieri, certissimis argu-
mentis constaret. Verum quidem est, Legatos Ro-
 mani Pontificis in Concilio Tridentino proposuif-
 se pro jure suo omnia quæ discutienda ac definienda
 erant, servatâ tamen Patribus integrâ libertate
 in omnibus & singulis Conventionibus atque sessioni-
 bus sententiam dicendi, quod necessarium omninò
 erat ad vitandam confusionem, quæ sanè maxima
 orta esset si omnibus integrum fuisset proponere
 quidquid ipsis in mentem venisset. Nec id juris sibi
 in Concilio Tridentino arrogarunt Legati Ponti-
 ficis, sed potiùs in Conciliis Generalibus Ephesino
 contra *Nestorium*, Chalcedonenfi contra *Eutychet-*
em, Constantinopolitano I I I. contra Monotheli-
 tas, Nicæno I I. contra Iconomachos, Constan-
 tinopolitano IV. contra *Photium*, & in aliis Con-
 ciliis Occumenicis, eodem jure rerum proponen-
 darum potiti sunt, ita ut nihil in Conciliis Gene-
 ralibus, ut videre est in eorum Actis, proponeretur
 aut decerneretur, nisi Arbitris & Auctoribus Le-
 gatis Pontificis Romani; & tamen nemo ità impiè
 desi-

desipuit, ut propterea dixerit, Spiritum Sanctum Ephesum, Chalcedonem, Constantinopolim, Romam in mantica à Summis Pontificibus missum, vel ademptam Ephesinam, Chalcedonenſis, & Sextæ Synodi Patribus ſuffragiorum libertatem. Apage ergo inficetum illud & impium ſcomma ab Hæreticis contra Concilium Tridentinum temerè jactatum, videlicet *Spiritum Sanctum Romam Tridentum fuiſſe delatum*. Poſtremò, non magis admittenda eſt expoſtulationo Hæreticorum adverſus Patres Concilii Tridentini, quos dicunt apertè odia exercuiſſe cum his, qui in eodem Concilio in jus vocati erant, eorum de Fide controverſa Dogmata, nullo prævio diligenti, ac maturo adhibito examine, condemnari; non, inquam, magis admittenda eſt hæc Hæreticorum expoſtulationo, quàm Arianorum adverſus Patres Concilii Nicæni, Macedonianorum adverſus Patres Concilii Constantinopolitani primi, Neſtorianorum contra Episcopos Concilii Ephesine, Eutychianorum contra Episcopos Concilii Chalcedonenſis, Monothelitarum contra Antiſtites Concilii Constantinopolitani tertii &c. Hi ſiquidem hæretici, ſicut ſolemne eſt pravis vitiligatoribus qui cauſam ceciderunt, in Episcopos, à quibus in Conciliis Generalibus fuerunt damnati, ore & calamo impudentiſſimè debacchati ſunt, non ſecus ac Lutherani, & Calviniſtæ, alique Novatores contra Episcopos Concilii Tridentini, à quibus fuerunt anathemate percuſi, latrare nunquam deſinunt. At quilibet facile judicare poteſt, quinam reveram hoſtilem animum ac præjudiciis affectum habuerint, an Lutherani, Calviniſtæ, cæterique Novatores, qui in jus vocati, authorita-

tem Romani Pontificis , & Episcoporum Concilii Tridentini spernebant , eos dentatis libellis proscindebant , & Catholicam fidem apertè impugnabant ? an Romanus Pontifex , & Episcopi in Concilio Generali Tridentino pro defensione fidei Catholicæ congregati , qui Lutheranos , Calvinistas , & alios id genus Sectarios ad Concilium Tridentinum vocarunt , invitarunt , eos ad meliorem frugem modis omnibus revocare tentarunt , ac tandem eorum errores post accuratissimum examen , ac præmissam diligentiam , quâ nulla major adhiberi poterat , confixerunt , ut constat ex Relationibus oculatorum testium , præsertim *Didaci Payuæ* , & ex *Historia Concilii Tridentini* , non eâ quidem , quam *Paulus Sarpinus* , sub nomine *Suavis Polani* mordaci stylo scripsit , mendaciis , contumeliis & imposturis refertam , sed ex *Historia Concilii Tridentini* , quam *Cardinalis Palavicinus* ex sinceris actis , ex Monumentis probatissimæ fidei , & ex Relationibus testium omni exceptione majorum concinnavit . Habes nunc breviter retusas sæpius decantatas expostulationes & imposturas , quas Lutherani , Calvinistæ , & alii Novatores , quò suam causam accisam ac desperatam in Sectariorum animis utcumque erigere ac fulcire possint , contra Concilium Tridentinum , in quo eorum errores protriti ac profligati fuerunt , obiicere solent .

D. Adeò ingenita est hæreticis maledicendi libido , adeò inveterata mentiendi & obloquendi licentia , ut omni veracitatis , conscientiæ , pudoris ac religionis abjectâ curâ , ingenio suo indulgeant , ac priùs illos Sycophantas vita deficiat , quàm

quàm à calumniis contra Ecclesiam Romanam, abstinere velint aut possint. Quapropter, consultius esse duco nunc prætermittere colluviem mendaciorum & sordium, quam movere nequeas, quin inficiaris, meque eo, quem afflant, gravissimo eneces fœtore. Uni itaque in præsentia inhæreamus Historiæ Concilii Tridentini, & ostende primò, quo anno fuerit indictum? Qui ei præfuerint? & quot Patres ad illud convenerint?

M. Dùm Calviniana Hæresis serperet in Gallia, in Belgio, in Batavia & Helvetia; Dùm Angliæ Regnum sub Rege *Henrico VIII. & Elizabetha* Reginâ, ejus filiâ, variis hæresibus infestaretur; dùm denique Lutherana Hæresis in Germania grassaretur, jamque in Regnum Sueciæ sub *Gustavo* Rege, & in Regnum Daniæ, sub *Christierno II. Friderico, & Christierno III.* Regibus, irrepsisset, altasque in his locis radices ageret: *Paulus III.* Pontifex Maximus, ut animabus periclitantibus, & Religioni tantis erroribus implicitæ succurreret, Concilium Generale *Mantue* primùm indixit, sed appposito à *Friderico*, Mantuæ Duce, obice, Vicentiæ celebrandum decrevit, ac tandèm, novis iterùm emergentibus obstaculis, illud Tridentum convocavit, Urbem Germaniæ conterminam, optatam à Germanis in Conventu Spirensi pro celebratione Concilii Generalis, & omnibus Christianis Nationibus opportunam. Tridenti itaque cœptum est Concilium Generale die *XIII.* mensis Decembris anni *MDXLV.* eique præfuere Sedis Apostolicæ Legati à *Paulo III.* Romano Pontifice missi, *Joannes Maria de Monte, Marcellus Cervinus, & Reginaldus Polus*, S. R. E. Cardinales. Ab an-

no MDXLV. usque ad annum MDLXIII. sub tribus Romanis Pontificibus *Paulo III. Julio III. & Pio IV.* celebratum est Concilium Tridentinum, adfuerunt Episcopi ex præcipuis Orbis Christiani Provinciis, & quidè in genti numero, ejusque Decretis subscripserunt Sedis Apostolicæ Legati, duo alii Cardinales, tres Patriarchæ, viginti quinque Archiepiscopi, centum sexaginta octo Episcopi, triginta novem Procuratores Episcoporum absentium, septem Abbates, & totidè Religiosorum Ordinum Præpositi Generales. Ex sola Familia Dominicana numerantur sex Archiepiscopi, septemdecim Episcopi, viginti octo celeberrimi Theologi, qui interfuerunt Concilio Tridentino, ut nihil in præsentī dicam de Episcopis, & doctissimis aliorum Religiosorum Ordinum Theologis, ex quibus coaluit Cætus ille post hominum memoriam augustissimus tot Patrum, tot Theologorum Concilii Tridentini, qui omnes Viri erant, si doctrinam spectes, eruditissimi; si usum, peritissimi; si ingenia, perspicacissimi; si pietatem, religiosissimi, si vitam innocentissimi; in quibus, nescias quid mirère magis, an gravitatem & sanctitatem, illo gradu dignam, an eruditionem, & rerum vel humanarum, vel sacrarum peritiam? Qua in re maximè eluxit providentia Dei Optimi Maximi, qui eo tempore, quo ingruentium barbarum mole & Hæresum colluvie periclitabatur Ecclesia, præsentissimum attulit remedium, excitando sanctissimos Antistites & insignes Theologos, qui Spiritus Sancti lumine, quo in Concilio Tridentino congregati plenissimè erant affusi, bullientes ubique hæreses exterminarunt, Catholi-

cam

cam Fidem illibatam conservarunt, & collapsam Ecclesiæ Disciplinam Sanctissimis editis Legibus instaurarunt.

D. Quot Sessiones habitæ sunt in Oecumenica Synodo Tridentina, tum ad stabiliendam contra Hæreticos Catholicam Fidem, tum ad faciendam Ecclesiæ Disciplinam?

M. Viginti quinque Sessiones habitæ sunt in Generali Concilio Tridentino, videlicet decem Priores, sub *Paulo III.* Pontifice Maximo, sex aliæ sequentes sub *Julio III.* denique novem postremæ sub *Pio IV.* Sed priusquam referam ea, quæ in qualibet Sessione gesta sunt, obiter advertere debes, in Concilio Tridentino, dum actu in Civitate Tridentina celebraretur, octo priores habitas esse Sessiones, sed cum morbus contagiosus in hac Urbe agroque Tridentino grassaretur, & gravioris luis periculum immineret, Patres Sessione octavâ habitâ die *xi. Martii* anni *MDXLVI.* promulgasse Decretum de translatione Concilii ex Civitate Tridentina ad Bononiensem, ubi duæ Sessiones, nona videlicet ac decima, celebratæ sunt. Mortuo autem *Paulo III.* Pontifice Maximo, ejus Successor *Julius III.* Concilium ad Civitatem Tridentinam reduxit, ubi cæteræ aliæ Sessiones habitæ sunt, videlicet *xi. xii. xiii. xiv. xv. xvi.* sub *Julio III.* Reliquæ verò novem sub *Pio IV.*

D. Perstringe modò compendiosâ narratione quidquid notabile in unaquaque Sessione Concilii Tridentini gestum est?

M. In prima Sessione, quæ habitæ est die *xiii. mensis Decembris* anni *MDXLV.* post sanctos Ritus, solemnemque præmissam supplicationem,

declaratum est, Concilium Tridentinum esse Oecumenicum, illudque jam inceptum. In secunda Sessione, editum est Decretum de modo vivendi, & de aliis in Concilio servandis. In Sessione tertia jusserunt Patres, ut recitaretur Fidei Symbolum Constantinopolitanum, quò omnibus notum facerent, se in suis definitionibus non recessuros ab eo Symbolo, in quo omnes, qui Fidem Christi profitentur, necessario convenire debent, quodque, ut ajunt, *fundamentum est firmum & unicum, contra quod portæ inferi nunquàm prævalebunt*. In his tribus Sessionibus nihil magni momenti statutum est, eò quòd in dies expectarentur Episcopi, adeòque Legatis Pontificis consultius visum fuerit, Fidei, morumque Sanctiones procrastinare, donec frequentior esset Synodus. In quarta Sessione condita sunt Decreta duo, primum videlicet de libris Canonicis & Traditionibus Sacris, quò declarat sacra Synodus: *Se suscipere omnes libros tam Veteris, quàm Novi Testamenti, necnon Traditiones ipsas tum ad Fidem, tum ad mores pertinentes, tanquam vel ore tenus à Christo, vel à Spiritu Sancto dictatas, & continua successione in Ecclesia Catholica conservatas pari pietatis affectu ac reverentiâ*. Enumerat postea sacra Synodus singulatim sacros omnes cum Veteris, tum Novi Testamenti libros Canonicos, quales nunc habemus in Canone Scripturæ Sacræ repositos. Hoc Decretum editum est contra Lutheranos, & Calvinistas, qui, ut ostendimus in *Traçtatu de Scriptura Sacra*, nuper edito, plures libros, & aliquot librorum partes ex sacro Canone expunxerunt, atque Traditiones penitus rejecerunt. Alterum ejusdem
 Sessio-

Sessiois quartæ Decretum spectat editionem & usum sacrorum librorum ad tollendos varios abusus, qui tum in Versionibus Sacrarum Scripturarum, tum in interpretationibus, tum in editionibus occurrebant. Ingens si quidem erat tum temporis Versionum Scripturæ Sacræ Latinarum multitudo ac varietas. Magnam sibi quisque arrogabat licentiam interpretandi pro suo arbitrio Scripturas Sacras, easque in alienos, pravosque sensus sæpè detorquendi. Tanta denique ex parte Typographorum in Sacris edendis Scripturis gliscebant corruptela, ut eas sæpius ex corruptis exemplaribus typis ederent, pravasque eis affuerent interpretationes. Hos abusus ut radicitus evelleret S. Synodus, tria ista præcipuè in hoc secundo Decreto declarat, primò, Versionem Scripturæ Sacræ, dictam *Vulgatam*, qualem nunc habemus, esse authenticam, eamque cæteris Scripturæ Sacræ Versionibus Latinis, quæ tunc circumferebantur, esse præponendam. Secundò, districtè prohibet, ne quis Scripturam Sacram ad improprium detorqueat sensum, aut contra unanimem Patrum consensum interpretari præsumat, aut ejus verba ac Sententias deflectat ad *prophana quæque, ad scurrilia scilicet fabulosa, vanas adulationes, detractiones, superstitiones, impias & diabolicas incantationes, divinationes, sortes, libellos etiam famosos &c.* Denique, statuit atque vetat, ne ullus deinceps de rebus sacris imprimatur liber, absque Ordinarii licentiâ, & sine expresso auctoris nomine sub pœna anathematis, & multæ pecuniariæ. In quinta, Sessione duo itidem Decreta edita sunt, unum de peccato Originali, alterum de Reformatione. De-

cretum de peccato Originali quinque complectitur Canones, quorum primus statuit, Adamum per divini mandati transgressionem excidisse ex sanctitate, ex iustitia, in qua constitutus fuerat, eumque secundum corpus & animam in deterius commutatum fuisse. Secundus Canon anathemate ferit eos, qui Adæ prævaricationem ipsi soli, & non ejus propagini nocuisse asserunt. Tertius Canon definit, peccatum Originale transfundi ab Adamo ad omnes ejus posteros. Quartus Canon dicit anathema illis, qui parvulos, recentes ab uteris matrum, baptizandos negant, etiamsi fuerint à baptizatis parentibus orti. Quintus denique Canon anathemate percellit eos, qui per Jesu Christi gratiam, quæ in baptismate confertur, reatum Originalis peccati remitti negant; vel asserunt, non tolli totum id quod veram & propriam peccati rationem habet, sed tantum radi, aut non imputari. Definit etiam idem Canon quintus, Concupiscentiam, quæ remanet in renatis, seu baptizatis, non esse verè, & propriè peccatum, nec nocere posse ei non consentientibus, & per Jesu Christi gratiam repugnantibus, ac subinde Deum in renatis nihil odisse, & concupiscentiam, quæ in illis remanet, peccatum à Paulo Apostolo dici, non quod reverà peccatum sit, sed quia ex peccato Originali profisciscitur, & ad peccatum inclinat. Ad calcem istius Canonis quinti declarat Sancta Synodus, non esse suæ intentionis comprehendere in hoc Decreto de peccato Originali Beatam Virginem Mariam Deiparam, sed observandas esse Constitutiones Sixti IV. Summi Pontificis. Alterum Decretum de Reformatione, quod in eadem

Ses-

Sessione quintâ promulgatum est, duo continet capita. Primum est de instituendo Theologo in singulis Metropolitanis & Cathedralibus Ecclesiis, necnon in Collegiatis insignium Oppidorum, pro lectione Scripturæ Sacræ, & de assignandâ ei Præbendâ, vel alio stipendio congruo. Alterum caput, quod Evangelii prædicationem spectat, decernit, omnes Episcopos teneri per se ipsos, si legitime non fuerint impediti, ad prædicandum sanctum Jesu Christi Evangelium: Si verò contigerit eos legitimo detineri impedimento, teneri juxta formam Concilii Lateranensis, Viros idoneos assumere ad hujusmodi prædicationis officium salubriter exequendum. In Sessione sexta duo pariter edita sunt Decreta; unum in quo Catholica declaratur doctrina *De justificatione* sexdecim Capitibus, & hæreticorum errores, præsertim *de extincto hominis Arbitrio post Adæ peccatum: De justificatione impii per solam Fidem: De justificatione per solam imputationem justitiæ Christi; exclusâ gratia sanctificante intrinsicâ & inherente: De justificatione per Fidem, seu fiduciam divinæ misericordiæ, quâ quis certò credit, sibi propter Christum remissa esse peccata: De impossibilitate mandatorum Dei: De inamissibilitate justificationis, nisi per peccatum infidelitatis: De non admittendo Purgatorio post hanc vitam: De excludendis à justificatione bonis operibus, & rejiciendis justificationum meritis &c.* De his, inquam, & aliis, quæ ad hominum justificationem attinent, Capitibus, errores hæreticorum tribus supra triginta Canonibus fuerunt damnati. Alterum ejusdem Sessionis sextæ Decretum, quod est de Reformatione, complectitur Capita quinque. Primum decer-

decernit, teneri Prælatos residere in suis Ecclesiis. Secundum statuit, Presbyteros Beneficiatos, habentes curam animarum, per Ordinarios ad residentiam esse cogendos. Tertium definit, excessus Clericorum ac Regularium degentium extra Monasterium, corrigi debere ab Ordinario loci, tanquam Sedis Apostolicæ delegato. Quartum sancit, Ecclesias quascunque majores, earumque personas posse ab Episcopis visitari, quoties opus fuerit. Quintum denique declarat, nulli Episcopo licere Pontificalia in alienâ exercere Diœcesi, nec Ordines conferre, nisi volente & consentiente loci Ordinario. In Sessione septima Concilii Tridentini duo etiam promulgata sunt Decreta, quorum unum spectat Sacramenta à Christo Domino instituta; Alterum est de Reformatione. Primum continet quindecim Canones de Sacramentis in genere, quatuordecim de Baptismo in specie, & tres de Sacramento Confirmationis, quibus damnantur recentes circa Catholicam de Sacramentis doctrinam Hæreticorum errores. Alterum ejusdem Sessionis septimæ Decretum, quod est de Reformatione, quindecim constat Capitibus, quibus damnatur pluralitas Beneficiorum incompatibilium, & præscribuntur dotes, examen, cæteraque id genus, quæ præquiri debent ab his, qui ab Episcopis ad Beneficia promoventur. In octava Sessione, propter litem Tridenti exortam, publicatum est Decretum de transferendo Concilio Bononiam, ubi duæ Sessiones habitæ sunt, nona videlicet, & decima, in quibus tamen nihil decisum est, sed tantum prorogationis Decretum promulgatum est, quod omnibus Patribus placuit. Hæc

decem

decem Sessiones habitæ sunt sub *Paulo III.* Pontifice Maximo, sed eo mortuo die x. mensis Novembris MDXLIX. *Julius III.* ejus Successor Concilium è Bononia Tridentum anno MDL. reduxit, sexque Sessiones sub eodem Pontifice fuerunt celebratæ.

D. Perge, si placet, eâdem brevitate cum claritate conjunctâ summariè ea describere, quæ acta sunt in his Sessionibus Oecumenici Concilii Tridentini, quæ sub *Julio III.* Pontifice Maximo habitæ sunt.

M. In Sessione Concilii Tridentini xi. & quæ prima est sub *Julio III.* Romano Pontifice, quæque Tridenti habitæ est die i. mensis Maji anni MDLI. duo lecta sunt ejusdem Summi Pontificis Diplomata, unum videlicet de resumendo Concilio, alterum de eodem Concilio ad Civitatem Tridentinam reducendo, ac de Legatis sive Præsidibus ad illud moderandum electis. In duodecima Sessione, quæ fuit secunda sub *Julio III.* Pontifice Maximo, nihil definitum est, sed dumtaxat prorogata Sessio, in qua de Sanctissimo Eucharistiæ Sacramento, necnon de his, quæ ad Reformationem, vel ad faciliorem & commodiorem Prælatorum residentiam pertinebant, agendum monuit Sacra Synodus. In decima tertia Sessione, quæ sub *Julio III.* fuit ordine tertia, edita sunt tria Decreta, quorum primum est de Augustissimo Eucharistiæ Sacramento, quo octo Capitibus traditur & explicatur doctrina Fidei de Eucharistiæ Sacramento, & undecim Canonibus proscribuntur Hæreticorum errores contra realem præsentiam Corporis & Sanguinis Christi Domini in Eucharistiæ Sacramento; contra Transubstantiationem, seu conversionem.

sub-

substantiæ panis & vini in substantiam Corporis & Sanguinis Christi Domini, contra Festivitatem in honorem Corporis Christi Domini institutam, & contra antiquissimum Ecclesiæ morem aservandi in pixide Eucharistiam, eamque ad infirmos deferendi; quem usum damnant hæretici Lutherani, quod velint Corpus Christi non esse permanenter in Eucharistia, sed solum in actuali illius usu, seu comestione. Alterum ejusdem Sessionis decimæ tertiæ Decretum, quod est de Reformatione, octo similiter complectitur Capita, quæ Prælatorum jurisdictionem spectant, & Appellationibus modum imponunt. Tertium ejusdem Sessionis Decretum continet Salvum conductum, quem Sancta Synodus Tridentina concessit Hæreticis Protestantibus, qui audiri postulabant supra quatuor de Eucharistia Articulis, quorum subindè definitionem prorogavit Sacra Synodus. Hi porro erant Articuli: I. *An necessarium sit ad salutem & divino jure præceptum, ut singuli Christi fideles sub utraque specie ipsum Venerabile Eucharistiæ Sacramentum accipiant*: II. *Nùm minùs sumat qui sub alterà, quàm qui sub utraque specie communicat*? III. *An erraverit Sancta Mater Ecclesia, Laicos & non celebrantes Sacerdotes sub panis specie dumtaxat communicando*? IV. *An etiam parvuli communicandi sint*? In Sessione decima quarta, quæ sub Julio III. Pontifice Maximo est ordine quarta, prolixè exposita est Catholicæ Ecclesiæ doctrina de Sacramentis Pœnitentiæ, & Extremæ Unctionis. Et primò quidè de Sacramento Pœnitentiæ novem edita sunt Capita, & quindecim conscripti Canones, quibus adversùs hæreticos, pœ-

niten-

nitentiæ oſores , definitum fuit , I. Pœnitentiam eſſe Sacramentum à Chriſto Domino poſt Reſurrectionem ſuam inſtitutum . II. Pœnitentiæ Sacramentum eſſe lapſis poſt Baptiſmum neceſſarium . III. Pœnitentis actus, Contritionem, Confessionem , & Satisfactionem , eſſe quaſi materiam hujus Sacramenti . IV. Formam Sacramenti Pœnitentiæ ſitam eſſe in his Miniſtri verbis . *Ego te abſolvo &c.* V. Contritionem includere doloré ac detestationem de peccato commiſſo cum propoſito non peccandi de cœtero . VI. Integram apud Sacerdotem peccatorum Confessionem lapſis neceſſariam eſſe neceſſitate mediæ ad juſtitiam conſequendam . VII. Non ad omnes Chriſti fideles, ſed ad ſolos Episcopos & Sacerdotes , hæc Chriſti verba : *Quorum remiſeritis peccata , remittuntur eis &c.* ſpectare . VIII. In Miniſtro Pœnitentiæ , præter poteſtatem Ordinis , requiri juridiſctionem ; & Episcopos poſſe ſibi nonnullos reſervare Caſus , ita tamen ut in articulo mortis nulla ſit reſervatio . Denique , totam pœnam per Pœnitentiæ Sacramentum non remitti , ſed pœnam æternam mutari in pœnam temporalem , ſeu ſatisfactionem , quæ pœnitenti à Sacerdote imponi, & cum gravitate criminum proportionata, quantum fieri poteſt , eſſe debet . Iis , quæ ſpectant Pœnitentiæ Sacramentum , Sancta Synodus Tridentina ſubjungit tria Capita , & quatuor Canones de Sacramento Extremæ Unctionis , quibus definit primò , Extremam Unctionem eſſe novæ legis Sacramentum propriè dictum . II. Extremam Unctionem delicta ac peccati reliquias abſtergere , alleviare animam ægroti , & corporis ſani-

sanitatem interdum conferre. III. Ministros Sacramenti Extremæ Unctionis esse Presbyteros. Hanc denique Sessionem XIV. concludit Sancta Synodus Tridentina Decreto de Reformatione, tredecim complectente Capita, Ecclesiæ Prælatos, Beneficiarios, vel Clericos spectantia ferè omnia, & inter cætera alia sancit, ut Clerici, qui in Sacris Ordinibus sunt constituti, aut Ecclesiastica Beneficia possident, utantur veste Ordini ac dignitati congruente: Ut voluntarii homicidæ ab Ordinibus arceantur, aut si jam sint ordinati, à ministerio separentur, ac omnibus beneficiis careant: Ut Religiosi, translati ad alium Ordinem, in claustro sub obedientia maneant, & Beneficiorum Sæcularium incapaces existant: Ut nemo juspatronatus obtineat, nisi ex fundatione vel donatione, & ille, qui à legitimo jurispatronatus possessore ad aliquod Beneficium Ecclesiasticum est præsentatus, non ab alio, quàm ab Ordinario, seu Episcopo, instituat. In Sessione decimaquintâ duo edita sunt Decreta; unum de proroganda Sessione ad expectandos Protestantium Theologos, sicut eorum nomine postulatum fuerat à Witembergensis & Saxonix Ducum Oratoribus. Alterum Decretum fuit de novo Salvo-Conductu, seu publicæ securitatis libello, iisdem Protestantibus concedendo, ad normam illius, qui olim Bohemis in Concilio Generali Basileensi datus fuerat. In Sessione decimâ sextâ, quæ habita est die xxiii. mensis Aprilis anni MDLII. cum Germania multis bellis ac perturbationibus esset infestata, suspensum est Concilium Generale Tridentinum, Patribus omnibus consentientibus, exceptis

ptis

ptis duodecim ex Hispania Episcopis, qui assentiri noluerunt. Ad decennium autem duravit hæc Concilii Tridentini suspensio, quæ nec tolli potuit sub *Marcello II.* successore *Julii III.* nec sub *Paulo IV.* post *Marcellum II.* electo, sed tandem sub *Pio IV.* Pontifice Maximo sublata est, & resumptum ac continuatum Concilium Oecumenicum Tridentinum, atque in eo novem postremæ Sessiones sub eodem Pontifice *Pio IV.* habitæ sunt.

D. Superfunt itaque novem adhuc Sessiones in Concilio Generali Tridentino sub *Pio IV.* Pontifice Maximo celebratæ, quarum subindè Synopsis hinc continuato ordine exhibere debes, quò plenam & integram rerum omnium, quæ in viginti quinque Concilii Tridentini Sessionibus gestæ ac statutæ sunt, notitiam habere possim.

M. Congregato iterum Concilio Tridentino anno MDLXII. cœpta est die XVIII. mensis Januarii ejusdem anni decima septima Sessio, quæ prima fuit sub *Pio IV.* & in ea lectum ac promulgatum est Decretum de celebrando, seu continuando Concilio Tridentino, quâcumque sublata suspensione, juxta formam & tenorem Litterarum *Pii IV.* ac de tractandis in eo, debito servato ordine, quæ, proponentibus Legatis, apta & idonea magis Concilio viderentur ad levandas horum temporum calamitates, sedandas de Religione Controversias, corrigendos depravatorum morum abusus, abolendas Hæreses, & ad conciliandam veram pacem, ac concordiam Christianam, ubique gentium ejectam ac profligatam. Sessiones XVIII. XIX. & XX. nihil aliud sunt, quàm prorogationes Sessionum, & promulgationum De-

creto-

cretorum, tùm in gratiam Protestantium Germanorum, quorum adventus de die in diem expectabatur, & quibus in Sessione XVIII. data est amplissima veniendi ad Concilium securitas, desumptis formulis ex Salvo-conductu, quem Bohemis Concilium Basileense indulserat; tùm etiam in gratiam Episcoporum Gallorum, qui ingenti numero Tridentum accessuri erant; tùm denique propter varias difficultates ex diversis causis exortas, atque etiam ut congruentius, majorique cum deliberatione omnia procederent, nimirùm ut dogmata, cum iis, quæ ad reformationem spectabant, simul tractarentur & sancirentur. In Sessione vigesima primâ, Doctrina Ecclesiæ Catholicæ de communione sub utrâque specie, & parvulorum, quatuor Capitibus est declarata, & erronea Hæreticorum Dogmata, huic doctrinæ opposita, quatuor itidem Canonibus fuerunt damnata, ac definitum contra illos primò, Laicos & Clericos non conficientes, non adstringi jurè divino ad communionem sub utrâque specie. Secundò, justis de causis ab Ecclesia abrogatam fuisse consuetudinem communicandi sub utrâque specie. Tertiò, nullâ gratiâ ad salutem necessariâ eos defraudari, qui sub unâ tantùm specie communicant. Quartò, Parvulos nullâ obligari necessitate ad Eucharistiæ communionem. His Capitibus & Canonibus Sessionis vigesimæ primæ, ad Fidem Catholicam spectantibus, adjungit Sancta Synodus Tridentina, Decretum de Reformatione, novem complectens capita, in quibus decernit primò, ut nihil Episcopi, aut alii Ordinum Collatores, vel eorum Ministri pro Ordinum Collatione, vel pro litteris dimissoriis

foriis aut testimonialibus etiã spontè oblatum , quovis prætextu accipiant , & contrarias huic Decreto consuetudines ait Sancta Synodus esse abusus , & cosuptelas simoniacæ pravitati faventes . Secundò , statuit Sacra Synodus , ut nullus absque Beneficii , aut Patrimonii titulo ad Sacros Ordines promoveatur . Potest tamen Episcopus aliquem absque titulo ordinare , sed tunc tenetur Ordinato alimenta suppeditare . Tertiò , potestatem dat Sacra Synodus Episcopis uniones perpetuas faciendi in casibus à jure permissis . Quartò , præcipit Sancta Synodus , ut Monasteria commendata , in quibus non viget regularis observantia Disciplina , & Beneficia quæcumque , ab Episcopis visitentur ; si verò in eis vigeat Disciplina regularis , admoneantur paternè eorum Superiores ab iisdem Episcopis : si autem sex post admonitionem mensibus illi negligentè se gerant , tunc Episcopi ea Monasteria visitare possint , & Monachos , vel Canonicos Regulares corrigere . Quintò , jubet Sancta Synodus , ut Quæstorum nomen & officium penitùs aboleantur . Quæstores autem dicebantur ii , qui colligebant eleemosynas , quas erogabant hi , quibus Indulgentiæ concedebantur ; sed quia isti Quæstores suâ potestate abutebantur , & multis adhibitis fraudibus pecunias è simplicis plebis pietate in suum proprium commodum emungebant ; necessarium omninò visum est Patribus Concilii Tridentini illos penitùs abolere , & facultatem promulgandi Indulgentias , & alias Sedis Apostolicæ gratias , transferre in Episcopos , qui oblata à fidelibus in pios usus subsidia , seu eleemosynas , absque ullâ mercede colligerent . In Sessione vigesima

secunda explicarunt Patres Concilii Tridentini doctrinam Catholicam de Sacrificio Missæ octo Capitibus, & Hæreticorum errores huic oppositos damnarunt novem Canonibus, quibus definierunt primò, Christum Dominum sub speciebus panis & vini Corpus & Sanguinem suum Deo Patri obtulisse, & Apostolis, quos in ultima Cœna novi testamenti Sacerdotes constituit, ut ea sub earumdem rerum Symbolis offerrent, præcepisse. Secundò, Eucharistiam esse verum ac visibile Sacrificium propitiatorium pro vivis & defunctis. Tertiò, Missam offerri quidè in honorem Sanctorum, non autem ipsismet Sanctis, sed Deo soli Optimo Maximo. Probarunt deindè Patres ejusdem Concilii Canonem Missæ, ex quo Hæresiarcha *Lutherus* temerè verba omnia expunxerat, quibus innui poterat, Missam esse verè ac propriè dictum Sacrificium. Commendarunt insuper solemnes Missæ Sacrificii cœremonias, & confirmarunt usum miscendi aquam cum vino in Calice offerendo. Huic Catholicæ de Sacrificio Missæ doctrinæ semel expositæ, & ab Hæreticorum erroribus vindicatæ, subjiciunt Patres Concilii Tridentini Decretum, de observandis & evitandis in celebratione Missæ, jubentque Episcopis, ut cum omni sollicitudine curent illos abusos è medio tollere, quos vel avaritia per importunas, atque illiberales eleemosynarum exactiones; vel irreverentia, dùm videlicet Missæ Sacrificio adsunt fideles absque composito corporis habitu, sine devoto mentis & cordis affectu, vel immodestiâ præ se ferentes confabulantur, aut tandè vana superstitio per certum quemdam candelarum numerum invexerunt. Præter istud

istud de observandis & evitandis in Missæ Sacrificio Decretum, aliud Patres Concilii ediderunt de *Reformatione*, quod undecim Capita complectitur, quibus, inter cætera alia, præcipiunt primò, ut veteres de vita & honestate Clericorum Canones innoventur. Ex quo, ut obiter dicam, facile intelligere potes, errasse quosdam recentiores Casuistas, qui ausi sunt asserere, omnes antiquos de moribus Clericorum & Christianorum Canones per desuetudinem, seu per non usum, esse penitus abrogatos. Quod certè falsi apertè evincunt tot præcepta, quæ passim ad observandos antiquos Canones inculcant Patres Concilii Tridentini, eorum ardens desiderium ut instaurarentur, diligens cura, studium, contentio, ut adhuc vigentes sedulò tenerentur, retinerentur collabentes, prorsus collapsi renovarentur; moderante tamen omnia Christianâ prudentiâ, ne præcipiti zelo pax Ecclesiæ & fidelium concordia perturbaretur. Ex quo liquet, nunquàm sic exolescere posse antiquos Canones Conciliorum ad mores pertinentes, ut eos velut penitus abrogatos, & tanquam Lacedæmoniorum, aut Atheniensium leges abolitas pridem & extinctas, spectare liceat. Semper enim in corde Clericorum, & omnium Christianorum impressi & consignati esse debent, ibique vivere. Semper ad eos conniti & contendere debent omnes Christiani, ac sibi ipsis graviter succensere, quòd ab eorum observatione tam longè absint. Secundò, Patres Concilii Tridentini Decreto de *Reformatione* statuunt, ut hi, qui ad Cathedrales regendas Ecclesias assumuntur, præter morum probitatem, eâ scientiâ polleant, quâ injuncti sibi

muneris, angelicis humeris formidandi, possint necessitati satisfacere. Præscribunt etiam, ut ii, qui in dictis Ecclesiis obtinent Beneficia, quibus onera varia sunt annexa, infra annum Ordines suscipiant requisitos. Cum eo Concilii Decreto praxim suam concilient, si possint, hi, qui ferè nusquam Sacros Ordines suscipiunt, quamvis fruantur Canonicatibus & Beneficiis, quibus annexum est onus Missam celebrandi. In Sessione, vigesimâ tertiâ Patres Concilii Tridentini exposuerunt quatuor Capitibus Catholicam de Ordinis Sacramento doctrinam, & huic oppositos hæreticorum errores Canonibus octo damnarunt, ac definierunt primò, Sacerdotium novæ Legis esse à Christo Domino institutum, & completi potestatem consecrandi, offerendi & ministrandi Corpus & Sanguinem Christi, necnon peccata dimittendi & retinendi. Secundò, esse septem Ordines, quorum tres dicuntur *Majores*, alii verò quatuor *Minores*. Tertiò, Ordinem esse verè Sacramentum. Quartò, in Sacramento Ordinis imprimi characterem. Quintò, Episcopos, inter cæteros Ecclesiasticos gradus, ad Ordinem Hierarchicum præcipuè pertinere. Sextò, in Ordinatione Episcoporum, Sacerdotū & cæterorum Ordinum, nec populi, nec cujusvis Sæcularis potestatis & magistratus consensum, si ve vocationem, si ve auctoritatem ita requiri, ut sine eâ irrita sit Ordinatio. Post illam de Sacramento Ordinis Expositionem Fidei, ac errorum damnationem, ediderunt Patres Concilii Tridentini Decretum de Reformatione octodecim, comprehensum Capitulis, in quorum primò declararunt, eos, quibus incumbit animarum cura,

teneri

teneri ad personalem in sua Ecclesia, vel Diœcesi, residentiam. Quo jure autem, an divino, an verò humano tantum, Pastores ad personalem residentiam obstringantur? diù multumque tam in privatis Theologorum, quàm in Generalibus Patrum Cœtibus disputatum est, ac tandem definitum, præcepto divino omnibus, quibus animarum cura demandata est, mandatum esse, ut oves suas agnoscant, pro iis Sacrificium offerant, verbiq; divini prædicatione, Sacramentorum administratione, ac bonorum operum exemplo pascant, eaque omnia ab iis Pastoribus nequaquàm præstari & impleri posse, qui gregi suo non invigilant, neque assunt. In aliis ejusdem Decreti *de Reformatione* Capitulis Patres Concilii Tridentini circa legitimas causas, propter quas Pastores à suis Ecclesiis, vel Diœcesibus absunt, circa Clericorum Ordinationes, & Seminariorum erectionem, multa decernunt, quæ puriorem veteris Ecclesiæ Disciplinam redolent, quæque si eâ, quâ par est, diligentia executioni mandari curarent Episcopi, brevi omni procul dubio suum Clero antiquum restituerent splendorem. In Sessione vigesima quarta Patres Concilii Tridentini exposuerunt doctrinam Catholicam de Sacramento Matrimonii, declarando illud esse verum novæ Legis Sacramentum, & indissolubile, atque duodecim Canonibus damnando errores Hæreticorum, qui primò negabant, Matrimonium esse propriè dictum Sacramentum novæ Legis. Secundò, dicebant, nullâ Lege divinâ prohibitum esse Christianis plures simul habere uxores. Hinc est, sicut alibi observavimus, quòd *Lutherus*, alique illius

Secæ Coriphæi, Hassiæ Lantgravio Poligamiam
 permiserint. Tertiò, affirmabant, Ecclesiam,
 non potuisse constituere impedimenta Matri-
 monium dirimentia. Quartò, pertendebant,
 Ecclesiam errare, cum docet, propter adulterium
 alterius conjugum matrimonii vinculum non posse
 dissolvi. Quintò, docebant, Ordines Sacros, aut
 solemnem in approbata religione professionem,
 non esse matrimonii impedimenta dirimentia.
 Hos, & alios ejusmodi Hæreticorum errores post-
 quàm duodecim, canonibus damnarunt Patres
 Tridentini, Decretum ediderunt *de reformatione*
matrimonii complectens capita decem, ac primò
 edixerunt, matrimonia clandestina fuisse valida,
 quamdiù Ecclesia ea irrita non declaravit, sed de-
 inceps fore invalida, si aliter quàm præsentè Pa-
 rocho, vel alio Sacerdote, de ipsius Parochi, seu
 Ordinarii licentiâ, & duobus, vel tribus testibus,
 contracta fuerint. Secundò, sanxerunt, rata &
 valida esse matrimonia à filiis familias sine con-
 sensu parentum contracta. Tertiò, varia statuerunt
 de proclamationibus necessariò præmittendis ad
 celebrationem matrimonii; de cognatione spiri-
 tuali, de impedimento publicæ honestatis, de af-
 finitate, de raptu, aliisque matrimonii impedi-
 mentis. Hoc Decretum, ad matrimonii reforma-
 tionem spectans, aliud subsequitur Decretum de
 morum ac disciplinæ reformatione, quod uno &
 viginti Capitulis continetur. Denique, in Sessione
 vigesima quinta, quæ fuit ultima, Patres Concilii
 Tridentini varia ediderunt Decreta de Purgato-
 rio, de invocatione, veneratione ac reliquiis San-
 ctorum, Sacris Imaginibus, De Indulgentiis, nec-
 non

non de approbandis consuetudinibus ac Sanctionibus Ecclesiæ, quæ ab Hæreticis impugnabantur, videlicet de ciborum delectu, Jeuniis, & diebus festis. Post Decreta Dogmatica, Sanctiones viginti duas *De Regularium Disciplina* promulgarunt Patres, quibus alia addiderunt Decreta, Primum videlicet de Indice librorum, Catechismo, Breviario & Missali. Alterum de loco Oratorum, quorum, & Imperatoris, Regum, Rerum publicarum, ac Principum jura & privilegia illæsa, & salva esse, Concilium declarat, & in eodem statu permanere, quo extabant ante Synodum. Tertium Decretum spectat ipsius Synodi Tridentinæ executionem. Quartum est de legendis omnibus ejusdem Synodi Decretis, quæ sub Summis Pontificibus *Paulo III.* & *Julio III.* condita fuerant, & ad Dogmata & ad mores attinebant, quod universis Patribus placuit, & peractum est. Ultimum Decretum est de finienda Synodo, & de confirmatione omnium Definitionum ac Decretorum, quæ in Synodo Tridentina edita fuerant, petendâ à Summo Pontifice *Pio IV.* Sic sessioni vigesimæ quintæ, seu ultimæ, finem imposuerunt Patres Tridentini die xv. mensis Decembris anni MDLXI I. & rerum omnium, quæ in Concilio definierant, decreverant, ac declaraverant, confirmationem impetrarunt ab eodem Summo Pontifice, qui, singulari ad hoc concessâ Bullâ xv I I. Kalend. Februarii anni MDLXIV. Concilium Tridentinum, ceu Oecumenicum, recipi, & ab omnibus observari mandavit. Hoc pacto conclusum ac finitum tandem est Concilium Generale Tridentinum, pluriès licet variis temporum injuriis intermissum, bellorum procellis jactatum,

&atum, & inimicorum insidiis turbatum, post
 elapsum decem & octo annorum intervallum, post
 habitas viginti quinque Sessiones Patrum, post va-
 ria pro reformatione & Disciplina Ecclesiæ con-
 dita Decreta, post quinque viros successivè Roma-
 nos Pontifices, *Paulum III.*, *Julium III.*, *Marcellum II.*,
Paulum IV., & *Pium IV.*, post denique viginti sex
 supra centenos sancitos Canones, quorum trigin-
 ta tres de justificatione, tredecim De Sacramentis
 in genere, quatuordecim de Baptismo, & tres de
 Confirmatione editi sunt in Sessione sextâ sub
Paulo III. Romano Pontifice. In sessione verò de-
 cimâ tertiâ sub *Julio III.* Summo Pontifice pro-
 mulgati sunt Canones XI. de Eucharistiæ Sacra-
 mento, & in Sessione decimâ quartâ confecti ca-
 nones quindecim de Sacramento Penitentiae, &
 quatuor de Extrema Unctione. Denique, sub
Pio IV. Romano Pontifice triginta tres editi sunt
 Canones, videlicet in Sessione vigesima prima,
 quatuor Canones de Communionem sub utraque
 specie: In vigesima secunda Sessione novem Cano-
 nes De Sacrificio Missæ: in vigesima tertia Sessione
 octo Canones de Sacramento Ordinis: tandem in
 vigesima quartâ Sessione duodecim Canones de
 Sacramento Matrimonii. Ex eo subducto calculo
 exsurgit numerus centum & viginti sex Canonum,
 qui in Tridentina Synodo Generali editi sunt,
 quosque, ut verbis utar *S. Leonis Magni* Epistola
 LXXXIV. Veteris Editionis, *Spiritu Dei conditos, &*
totius Orbis reverentiâ consecratos suscipere, vene-
 rari, atque ad eorum normam mores Fidemque
 suam omnes Christiani exigere debent, si salvi esse
 velint.

D. Catechismus ille , qui sub nomine Concilii Tridentini circumfertur , ac vulgò *Catechismus Concilii Tridentini* appellatur , fuitne reverà editus à Patribus in Oecumenica Synodo Tridentina congregatis ?

M. Catechismus Concilii Tridentini jussu Patrum ejusdem Concilii compositus fuit à tribus Ordinis FF. Prædicatorum Patribus , videlicet à *Leonardo Marini* Archiepiscopo Lancianensi, *Ægidio Foscario* Episcopo Mutinensi, & *Francisco Forerio*, Concilii Tridentini Secretario , eumque latinitate & stylo Ciceroniano donavit *Paulus Manutius* , vir omnis elegantix , atque virtutis & totius antiquitatis studiosissimus . Hunc Catechismum , non solum delectu verborum & latini sermonis puritate , sed etiam gravitate Sententiarum , ubertate & securitate doctrinæ eximium, Apostolicâ autoritate approbarunt Summi Pontifices *Pius V.* & *Gregorius XV.* Ejus utilitatem sæpius *S. Carolus Borromeus* Cardinalis & Archiepiscopus Mediolanensis, impensè commendavit , eumque , tanquam genuinum Concilii Tridentini factum & interpretem , recipit universa Ecclesia . Ratio autem, quâ potissimum Patres Concilii Tridentini moti sunt , ut hic Catechismus sub nomine Concilii prodiret in lucem , hæc fuit : Hæretici Lutherani, Calvinistæ, & alii , qui tum temporis fidelium mentes corrumpere sibi proposuerant, cum fieri nullo modo posse intelligerent, ut cum omnibus coram loquerentur, & in eorum aures venenatas voces infunderent ; idem aliâ ratione aggressi, multò facilius ac latius impietatis errores disseminarunt . Nam præter ingentia illa Volumina , quibus Catholicam fidem

ever-

evertere conati sunt, infinitos etiam libellos conscripserunt, qui, cum pietatis speciem præ se ferrent, incredibile est, quam facile incautos simplicium animos deceperint. *Quamobrem* (ut legitur in Præfatione ejusdem Concilii Tridentini) *Patres Oecumenicæ Tridentinæ Synodi*, cum tanto & tam pernicioso huic malo salutarem aliquam medicinam adhibere maximè cuperent, non satis esse putarunt graviora Catholica Doctrinæ capita contra nostri temporis Hæreses decernere, sed illud præterea sibi faciendum censuerunt, ut certam aliquam formulam, & rationem Christiani Populi ab ipsis fidei rudimentis instituendi traderent, quam in omnibus Ecclesiis illi sequerentur, quibus legitimi Pastoris, & Doctoris munus obeundum esset. Patribus itaque visum est maximè referre, si liber Sæctæ Synodi auctoritate ederetur, ex quo Parochi, vel omnes alii, quibus docendi munus impositum est, certa præcepta peterè, atque depromere ad fidelium adificationem possent, ut quemadmodum unus est Dominus, una Fides, ita etiam una sit tradendæ fidei, ad omniaque pietatis officia populum Christianum erudiendi communis regula atque præscriptio. Hunc igitur Concilii Tridentini Catechismum, qui maximâ in Catholica Ecclesia auctoritate pollet, tanquam Fidei nostræ Enchiridion, Pastores, & alii, quibus, cura incumbit animarum, nocturnâ debent versare manu, versare diurnâ, quò populum sibi à Deo creditum salutari doctrinâ instituere, & ad bonos mores sedulò informare possint.

D. Fueruntne aliqua Concilia Nationalia seu Provincialia celebrata ad promovendam executionem, seu observationem rerum, quæ tùm ad
Fi-

Fidem Catholicam contra Hæreticos tutandam, tum ad instaurandam contra pravitatem morum Ecclesiasticam Disciplinam decretæ ac definitæ sunt in Concilio Generali Tridentino ?

M. Plurima in variis Orbis Christiani partibus Episcopi Concilia Nationalia, seu Provincialia, celebrarunt, ut ea, quæ in Concilio Oecumenico Tridentino tam circa Fidem, quàm circa emendationem morum statuta ac sancita fuerant, executioni mandarentur, & ab omnibus fidelibus, eà, quâ par erat, obedientiâ ac sedulitate observarentur. Referam in primis Concilia Nationalia seu Provincialia, quæ in Galliis habita sunt, dein, ea, quæ in Italia; denique, ea, quæ in Hispania & in Belgio fuerunt convocata. Inter Concilia Nationalia seu Provincialia, quæ Sæculo XVI. post Concilium Tridentinum habita sunt, primum tenet locum Concilium Remense, quod anno MDLXIV. indictum est à *Carolo à Lotharingâ* Cardinali Archiepiscopo Remensi, & ex Ducum Lotharingæ prosapia Principe, qui statim ac ex Concilio Tridentino, cui interfuerat, in Galliam esset reversus, Concilium Remense convocavit, & in eo publicas Deo gratias egit, quòd Generalem Synodum Tridentinam finitam vidisset, & Provinciale primam Synodum in Galliis post Oecumenicam Synodum Tridentinam primus omnium Metropolitanorû celebrasset, viamq; cæteris aperuisset. Hæc Synodus Remensis, in qua viginti Statuta ad Ecclesiasticæ Disciplinæ emendationem edita sunt, novemdecim Congregationibus fuit absoluta, in quarum quartâ Episcopi, Abbates, ac cæteri, qui huic Synodo intererant, professionem Fidei emiserunt,

con-

contestantes, se firmà fide complecti & tenere omnia, quæ de Fide in superioribus Oecumenicis Conciliis, & novissimè in Sancta Generali Synodo Tridentina sunt definita, & insuper de septem Ecclesiæ Sacramentis, inprimis de Augustissimo Eucharistiæ Sacramento, & Missæ Sacrificio, cæterisque dogmatibus adversus Hæreses iis temporibus exortas, sentire & credere cum eadem Synodo damnantes & detestantes omnem hæresim, quam eadem Sancta Synodus damnavit & anathematizavit. Contigit autem in Congregatione x1. eiusdem Synodi Remensis res quædam observatione digna, quam hîc silentio prætermittere non debeo. In ea quippè Congregatione x1. actum est de Causa *Odeti Castillionei* Cardinalis & Episcopi Bellovacensis, qui erat unus ex Suffraganeis Provinciæ Remensis, & apertè à Fide Catholica defecerat. Fratres huius hæretici Cardinalis & Episcopi Bellovacensis, *Gaspar* Admiralius, seu summus in Regno Galliæ rerum maritimarum Præfectus, & *Franciscus*, natu minor, erant præcipui fautores & duces Hæreticorum Calvinistarum in Galliis, quorum armis strenuè obstiterunt Principes Lotharingii duo, *Franciscus* Dux Guisus (qui erat frater *Caroli à Lotharingia* Cardinalis Archiepiscopi Remensis) & *Henricus Guisus*, filius *Francisci*. Hi ambo præcipui erant Catholicorum duces ac acerrimi defensores; undè internecina odia Guisianos inter & Castillioneos exarsere. Cum igitur Causa *Odeti Castillionei* Cardinalis & Episcopi Bellovacensis, Catholicæ Fidei desertoris, in hac Congregatione x1. ageretur, iamque omnibus constaret, eum ob hæresim à *Pio IV.* Pontifice Maximo citatum ex forma juris, nec Romæ se

sisten-

sistentem, habito Cardinalium consilio, exauctoratum fuisse, & affixis per Urbem schedulis anathemate damnatum; noluit tamen *Carolus à Lotharingia* Cardinalis, & hujus Concilii Remensis Præses, in hac Causa *Odeti Castillionei* Cardinalis hæretici sedere tanquam iudex, eo solo nomine, quod inter suam & Castillioneorum familiam graves iam pridem intercederent offensiones ac simultates, etsi ipse nullas cum eo gereret inimicitias. Hujus itaque Causæ discussionem ac iudicium ferendum permisit istius Synodi Episcopis, quorum tandem hæc sententia fuit, ut scriberetur ad Regem Christianissimum, qui pro sua pietate declararet, *Odetum Castillioneum* Cardinalem & Episcopum Bellovacensem, ob hæresim exauctoratum, omninò excidisse ab administratione Ecclesiæ Bellovacensis cum in spiritualibus, tum in temporalibus, adeoque alium Episcopum in eius locum sufficiendum esse. Ad hanc Remensem Synodum ut venirent, citati sunt Episcopi Provinciæ Cameracensis, qui tamen venire renuerunt, eò quod per *Pauli IV.* Pontificis Maximi Decretum à Provincia Remensi, cujus olim Suffraganei extiterant, fuissent divulsi, eorumque Ecclesia, seu Cameracensis, in Metropolim fuisset erecta, quod *Pauli IV.* Decretum *Pius IV.* ejus successor, novo Diplomate confirmavit. Quapropter, Episcopi Provinciæ Cameracensis, ut notum facerent, se neque dignitatis gradu, neque pietatis studio, neque in Ecclesiam affectu, Remensis Provinciæ Episcopis inferiores esse, aliud Concilium, seu Cameracense, anno MDLXV. seorsum ab illis celebrarunt, Præsidente *Maximiliano à Bergis*, Archiepiscopo.

scopo & Duce Cameracensi, & in eo viginti duo Decreta, quæ Disciplinæ emendationem spectant, & pluribus Capitulis, scû Titulis constant, condiderunt, atque Concilium Generale Tridentinum receperunt hac verborum formulâ: *Ego N. omnia & singula, quæ in sancta Synodo Tridentina definita & statuta sunt, palam recipio; necnon veram obedientiam Summo Romano Pontifici spondeo & profiteor; simulque hæreses omnes à sacris Canonibus, & Generalibus Conciliis, præsertimque à prædicta Synodo Tridentina damnatas, publicè detestor & anathematizo.* Utriusque Archiepiscopi, Remensis, & Cameracensis, in celebrandis Conciliis, & recipiendis Oecumenicæ Synodi Tridentinæ Decretis, zelum ac pietatem æmulati sunt alii Ecclesiæ Gallicanæ Archiepiscopi. Serenissimus Princeps Carolus Borbonius, Cardinalis, & Archiepiscopus Rhotomagensis anno MDLXXXI. indixit in sua Metropoli Concilium, Rhotomagense dictum, in quo Episcopi inhærentes definitionibus, ac Decretis Concilii Tridentini, universos, qui aliter quàm Catholica, Apostolica & Romana credit ac prædicat Ecclesia, credere & pertinaciter asserere attentant, velût hæreticos & pertinaces, atque à communione Fidelium separatos, declararunt, & aliquot Decreta disciplinam Ecclesiæ spectantia ediderunt, videlicet: *De Episcopis, & Capitulis: De Episcoporum Officiis: De Curatorum & aliorum Presbyterorum, ac Parochianorum Officiis: De Monasteriis: De Jurisdictione Ecclesiastica: De Scholarum & Seminariorum fundatione & regimine.* Hanc tamen, præ cæteris aliis, Sanctionem, quæ legitur Capite nono illius Concilii, quæque istis temporibus, &
præ-

præsertim hisce locis maxime necessaria est, diligenter attendas velim: Cum deceat domum Dei sanctitudo, ut cujus in pace factus est locus, ejus cultus sit cum debita veneratione pacificus: sit ad Ecclesiam humilis & devotus ingressus, sit in ea devota conversatio Deo grata, inspicientibus devota, quæ considerantes non solum instruat, sed reficiat. Cessent in Ecclesiis confabulationes qualibet, cessent vana & multo potius fœda colloquia & prophana; eò nec libri nisi orationis & pietatis, nec alia nisi sancta inferantur. Cessent postremò quacumque divinum possunt perturbare Officium, aut oculos divina Majestatis offendere, ne ubi peccatorum est venia petenda, ibi peccandi detur occasio &c. Ad hanc utilissimam Sanctionem, utinam animum tantisper adverterent illi, qui festivis præcipue diebus in sacris Templis immodeste obambulant, vel altero genu terram contingunt, erecto altero, cui lævus innitatur cubitus, vel nugas obganniunt in aurem vicini, vel huc illuc circumferunt vagos oculos, vel denique inani vocum boatu, aut modulato Musicorum cantu & organis, quibus perstrepunt templa, nimium delectantur; non quòd Musicam corporalem damnam, si modicè, si sobriè, cultuque divino digna in templis adhibeatur, sed ut ostendam ista nihil esse, si absit tacitus ille pietatis affectus in Deum, quæ Deo cantio est gratissima, etiamsi nullus vocum & instrumentorum Musicorum strepitus accedat. Ludovicus à Lotharingia Cardinalis, dictus à Guisja, Remensis Archiepiscopus, Patru sui Caroli à Lotharingia Cardinalis itidem, & Remensis Archiepiscopi, cujus antea mentionem fecimus, pietatem æmulatus, alte-

alterum Concilium Remense anno MDLXXXIII. celebravit, in quo primùm de Catholica Fidei professione, juxta definitiones Concilii Tridentini & Formulam à Pio IV. Pontifice Maximo præscriptam, actum est; dein, de vita & moribus, habitu, tonsura, & Officiis Clericorum edita sunt viginti septem Decreta. Eodem anno, seu MDLXXXIII. *Antonius Prevotius Sanfacs*, Archiepiscopus Burdigalensis, Synodum convocavit, stabiliendarum Tridentini Concilii Sanctionum causâ, ex quibus triginta sex Decreta, quibus in hoc Provinciali Burdigalensi Concilio Ecclesiasticæ Disciplinæ consuluit, ferè omnia mutuatus est, ut ipsemet declarat in ejusdem Synodi Provincialis publicatione. Ad eundem annum, seu MDLXXXIII. referri debet Concilium Turonense, quod *Simon à Maille* Turonensis Archiepiscopus habuit, in quo Tridentini quoque Concilii Decreta Fidem spectantia suscepit, & secundùm ea Fidei professionem edidit, atque Disciplinam Ecclesiasticam circa Episcopos, Clericos, Monachos, & Laïcos, ex ejusdem Concilii Tridentini Decretis emendavit, ut scribit idem Archiepiscopus ad Gregorium XIII. Summum Pontificem his verbis: *Habebit ergò tua Sanctitas tuorum humillimorum servorum Turonensis Provinciæ Patrum Decreta, è Tridentino tuo excerpta Concilio, pro temporis instantis usu, conditione & necessitate.* Paulò post celebrationem illius Concilii Provincialis Turonensis, *Reginaldus de Beaulne* Archiepiscopus Bituricensis anno MDLXXXIV. Concilium Bituricense celebravit, in quo variis Decretis, ex Tridentina Synodo maximam partem desumptis, Disciplinam Ecclesiæ instauravit. Anno verò sequenti,

quenti, seu MDLXXXV. *Alexander Canigianus*, Aque-
 nis Archiepiscopus, Concilium Aqueense cœgit,
 in quo professionem Fidei, juxta Synodi Triden-
 tinæ definitiones, emisit, ac in Synodis Dioce-
 sanis emitti statuit, atque tribus supra quadra-
 ginta Constitutionum Capitibus Disciplinam Ec-
 clesiæ, secundum ejusdem Synodi Tridentinæ
 Decreta, reparavit. His Provincialibus Synodis,
 quæ ad executionem, & observantiam Decreto-
 rum Oecumenici Concilii Tridentini in Galliis
 Sæculo XVI. habitæ sunt, duas dumtaxat adjun-
 gam, Tolosanam videlicet & Avenionensem, qua-
 rum primæ, seu Tolosanæ, quæ indicta fuit anno
 MDXC. præfuit *Franciscus à Joyosa* Cardinalis &
 Archiepiscopus Tolosanus, & in eâ de emenda-
 tione morum, de vita & honestate Episcoporum,
 Parochorum, & Clericorum, sanctissimæ condite
 sunt Leges, quarum magna pars habetur in De-
 cretis Concilii Tridentini. Denique, Synodo Pro-
 vinciali Avenionensi habitæ anno MDXCVI. præfuit
 vir amplissimi meriti *Franciscus Maria Taurinus*,
 Archiepiscopus Avenionensis, & postea S. R. E.
 Cardinalis, qui sexaginta quatuor Decreta ad
 faciendam Ecclesiæ Disciplinam edidit, Decre-
 tis Oecumenicæ Synodi Tridentinæ omnino con-
 sentanea. Nec solum in his Conciliis Provincia-
 libus maximâ cum sollicitudine curarunt Gallia-
 rum Archiepiscopi, ut Concilii Tridentini De-
 creta in Galliis reciperentur, & ad praxim redi-
 gerentur, sed etiam totus Clerus Gallicanus, ad
 generalia Comitia cœctus, frequenter à Christia-
 nissimis Regibus postulavit, ut Concilium Tri-
 dentinum in Ecclesia Gallicana promulgaretur.

Preces Cleri Gallicani, pro istâ promulgatione
Henrico III. Galliarum Regi porrectæ, habentur
 in Comitibus Blesensibus, in Actis Conventûs, qui
 Meloduni anno MDLXXIX. celebratus est; in Actis
 Conventuum Parisiensium an. MDLXXXV. MDLXXXVI.
 & MDXCVI. Quæ quidem, pluresque aliæ Cleri
 Gallicani supplicationes de verbo ad verbum des-
 criptæ reperiuntur Tomo V. *Commentariorum*
Cleri Gallicani,

D. Celebraruntne Episcopi Italix multa
 Concilia Provincialia ad promovendam execu-
 tionem & observantiam Decretorum Concilii Ge-
 neralis Tridentini?

M. Inter omnes Italix Episcopos, qui Sa-
 culo decimo sexto Decretorum Concilii Tridenti-
 ni executioni ac observationi sedulo invigilarunt,
 primas jure optimo tenet Sanctus Carolus Borro-
 maus Archiepiscopus Mediolanensis, & Pii IV.
 Pontificis Maximi ex sorore nepos, qui, postquam
 incredibili studio ac prudentiâ Concilium Tri-
 dentinum diu intermissum instaurari ac perfici a
 suo Avunculo Pio IV. curasset, eoque felici successu
 concluso, ad Ecclesiam suam Mediolanensem esset
 regressus; in id totus incubuit, ut Oecumenicæ
 Synodi Tridentinæ Decreta in tota sua Provincia
 quam exactissime servarentur. Quam ob rem, sin-
 gulis triennis, dum vixit, Provinciales Synodos
 cœgit numero sex, Diocesanas verò undecim, in
 quibus perfectissimi regiminis Ecclesiastici for-
 mam tradidit, Disciplinam Ecclesiasticam in tota
 sua Provincia restauravit, & collapsos Cleri popu-
 lique mores emendavit. Hic, brevitatis ergo,
 prætermittis undecim Synodis Diocesanas, pauca
 tantum

tantum dicam de sex Provincialibus Conciliis
 Mediolanensibus à S. *Carolo Borromæo* celebratis.
 Horum primum anno MDLXV. convocavit, eique
 præfuit sanctissimus ille Præsul autoritate fultus
 Apostolici per universam Italiam à Latere Legati.
 Saluberrimæ Constitutiones, quas in eo primo
 Concilio Mediolanensi edidit Sanctus *Carolus Bor-*
romæus, in tres partes sunt distributæ, quarum
 prima est *De Fide Catholica*. Secunda, *De iis quæ*
ad Sacramentorum administrationem generatim per-
tinent. Tertia, *De piorum locorum administratione*.
 Diligenter ac sæpius has omnes Constitutiones
 perpendere debes, sed potissimum illas, quæ in
 secunda parte leguntur, & quibus statuitur primò,
 proprium Episcopi esse officium prædicare Verbum
 Dei. Secundò, prohibetur Confessariis, ne illos,
 qui bona aliena injustè detinent, ante debitam sa-
 tisfactionem absolvant, exceptis tamen his, qui
 periculosè ægrotant, quos sufficit monere, ut id
 quod debent, quam primum persolvant. Tertiò,
 præcipitur Clericis, ut personati non incedant,
 ut ab usu armorum abstineant, à venatione, à fa-
 bulis, comædiis, hastiludiis, aliisque prophanis
 spectaculis, choreis privatis aut publicis, ludis
 alex &c. Districtè etiam Clericis prohibetur, ne
 artem medendi exerçant, negotiationibus & mer-
 caturis sese immisceant, aliorum curam ac tute-
 lam suscipiant, prædia, lucri causâ, conducant,
 ne pro aliis fidejubeant, neque in famulatu Laico-
 rum maneant indecorè, multominus fœminis di-
 scumbentibus, vel ambulantibus assistant aut an-
 cillentur. Alterum Concilium Mediolanense
 habitum triennio post, seu anno MDLXIX. comple-

 titur varia Decreta in tres partes itidem divisa ,
 quarum prima ea exhibet Statuta , qu  ad Fidem
 Catholicam tuendam , Sacramenta ministranda ,
 & alia munia Pastoralia spectant . Altera pars ea
 tradit , qu  ad Missam , Divina Officia , Ecclesi 
 cultum , & ad Viros Statui Ecclesiastico additos
 pertinent . Postrema pars ea comprehendit Statu-
 ta , qu  ad bona & jura Ecclesiarum , piorumque
 locorum vindicanda necessaria sunt . Tertium Con-
 ciliium Mediolanense anno MDLXXIII. celebravit
 Sanctus Carolus Borrom us , & in eo promorum
 emendatione viginti Decreta edidit . In quarto
 Concilio Mediolanensi , quod anno MDLXXVI. con-
 vocavit idem sanctissimus Pr sul , plurima promul-
 gata sunt Decreta *De Sacris Reliquiis , Miraculis ,*
Imaginibus , Indulgentiis , Jejuniis , Festorum dierum
observantia , Religiosis peregrinationibus ; De sacris
locis , & eorum cultu , de Verbi Dei pr dicatione , de
Scholis Doctrin  Christian  , de Sacramentorum ad-
ministrati ne , de Divinorum Officiorum celebratione ,
de Parochis & Parochialibus juribus & Officiis , de
Episcopis & eorum conversatione ; de vita & honesta-
ne Clericorum ; de visitatione , de Synodis Provinciali
& Di cesana ; de Foro Ecclesiastico ; de Regularibus ;
de Monialibus , de piorum locorum administrati-
 ne &c. Quintum Conciliium Mediolanense , cui
 Sanctus Carolus Borrom us anno MDLXXIX. pr fuit ,
 complura continet Statuta in tres partes distin-
 cta . Prima pars ea complectitur , qu  ad tutandam
 Orthodoxam Fidem , ad dignam Sacramentorum
 administrati nem , & Sacramentalium usum atti-
 nent . Altera pars triginta habet Titulos , in qui-
 bus cum admirabili prudenti  & eximi  charitate
 copio-

copiosè præscribuntur cautiones, quæ tùm circa sollicitudinem spiritualem adhiberi debent tempore pestis, cùm adhuc recēs esset memoria funestæ illius pestis, seu contagionis, quæ per Italiam longè latèque grassata, occasio fuerat sanctissimo Cardinali *Carolo Borromeo* tot præclara edendi specimina summæ prudentiæ, vigilantiz, præcautionis, & inexhaustæ charitatis, quibus per totam ipsius ferè Diœcesim sævienti ac populanti malo providere, necessitatibus publicis ac privatis occurrere, animarumque saluti consulere summopere studuit. Tertia pars hujusce quinti Concilii Mediolanensis ea continet Statuta, quæ spectant Sacramentum, Ordinis, Clericorum honestatem, Beneficiorum collationem, Divinorum Officiorum celebrationem, Residentiam, Ecclesiarum suppellectilem & fructus, Synodorum Congregationem, Visitationem, & Episcopalem jurisdictionem, Matrimonii disciplinam, Scholarum, Confraternitatum, piorum locorum directionem, & administrationem, Sanctimonialium reformationem &c. Denique, sextum Concilium Mediolanense ab eodem S. *Carolo Borromeo* celebratum est anno MDLXXXI. & in eo triginta Decretis sancita est Ecclesiæ Disciplina, ac in primis statutum est, ut Episcopus suspendat ab audiendis confessionibus eos, quos viderit hoc munere non rectè fungi. Secundò, præcipitur, ut Fideles Sacramento Pœnitentiæ se præmuniant, in agendis rebus in quibus mortis periculum timetur, sicut in peregrinatione, bello, & similibus. Tertiò, præscribitur Episcopis modus, quo ineunte Quadragesimali tempore plebi suæ invigilare debeant. Quartò, injungitur Sacerdotibus à Missa

celebrandâ suspensis, ut diebus Dominicis & festi-
vis sacram Communionem sumant. Quintò, præ-
figitur modus, quo piæ defunctorum voluntati sa-
tisfieri debeat, quandò eleemosyna tenuis est, vel
sufficiunt Sacerdotes pro Missarum celebratione,
& quid observari debeat in Missarum reductione.
Sextò, prohibetur, ne quis repentinâ morte præ-
ventus sepulturæ mandetur ante vigesimam quar-
tam horam post obitum. Septimò, circa Clausu-
ram Monialium statuitur, ne quis absque licentia
Ordinarii intra septa Monasterii illarum ingredia-
tur. Octavò decernitur, ut Episcopus familiam
suam in officio & regulis bene vivendi, ad cætero-
rum exemplum, contineat, & ut Feriâ quintâ in
Cœna Domini, in loco, in quo Sanctissimum Cor-
pus Christi reconditur, unus saltem Sacerdos,
aut Sacris institutus, excubet ad custodiendum &
orandum. Hæ sunt sex Provinciales Synodi Me-
diolanenses, quas celebravit *S. Carolus Borromæus*
Cardinalis & Archiepiscopus Mediolanensis, de
cujus doctrinâ, & in restauranda, valdè id ætatis
labefactatâ, disciplinâ Ecclesiæ summâ vigilantia,
Deo dante, plura dicemus tum in Colloquio
quinto, ubi agemus de Viris Illustribus Sæculi XVI.
tum in Colloquio sexto, in quo præcipua Eccle-
siasticæ Disciplinæ ejusdem Sæculi Capita perstrin-
gemus. Unum tamen adhuc superest Concilium
Provinciale, *Aquilejense* videlicet, anno MDXCVI.
à *Francisco Barbaro* Patriarcha Aquilejensi in Ita-
lia celebratum, quod hic silentio prætermittere
haud debemus. In eo Concilio Aquilejensi unde-
viginti Decretorum Capita circa Disciplinam
tam Ecclesiasticam, quàm Monasticam conscri-
pta

pta ac promulgata sunt, quibus, inter cætera alia, circa Moniales præcipitur primò, ut in Monasteriis omnis proprietas procùl exulet. Secundò, ut mensa sit communis, ad quam omnes, exceptis ægrotantibus, conveniant, & sacra lectio adhibeatur. Tertiò, ut silentium, obedientia, humilitas, charitas, ac reliquæ virtutes inter Religiosas personas eluceant. Quartò, ut Regula inter Moniales vernaculâ linguâ scribatur, & frequenter legatur. Quintò, ut Divinis Officiis diurnis, ac nocturnis sedulò interfint, nisi iusta causa excuset.

D. Percense nunc, quæso, Concilia Provincialia, quæ ad promovendam executionem & observantiam Decretorum Concilii Tridentini, cum Fidem, tum Disciplinam spectantium, Sæculo xvi. in Hispania fuerunt celebrata, iisque, si placet, nostrum absolvamus Colloquium.

M. Rem profectò immensi operis aggredere, si omnia Acta, Statuta, ac Decreta Conciliorum Provincialium, quæ in Hispania Sæculo xvi. habita sunt, recensere hic animus esset. Ne igitur à fine, quem mihi ab initio hujus Operis præstitui, Historiam Ecclesiasticam in rem Theologiæ Candidatorum compendiosâ narratione describendi, in præsentiarum recedere videar, & ne in tam immenso campo vagari cogatur oratio, totam Conciliorum Provincialium, quæ Decretorum Concilii Tridentini executionis & observationis promovendæ causâ in Hispania Sæculo xvi. cõacta sunt, notitiam duabus dumtaxat observationibus breviter concludam. In primis, observare debes, eodem tempore, quo S. Carolus Archiepiscopus

Mediolanensis, ad promulgandas Concilii Tridentini Sanctiones, Concilia Provincialia in Italia celebraret, *B. Toribium Mogrovexum*, Archiepiscopum Limensem in Peruvia, (quæ est amplissima & fertilissima regio in America Meridionali sita, & ab Hispanis *Novus Orbis* appellata) aliquot Concilia Provincialia, & plura Diocesana ad cultum Dei, propagationem Fidei, Disciplinæ Ecclesiasticæ, & morum reformationem convocasse, ut Peruvianos illos, seu Novi Orbis incolas, longè ampliùs à nobis distitos, *quàm divisos toto Orbe Britannos*, & adhuc magna ex parte Neophytos, ac veluti primitias Christianismi in Peruvia, peculiaribus quibusdam Decretis, eorundemque ruditati & conditioni infirmæ adaptatis instrueret documentis, quæ in Conciliis Sanctissimi hujus Archiepiscopi Limensis & Catechismis leguntur. Duo itaque illi Archiepiscopi eodem tempore, tanquàm clarissima Ecclesiæ lumina, præfulserunt, & pari spiritu Apostolico animati, innocentiam morum, incorrupto virginitatis flore, charitate ardentissimâ erga Deum, & homines, zelo salutis animarum, austeritate vitæ, virtutum omnium apice præcellentes, plures Synodos cum Provinciales, tum Diocesanas celebrarunt, cum eo tamen discrimine, quod Concilia *S. Caroli Borromæi* in lucem edita, & per totam Europam distracta, vivente adhuc *S. Carolo Borromæo*, ab ejus ætate adhuc usque nostra tempora summam semper celebritatem habuerunt; Limensia verò *B. Toribii* Concilia, utpotè in remotissimis Novi Orbis partibus cōacta, licet ibidem magno in pretio semper habita sint, non potuerunt tamen æquali

lem in Europa nancisci celebritatem , donec occasione Beatificationis hujus Sancti Archiepiscopi *Toribii* non multis abhinc annis Romæ publicâ luce donata fuerunt , & deindè in ampliori forma cum doctissimis Notis Romæ anno MDXCIII edita ab Eminentissimo Cardinali *Josepho de Aguirre* , in IV. Tomo *Collectionis Maximæ omnium Conciliorum Hispaniæ & Novi Orbis* . Quapropter , si plura scire desideres de his Conciliis Limensibus , quæ ad promovendam in Peruvia , seu in America Meridionali , Decretorum Concilii Tridentini tam Fidem , quàm Disciplinam & morum reformationem spectantium observantiam *B. Toribius* Archiepiscopus Limensis celebravit , consule doctissimum illum Cardinalem , qui ejusmodi Concilia in longinquis illis regionibus habita , ex MSS. Codicibus accuratè descripta exhibet , & de illis longo latoque calamo disserit loco mox à me laudato . Nec solum in Peruvia , seu in America Meridionali , sed etiam in *Mexico* , quod est Regnum sub Dominio Regis Hispaniæ in America Septentrionali , celebratum est anno MDLXXXV. Concilium Provinciale , dictum Mexicanum , cui præfuit *Petrus Moya de Contreras* , Ecclesiæ Mexicanæ Archiepiscopus , quodque Oecumenicæ Synodi Tridentinæ Decretâ Fidem , quàm Disciplinam Ecclesiæ & morum reformationem attinentia suscepit , ac executioni mandari jussit . Omnia istius Concilii Provincialis Mexicani Acta ac Statuta inseruit jam citatus Cardinalis de *Aguirre* Tomo IV. *Collectionis Maximæ omnium Conciliorum Hispaniæ & Novi Orbis* . Extat etiam idem Concilium Provinciale Mexicanum in Tomo ultimo *Collectionis Conciliorum*

liorum Labbeanæ . Digitum ad fontem intendisse
 sufficiat , nec enim ut plura de his Conciliis dica-
 mus patiuntur temporis angustia . Secundò , ob-
 servare debes , plures in Regno Hispaniæ ad reci-
 piendum & promulgandum Concilium Generale
 Tridentinum cōactas fuisse Synodos Provinciales,
 quarum primam , seu Toletanam , anno MDLXV.
 indixit , eique præfuit *Christophorus Rexas Sando-
 val* Episcopus Cordubensis , & in ea omnia Gene-
 ralis Concilii Tridentini Decreta recipi , & ab
 omnibus observari debere jussum est his verbis :
*Cetera item omnia , quæ à Sacris Canonibus & Oecu-
 menicis Conciliis , ac præcipuè ab eadem Sacrosancta
 Tridentina Synodo diffinita sunt , tam in his quæ ad
 extirpandas Hæreses , quàm in his quæ ad morum Re-
 formationem pertinent , ejusdem Sanctæ Synodi De-
 cretum secuta , recipit , & omninò recipienda ab
 omnibus esse decernit , Hæresesque omnes ab iisdem
 Sacris Canonibus , Generalibus Conciliis , & præser-
 tim ab eadem Sancta Synodo Tridentina damnatas de-
 testatur & anathematizat hæc Synodus Toletana.*
 Eodem anno MDLXV. quo habita est hæc Synodus
 Toletana , alia Concilia Provincialia ad imperan-
 dam in Hispania executionem & observantiam
 Decretorum Concilii Tridentini fuerunt celebra-
 ta , videlicet Concilium Valentinum , Præside Ar-
 chiepiscopo *Martino Ayola* : Concilium Compo-
 stellanum indictum Salmanticæ Præside *Gaspere de
 Zunñiga & Avellaneda* Archiepiscopo Compostel-
 lano , postea Hispalensi , & S. R. E. Cardinali :
 Concilium Granatense , Præside *Petro Guerrero*
 Archiepiscopo hujus Urbis : Concilia Bracarense,
 Cæsaraugustanum , & Eborense , quibus adjungi
 debet

debet alterum Concilium Provinciale Toletanum anno MDLXXXII. congregatum, & cui præfuit *Gaspar de Quiroga* Cardinalis & Archiepiscopus Toletanus. Hæc est series Conciliorum Provincialium, quæ ad recipiendum Concilium Tridentinum, & ad ejus Decretorum, tum Fidem, tum Disciplinam, morumque emendationem spectantium, præcipiendam omnibus observantiam in Regno Hispaniæ celebrata sunt, quorum Acta, Decreta, ac Statuta legis apud sæpius jam citatum Cardinalem de *Aguirre*, qui in Tomo IV. *Conciliorum Hispaniæ* prædictas Synodos Provinciales Hispaniæ summâ diligentiam descripsit, atque doctissimis Notis illustravit. His Conciliis Provincialibus Hispaniæ unum dumtaxat addam Concilium Provinciale Mechliniense, quod Mechliniæ in Belgio sub dominio Regis Hispaniæ anno MDLXX. habitum est, Præside *Martino Rythovio* Episcopo Iprensi, nomine & loco *Antonii* Cardinalis *Granvellani*, Archiepiscopi Mechliniensis, in quo præcipitur: *ut omnes & singuli, qui ad hanc Synodum conveniunt, simpliciter & sine ulla protestatione ea omnia & singula, quæ à Sancta Synodo Tridentina definita & statuta sunt, palam recipiant, necnon veram obedientiam Summo Romano Pontifici spondeant & profiteantur, simulque omnes Hereses à Sacris Canonibus, præsertim ab eadem Synodo Tridentina damnatas detestentur & anathematizent.* Decretis itaque Concilii Generalis Tridentini, quidquid contrâ obstrepant ac frendeant Lutherani, Calvinistæ, aliique Heretici, consenserunt, eorumque observantiam imperarunt Gallia, Italia, Hispania, Novus Orbis, seu America, cum Meridionalis, tum Septen-

Septentrionalis, ac Belgium, ut sole clariùs patet ex tot Synodis Provincialibus, quas percensuimus. Decreta quoque Concilii Tridentini summâ, quâ par est, veneratione suscepta sunt à Catholicis Germaniæ regionibus in Synodo Augustana, quæ ab *Otthone* Cardinali anno MDLXVI. habita est. Suscepta pariter fuerunt à Sicilia, Sardinia, Regno Neapolitano, cæterisque Catholici Regis ditionibus, anno MDLXIV. per solemne Edictum *Philippi II.* Hispaniarum Regis. Suscepta itidem fuerunt à Lusitania, sicut constat ex *Sebastiani* Regis Litteris ad *Pium IV.* Pontificem Maximum, quas refert Cardinalis *Palavicinus* lib. 24. *Historiæ Concilii Tridentini* cap. 9. Suscepta etiam fuerunt à Polonia in Regni Comitibus, quæ anno MDLXIV. habita sunt. Suscepta denique fuerunt à Serenissimâ Venetorum Republicâ, ac teste *Morosino* libro VIII. *Historiæ Venetorum*, intra Missarum solemnities promulgata sunt. Habent igitur Decreta Concilii Tridentini tres luculentissimos veritatis characteres, quos semper sequi debemus, Universitatem, Antiquitatem, Consensionem: Sequemur autem universitatem hoc modo (inquit *Vincentius Lirinensis*, Scriptor elegans quinti Ecclesiæ Sæculi in suo aureo Commonitorio adversus prophanas novitates) *si hanc unam fidem veram esse fateamur, quam tota per orbem terrarum constitetur Ecclesia. Antiquitatem verò ita, si ab his nullatenus sensibus recedamus, quos Sanctos majores ac Patres nostros celebrasse manifestum est. Consensionem quoque itidem, si in ipsa vetustate, omnium, vel certe penè omnium Sacerdotum pariter ac Magistrorum definitiones, sententiasque sectemur.* Quapropter anti-

antiquæ Fidei, quam, juxta Sanctorum Patrum, traditionem, & Oecumenicorum Conciliorum, definitiones, Patres Concilii Tridentini suis Decretis firmarunt, ac factam rectam conservarunt, constanter inhærere, omniumque Hæreticorum novellas adinventiones explodere debemus, quia, ut ait mox laudatus Author, *Annunciare aliquid Christianis Catholicis, præter id quod acceperunt, nunquam licuit, nunquam licet, nunquam licebit: & anathematizare eos, qui annunciant aliquid, præterquam quod semel acceptum est, nusquam non oportuit, nunquam non oportet, nunquam non oportebit.*

COLLOQUIUM QUINTUM,

De Clarissimis Viris, qui Sæculo decimo sexto Doctrinâ, Vitæque sanctimoniam Ecclesiam illustrarunt.

DISCIPULUS. **M**Ajorem in dies fructum capio ex studio Historiæ Ecclesiasticæ, quæ omnes homines ad virtutem colendam incredibili quodam gloriæ studio atque eximio immortalitatis amore accendit, & sicut improborum turpiter facta, atque Hæreticorum errores ob oculos ponit, ut ab illis omni adhibitâ diligentiam caveamus, ita præclara Virorum eruditum gesta, doctrinam ac lucubrationes magnis præconiis extollit, eorumque virtutis testis est sempiterna. Hinc est, quod, postquam in superioribus Colloquiis de Hæreticorum Sæculi xvi.

erro-

erroribus, eorumque in Conciliis damnatione, fat superque egerimus, nunc de Viris Illustribus ejusdem Sæculi, eorumque Operibus continenti ordine disserere debeamus, ut, quemadmodum vulgò dicitur, opposita juxta se posita magis elucescant, indeque desumamus virtutis exempla, quæ nulla posterorum hominum oblivio obscurare, nulla Sæculorum delere diuturnitas poterit. Verùm, cùm ingens sit, ut opinor, Scriptorum Sæculi XVI. numerus, optarem tùm claritatis ergò, tùm meæ etiam memoriæ juvandæ causâ, ut illos eruditos Scriptores ad distinctas Classes revocares, nihilque attingeres eorum, quæ Lutherani, Calvinistæ, alique Hæretici scripserunt, non solum ad suorum errorum defensionem, sed neque etiam libros, quos ad artes & scientias humanas illustrandas, ad Religionis mysteria exponenda, ad varios Scripturæ Sacræ sensus expromendos lucubrarunt. Nec enim Hæreticis ullum inter viros illustres locum dare fas est, nec necesse est eorum indicare libros, quorum lectionem, ut potè noxiam, jure optimo Catholicis prohibuit ac interdixit Ecclesia.

M. Haud modico sanè me levas onere, dùm rogas, ut à recensendis Hæreticorum decimi sexti Sæculi Operibus in integrum abstineam. Si enim iniretur numerus librorum, quos Hæretici XVI. Sæculi vel ad tutandos suos errores, vel in Scripturam Sacram, vel de rebus Theologicis, & Disciplinis humanis ediderunt, magna, mihi crede, posset ex illis confici Bibliotheca, quæ eò esset periculiosior, quò juvenes, naturâ curiosi, ex libris Hæreticorum pessima quæque decerperent, variis-

variisque sese implicarent erroribus . Solent quippe Hæretici , in libris , quos ad aliorum perditionem temerè in vulgus spargunt , illos imitari , qui (ut ait *Vincentius Lirinensis* in suo Commonitorio adversus Hereses cap. 35.) austera quædam pocula temperaturi , priùs ora melle circumliniunt , ut incauta ætas , cum mellis dulcedinem persenserit , amaritudinem non reformidet ; quod etiam iis curæ est , qui mala gramina & noxios succos ementitis medicaminum vocabulis præcolorant , ut nemo ferè , ubi superscriptum legerit remedium , suspicetur venenum . Quocircà , quemadmodum venatores non sinunt canes aberrare , & quemlibet odorem persequi , sed loris retrahunt revocantque , olfactum illorum servantes purum & integrum officio peculiari , ut acriùs inhæreant vestigiis : sic oportet curiositatem juvenum ad libros Hæreticorum legendos excurrentem atque oberrantem cohibere ac retrahere , ut in sola Scriptorum Catholicorum lectione hæreant , sicque puram & illibatam Fidem custodiant . Prætermiſſis ergò Hæreticorum , Operibus , eos dumtaxat Sæculi XVI. viros eruditos hîc in medium producam , qui Ecclesiæ Catholicæ Fidei constanter adhæserunt , vel quos saltèm ab ea ad hæresim defecisse certò non constat . Ne autem aliquam confusionem pariat tot clarissimorum virorum copia , illos in quindecim Classes distribuam . In prima generatim referam omnes variarum nationum Artis Grammaticæ Viros peritissimos . In altera agam de Cardinalibus & Episcopis , qui in omnium scientiarum genere excelluerunt . In tertia differam de Historicis . In quarta de Gallis Scriptoribus . In quinta de

de Italis . In sexta de Hispanis . In septima de Germanis . in octava de Anglis . In nona de Monachis . In decima de Scriptoribus Ordinis FF. Prædicatorum . In undecima de illustribus Viris Ordinis S. *Augustini* . In duodecima de eximiis Theologis Ordinis S. *Francisci* . In decima tertia de celebrioribus Viris Ordinis Carmelitarum . In decima quarta reponam insignes Societatis *Jesu* Scriptores . Ultimam Classẽ claudent præstantissimi Jurisconsulti , qui Sæculo XVI. magnâ nominis celebritate claruerunt . Facile quidẽ prospicio , quantum oneris in me suscipiam , qui innumeros penè viros toto orbe clarissimos in præsentis Colloquii angustias includere cogar , multumque vereor , ne rerum dicendarum numero & magnitudine obruar . At opprimar antè licet officii pondere , quàm illud deferam , & quamvis probè sciam , mihi non satis esse vel facultatis ad dicendum , vel temporis , ut illos præclaros eruditione viros , pro eo ac merentur , laudare possim (hoc quippè nimis prolixum foret) sic tamen paucis verbis illorum eruditionem commendabo , ut statim percepturus sis , maximis præconiis dignos esse præstantissimos illos Scriptores , qui tam benè de Ecclesia , & universâ Republicâ Christianâ meriti sunt , quos (ut Vincentii Lirinensis verbis utar) à defensione Fidei Majorum *nulla vis depulit , non minæ , non blandimenta , non vita , non mors , non palatium , non Satellites , non Imperator , non Imperium , non homines , non Demones* detertere unquàm potuerunt , quos denique tanto munere dignos Deus judicavit , ut per eos antiquam Fidem ab Hæreticis oppugnatam strenuè vindicaret , prostratam

stratam repararit Disciplinam, & Moralem Christianam illibatam conseruarit.

D. A Grammaticis Scriptoribus, quos in prima Classe virorum Illustrium Sæculi decimi sexti reposuisti, exordium, si placet, ducamus, & eos in primis recense, qui in Italia floruerunt.

M. Tot in Italia Sæculo decimo sexto periti excelluerunt Grammatici, ingenio, eruditione, & eloquentiâ præstantes, ut plures Italiæ civitates in Athenas mutatz viderentur, & ad illas certatim ex omnibus Europæ partibus confluerent viri eruditi, qui è Magistris facti Italorum discipuli, eruditionem atque eloquentiam inde hauriebant, eamque postea ad suos deferebant. Ex tot insignibus Italiæ Sæculi decimi sexti Grammaticis sex præcipuos seligam, videlicet *Accium Syncerum*, sive *Jacobum Sannazarium*, *Petrum Bembum*, *Petrum Victorium*, *Paulum Manutium*, *Cælium Rhodiginum*, & *Latinum Latinium*. Primus, seu *Jacobus Sannazarius* ex illustri prosapia Neapoli originem duxit, & Poësim Latinam splendore ingenii, imitatione optimi cujusque veterum, aptâ fictionum poëticarum inventionem & acumine ad summum fastigium evexit. Scripsit *Eclogas*, *Elegias*, & *Epigrammata*, sed præcipuè Poëma *De partu Virginis*, in tres libros distinctum, in quo de perfectione Poëseos videtur cum antiquis decertare. Alter, seu *Petrus Bembus*, patriâ fuit Venetus, Ciceronianæ eloquentiæ sedulus admirator & imitator extitit, Orator, Poëta, Historicus suo tempore nulli secundus, antiquis etiam conferendus. Eum, ob doctrinam singularem, ra-

ram facundiam, & summam vitæ integritatem *Paulus II.* Pontifex Maximus Cardinalē creavit. Pervenit *Petrus Bembus* ad annum usque septuagesimum septimum, plurimosque reliquit felicitis ingenii sui partus. Hoc tamen periti Critici jure merito ei vitio vertunt, quod inter scribendum aut dicendum nullam unquam voluerit usurpare, vocem, quæ à *Cicerone* scripta aut dicta non fuisset, & ad exprimendas res novas ac *Ciceroni* ignotas, miro verborum uteretur ambitu, & ab usitatis verbis sibi curiosè cavēret, quod sanè puerilem imitandi *Ciceronianum* stylum affectationem redolet, ut optimè observat *Desiderius Erasmus* in eo Dialogo, qui inscribitur, *Ciceronianus*. Princeps ingeniorum sui temporis dictus est *Petrus Victorius*, patriâ Florentinus, cique uni plus *Cicero* debet, quàm reliquis omnibus, qui in eo perpoliando tempus studiumque posuerunt, quorum plurimos Sæculum decimum sextum culit, Italia præcipuè, omnis eruditionis, quæ in illa reffloruit, fecundissima parens. Plura ingenii sui monumenta posteritati reliquit *Petrus Victorius*, quibus humaniores litteras, & antiquos Scriptores tam Græcos, quàm Latinos magnâ fide ac diligentiam recognitos explicavit, castigavit, illustravit. Magnam in exprimendo pariter stylo *Ciceroniano* felicitatem assecutus est *Paulus Manutius*, filius *Aldi Manutii* celeberrimi Typographi. Ille quippè tractandis assiduè *Ciceronis* Scriptis, sic illius stylum æmulatus est, ut redivivum eum in illo credas, & apud omnes eruditos audiat vir *Tullianæ* facundiæ & totius antiquitatis studiosissimus. Multa scripsit elegantissima Opera, quæ etiamnum
ex-

extant, & Catechismus Concilii Tridentini, à tribus Ordinis Fratrum Prædicatorum Theologis, ut superius observavimus, lucubratum, purissimâ latinitate donavit. Immortale sibi quoque nomen peperit *Cælius Rhodiginus*, Græcarum ac Latinarum linguarum peritissimus, quas primùm Mediolani, postea in Gymnasio Patavino magnâ cum gloriâ docuit, fuitque *Julii Cæsaris Scaligeri*, Viri doctissimi, præceptor. Quantum in humanioribus litteris excelluerit hic *Cælius Rhodiginus*, aperte probant triginta *Antiquarum Lectionum* libri, quos concinnavit, & in eis quorumcumque veterum Scriptorum loca obscura dilucidè explanavit, corrupta castigavit, & quidquid scitu dignum per totum vitæ suæ curriculum collegerat vel observaverat, studiosè inferuit, & eleganti stylo exaravit. Denique, inter Italos *Latinus Latinus*, patriâ Viterbientis, Græcarum, Latinarumque litterarum adeò peritus evasit, & in Veterum Authorum Critice itâ excelluit, ut plerosque eorum, qui in ejusmodi studiis insudaverant, superaverit. In sacris veterum Patrum libris emendandis, & præsertim *Tertulliano* ad veteres codices corrigendo, operam impendit. Ejus Bibliothecam Sacram & prophanam, sive Correctiones in Sacros & prophanos Scriptores *Dominicus Magrus* Romæ anno MDCLXXVI. publicam in lucem emisit. His insignibus Italiæ Viris Grammaticis, quos hætenus laudavi, alios doctrinâ & eruditione hæud inferiores eodem Sæculo decimo sexto protulit Gallia, quos inter hic quatuor dumtaxat, qui cæteris eloquentiæ palmam præripuerunt, breviter commendabo. Agmen Clarissimorum Galliæ Gram-

maticorum ducet *Gulielmus Budæus*, Lutetiæ Parisiorum natus, qui Linguas Græcam & Latinam, perfectè callebat, tamque facilè utrâque linguâ ex tempore loquebatur, quàm Gallicâ, quæ erat ei vernacula. Scripsit Orationes & Epistolas Græcas ac Latinas quàm plurimas, Elegias & Epigrammata varia, Annotationes in Pandectas, & librum *De Assè*, plurimæque alia Opera, quæ eruditorum manibus quotidie teruntur, & in magno pretio habentur. *Gulielmum Budæum* eruditione æquavit *Adrianus Turnebus*, in Normannia, Galliæ Provinciâ, natus; Vir omnium virtutum, omniumque litterarum genere instructissimus, in condendis versibus sublimis & acutus, in Oratione verò solutâ tersus atque elegans. Docuit Tolosæ & Parisiis magnâ cum laude & frequentissimo auditorum concursu, variaque edidit Opera, inter quæ eminent *Adversaria*, Opus sanè omnigenâ eruditione refertum, in quo tot veterum, cum Græcorum, tum Latinorum, difficiles locos aut emendavit, aut explicavit, ut dubium fecerit, plusne in eo ingenii, an diligentiæ admirari debeamus. *Adriano Turnebo* cœvus fuit *Dionysius Lamblinus* Monstroli ad Oceanum in Picardia, Galliæ Provinciâ, ortus; qui fuit tam Græcæ, quàm Latinæ litteraturæ scientissimus, ut videre est in Commentariis, quos edidit in *Horatium*, *Cornelium Nepotem*, *Plautum*, *Lucretium*, & *Ciceronem*, & in aliis ejus libris, quibus de re Litteraria optimè meritus est. Verùm, ut cordatè fatear, peritis Grammaticis, qui Sæculo decimo sexto in Gallia floruerunt, longè, meâ quidem sententiâ, anteponendus est *Marcus Antonius Muretus*, Gallus in Lemo-

Lemovicibus natus, ingenio præstanti & ad omnia nato præditus, quod in politiori litteraturâ præcipue exercuit, utriusque linguæ Græcæ ac Latinæ peritiâ clarus. Tantam sive in Gallia, sive in Italia, ubi per plures annos docuit, apud omnes viros eruditos gratiam sibi conciliavit, ut quasi alter *Tullius Cicero* concordibus votis acclamaretur. Scripsit Orationes, varias Lectiones: Poëmata: Emendationes in *Terentium*, *Horatium*, *Catullum*, *Tibullum*, *Propertium*, *Tacitum*, *Senecam* Philosophum; plures Epistolas, & multa alia Opuscula, quibus nihil uberius, nihil politius & elegantius legi potest. Obiit Romæ, ejusque Sepulchrum etiamnum spectatur ad Aram maximam Ecclesiæ Sacro-Sanctæ Trinitatis, quæ est Patrum Ordinis Sancti *Francisci de Paula* Nationis Gallicæ. Nec se Italiæ, aut Galliæ finibus cohibuit hic Sæculo XVI. bonarum litterarum progressus, sed suos itidem Belgium habuit eruditos Grammaticos, *Longolios*, *Agricolas*, *Langios*, *Lipsios*, &c. Batavia unum intar omnium protulit *Desiderium Erasmus*, Grammaticum suis omnibus numeris absolutum, qui, si intra professionis litterariæ, seu Grammatices Disciplinæ, terminos subtitisset, seque totum hisce studiis, quibus cæteros sui temporis Grammaticos facile superabat, dedisset; paria fortasse cum primis illis Latini sermonis auctoribus facere potuisset. At verò, postquam Theologum agere voluit, ingenio suo plus æquofusus, nimium sibi arrogavit, in tractandis Sacris litteris, veterumque Patrum monumentis rigidum nimis Censorem se præbuit, in Monachos, & Theologos Scholasticos acriter invecus est, sibi-

que eorum odium conflagavit. Hinc *Bellarminus* inter Semichristianos *Erasmum* refert. *Posssevinus* nomen *Erasmi* ex omnibus Catholicorum Scriptis expungi debere affirmat. *Stapletonus* murem errantem vocat. *Forer* in *Aranea* ait, dignum esse *Erasmum*, qui ex omnium hominum memoria eradatur. Alii tandem dicunt, *Erasmum* posuisse ova, quæ deindè Hæresiarcha *Lutherus* exclusit. Verùm, plures Apologias adornavit *Erasmus*, ut ostenderet, se ab impia *Lutheri* doctrina vehementer abhorrere, & in Catholicæ Ecclesiæ sinu emori velle. Quin, & ipsum *Lutherum*, ejusque discipulos, qui perperam sese, *Evangelicos* dicebant, & Ecclesiæ insultabant, libris editis palam impugnavit *Erasmus*, cujus proindè patrocinium ac defensionem susceperunt quidam Scriptores Catholici, quos inter paucis abhinc annis doctissimus Abbas *de Marfolier*, Scriptor Gallus & apprimè Catholicus, Apologiam edidit pro *Erasmo*, quem ab omni suspitione Hæreseos liberat, eumque in gremio Ecclesiæ Catholicæ obiisse multis argumentis evincit, quæ hic referre nimis longum esset. Mitto plures Epistolas, & encomia, quibus doctissimi S. R. E. Cardinales, & Episcopi, Imperatores, Reges, Principes, & Doctores Catholicæ communionis, ingenium, eruditionem & lucubrationes *Erasmi* commendarunt. Mitto etiam honorificentissimas litteras, quas Romani Pontifices *Leo X.* *Adrianus VI.* *Clemens VII.* & *Paulus III.* ad *Erasmum* scripserunt, eumque ut Romam se conferret, invitarunt, & ut contra *Lutherum* scriberet vehementer sunt adhortati. Quin, & *Paulum III.* Pontificem Maximum Cardinalitias Insulas *Erasmo* decrevisse, legitur

legitur in ejusdem *Erasmi* Vita. Hæ Epistolæ ad *Erasmum* scriptæ, & honorifica de eo Virorum eruditorum judicia extant simul collecta in fronte ejus Operum postremæ Editionis pag. 9. & seqq. Multa Opera scripsit *Erasmus*, quæ Ecclesiæ judicio subjecit, quæ in Editione *Frobeniana* novem Tomis continentur, sed in recentissima Editione, quæ Lugduni Batavorum anno MDCCIII. fuit adornata in decem Tomos sunt distributa, quorum lectio, ut candidè fatear, ob stylum apertum, extemporalem, purum, facilem & argutum, mihi supra modum semper placuit, licet errores, qui in ejus Operibus notantur, rejiciam. Suos quoque peritos Grammaticos Sæculo decimo sexto habuit Anglia, sed in primis *Thomam Morum*, Regni Angliæ sub *Henrico VIII.* Cancellarium, qui, præter Linguarum Græcæ & Latinæ notitiam, quâ erat excultus, vir fuit perspicacis & acuti ingenii, acerrimi judicii, memoriæ felicissimæ, multæ lectionis, & singularis eruditionis, ut liquet ex ejus Operibus, inter quæ eminent duo libri, quos edidit, *De Utopia*, seu *De optimo Reipublicæ statu*. Martyr occubuit *Thomas Morus*, quippè qui, cum nec divortium *Henrici VIII.* Angliæ Regis, nec Schisma, quo idem Rex, se, suumque Regnum ab Ecclesia Romana separaverat, ullo pacto approbare vellet, per quatuordecim menses in carcere detentus est, cumque constanter in proposito perseveraret, capite plexus in Cælum evolavit. Denique, Germania Sæculo XVI. suis non caruit Grammaticis eruditis quidem, sed hæreticis, à quibus referendis consultò abstinco, ne mihi fraudi sit laudasse hæreticos, & in hostibus virtutē fuisse admiratum.

D. Gaudeo sanè plurimùm , quòd Grammaticos Viros , politioris litteraturæ cultores , & linguarum peritos , pluris facias quàm vulgò facere solent nonnulli , qui Grammaticis , seu linguarū peritis, Antiquariis, Historicis, Criticis, ac Chronologis infesti , dictitant, studium eis in dorso esse & non in cerebro; illos, in tantos rerum ac multiplicis eruditionis campos longè latèque distractos , rationum momentis , & acutæ rerum Theologicarum indagini constanter insistere non posse, ac subindè nullatenùs expedire , ut Theologus Scholasticus , quem subtilitèr de rebus disputare , mentemque suam abstractissimis præcisionibus sursum agere oportet , hisce humanioribus studiis ac Disciplinis operam det , ac planè inani se se torqueat Grammaticorum labore .

M. Hoc præposterum de humanioribus studiis ac Disciplinis quorundam iudicium meo certè calculo probare haud possum , sed potiùs semper existimavi , Viros eruditos , qui sese in hisce humanioribus Disciplinis exercent , maximam promereri laudem , eorumque laborem perutilem Ecclesiæ, & Theologo apprime necessarium esse. Dicās enim , amabò , nùm Ecclesiæ utilis , & Theologo necessarius sit ille labor, quo Viri linguarum periti Sacræ Scripturæ arcana perscrutantur , varias Sacri Textus cùm lectiones , tùm Versiones consulunt, & eas, quæ falsò ab Hereticis obtruduntur , interpretationes , linguarum peritiā expungunt? Nùm etiam Ecclesiæ utilis & Theologo necessarius sit ille labor, quo Critices Disciplinæ periti homines Sanctorum Patrum Opera in ipso Scriptorum fonte propriis , non alienis oculis, legunt ,
& col-

& collatis inter se manuscriptis, editisque codicibus, si quid luxatum ac depravatum est, ope Critices integritati suæ restituant, atque genuina à spuriiis accurato examine secernunt? Nùm denique, Ecclesiæ utilis sit & Theologo necessarius ille labor, quo Antiquarii, Historici, ac Chronologi omnia Antiquitatis tum Sacræ, tum Ecclesiasticæ & prophanz monumenta, juxta seriem temporum disponunt, Decreta Romanorum Pontificum, & Conciliorum Canones in optimo ordine collocant, undè certam ad fidei, castæque morum doctrinæ defensionem argumentorum seriem sibiumat Theologus, atque omnia recto filo disponat, & perspicuè, ornatèque in lucem emittat? Hunc profectò laborem esse Ecclesiæ utilem, & Theologo necessarium fatebitur æquissimus quisque rerum æstimator, eademque operâ improbabit distortum judicium illorum, qui hæc virorum eruditorum studia solent appellitare non ingenii, sed dorso laborem, & disciplinis humanioribus infesti unum dumtaxat dolium volutare noverunt, unoque in pistrino semper inclusi, in eo tanquam in regno cristas erigunt, sibi plaudunt ac triumphant.

D. Mittamus, si placet, querulas illas voces, quas nonnulli adversus humaniores Disciplinas spargunt in vulgus, quasque non ab veritatis amore, sed ab invidia, ab inertia, & ab ingenii imbecillitate suas habere radices jam pridem novi, & eam ob rem semper his nostri temporis doctissimis Theologis indivulsè adhæsi, qui Sanctorum Patrum exempla secuti, omnigenæ eruditionis, atque humaniorum Disciplinarum

no-

notitiam cum Theologica facultate ita conjungunt, ut nedum paribus, sed longè superioribus armis Novatores collatis signis adoriantur, eorumque petulantiam egregiè retundant. Sed nunc veniamus ad secundam virorum eruditorum classem, in qua locum dedisti Cardinalibus & Episcopis, qui Sæculo XVI. doctrinâ ac pietate Ecclesiam illustrarunt.

M. Cùm de Cardinalibus & Episcopis, qui Monasticam aut Regularem Vitam professi sunt, sermonem simus habituri in sequētibus Classibus, in quas Scriptores Monachos & Regulares distribuimus, ideò eos dumtaxat Cardinales & Episcopos in ista Classe reponam, qui nec Monasticæ, nec Vitæ Regulari fuerunt addicti. Inter Cardinales, qui Sæculo XVI. doctrinâ & pietate toto orbe celeberrimi fuerunt, sex potissimum numerantur, videlicet *Hadrianus*, *Jacobus Sadoletus*, *Gaspar Contarenus*, *Reginaldus Polus*, *Joannes Fischerus*, & *Stanislaus Hosius*. De primo, seu *Hadriano*, qui fuit Doctor Lovaniensis, *Caroli V.* Imperatoris Præceptor, postea ex Dertusano Episcopo creatus Cardinalis, ac tandem electus Romanus Pontifex, dictusque *Hadrianus Sextus*, plura jam diximus in Colloquio secundo, ubi descripsimus Gesta Summorum Pontificum, qui Sæculo XVI. Sedem *Petri* tenuerunt. Quapropter sufficiet hic indicare Opera, quæ ab ipso edita sunt, dum adhuc esset Cardinalis. Scripsit *Hadrianus* quæstiones Quodlibetales xii. & Commentarios in iv. libros Sententiarum, qui iterum Romanis typis, cum ipse in *S. Petri* Cathedra sederet, eoque approbante, excusi sunt anno MDxxi. *Jacobus Sadoletus* Mutinæ

tinæ, Urbe Italiæ, ex parentibus nobilibus & locupletibus ortus, & famâ singularis facundiæ ac doctrinæ, quâ pollebat, celebris, à Leone X. Pontifice, Maximo Romam vocatus, Episcopatu Carpentoratensi in Comitatu Venascino donatus est, & postea à Clemente VII. in Cætum Cardinalium, magnâ totius Collegii Apostolici lætitiâ & congratulatione adscitus est. Scripta reliquit plurima, admirabili nitore sermonis, & Ciceroniano more, stylo ac facundiæ maximè vicina, scilicet, Poëmata nonnulla, Orationes varias, Epistolarum volumen, sed præsertim Commentarios in Psalmos, & in Epistolam Pauli ad Romanos, in quibus viri eruditi cum solidam suspiciendi ingenii doctè juxtâ ac piè argumenta tractantis laudem attigisse fatentur. *Gaspar Contarenus*, nobilis Venetus, prudentiâ, pietate, & insigni litteraturâ præditus, Græcèque ac Latine doctus, à Paulo III. Pontifice Maximo purpurâ exornatus est. Scripsit, dum adhuc iuuenis esset, librum de *animarum immortalitate* contra *Pomponatium*, quem præceptorem habuerat, quique impio conatu animas nostras interire cum corpore, ex *Aristotelis* sententiâ persuadere libro edito contenderat. Suum postea ingenium *Gaspar Contarenus* ad Sacras litteras appulit, multaque lucubavit Opera tùm Exegetica, tùm Polemica & Theologica, quæ omnia Venetiis publicam in lucem prodierunt anno MDLXXXIX. & antea Parisiis anno MDLXXI. Hi duo, qui sequuntur, Cardinales, natione Angli fuerunt, quorum primus, seu *Reginaldus Polus*, generis nobilitate, eximio morum candore, summâ in gerendis negotiis dexteritate, cum singulari

lari eruditione conjunctâ clarissimus, & ad Purpuram adscitus, de Ecclesia benè meritus est, præsertim in Regno Angliæ, ubi, sicut jam observavimus in primo Colloquio, extinctam ferè pravis hæreticorum artibus Catholicam Fidem in integrum restituit. Varia reliquit ingenii sui monumenta, de quibus legendi sunt *Joannes Balæus*, & *Joannes Pitsens* de Illustribus Britannix, seu Angliæ Scriptoribus. Alter Cardinalis natione Anglus, quem Ecclesia ut Martyrem colit, est *Joannes Fischerus*, Rossensis in Anglia Episcopus, & in Cardinalium Ordinem à *Paulo III.* Pontifice Maximo, ob insignem doctrinam & pietatem, allectus. Ille quippè Fidem, quam perdoctis lucubrationibus contra *Lutherum* constantèr defenderat, sanguine confirmavit, eò quòd nefario *Henrici VIII.* Angliæ Regis divortio subscribere noluerit, ipsumque tanquàm supremum Anglicanæ Ecclesiæ Caput agnoscere. Ad supplicium hilari placido vultu perrexit Sanctus ille Cardinalis, sicque toto corporis gestu lætitiâ quamdam præ se tulit, ut nemini non esset perspicuum, sanctissimum Virum, ceù jam portui vicinum, toto pectore ad illam beatam tranquillitatem adspirare. Ad locum, in quo Martyriû consummaturus erat, cum pervenisset, paucis allocutus est populum, moxque ardenti magis, quàm prolixa precatone, elevatis in Cælum oculis, se ipsum Dei misericordiæ commendavit, simulque procumbens in genua, gracilem & exhaustam cervicem intrepidè securi subjecit decrepitus penè senex, capitisque obtruncatione Martyrii palmam consecutus est. Hoc horrendum spectaculum magno cum animi dolore viderunt

hi,

hi, quibus religio pietasque cordi erat, & qui Christi spiritum in Pastore operantem experti fuerant. Soli Hæretici, quibus ejus virtus invisa erat, gaudio triumpharunt. De Sanctissimi illius Cardinalis Vita, & præclaris, quæ edidit, Operibus, leges *Sanderum* libro 1. *De schismate Anglicano*. Denique, *Stanislaus Hosius*, Cracoviensis in Polonia Episcopus, & à Pio IV. Pontifice Maximo Cardinalis creatus, ejusdemque Pontificis in Concilio Tridentino Legatus, Vir fuit moribus castissimis, Fidei zelo illustris, & variâ eruditione præditus, ut liquet ex doctissimis illis Operibus, quæ edidit contra Lutheranos. Hi sex Cardinales, quos hætenus laudavi, & quorum gesta, elogia atque Opera fusè prosequitur *Ciaconius* ab *Oldoino* recognitus & illustratus Tomo III. *De Vitis Romanorum Pontificum & Cardinalium*, egregiam quidem in tuenda contra Hæreticos Catholicâ Fide operam Ecclesiæ navarunt, sed in resarcienda collapsâ Ecclesiæ Disciplinâ illos omnes superavit S. *Carolus Borromeus*, Patritius Mediolanensis, Pii IV. Pontificis Maximi ex Sorore Nepos, S. R. E. Cardinalis, & Archiepiscopus Mediolanensis, quippè qui, ut jam vidimus in Superiori Colloquio, Christianam & Ecclesiasticam Disciplinam in sua Provincia instauravit, sex Concilia Provincialia, & undecim Diocesana celebravit, in quibus promulgavit varia Decreta, Ordinationes, Edicta, Instructiones, Institutiones, Litteras Pastorales, & Conciones Synodicas, quæ omnia in unum collecta sub titulo *Actuum Ecclesiæ Mediolanensis*, & duobus Tomis comprehensa Lugduni in Galliis anno MDCLXXXI I. edita sunt, ex quibus Prædicatores,

tores, Confessarii, Parochi, & alii ad rectè administranda Sacramenta, potissimum Pœnitentiæ & Eucharistiæ, ad emendandos fidelium mores, ad dirimendos emergentes conscientiæ Casus, certissimas leges, & tutissimas regulas haurire poterunt, si eorum lectiõni, ut par est, sedulò incumbere veliunt, nec in quorundam modernorum Casuitarum Summis, & Summulis legendis tempus & operam perdant. Sanctum *Carolus Borromæum* Cardinalem in Sanctorum numerum solemni ritu retulit *Paulus V.* Pontifex Maximus anno MDXC. Complures alii Sæculo decimo sexto floruerunt Cardinales ex variis religiosis Ordinibus assumpti, doctrinâ & pietate præstantissimi, quos commodius referemus in sequentibus Classibus, in quas celebriores Scriptores Vitæ Monasticæ, vel Regulari addictos ordinavimus. Nihil etiam hic dicemus de Cardinali *Petro Bembo*, Viro undecumque doctissimo, quia illius in superiori Grammaticorum, seu utriusque linguæ Græcæ ac Latinæ peritorum Classe, jam mentionem fecimus. Nec demùm in ista Classe, inferemus illustrissimos Cardinales *Casarem Baronium*, Annalium Ecclesiasticorum parentem, & *Laurentium Campegium*, Clarissimum Jurisconsultum, quoniam de Cardinali *Baronio* in sequenti Classe, quæ erit de Scriptoribus Historicis, & de Cardinali *Laurentio Campegio* in postrema virorum eruditorum Classe, quæ erit de nobilioribus Jurisconsultis Sæculi decimi sexti, opportunior differendi sese præbebit occasio.

D. Ne multitudo Episcoporum, qui Sæculo XVI. doctrinæ famâ ubique claruerunt, meam plus æquò oneret memoriam, obsecro te, ut hic dumta-

dumtaxat illos percenseas Episcopos, qui nec Monasticam, nec Regularem vitam sunt amplexi, eos verò Episcopos, qui eodem sæculo ex variis Ordinibus assumpti magnum sibi litteris, & perdoctis editis Operibus nomen in Ecclesia, & Republica Litteraria compararunt, ad sequentes Classes remittas, ad quas à principio Scriptores, qui Statui vel Monastico, vel Regulari nomen dederunt, majoris claritatis ergò, retulisti.

M. Sex tantùm Episcopos, quorum quinque nec Monasticæ, nec Regulari Disciplinæ addicti fuerunt, & Sæculo XVI. eximiâ eruditione cæteris antestarent, hic breviter recensebo, videlicet *Isidorum Clarium, Aloysium Lippomanum, Claudium Seisellum, Stephanum Gardinerum, Robertum Cenalem, & Jacobum Pamelium*. Primus, seu *Isidorus Clarius*, Italus, patriâ Brixienfis, & Fulginas Episcopus, Concilio Tridentino interfuit, ubi, cum esset trium linguarum peritus, perdoctas, & elegantes Orationes habuit. Præter Scholia in *Cantica Canticorum*, multaque Orationum in utriusque Testamenti insigniora quæque loca, quæ edidit, Volumina; Versionem etiam Bibliorum adornavit, quæ tamen, cum ab Editione Vulgata multis in locis recedat, ab Ecclesia fuit improbatâ, ut videre est in Regula IV. Indicis Librorum prohibitorum, quæ sic habet: *Ex Bibliis verò Isidori Clarii Brixiani Prologus, & Prologomena præcidantur. Ejus verò Textum nemo Textum Vulgatæ Editionis esse existimet*. Hinc noster *Melchior Canus* Lib. 2. de *Locis Theologicis* Cap. 13. asserit, *Isidorum Clarium* multa in sua Scripturæ Versione inseruisse, adjecisse quædam, nonnulla mutasse, ut *Lector non aliud*

aliud possit in locis mutatis intelligere, quàm aut veteris Interpretis errorem, aut veterem Codicum depravationem. Benignius tamen de Isidoro Clario iudicium profert Illustrissimus Huetius Episcopus Abrincensis in Libro de Claris Interpretibus, ubi Num. xvi. hæc scribit: Isidorus Clarius non tam novæ auctor editionis, quàm Veteris, uti in Operis sui fronte prænuntiat ipse, emendator, & corrector dicendus: cujus tituli modestiam & veritatem, adeoque laudabilem, immeritò castigat Melchior Canus. Ex Ordine S. Benedicti Congregationis Cassinensis ad Fulginatam Episcopatum, Italicè Fuligno, assumptus est. Alter scriptor, quem nominavi, seu Aloysius Lippomanus patriâ Venetus, & Episcopus Veronensis, interfuit quoque Concilio Tridentino; in quo, ob eam, quâ pollebât, linguarum Græcæ ac Latinæ peritiam & eximiam probitatem morum, magnum sibi peperit nomen, & præter octo volumina, quæ reliquit, De Vitis Sanctorum, alia scripsit Opera, & Catenas in Genesim, Exodum, & in Psalmos ex Græcis & Latinis Auctoribus, miro ordine contexuit, ac perdoctis Annotationibus illustravit. De hoc Scriptore plura leges apud Sixtum Senensem libro 1v. Bibliothecæ, apud Possevinum in Apparatu, & apud Aubertum Miræum in Bibliotheca Ecclesiastica. Claudius Scissellus, natione Sabaudus, primùm Massiliensis Episcopus, dein Taurinensis Archipræsul, juris Civilis scientiam cum Theologica eruditione conjunxit, & præter Historiam Christianissimi Regis Ludovici XII. quam Gallicè scripsit, librum quoq; edidit De triplici Statu Viatoris: Tractatus tres De divina Providentia: Librum contra Waldenses; & Commentaria,

taria , quibus Evangelium S. *Lucæ* elucidavit . De præclaris *Claudii Seiselli* dotibus ac lucubrationibus fusè differunt *Ferdinandus Ughellus* Tomo IV. *Italia Sacra* in Catalogo Taurinensium Episcoporum, & *Sammarthani* Tomo III. *Galliæ Christianæ* in Massiliensibus Episcopis . In Angliæ Sæculo XVI. floruit *Stephanus Gardinerus*, Wintoniensis Episcopus, & Regni Angliæ sub *Maria* Regina Cancellarius, qui Catholicum dogma de reali præsentia Corporis & Sanguinis Christi Domini contra Hæreticos Calvinistas erudito Volumine propugnavit, & graves carceris molestias sub *Eduardo*, Angliæ Rege hæretico, pro Fidei Catholicæ defensione constanter passus est. Hujus pii & eruditi Antistitis in confutandis Calvinistarum erroribus zelum æmulatus est eodem Sæculo in Galliis *Robertus Cœnalis*, originè Parisiensis, Sacre Facultatis Parisiensis Doctor, & Episcopus Abrincensis, qui, præter Galliarum Historiam Latinè duobus Tomis editâ, & Hierarchiam *Neustriæ* in quinque libros divisam, scripsit librum contra *Interim Cæsareum*: item *Antidotum adversus Sacramentarios*: *De Cœlibatu*: *Larvam Sycophanticam contra Calvinum*, & alia ejusmodi Opera, quæ singularem ejus eruditionem, & vindicandæ contra Hæreticos Fidei Catholicæ zelum apertè produnt . Postremò, inter Episcopos Sæculi decimi sexti *Jacobus Pamelius*, Audomarpolitanus in Artesia Episcopus, & Aldernadæ in Belgio illustri stirpe ortus, immortale nomen multis editis libris promeritus est, præsertim castigatissimis illis, quas adornavit, Editionibus *Tertulliani*, & Sancti *Cypriani*, quorum Opera novo & præclaro ordine digessit, Træctatus antehac

ineditos eis addidit, doctisq; Commentariis eadem illustravit, ex quibus proclive est judicare, eum Antiquitatis Ecclesiasticæ cognitionem amplam habuisse, & Critices Disciplinæ peritum fuisse.

D. De Historicis, quos in tertia Classe illustrium Sæculi decimi sexti Scriptorum reposuisti, nunc recto ordine disserere debemus, exceptis tamen illis, qui vel Monasticam, vel vitam Regularem professi, aliquid de Historia scripserunt, de quibus, juxta præscriptum ordinem, in sequentibus Monachorum, aut Regularium Scriptorum Classibus datâ operâ sermonem instituemus.

M. Incipiam ab Historicis Italis, qui Sæculo decimo sexto numero multò plures fuerunt, quàm in cæteris aliis Nationibus, & octo præcipuè Italiæ hic proferam Scriptores, qui in describenda Historiâ excelluerunt. Primus, juxta ordinem temporum, qui in Italia de Historia scripsit, est *Pandulfus Colleenutius*, qui, præter alia Opera quibus stylum exercuit, Neapolitanam Historiam sex Libris Italico Idiomate complexus est, ejusdemque Historiæ Compendium Latine edidit. Alter celebris Historicus Italus, est *Franciscus Guicciardinus*, Florentinus, qui Historiarum sui temporis libros viginti Italicè conscripsit, quos in Latinum sermonem convertit *Cælius Secundus Curio*. De hoc insigni Historico *Henricus Spondanus* ad annum MDXXXIV. Num. XVI. istud judicium profert: *Guicciardinus excellentissimus Scriptor, & paucissimis antiquorum Historicorum, recentium nemini gravitate sermonis, sententiarum pondere, ratiocinationum circumspeditione postponendus; plerisq; eximiis anteponeendus.*

Qui

*Qui, si non nunquam acrem se gestorum Principum, aliorumve de quibus agit, Censorem exhibeat; culpa hæc est noxiorum, non Historicorum, qui gravius culpandi ipsi forent, si malè facta tacerent, quibus alii prudentiores fiant, & à similibus peccatis abstineant, vel pudore. Alii Scriptores Guicciardinum impensè laudant, ajuntque, cum in concinnanda Historia Epistolas, Decreta, Fœdera, Conciones ex ipsis fontibus hausisse, & rerum, locorum, personarum, atque adeò consiliorum & factorum tam diligentem investigatorem fuisse, ut omnes Italiæ Urbes, municipia, castra, fluvios, publica que monumenta Historiæ conscribendæ necessaria penitus inspexerit. Non minori fide ac diligentia Paulus Jovius, natione Italus, patriâ Novocomensis apud Insubres, & Episcopus Nucerinus à Clemente VII. Pontifice Maximo creatus, Historiam sui temporis descripsit, seu Res, quæ quinquaginta annis gestæ sunt in Italia, Hungaria, Asia, Africa, aliisque regionibus. Scripsit etiam vitas aliquot Pontificum & Principum Italiæ, maximè Vicecomitum Mediolani, quibus adjunxit Elogia & Icones Illustrium Virorum, qui tam armis, quàm litteris clari evaserunt, quorum ipse imagines ad vivum expressas Comi in suo Musæo servabat. Ad Historiam itidem scribendam animum adplicuit Polydorus Virgilius, sive ut alii dicunt, Vergilius, Natione Italus, patriâ Urbinas, qui præter libros octo, quos edidit, *De Rerum Inventoribus*, & librum *De Prodigis*, concinnavit etiam *Historiam Anglicanam* libris xxvi. comprehensam, in qua tamen doctiores Angli parùm fidei ei tribuunt. Inter Historicos haud postremum locum occupare debet.*

Raphael Maffens, dictus *Volaterranus*, eò quòd *Volaterris*, *Hetruriæ* in Italia Urbe, natus sit. Libros triginta octo *Commentariorum Urbanorum* composuit, ac *Julio II.* Pontifici Maximo nuncupavit, quos *Urbanos* vocavit, quòd eos in Urbe Roma, conscripsisset. In tres verò Tomos partitus est ejusmodi libros. Primus Tomus *Geographiam Veterem* complectitur: Alter *Antropologiam*, sive Viros Illustres: Tertius *Philologiam*, sive Artium rudimenta. Nonnulla etiam Scriptorum Græcorum Opera in Latinum sermonem convertit idem *Volaterranus*. Optimi ac præstantissimi inter Italos Historici laudem consecutus est *Carolus Sigonius*, patriâ Mutinensis, qui Venetiis, Patavii, & Bononiæ litteras elegantiores docuit, scripsitque *De regno Italiæ* — *Commentarios in Fastos & Triumphos Romanorum* — *Notas in Severum Sulpitium* — *Librum De Republica Hebraeorum* — *Librum De Republica Atheniensem* — *Scholia in Titi Livii Historiam*, & elegantissimas *Orationes Latinas*. Clarissimis Italiæ Historicis Scriptoribus jure optimo accenseri debet *Michael Riti*, Neapolitanus, qui libros tres *De Regibus Francorum Romæ* edidit. Totidè m libros scripsit *De Regibus Hispaniæ*: librum *De Regibus Hierosolymorum*: libros quatuor *De Regibus Neapolis & Siciliæ*: libros duos *De Regibus Angliæ*. Verùm, ut candidè fatear, omnes illos, quos hætenus laudavi, Italiæ Historicos Scriptores longo post se intervallo reliquit Eminentissimus Cardinalis *Cæsar Baronius*, Romanæ Congregationis Oratorii Presbyter eruditissimus, *Soræ* in Regno Neapolitano anno MDXXXVI I I. natus, qui contra Centuriatores Magdeburgenses, infen-

infensimos Ecclesiæ Romanæ hostes, scripsit Annales Ecclesiasticos duodecim Tomis in Folio comprehensos, in quibus operam in concinnanda Historia Ecclesiastica adeò insignem posuit, ut omnibus suâ diligentia palmam præripuerit, & apud omnes doctissimus Annalium Ecclesiasticorum Parens audiat. Primus quippè omnium Cardinalis *Baronius* fuit, qui totius Orbis Christiani res gestas, præsertim autem quæ ad Ecclesiasticam Historiam pertinebant, in continuam seriem annorum incredibili labore digessit, multa locupletissima monumenta antehac penitus ignota primus prompsit in lucem, Antiquorum Episcoporum, in magnis Urbibus successiones; Veterum Hæresum originem, progressum & finem; tempora Ecclesiæ sive tranquilla, sive turbulenta, tam accuratâ diligentia explicuit, ut dignus sit absque ulla controversia, cui omnes & veteres & recentiores, qui illam eruditionis partem attigerunt, assurgant, fascesque submittant. In hoc sacro Ecclesiæ Annalium arduo Opere lucubrando posteaquàm Cardinalis *Baronius* triginta annos insumpsisset, & in eo perpoliendo insudasset, præmissis, auspicii vice, *Notationibus ad Martyrologium Romanum*, primum Annalium Ecclesiasticorum Tomum publicâ luce donavit, tanto omnium applausu, ut fuerint etiam ex Heterodoxis, qui ejus diligentiam, fidem, eruditionem ac judicium commendarint. Et reverâ tam in eo Tomo, quàm in sequentibus undecim innumeras difficultates, quæ antea dissolvi non posse credebantur, enodavit, complanavit, membra Historiæ, prius discerpta, passimque jacentia, in unum Corpus scitè coaptata collegit,

disparatis locum suum dedit, obscuris lucem, dubiis fidem, praposteris ordinem conciliavit, tantumque rerum Ecclesiasticarum cognitionem promovit, quantum ante eum nemo. Hoc insignis Cardinalis *Baronii* Opus *Sixtus* hujus nominis *Quintus* in Diplomate, Annalibus Ecclesiasticis ejusdem *Baronii* inserto, exornat isto singulari elogio: *Opus non minus doctè, quàm fidelitè scriptum, & ad totius Antiquitatis Ecclesiasticæ notitiam comparandam valdè utile; quo nimirum non tantum res gestæ per annos singulo. recensentur, & quæ de iis obortæ sunt, Controversiæ elucidantur; sed etiam ipsi Apostolicarum Traditionum fontes purissimi aperiuntur, atque hæreticorum mendacia confutantur &c.* Gloriosè huic conscribendo utilissimo Ecclesiæ Operi immortuus est Cardinalis *Baronius*, cùm pervenisset ad annum à Christo nato millesimum centesimum nonagesimum octavum, illudque continuarunt *Abrahamus Bzovius* Ordinis Prædicatorum, *Henricus Spondanus*, Gallus, Episcopus Appamiarum, *Odoricus Raynaldus*, Italus, Congregationis Oratorii Presbyter, de quibus in Colloquio quinto in Historiam Sæculi decimi septimi, quo floruerunt, disseremus.

Productis in medium celebrioribus Historicis Scriptoribus, qui Sæc. XVI. Italiã illustrarunt, nunc breviter me expediam ab aliis Scriptoribus, qui eodem Sæculo in cæteris Orbis Christiani Nationibus libros de Historia cum aliqua nominis celebritate ediderunt. Et primò quidè in Gallia *Florimundus Ramundus*, Senator Burdigalensis, aliqua Opera sermone Gallico lucubravit, quibus laudem apud eruditos haud mediocrem consecutus est.

Fabu.

Fabulam quoque de *Joanna Papissa* egregiè confutavit, & scripsit librum *De Antichristo*, item aliud Opus *De ortu, progressu, ac ruina Hæresum nostri ævi*. In Anglia *Nicolaus Harpsfeldius*, Archidiaconus Cantuariensis, eximius Fidei Catholicæ, temporibus *Elizabethæ* Angliæ Reginæ, Confessor, scripsit *Historiam Anglicanam Ecclesiasticam*, necnon *Historiam Wicleffianam*. Eodem Sæculo decimo sexto duo Angli Scriptores *Joannes Balæus*, & *Joannes Pitsæus* libros *De Illustribus Britannia, seu Angliæ Viris* in lucem emiserunt, quos hic indigitaile abundè sufficiet, quia in Romano Indice librorum prohibitorum inter Hæreticos primæ Classis recensentur. In Aragonia *Hieronymus Surita*, omnis Antiquitatis peritus, *Rerum Aragonensium* libros xxx. magnâ sinceritate, moderatione, diligentia & gravitate elaboravit. In Hispania *Joannes Margarinus*, Gerundensis Episcopus, *Paralipomena Hispania* libris x. complexus est ab adventu *Herculis* in Hispaniam usque ad *Theodosium Seniore* Imperatorem, & filios ejus *Arcadium* & *Honorium*, quorû temporibus Gothi in Hispaniam irruerunt. *Franciscus Tarapha*, Civis & Canonicus *Barcinonensis*, Regum Castellæ & Aragoniæ seriem contexuit: Et *Stephanus Garibajus*, Catholici Regis Historicus, *Annales Regnorum Castellæ, Lusitaniæ, Aragoniæ, Navarræ* Hispano idiomate composuit. In Bohemia *Joannes Dubravius*, Olomucensis in Moravia Episcopus, *Historiam Bohemicam* libris xxxiii. conscripsit. In Suecia *Joannes Magnus*, Gothus, Archiepiscopus Upsaliæ, Sueciæ, Gothiæ, Wandalæ Primas, librum edidit *De Episcopis Sueciæ*, & alterum Opus *De omnibus Regibus*

Gothorum, & Suecorum. In Germania *Wolfgangus Lazius*, Ferdinandi I. Imperatoris Historicus, Rerum Viennensium libros xv. composuit, & alia Opera Historica. *Albertus Krantzius*, Hamaburgensis, scripsit *Metropolim*, seu Historiam Ecclesiasticam de Ecclesiis *Caroli Magni* ætate constitutis, vel instauratis, item *Saxonicam*, & *Wandalicam*, necnon Chronicon rerum aliarum Septentrionalium, Daniæ, scilicet, Sueciæ, & Norvergicæ. Denique, in Belgio *Joannes Vascus*, Brugenſis, Salmanticę publicus Eloquentię Professor, condidit *Chronicon Rerum Hispanicarum*, quod in pretio est apud Viros eruditos. Consulto prætermitto *Joannem Sleidanum*, Natione Belgam, elegantem quidem Historicum Lutheranum, cujus libros *De Religione & Republica* undeciès mille falsitatibus inquinatos esse ostendit *Bartholomæus Latomus*, & eâ de causâ *Joannes Sleidanus* unâ cum suis libris inter Hæreticos primæ Classis rejicitur in Indice Romano librorum prohibitorum.

D. In hac quarta, quæ nunc sequitur, Clarissimorum Sæculi XVI. Authorum Classe Scriptores Gallos collocasti, quos proindè hic recensere debes, & de Operibus, quibus maximum Ecclesiæ & Reipublicæ Litterariæ splendorem contulerunt, pauca delibare.

M. Præcipuos hic percensebo Scriptores Gallos, qui Sæculum XVI. doctrinâ & pietate nobilitarunt. His tamen exceptis, qui de rebus ad Grammaticam & Historiam attinentibus scripserunt, quorum jam in superioribus Classibus meminimus; vel qui periti Jurisconsulti fuerunt, aut Monasticam, siue Regularem Vitam professi sunt,

sunt, de quibus in sequentibus Classibus, juxta præscriptum ordinem, sermonem sumus habituri. Decem verò præcipui tum in Theologia perdoctis suis Operibus illustrandâ, tum in Scripturis Sacris interpretandis, & in refellendis Hæreticorum erroribus celebrantur Sæculi XVI. Scriptores Galli, quorum primus est *Jacobus Faber*, dictus *Stapulensis*, quod ad *Stapulas*, maritimum Picardiae pagum, natus esset. Fuit Vir humanis divinisque litteris excultissimus, Sacræ Facultatis Parisiensis Doctor, quem *Erasmus* appellat *magnum bonarum Litterarum Antislitem*. Præter alia Opera, scripsit *Jacobus Faber Stapulensis* Commentaria in Evangelia, in Epistolas *S. Pauli*, & in septem Epistolas Canonicas & in Psalmos, necnon Tractatum *De tribus Magdalenis*. Hic tamen obiter advertere debes, hunc *Jacobum Fabrum Stapulensem*, nimio novitatis studio abreptum, quibusdam erroribus sua respersisse Opera, quæ subinde jussu *Clementis VIII.* Pontificis Maximi in Librorum prohibitorum Indicem relata sunt, donec alicujus Catholicæ Facultatis studio, vel præcipiente Inquisitione Generali, emendata in lucem prodirent. Eiusdem *Jacobi Fabri Stapulensis* errores confutavit *Natalis Bedda*, Sacræ Facultatis Parisiensis Syndicus, Vir doctissimus, qui etiam calamum strinxit in *Desiderium Erasmus*, quem multorum errorum infimulavit, à quibus ut se purgaret *Erasmus* prolixam adversus ipsum adornavit Apologiam, quæ extat in Tomo IX. recentis Operum *Erasmi* Editionis Lugduni Batavorum anni MDCCVI. Eamdem ferè sortem nactus est alter celebris in Galliis Regius Linguae Hebraicæ Pro-

Professor *Franciscus Vatablus*, patriâ Ambianensis, Vir insignis doctrinæ & in Sacris Litteris exercitissimus, qui licet morte præventus, nihil omnino in publicam lucem emisserit, *Annotationes* tamen, quas ipse in Scripturam Sacram in suis publicis Lectionibus tradiderat, sed ab hæreticis depravatas, evulgavit *Robertus Stephanus*, Typographus Hæreticus Calvinista. Quò factum est, ut, statim ac ejusdemodi *Notæ*, seu *Annotationes* in Scripturam Sacram in publicum prodierunt, à Doctoribus Sacræ Facultatis Parisiensis fuerint tanquam Hæreticæ proscriptæ, & Romæ in Indicem Librorum prohibitorum relatæ, donec ab aliqua Facultate Theologica, aut Inquisitione Generali expurgatæ publicâ luce donarentur. Id Beneficii Christiano Orbi cumulatissimè præstiterunt Salmanticenses & Complutenses Theologi, qui *Francisci Vatabli* nomine inscriptum Opus castigatum atque penitus emendatum, Salmanticæ apud *Gasparem de Portonariis* edi curaverunt. Cæterum, *Franciscum Vatablum* fuisse virum cum primis Catholicum & doctum testatur *Cornelius à Lapide* Prolegom. In Epistolas Apostoli Pauli his verbis: *Franciscus Vatablus Catholicus fuit, sed ejus scripta ab Hæreticis excusa & depravata sunt: Alioqui Vir ipse fuit egregiè doctus tam in Hebrais, quam in Græcis*. Inter peritos Scripturæ Sacræ Interpretes jure merito censeri debet *Joannes Gagnæus*, Theologus Parisiensis, ejusdemque Academiæ Cancellarius, *Francisco I.* Galliarum Regi à Concionibus & eleemosynis, qui eximiâ eruditione, Linguarum peritiâ, & singulari pietate præditus, peritiles in novum Testamentum edidit.

Com-

Commentarios, aliisque etiam perdoctis lucubrationibus Clarissimus apud Viros Litteratos evasit. In confutandis Lutheranorum & Calvinistarum erroribus præclaram Ecclesiæ operam navarunt quinque insignes Sacre Facultatis Parisiensis Theologi, videlicet *Claudius Espencæus*, *Claudius Sanctesius*, *Jodocus Cliftovæus*, *Jacobus Merlinus*, & *Hermannus Lethmatius*, quorum primus, seu *Claudius Espencæus* illustri genere natus, eruditione, facundiâ & pietate, nobilitatis decus cumulavit. Concilio Tridentino interfuit, & in Colloquio Poissiacensi *Theodorum Bezam*, cæterosque Sectæ Calvinianæ Ministros confutavit, atque ad illorum errores penitus profigandos edidit libros quinque *De Eucharistia & ejus Adoratione*: sex libros *De Continentia*: *Apologiam adversus Ministros Hæreticos*: *Tractatum De Missa privata & publica*, & alia complura utilissima Opuscula. Ad Concilium Tridentinum unâ cum *Carolo Lotharingo* Cardinali profectus est *Claudius Sanctesius*, & in eo elegantem Orationem habuit, quæ sic incipit: *Illustrissimi Domini*. Adfuit quoque Colloquio Poissiacensi, ubi avitam Sacro-Sanctæ Eucharistiæ Fidem invictè propugnavit, atque contra Sectæ Calvinianæ Pseudo-ministros Scriptis doctissimis vindicavit. Ex Ordine Canonicorum Regularium, cui nomen dederat *Claudius Sanctesius*, ad Ebroidensem Episcopatum assumptus est. Contra Hæreticos Lutheranos *Jodocus Cliftovæus*, Carnutensis Ecclesiæ Canonicus, varios Tractatus edidit, videlicet *Propugnaculum Ecclesiæ contra Lutheranos*: *Antilutherum*: *De Sacramento Eucharistiæ contra Oecolampadium*, aliaque ejusmodi de Dogmatibus nonnullis

Catho-

Catholicos inter Hæreticos controversis Opuscula. Edidit quoque ac eruditis Notis illustravit Decreta Concilii Senonensis, in quo, uti in superiori Colloquio diximus, nefanda *Lutheri* doctrina fuit profligata. De aliis, quæ *Jodocus Clichtoveus* lucubravît, Operibus, legendus est *Possevinus* in Apparatu. Non minori zelo Hæreticorum errores oppugnavit *Jacobus Merlinus*, qui, Ecclesiæ Parisiensis Pœnitentiarii munere fungens, cum, intelligeret, nihil ad retundendos Hæreticorum conatus efficacius esse armis, quibus dudum Sancti Patres eorum errores contriverunt, Sacrorum scilicet Conciliorum, & Catholicorum Antistitum Decretis, in duos Tomos ea collegit ac publici juris fecit. Scripsit etiam Apologiam pro *Origine*. Ecclesiam suis perdoctis Operibus haud parum illustravit, & adversus hæreticos communivit *Hermanus Lethmatus*, Theologus Parisiensis, & Episcopi Ultrajectensis Vicarius Generalis, qui, ut testatur coævus quidam Scriptor, cum, antequam studium Theologicum ingrederetur, feliciter esset auspicatus Græcarum ac bonarum litterarum notitiam, ita se gessit in hoc cursu Sorbonico Theologiæ, ut omnium punctis primas meruerit, idque in ea Schola, quæ sine controversia in hoc studiorum genere semper primas tenuit Nihil Conciliorum, nihil historiarum, nihil veterum Theologorum non excussit, atque adeo habet in promptu. Ingenium velox ac rapidum, discendi aviditas inexplebilis, judicium præsens & expeditum; quodque in hoc genere rarum est, nihil habet arrogantiae, nihil bilis, nihil supercilii. Mira comitas, mira modestia &c. Scripsit *De Instauranda Religione* libros novem. His Clarissimis

Viris,

Viris , Facultatis Parisiensis alumnis , duos alios adjungam Scriptores in Gallia illustres , videlicet *Jacobum Almainum* , celebrem Theologum Parisiensem , qui multa Opera Philosophica , Moralia , & Theologica edidit , & *Joannem Mercerum* , Lutetiae Parisiorum Linguae Hebraicae Professore , qui egregios Commentarios adornavit in *Genesim* , in *Job* , in *Salomonem* , & sex minores Prophetas priores . De aliis eruditis Gallis Scriptoribus , & praesertim de celeberrimae Universitatis Parisiensis Academicis consule *Egassium Bulaum* , qui ad calcem Tomi VI. *Historiae Universitatis Parisiensis* illustriorum ejus Academicorum , qui Saeculo decimo sexto floruerunt , amplum satis Catalogum exhibet . Hic tamen praetermittere haud debeo unum , qui mihi penè exciderat , doctissimum Scriptorem Gallum , *Gilbertum Genebrardum* , qui in Arvernia , Galliae Provinciâ , natus , Hebraicarum litterarum apud Lutetiam Parisiorum primum Regius Professor fuit , deindè Romae Bibliothecae Vaticanae Praefectus , postremò Aquensis in Galliis Archiepiscopus , diversa reliquit ingenii sui monumenta *De sacra Liturgia* , *De Ecclesiasticis Electionibus* . Plures etiam libros ex Hebraeo in latinum convertit , *Josephi* quoque Judaei Opera ex Graeco in Gallicum sermonem transtulit . Luculentum *Chronicon* ab Orbe condito ad sua usque tempora productum contexuit ; & doctissimum in Psalmos Commentarium emisit in lucem , ex quo Cardinalis *Bellarminus* plurima hausit , & in suos Psalterii Commentarios derivavit .

D. Praeter eximios illos Scriptores Italos , Grammaticos videlicet & Historicos , Cardinales & Epi-

& Episcopos, quos jam in superioribus Virorum Sæculi decimi sexti eruditorum Classibus laudasti, fueruntne in Italia eodem Sæculo decimo sexto alii Scriptores, eruditionis famâ conspicui, & omnium Gentium commendatione celebrati, atque subindè Sæculorum memoriâ digni?

M. Præter insignes Scriptores Italos, quos jam in medium produximus, extiterunt Sæculo decimo sexto alii longè plures, tum periti Jurisconsulti, tum perdocti Authores, qui è Statu vel Monastico, vel Regulari, tanquàm ex equo Trojano prodeuntes, præclarum Italiæ decus conciliarunt, sibi que immortale nomen pepererunt. Verùm, de Jurisconsultis, & de Scriptoribus, qui Sæculo decimo sexto Monasticam, vel Regularem Vitam professi sunt, cum simus dicturi in sequentibus Virorum illustrium Classibus, in quas, velut totidem alvearia, illos distribuimus, in hac quinta Virorum Sæculi decimi sexti eruditorum Classe, duos dumtaxat proferam egregios Scriptores Italos, qui ad sequentes reduci non possunt. Primus nobilissimus Scriptor, est *Flaminius Nobilius*, patriâ Lucensis, Vir Græcè Latinèque doctissimus, qui præter alia Opera, in Editione Versionis LXX. Interpretum, quæ Romæ *Sixti V.* Pontificis Maximi auctoritate in lucem prodiit, egregiam, unâ cum *Antonio Carafa* Cardinali, navavit operam, & Editionem Latinam, Vulgatam & veterem Scripturæ Sacræ, dictam *Italiam*, quæ ex Versione LXX. Interpretum erat expressa, quæque ante Hieronymianam Editionem, quam nunc Vulgatam nuncupamus, publicè in Ecclesia legebatur, sed jam à mille & ampliùs annis evanuerat, luci denuò, quoad

ejus fieri potuit, restituit, interpretationem textus Lxx. Interpretum Græci ex variis Sanctorum Patrum Sententiis hæc illâc dispersis, collegit, & in his, quæ ex Sanctis Patribus excerpere haud potuit, transferendis, veteris illius, seu *Italæ*, Editionis stylum & simplicitatem exprimere pro viribus studuit. Sic antiquam illam Scripturæ Sacræ Versionem ad normam Versionis Lxx. Interpretum factam, jamque extinctam, nobis quasi redivivam exhibuit, edique curavit Romæ anno MDLXXXVIII. Contendunt attamen duo perdocti Critici, antiquam Versionem Scripturæ Sacræ, dictam *Italam*, non fuisse à *Flaminio Nobilio* omninò restitutam. Quanquàm enim (inquit doctissimus *Daniel Huetius*, Episcopus Abrincensis in libro De Claris Interpretibus pag. 110.) *Italam* illam Scripturæ Sacræ Editionem totam ex Latinorum Scriptis maximo labore collectam consarcinare, & renovare studuerit *Flaminius Nobilius*, attamen cum pannos illos à Patribus undequaque corraferit *Nobilius*, & non *Italam* unam, sed complures alias, passim tunc temporis emergentes, & omnium usui permissas, promiscuè Patres usurparent, immò pro captu suo loca ex tempore sæpè converterent, vel ab aliis conversa memoriter recitarent, cumque è Lxx. Senum Editione, quæ profecta sit *Italica*; *Sixtinæ* autem, quam illam esse *Hexaplis* intextam, eruditi propugnant, *Nobiliana* consentiat; certissimum est, non facilius in *Nobiliana Italam*, quàm aliam quamlibet reperiri posse. Idem judicium profert alter peritus Criticus, seu *Richardus Simonius*, Congregationis Oratorii Presbyter, capite 19. *Disquisitionum Criticarum de variis Bibliorum Editionibus*, ubi hæc habet: Hanc puram

puram putam esse Ecclesiæ Latinæ Versionem, quæ ante Hieronymum sola in Occidente legebatur, nemo rei Criticæ peritus affirmaverit. Fieri siquidem non poterat, ut Nobilius illam modis omnibus absolutam & perfectam ex Patrum testimoniis hauriret, qui eam non exactè secuti fuerant, & si qui eorum Græcè docti fuerunt, Versionem novam ad Græcum sermonem lxx. Interpretum condere non ipsis fuit religio. Alius Scriptor Italus, qui Sæculo decimo sexto floruit, quemque singulari laude dignum esse autumo, est Albertus Pius, Corporum in Italia Princeps, qui non solum præclaris Legationibus apud Summos Pontifices Julium II. Leonem X. & Clementem VII. summâ cum laude perfunctus est, sed etiam singulari doctrinâ conspicuus doctissimis libris impia, Lutheri dogmata confutavit, & cum Desiderio Erasmo Litterarias Concertationes habuit, ut liquet ex libris, quos ultrò citròque scripserunt.

D. Veniamus nunc ad Scriptores Hispanos quos in sexta Virorum eruditorum Sæculi decimi sexti Classè collocasti, & prætermisissis Monachis ac Regularibus, necnon peritis Jurisconsultis, de quibus in sequentibus Classibus in quas eos ordinatè disposuisti, opportuniùs differemus; illos tantùm selige Classicos Scriptores, qui majori eruditione in Hispania præfulserunt, & Ecclesiæ novum splendorem perdoctis suis lucubrationibus contulerunt.

M. Duos in primis laudabo Scriptores Hispanos, linguarum peritissimos, & in Sacrarum Litterarum notitia omni exceptione majores, videlicet *Benedictum Ariam Montanum, & Andream Masium*, quorum primus, patriâ Hispalensis,

Do-

Doctor Theologus, omnium penè gentium linguis atque litteris apprimè excultus, à *Philippo II.* Hispaniæ Rege in Aulam adscitus, & in Ordinem Militiæ Sancti *Jacobi* cooptatus est, missusque Antuerpiam, ubi incredibili labore Regiam Sacrorum Bibliorum Editionem, magno Ecclesiæ & Reipublicæ litterariæ commodo, quinque Linguis, Hebraicâ, Chaldaicâ, Græcâ, Syriacâ, ac Latinâ, Tomisque octo comprehensam, adornavit, & Typis Plantinianis edi curavit anno MDLXXI. Immensam illud ac verè Regium Opus à Theologis Hispanis, Parisiensibus, Lovanientibus, & aliis Viris eruditione & pietate conspicuis fuit approbatum & eximiè laudatum, à quibusdam etiam Orbis miraculum dictum, teste *Waltono* in Præfatione ad Biblia Polyglotta Londinensia, Prolegomeno IV. pag. 33. Certè, hæc Biblia Polyglotta Antuerpiensis indefesso labore, summâque fide ac diligentia fuisse excusa, asserit ipsemet *Benedictus Arias Montanus* in Epistola ad *Gregorium XIII.* Pontificem Maximum his verbis: *Fuimus in labore per quatuor integros annos à xv. mensis Maji, quo ego in Belgium perveni, anni 1568. usque ad ultimam Martii hujus anni 1672. Tandem structura omnis, magnis quidem sumptibus, sexaginta perpetuis Operis magnis Virorum doctorum laboribus est absoluta. Quod verò ad Operis integritatem attinet, ego Benedictus Arias Montanus offero sanctitati vestræ Biblia ipsa à me à prima pagina ad ultimâ usque diligenter Græcè & Chaldaicè perlecta, & cum exemplaribus fidelissimè collata, tanta fide ut non solum si verbum aliquod depravatum deprehendatur, sed si vel unus apex aut jota in illis meritò desideretur, ceteris coadjutoribus*

meis exceptis, & à culpa liberatis, ipse perpetuam ignorantia & negligentia notam subire velim

Tertium Tomum (in quo continetur Apparatus ad Sacra Biblia (*totum ferè ipse conscripsi* . Præter hoc non minùs arduum, quàm eruditum & Ecclesiæ utile Opus, edidit insuper *Benedictus Arias Montanus* Commentarios in libros *Josue & Judicum*, in duodecim Prophetas Minores, in *Isaiam* Prophetam, in quatuor Evangelia, & in Acta Apostolorum. *Benedicto Ariæ Montano* ad Regiam Sacrorum Bibliorum Antuerpiensium Editionem adornandam *Philippus II.* Hispaniarum Rex socium, adjunxit *Andream Masium*, in Brabantia, seu in Belgio Hispanico, natum, qui præter Italicam, Gallicam, Hispanicam, cæterasque Europæ Linguas, quas optimè callebat, etiam Latinæ, Græcæ, Hebraicæ, atque Syriacæ cognitione haud vulgari præditus erat. Multa egregia edidit Opera, inter quæ præsertim eminent *Disputatio de Cena Domini* adversus Calvinistas, & eruditus in librum *Josue* Commentarius. In explicandis quoque litteris Sacris nomen inter Ecclesiasticos Authores promeriti sunt tres alii Scriptores Hispani, videlicet *Petrus Serranus*, Cordubensis, Doctor Theologus, & Canonicus Complutensis, qui Commentaria in *Leviticum*, in *Ezechielem*, & *Apocalypsin* edidit: *Paulus Palacius*, Granatensis, Theologus Conimbricensis, qui Commentarios scripsit in XII. Prophetas Minores, & in Evangelium Sancti *Matthæi*, necnon Catenam Patrum in eundem Evangelistam: *Leo Castrius*, in Academia Salmanticensi Doctor Theologus, qui Commentarios concinnavit in *Isaiam*, & *Oseam* Prophetas, *Apologiam* ador-

adornavit pro *Vulgata Scriptura Sacra Editione*, & *lxx. Interpretum Versione*. Postremò, inter illustres Sæculi decimi sexti Scriptores Hispanos jure optimo censi debent *Joannes Medina*, Theologus Complutensis, qui librum edidit *De Pœnitentia, Restitutione & Contractibus*: *Jacobus Payva de Andrada*, Lusitanus, inter Concilii Tridentini Theologos celebris, qui Explicationes omnium ferè Capitum de Religione Controversorum perdoctè scripsit, & adversus Hæreticorum, præsertim *Martini Kemnitii* calumnias, egregiam publici juris fecit Tridentinæ Fidei defensionem: *Joannes Ludovicus Vives*, patriâ Valentinus, Græcis Latinisque litteris excultus, qui, multis editis Operibus, præsertim quinque libris *De tradendis Disciplinis*, & commentariis in libros Sancti Augustini *De Civitate Dei*, immortalis famæ gloriam est adeptus, & Magister *Joannes Avila*, qui Vitæ Sanctimoniam cum doctrina & zelo animarum, conjungens, aliquot Opera Ascetica, & spirituales variis de argumentis reliquit Epistolas, ut videre est in ejus Vita, quam tribus libris conscripsit noster *Ludovicus Granatensis*.

D. Quò pleniorẽ peritorum Sæculi XVI. Scriptorum Hispaniæ notitiã habere possim, optarem vehementer, ut ad illorum classẽ hic etiã eos referres viros eruditos, qui eodem Sæculo in Belgio Hispanico floruerunt, suisque lucubrationibus Ecclesiã, ac Rempublicã litterariã illustrarunt.

M. In Belgio Hispanico plures celeberrimi fuerunt Scriptores, quos inter, isti, quos laudabimus, in maximo honore apud viros eruditos ha-

bentur, videlicet *Jacobus Latomus*, *Ruardus Tapperus*, *Thomas Stapletonus*, *Joannes Driedo*, *Jansenius Gandavenfis*, *Guillelmus Estius*, *Henricus Gravius*, *Christianus Adricomius*, *Albertus Pighius*, *Justus Lipsius*, *Joannes Molanus*, & *Guillelmus Lindanus*, de quibus pauca hîc attingemus. In primis, *Jacobus Latomus*, inter Lovanienses Theologos insignis, multa scripsit adversùs *Lutherum*, *Oecolampadium*, aliosque huius furfuris Novatores. *Ruardus Tapperus*, Lovaniensis Academiæ Doctor & Cancellarius, interfuit Concilio Tridentino, & *Articulos Lovanienses* contra *Lutherum* erudito Opere explicuit ac defendit. Author est etiam libri *De Providentia & Prædestinatione*. *Thomas Stapletonus*, in Lovaniensi Accademia Regius Sacræ Scripturæ interpres, multa adversùs Hæreticos Lutheranos & Calvinistas edidit Opera, de quibus legendus est *Aubertus Miræus*, in suis *Illustrium Belgii Scriptorum Elogiis*. *Joannes Driedo*, Lovaniensis Academiæ Doctor Theologus, complura itidem scripsit Opera, quibus Lutheranorum errores impugnavit, & Catholicæ Fidei dogmata doctissimè propugnavit. *Jansenius*, Gandavenfis Episcopus, scripsit utilissimam *Concordiam in IV. Evangelia*, doctissimum *Commentarium in Psalmos*, & alia Opera. *Guillelmus Estius*, in Academia Lovaniensi Doctoris Theologi laureâ donatus, ac deindè Academiæ Duacensis Cancellarius, Censuram, nomine ejusdem Academiæ, contra novam *Leonardi Lessii*, & *Joannis Hamelii* doctrinam adornavit, variaque reliquit ingenii sui monumenta, in quibus, præter eruditos *Commentarios in quatuor Magistri Sententiarum libros*, eminent *Commentarii in Beati*

Beati Pauli & aliorum Apostolorum Epistolas & Notæ in præcipua ac difficiliora Scripturæ Sacræ loca, quibus toti Orbi Christiano eruditionis famâ notissimus evasit. Henricus Gravins, Academia Lovaniensis Doctor, composuit, ejusdem Academia nomine, Censuram Lovaniensem contra jam laudatos Lessium, & Hamelium, & Romam postea ob summam eruditionem à Sixto V. Pontifice Maximo adscitus, à Gregorio XIV. ejus Successore, honorificè in Aulam exceptus ac Bibliothecæ Vaticanæ, & Apostolicæ Typographiæ Præfectus est institutus, atque Eminentissimis Cardinalibus, præsertim Sancto Carolo Borromeo & Cesari Baronio charissimus fuit. Christianus Adricomius accuratissimam Tabulam Geographicam Terræ Sanctæ descripsit, & Historiam Sacrorum Bibliorum Chronologicam contexuit. Albertus Pigbius, Academiae Coloniensis Doctor Theologus, Hadriano VI. Pontifici Maximo, à quo in Italiam fuerat evocatus, ac deinde Clementi VII. & Paulo III. acceptissimus fuit. Præter nonnulla, quæ de tempore celebrandi Pascha, & de Reformatione Calendarii edidit Scripta Mathematica, pluribus etiam Theologicis Operibus Catholicam Fidem adversus Hæreticos defendit, quæ Possevinus & Miræus accuratè recensent. Justus Lipsius, diligentia, judicio, ac multiplici lectione clarissimus, egregia edidit Opera, inter quæ præcipuam laudem merentur ejus Commentarius in Tacitum: Civilis doctrina: Monita Politica: Manuductio in Philosophiam Stoicam: Notæ in Senecam. Quoddam novum, & nimis concisum dicendi genus affectavit, quod interdum ejus orationem reddit obscuram, & pu-

rioris latinitatis cultoribus meritò non probatur. *Joannes Molanus*, Lovaniensis Academiae Theologus, Historiæ Ecclesiasticæ peritissimus, perdoctis de Historia, & de Theologia Operibus nomen suum celebravit. Denique, *Guillelmus Lindanus*, Religionis Catholicæ, & Disciplinæ Ecclesiasticæ zelo accensus, ex Doctore Lovaniensi Ruremundensis primò, deindè Gandavenfis, post *Cornelium Jansenium*, Episcopus, scripsit *Panopliam Evangelicam*, & *Tabulas Analyticas omnium Hæresum* sui Sæculi.

D. Cùm *Lutheri*, & *Zuinglii* Hæreses in Germania & in Septentrionalibus Regionibus fuerint Sæculo XVI. latè propagatæ, præstat, ut in hac septima illustrium Virorum ejusdem Sæculi Classe, celebriores inferas Scriptores, qui tam in Germania, quàm in aliis vicinis Regionibus voce & Scriptis adversus illas Hæreses acriter decertarunt, & stantes invicti in prælio pro domo Domini, nomen suum immortalitati consecrarunt. De aliis verò Germaniæ Scriptoribus, qui aut periti Jurisconsulti fuerunt, aut Monasticæ, & Regulari Vitæ addicti, in omni scientiarum genere excelluerunt: commodiùs in aliis sequentibus Classibus, in quas illos, majoris claritatis ergò, distribuimus, disseremus.

M. Quinquè potissimùm insignes Authores ad hanc septimam Virorum Sæculi XVI. eruditorum Classem referri possunt, qui ad debellandas *Lutheri*, *Zuinglii*, & aliorum eâ ætate serpentes Hæreses strenuè allaborarunt, omnesque suas curas ac studia contulerunt, videlicèt *Fredericus Nausæa*, *Joannes Ekius*, *Joannes Cochleus*, *Joannes Grop-*

Gropperus, & Joannes Noguera, de quorum patriâ, dignitate, & Operû præstantiâ pauca hic dicemus. Primus, seu Fredericus Nausea, Natione fuit Germanus & Viennensis in Austria Episcopus, qui præter Expositiones librorum Tobie & Judith, variasque Homilias, & Metaphrasim in Evang. S. Matthæi, scripsit *Expositionem* XII. Articulorum Fidei contra Hæreticos: *Censuras & Solutiones Questionum contra Zuinglium*: *Librum De Sacramento Eucharistiæ*; *Librum De Christiani Sacerdotii dignitate*: *Librum De Cœlibatu Sacerdotum & Votis Monasticis contra Lutherum*: *De ineunda in Christiana Religione Concordia*: *De Concilio Tridentino*, & alia de controversis Capitibus Opuscula. Non minùs in Concionatorio genere, quàm in Dogmatico excelluit perdoctus ille Episcopus, cujus Conciones, sicut & alia Opera fuerunt Colonie typis excusa anno MDLXXVI. Joannes Ekius, Natione Suecus, Sacrarum Litterarum in Academia Ingolstadiensi Professor, *Luthero*, *Carlostadio*, *Oecolampadio*, *Melanctoni*, *Pomerano*, aliisque pestibus & vivâ voce & scriptis voluminibus disputando strenuè sese velut murum æneum opposuit, præsertim in Disputatione Lipsica, uti in superiori Colloquio jam observavimus. Edidit *Enchiridion*, in quo Fidei Controversias breviter ac eruditè dirimit; duos libros de *Missæ Sacrificio*; tres etiam alios De *Primatu Petri*; *Librum quoque de Pœnitentia*, & plures Homilias tùm de Tempore, tùm de Sanctis, ut nihil in præsentia dicam de ejus Operibus Philosophicis, seu Commentariis in libros octo Physicorum *Aristotelis*, & in libros de Cœlis, & Anima, & de Meteoris. Joannes Cochleus, Norimber-

genſis, Vir doctiſſimus, & Fidei Catholicæ propugnator acerrimus, plurima contra *Lutherum*, *Bullingerum*, *Oſiandrum*, *Melancthonem*, *Bucerum*, *Calvinum*, & alios ejusdem farinae impiarum Sectarum Magiſtros ſcripſit Opera, & inter alia, librum *De Actis & Scriptis Lutheri*, qui ad detegendas verſipellis hæreſiarchæ *Lutheri* artes, ejuſque Sectarios confundendos utiliſſimus eſt. Scripſit inſuper *Joannes Cochleus* librum *De Septicipiti Luthero*, ut oſtenderet illius Hæreſiarchæ libros à capite ad calcem antilogiis, ſeu manifeſtis contradiccionibus ſcatere, eumque nunquam ſibi conſtare. Non minori conſtantiâ & animi ardore *Joannes Gropperus*, Natione Germanus, ex Suſato Weſtphaliæ Oppido ortus, Fidem Catholicam propugnavit, tum in Conventu Ratiſponenſi coram *Carolo V.* Imperatore, tum Colonia contra *Hermannum*, nefarium ejusdem Civitatis Archiepiſcopum Apoſtata, tum denique pluribus adverſus Hæreticos conſcriptis Operibus, quæ recenſet *Poſſevinus* in Apparatu ſacro, & ab omnibus Viris eruditis impenſè laudantur, potiſſimum ejus *Inſtitutio Catholica: Liber De Euchariftia: & Tractatus De Communione ſub altera tantum ſpecie*, Germanicè ſcriptus, & à *Surio* latinitate donatus. Inter S. R. E. Cardinales *Joannes Gropperus*, ob præclara merita, fuit à *Paulo IV.* Pontifice Maximo cooptatus. Demum, *Jacobus Noguera*, Vienneniſis Eccleſiæ in Austria Decanus, & *Ferdinando I.* Imperatori à Sacris, eodem zelo Fidei Catholicæ ſuccenſus, libros duos *De Eccleſia Chriſti ab Hæreticorum Conſiliabulis dignoſcenda in lucem emiſit*.

D. Proſtigatâ penitus Sæculo XVI. in Angliæ

glia Regno, sub *Henrico VIII.* & *Elizabetha* ejus filiâ, Religione Catholicâ, facilitè mihi persuadeo, paucos admodùm eodem sæculo extitisse celebres Catholicæ Communionis Scriptores Anglos, præter illos, quos jam in superioribus Classibus laudasti, videlicet *Reginaldum Polum*, *Joannem Fischerum*, *Thomam Morum* & *Nicolaum Harpsfeldium*. Quapropter, nos breviter expedire debemus ab his Scriptoribus Anglis, quos in octava Virorum sæculi XVI. eruditorum Classe reposuisti.

M. His Catholicis atque Clarissimis Scriptoribus Anglis, quorum jam in superioribus Classibus meminimus, tres alios in hac octava Virorum sæculi XVI. eruditorum Classe addam illustres ejusdem Nationis Scriptores, qui Schisma Anglicanum detestantes, nihil tam curæ ac cordi habuerunt, quàm ut Fidei Catholicæ dogmata, contra Hæreticos, Angliæ Regnum miserè infestantes, linguâ & calamo tutarentur. Primus est *Joannes Major*, Natione Scotus, Doctor Theologus Facultatis Parisiensis, ubi celebri famâ & Auditorum frequenti concursu Theologiam Professus, scripsit *Commentaria in IV. Libros Magistri Sententiarum*, & in *IV. Evangelia*. Concinnavit etiam *Historiam majoris Britanniae*, seu *Angliæ*, in sex libros partitam. Alter Scriptor Anglus, est *Guillelmus Alanus*, Lancastriæ in Anglia natus, Doctor Theologus Academix Duacensis, qui plura scripsit de Quæstionibus controversis contra Hæreticos Opera, quæ *Possevinus* in Apparatu, & *Pitfeus* in libro *De Illustribus Angliæ Scriptoribus* enumerant. Nec solùm perdoctis suis lucubrationibus Fidem Catholicam egregiè tuitus est *Guillelmus Alanus*.

Alanus, sed etiam multis pro Orthodoxâ Religionē & Romani Pontificis Primatu, in Angliâ Regnante *Elizabetha*, laboribus ac periculis perfunctus est, solumque vertere coactus. Restaurandæ tamen in Angliâ extinctæ penè Religionis Catholicæ percupidus, plura Seminaria variis in locis erexit, tum ad fovendos Anglos propter Fidem Catholicam exules, tum etiam ad erudiendos ejusdem Nationis juvenes, qui ad Hæresim debellandam idonei & pro Fidei Catholicæ, atque pro Romani Pontificis Primatus veritate magno animi ardore propugnandâ parati, in Angliam identidem transmitterentur. In præmium tot laborum, quos pro Fide Catholica constanti animo exantlavit *Guillelmus Alanus*, in Cardinalium Collegium à *Sixto V.* Pontifice Maximo adlectus est. Denique *Nicolaus Sanderus*, rebus, propter schisma Regni Angliæ, cujus Historiam scripsit, turbatis, Romam sese recepit, ubi laureâ Doctoris Theologi donatus, ad Tridentinum Concilium mox perrexit, & in eo augustissimo Patrum Confessu præclara ingenii & eruditionis suæ prodidit argumenta. Cardinalis *Stanislai Hosii*, cujus superius mentionem fecimus, per Poloniam, Prussiam ac Lituaniam comes individuus fuit, & inde Lovanium secedens, librum *De Visibili Monarchia* ibidem conscripsit. Sed de eximiis Scriptoribus, quos in octo priores Virorum sæculi XVI. eruditorum Classes tribuimus, satis hætenus, pro eâ, quam in hisce in Historiam Ecclesiasticam Colloquiis nobis præscripsimus, brevitate, dictum sit. Nunc in aliis sequentibus Classibus differendum nobis incumbit de Clarissimis Scriptoribus, qui Vitam

Mona-

Monasticam aut Regularem professi, locum inter peritos Scriptores Ecclesiasticos, summo omnium Virorum eruditorum consensu promeriti sunt.

D. Protulitne Ordo Monasticus Sæculo XVI. insignes Scriptores, qui doctrinâ & pietate Ecclesiam illustrarint?

M. Ex Sanctissimo Carthusianorum Ordine quatuor celebres prodierunt Sæculo XVI. Scriptores videlicet *Joannes Picus*, *Godefridus Tilmanus*, *Laurentius Surius*, & *Petrus Sutor*, quorum primus, Carthusiæ Divionensis in Galliis Prior, scripsit *Commentarium in Cantica*, quem *Ascensius Badius* edidit anno MDXXIV. Alter, seu *Godefridus Tilmanus*, Carthusianus Parisiensis, præter aliqua Græcorum Patrum Monumenta in latinam linguam versa, edidit *Allegoriarum & Tropologiarum in locos selectos utriusque Testamenti librum*. Tertius, seu *Laurentius Surius*, natione Germanus, præter nonnulla aliorum Opera, quæ ex Germanico idiomate in latinum transfudit, Collectionem etiam Conciliorum multis in locis emendatam, & septem Tomis comprehensam, edidit in lucem. Historiam Ecclesiasticam ab anno MD. ad suam usque ætatem deduxit, & Sanctorum Vitas collegit ac descripsit. Quo in ultimo Opere, *Laurentius Surius* benè meritus est de Sanctis Ordinis Prædicatorum, quorum Vitas accuratius ac elegantius scripsit, quasi ad Carthusianorum Ordinem pertinuisent, & eam ob rem, Comitia Ordinis FF. Prædicatorum Generalia ad illum litteras scripserunt, quibus grates egerunt maximas pro hac singulari in Dominicanos benevolentia, quam testatam voluit effusis illis laudibus in viros

ros hujus Ordinis sanctitate illustres. Ipse etiam S. Pius V. Pontifex Maximus, *Laurentium Surium*, pro suis in Ordinem Prædicatorum, & in totam Ecclesiam meritis impensè laudavit, & ad proseguendam Historiam Ecclesiasticam hortatus est. Quartus denique, seu *Petrus Sutor*, Natione fuit Gallus, Sacræ Facultatis Parisiensis Doctor, & postea Monachus Carthusianus, atque in pluribus Cœnobiis Prior. Scripsit *Apologiam pro Editione Vulgata: Tractatum De Potestate Ecclesiastica: Duos libros De Vita & Disciplina Carthusianorum*, & alia Opera Critica & Polemica, præsertim contra *Desiderium Erasmus*, quem acerrimè Scriptis suis exagitavit. Sed eum vicissim *Erasmus* acerbiori stylo perstrinxit in proluxa Apologia, quam in sui defensionem adornavit, quæque inserta est Tomo IX. Operum ejusdem *Erasmi* postremæ Editionis Lugduni Batavorum. Hic necessario inferendum esse putavi Clarissimum ejusdem Carthusianorum Ordinis Scriptorem, videlicet *Dionysium*, vulgò dictum, *Carthusianum*, vel *Doctorem Ecstaticum*, quem in Catalogo Scriptorum Ecclesiasticorum Sæculi decimi quinti, in quo vixit, memoriæ lapsu prætermisi. Fuit autem *Dionysius Carthusianus* Natione Belga, sanctitatis & eruditionis laude præstantissimus, qui omnes Divinæ Scripturæ Libros egregiis Commentariis elucidavit, scripsit etiam in IV. Libros Sententiarum, variosque Tractatus perindè eruditos emisit in lucem. Hunc religiosissimum Carthusianorum Ordinem semper ipse à teneris armis singulari affectu prosecutus sum, & nunc plurimum gaudeo, quòd Divina misericordia me, omninò immeritum, addixerit

sacro

sacro Ordini Prædicatorum , qui initam à S. Patre *Dominico* amicitiam cum Carthusianis , quasi partem patrimonii sui , diligentissimè custodierunt , & perpetuam hætenùs servaverunt , tum beneficiis ultrò citròque receptis , tum similitudine morum & Instituti , quod ferè ejusdem generis est , easdem penè Leges statuit de jejuniis per septem anni menses , de jugi à carnibus abstinèntia , de silentio , & de reliquis disciplinæ partibus , quæ adeò intimè utrumque Ordinem devinxerunt , additis etiam ferè eisdem vestibus , ut Dominicanus videatur Carthusianus , qui charitatis causâ , paululùm à solitudine secedit ; Carthusianus etiam Dominicanus sit , qui , actione intermissâ , totum se contemplationi tradit . Sed jam ad id , undè paululùm digressi sumus revertamur , & de cæteris aliis illustrioribus Sæculi XVI. Scriptoribus Monachis aliquid breviter stricimque dicamus . Dedit Ecclesiæ Sæculo XVI. Ordo S. *Benedicti* quinque Scriptores Ecclesiasticos , quorum primus fuit *Gregorius Cortesius* , patriâ Mutinensis , Abbas Cassinensis , à *Paulo III.* Pontifice Maximo in Collegium Cardinalium adscriptus , qui Theologiæ , & utriusque juris peritissimus Commentarios exaravit in IV. Sententiarum Libros , aliosque edidit , *De Theologica Institutione : De peccato Originali : De potestate Ecclesiæ : De adventu S. Petri Romam &c.* Secundus Scriptor Monachus Benedictinus , est *Jacobus Billius Brunæus* , Abbas S. *Michaelis in Eremita* , Guisæ natus , proximo Hannoniorum finibus Oppido ; Vir Græcè ac Latine doctissimus , qui plurima ex Patribus Græcis , *Gregorio Nazianzeno , Basilio , Chrysostomo , & Joanne Dama-*

Damascono, doctissime, fidelissimeque latine reddidit. Latinam suam Lucubrationum S. Joannis *Damasцени* Versionem, quæ Parisiis anno MDLXXVII. Parisiis publici juris facta est, eo potissimum nomine aggressus est *Jacobus Billius*, ut effrænem Hæreticorum, in contemnendis Sanctorum Patrum, & Veterum Theologorum Operibus audaciam retunderet, quemadmodum ipsemet testatur in Epistolâ nuncupatoriâ ad Cardinalem *Carolus Borbonium*, Rothomagensem Archiepiscopum, his elegantissimis verbis, quæ hic ad excitandos Juvenes ad lectionem Operum Sanctorum Patrum & Veterum Theologorum inferere operæ pretium duxi: *Inter plurimas Notas*, inquit ille doctissimus Abbas, *quæ Orthodoxos ab Hæreticis dirimunt, hanc vel in primis numerandam haud immerito quispiam censuerit, quod illi Veteres Theologos, tanquam parentes colunt ac suspiciunt, eorum vestigiis hærent, in eorum lucubrationibus, ingeniique monumentis libenter versantur, ab eorum placitis vel transversum unguem sibi minimè discedendum putant. Hi contra celeberrimos etiam quosque Patres, atque tum doctrina, tum admirabili vitæ sanctitate, ac pietate præditos, inaudito quodam supercilio aspernantur, ac velut de ponte deiiciunt, eos nunc probris & maledictis incessunt, nunc sannis ac disteriis impetunt, id denique omnibus modis agunt, ut eos, quos errorum suorum laqueis implicitos tenent, à præstantissimorum Authorum lectione debortentur. Quos enim errores hac miserrimâ tempestate ab orco revocarunt, hos à veteribus Theologis confossos, & jugulatos esse minimè ignorant, ut jam non tam Hæresum inventores, quam sepultarum effossores dici possint. Cùm igitur*

tur in Sanctissimorum Virorum scriptis nobis certissimum praesidium constitutum, sibi Crucem defixam, paratamque ruinam esse perspiciant, idcirco eos tanquam firmissimos Catholicae Fidei propugnatores infensissimo animo averfantur, ac de omnium manibus sublatos cupiunt &c. Utinam omnes Theologi semper prae oculis haberent hæc, & alia id genus præclara documenta, quæ in hac Epistola Nuncupatoria Operum S. Joannis Damasceni suppeditat clarissimus ille Scriptor Jacobus Billius Bruneus, qui ob singularem linguæ Græcæ peritiam, & omnigenam eruditionem, Doctorum Virorum sæculi XVI. maximam sibi venerationem comparavit. Tertius Scriptor Monachus Benedictinus, est *Thomas Luscinus*, patriâ Argentoratensis, qui edidit *Allegorias Psalmorum*, & Author est Libri, cui titulus: *Pelagus humanæ miseriæ*, &c. Quartus Scriptor Monachus Benedictinus, est *Ludovicus Blossius*, ex illustri prosapia in Belgio oriundus, qui Latinis, Græcis, Hebraicisque Litteris, necnon Philosophiâ & Theologiâ sub optimis Magistris in Academia Lovaniensi imbutus, Regulam S. *Benedicti* in Cœnobio Latiensi professus est, & postea, ob vitæ innocentiam, & Regularis Disciplinae zelum, Abbas ejusdem Monasterii electus, libros Asceticos edidit, qui clarissimum nomen, & magnam sanctitatis opinionem ei pepererunt. Ejus Vitam ex Monasterii Latiensis Archivis & aliis documentis descriptam exhibet *Bollandus* inter Acta Sanctorum ad diem VII. mensis Januarii, eique Scriptorum pii illius Monachi Catalogum Chronologicum præmittit. Agmen Scriptorum Ordinis S. *Benedicti* claudet *Joannes Docans*, ex Mona-

Monacho Benedictino Laudunensis in Gallia Episcopus, qui præter libros duos *De æterna Filii Dei Generatione*, ejusque temporali nativitate, Homilias per totum anni curriculum evulgavit. His celebrioribus Ordinis Monastici Scriptoribus unum alium dumtaxat famigeratissimum Cisterciensem Monachum addam, videlicet *Cyprianum*, appellatum *Phenicem Hispaniæ*, Hebraicæ, Chaldaicæ, Græcæ, Latinæque linguarum peritissimum, & Sacrarum Litterarum in Academia Complutensi Professore eximium, qui Commentarios in *Job*, *Isaiam*, *Jeremiam*, *Nabum*, in *Evangelia S. Matthæi*, & *S. Joannis*, & *Apocalypsin* adornavit, ac tres præterea libros in *Cantica Salomonis*, deque *Mundi Opificio* conscripsit. Istos illustriores Scriptores Monachos, quos in nona Virorum Sæculi XVI. eruditorum Classe constituimus, hic indiguisse sufficiat, maximè, cum de aliis Scriptoribus, qui eodem Sæculo Vitam Regularem amplexi sunt, in sequentibus Classibus sinus copiosè dicturi.

D. Illustrium Scriptorum Sacri Ordinis Prædicatorum in defensione Fidei Catholicæ constantiam, ardentissimum in proterendis hæresibus zelum, reverentiam ergà Sedem Apostolicam, & in ea colendâ tutandâque turbulentissimis temporibus probatam fortitudinem invictam, ac denique illibatam Doctrinam, germanam pietatem, aliaque id genus præclara merita, quibus Ecclesiam illustrarunt, & omnium salutem ubique promoverunt, jam in præcedentibus Colloquiis fuisse latè prosecutus; nunc in ista decima Classe Scriptorum, qui Sæculo XVI. primum inter viros
cru-

eruditos locum obtinuerunt , texere debes elogia clarissimorum Scriptorum Ordinis FF. Prædicatorum , qui eodem Sæculo doctrinâ & pietate incla-
ruerunt, atque eorum Opera, ac res gestas maximè memorabiles, præsertim ad Ecclesiæ & Reipublicæ litterariæ statum pertinentes , breviter annotare .

M. Dominicani, perpetuâ & nunquàm interruptâ serie à S. Patre *Dominico* ad hæc usque nostra tempora, illustrandæ Ecclesiæ, veritati doctissimis suis lucubrationibus propugnandæ , luci Fidei per totum Orbem Gentibus infidelibus inferendæ , atque evertendis enatis Hæresibus tam egregiam operam navarunt , ut meritò dicta sit Dominicana Religio, *Ordo Veritatis*, quam velut à bicipiti fonte, Sancto *Dominico*, & Doctore Angelico *Thoma Aquinate*, ità copiosè hausit , ut *Marcus Antonius Coccius Sabellicus* Sæculi XVI. Scriptor Italus undecunque doctissimus , *Enneade* nonâ libri quinti *Historiæ* referat , suâ ætate , anno videlicet millesimo quadringentesimo nonagesimo , quo florebat , è Sacro FF. Prædicatorum Ordine mille quingentos Sacræ Theologiæ Magistros floruisse . Ex hac immensa Scriptorum messe plures , eosque celebriores in Colloquiis in Historiam superiorum Sæculorum XIII. XIV. & XV. jam produximus , aliosque, qui Sæculo XVI. ore famæ , omniumque gentium commendatione fuerunt celebrati , in hac decima virorû eruditorum Classe proferemus in medium . Sed ne eorum numerus , qui prope modum infinitus est , ordini ac perspicuitati , cui potissimum studere satagimus , officiat ; eos sic disponemus , ut primo loco recenseamus doctissimos Cardinales & Episcopos Ordinis Prædicato-

rum, qui Sæculo XVI. floruerunt, deindè insignes Theologos, & Scripturæ Sacræ Interpretes: Denique eximios Concionatores, & Scriptores cum Asceticos, tum Historicos. Eminuit Sæculo XVI. inter Cardinales Ordinis FF. Prædicatorum *Thomas de Vio*, patriâ *Cajetanus*, undè illi *Cajetani* nomen adhæsit. Eum Cardinales *Palavicinus*, *Bel-larminus*, necnon *Possevinus*, Societatis Jesu Scriptores, aliique mirè laudant ab ingenio, à summa eruditione, à maximis in Ecclesiam meritis, quæ *Leonem X.* Pontificem Maximum impulerunt, ut anno ætatis suæ trigésimo octavo in supremum totius Ordinis sui Magistrum Generalem electum, aliquot post annos ad purpuram eveheret, ad difficillimas, & juxtà honorificentissimas Legationes admoveret, & in Controversiis, quæ circa Religionem emergebant, præ cæteris consulere. Nec in minori pretio doctissimum illum Cardinalem habuit *Clemens VII.* Pontifex Maximus, qui in expugnatione ac direptione Urbis Romæ, cuius mentionem fecimus in superioribus Colloquiis, cum vix cuicumque suis malis & periculis implicito liceret de alienis meminisse, non potuit attamen Summus ille Pôtifex, tantâ ruinâ oppressus, Cardinalem *Cajetanum* oblivisci, & in ea totius Urbis calamitate sollicitè inquisivit, quid illi mali accidisset? omnemque sollicitudinem adhibuit, ne ab hostilibus copiis Romani deprædantibus occideretur: *Cavete*, inquiebat, *ne extinguatis Lumen Ecclesiæ.* Quàm amplâ eruditione præditus esset Cardinalis *Cajetanus*, apertè probant commentaria in totam Summam tripartitam S. *Thomæ*, Commentaria in *Scripturam universam*, præter quàm in Canticum, Pro-

Prophetas, & Apocalypsin: Summula de peccatis, & alia Opuscula tùm Moralia, tùm Theologica, de Fide & Operibus, De Indulgentiis, & aliis quæstionibus controversis contra Hæresiarcham *Lutherum*. Verùm, cùm nihil sit ex omni parte beatum, ultrò fateri debemus, nullum Cardinali *Cajetano* ab omni errore remotiorem fuisse, quandiù *S. Thomæ*, Doctori Angelico, velut Sacræ anchoræ adhæsit; nullum ad lapsus magis præcipitem, cùm ducem deseruit, & sibi fidit, maximè in Scripturæ Sacræ interpretatione, in qua parùm feliciter versatus est, sicut observat doctissimus *Melchior Canus*, eiusdem Ordinis Prædicatorum elegantissimus Scriptor libro 2. *De Locis Theologicis* Cap. 13. & libro 8. Cap. 3. ubi hæc habet: *Ego Virum hunc* (cèu Cardinalem Cajetanum) *ut sæpè aliàs testatus sum, semper feci maximè, Plurimum enim Ecclesiam Christi suis litteris iuvit. Longum est autem hominis commendare sive eruditionem, sive ingenium: molestum etiam universa ipsius Opera commemorare. Illud breviter dici potest: Cajetanum summis ædificatoribus Ecclesiæ parem esse potuisse, nisi quibusdam erroribus doctrinam suam, quasi cujusdam lepræ admixtione, sædasset, & vel curiositatis libidine affectus, vel certè ingenii dexteritate confusus, litteras demùm sacras suo arbitratu exposuisset, felicissimè quidem ferè, sed in paucis quibusdam locis acutius sanè multò quàm feliciter &c.* Huic iudicio, quod noster *Melchior Canus* tulit de Cardinali *Cajetano*, lubens quidem subscribo, at probare hæud possum acriorem illū stylum, quo *Ambrosius Catharinus*, eiusdem Ordinis Prædicatorum Scriptor, invecus est in Cardinalem *Cajetanum*, contra

quem sex libros scripsit, & in his plures profecto calumnias, quàm illius Cardinalis errores, inseruit. Sed magis, meherclè, culpandus est *Alphonsus à Castro*, qui libro 2. *adversus Hæreses*, omninò inconsideratè Cardinalem *Cajetanum* numero Hæreticorum accensuit. Quam certè atrocem injuriam necesse non est pluribus depellere, post vindicias Inquisitionis Hispanæ, quæ majoris in Cardinalem *Cajetanum* æquicatis, uti est autoritatis in Fidei judiciis, hæc folio 37. *Expurgatorii* pronunciat: *Ex Alphonsi à Castro Indice Operis De Hæresibus, ex quacumque editione, expunge ex numero & catalogo Hæreticorum Thomam Cajetanum, qui potius inter summi ingenii viros pietate præclaros, atque optimè de Ecclesia Catholica meritos numerandus est.* Obiit eruditissimus ille Cardinalis die 1x. mensis Septembris anni MDXXXIV. & apud FF. Prædicatores in vestibulo Ecclesiæ S. *Mariæ super Minervam*, humili Sepulchro condi voluit. Ejus Vitam scripsit *Antonius Fonseca* Lusitanus. Præter *Thomam Cajetanum*, Cardinalem S. *Sixti*, prodierunt etiam Sæculo XVI. ex Ordine Prædicatorum novem insignes Scriptores, qui ad Episcopatum assumpti Ecclesiæ doctrinæ suæ splendore mirum in modum illustrarunt, nimirum *Augustinus Justinianus*, *Didacus Deza*, *Jacobus Naclantus*, *Joannes Faber*, *Melchior Canus*, *Ambrosius Catharinus*, *Guillelmus Parvi*, *Bartholomæus Carranza*, & *Bartholomæus à Martyribus*, de quibus pauca hic dicemus, ut in hac amplissima Clarissimorum Scriptorum Ordinis Prædicatorum Sylva aliquis statuatur orationi modus. In primis, *Augustinus Justinianus*, patriâ Genuensis, Nebiensis in Corsica Episcopus,

scopus, Sacrarum Litterarum, linguarumq; Orientalium peritissimus fuit & alter sui Sæculi *Origenes*, quippè qui vetus & novum Testamentum unâ cum Versionibus in unum Corpus redegit, quod *Biblia Oëtapla* inscripsit, quia in singulis paginis octo columnas disposuit, quarum prima, Textum Hebraicum; Altera, latinam ejusdem Textus interpretationem; Tertia, Latinam Versionem Vulgatam; Quarta, Grecam; Quinta, Arabicam; Sexta, Chaldaicam; Septima, Latinam Caldaicæ Paraphræcos interpretationem; Octava, Scholia, seu breves continet Annotationes, quibus Judæorum potissimum errores refellit. Naufragio periit *Augustinus Justinianus*, dum anno MDXXXVI. in Corsicam ad Ecclesiæ suæ administrationem rediret. Ejus cum laude meminerunt *Vghellus* Tomo IV. Italiæ Sacræ, *Miræus* in Auctario, *Possevinus* in Apparatu Sacro, & qui de Viris Illustribus Ordinis FF. Prædicatorum scripserunt, *Fontana*, *Sixtus Senensis* & *Altamura*. Alter, quem laudavimus, ex Ordine Prædicatorum ad Episcopatum assumptus, est *Didacus Deza*, Doctor Salmanticensis, *Ferdinando* Regi Hispaniæ à Sacris Confessionibus, Inquisitor Supremus Fidei in Hispaniarum Regnis institutus, & Archiepiscopus Ecclesiæ Hispalensis, quam per novemdecim annos cum sanctissimè rexisset, & Collegium S. *Thomæ* Dominicanis Hispali erexisset, tandem ad Toletanæ Ecclesiæ Archiepiscopatum, à *Carolo V.* Imperatore, & Hispaniarum Rege, designatus, & ab *Hadriano VI.* Pontifice Maximo confirmatus, dum ad illam Ecclesiam accederet, in itinere obiit anno MDXXIII. & in suo Conventu S. *Thomæ* Hispalensi sepultus est. Plurimas reliquit

doctrinæ suæ monumenta , præcipuè *Monoteffaron Evangelicum* præclaris Commentariis illustratum, quod quidem Opus in Bibliotheca ejusdem Collegii S. Thomæ Hispalensis magno volumine & elegantibus characteribus descriptum etiamnum asservari testantur *Sixtus Senensis* lib. iv. Bibliothecæ Sanctæ, & *Ambrosius De Altamura* in Bibliothecâ Dominicanâ , Centuriâ iv. ad ann. MDXXIII. In Italia floruit *Jacobus Naclantus*, patriâ Florentinus, Conventus S. *Mariæ Novellæ* Ordinis Prædicatorum alumnus, qui dùm Romæ Theologiam in Conventu Minervitano doceret, à *Paulo III.* Summo Pontifice creatus est Episcopus Clodiensis, seu Clugiensis, in Patriarchatu Veneto : interfuit Concilio Tridentino, & Ecclesiam suam iuxta Sacri illius Concilii leges per viginti quinque annos sapientissimè rexit, composuit ac reformavit. Enarrationes composuit pias & doctas in Epistolas S. *Pauli* ad Romanos & Ephesios; scripsit etiam *Medullam Scripturæ Sacræ*, variosque Tractatus cùm Theologicos, tùm Philosophicos, & alia Opuscula, quæ omnia in unum volumen collecta S. *Pio V.* tum temporis Pontifici Maximo nuncupavit. In Germania strenuè restitit Hæreticis Lutheranis, Zuinglianis, Anabaptistis, & Calvinistis, atque doctissima adversùs illos Opera scripsit *Joannes Faber*, Natione Germanus, & ex Ordine Prædicatorum ad Episcopatum Viennensem assumptus, quæ celebrat *Georgius Crugerius*, Societatis Jesu Scriptor, in libro, cui titulus est : *Pulveres Sacri*, ubi sequens illius eruditi Episcopi Elogium refert ex *Nicolao Avancino*, ejusdem Societatis Professore, his verbis contextum : *Fuit Joannes Faber Ordinis*

nis Prædicatorum illustre ornamentum. Hic cum candida veste, virtutis & cæli factus est Candidatus; vir non minus eruditione ac Sapientia instructus, quam vitæ integritate spectandus. Animi supra ejus sæculi Sapientes eruditio, supra illecebras eminens magnitudo, supra minas & terrores constantia, supra fortunam virtus, latere volentem extraxerunt in lucem. Adlectus Conscientiæ Cæsareæ (seu Ferdinandi I. Imperatoris) Arbiter, Aula vetusta probra extinxit, cum eam fecit virtutum magistram. Nulli placere studens, nulli displicuit; nulli displicere volens, omnibus placuit. Virtutis ac Sapientiæ suffragio, Episcopus Viennensis creatur. Ingenium, stylum, linguam in Hæreticos acuit, sæpè cum eis confligit publice, semper vicit. Per ea prælia sibi famam & gloriam comparavit, Ecclesiæ manipulos dedit &c. Ex hoc tam splendido Elogio facile intelligere potes, clarissimum Scriptorem fuisse Joannem Fabrum Episcopum Viennensem Ord. FF. Prædicatorum, ac subindè plurimi fieri debere Opera tam Moralia, quam Dogmatica, quæ præsertim adversus sui temporis Hæreticos lucubravit, & quorum Catalogum texunt hi, qui de Scriptoribus Ecclesiasticis, & de Viris illustribus Ordinis FF. Prædicatorum scripserunt. Hos insignes jam à me laudatos Ordinis Dominicani Scriptores, pontificalibus infulis conspicuos, doctrinâ æquavit, & inter scribendum eloquentiâ superavit Melchior Canus, ejusdem Ordinis, natione Hispanus, & Episcopus Canariensis, qui in sacris Litteris, in SS. Patribus, in Historia Ecclesiastica, & in S. Thomæ doctrina, versatissimus, ingenii sui perenne reliquit monumentum, videlicet pulcherrimum Opus *De Locis*

Theologicis, in quo cultissimo stylo, ornato verborum contextu, exquisito rerum apparatu, & multiplici argumentorum nexu res Theologicas pertractat, doctrinæ Ecclesiasticæ gemmas, & reconditos sacræ antiquitatis thesauros plenâ manu diffundit. Edidit quoque doctissimus ille Episcopus Relectione De Sacramentis in genere, & aliam De Sacramento Pœnitentiæ, dùm publicè Theologiam doceret in celebri Universitate Salmanticensi. Aduit *Melchior Canus* Concilio Tridentino, ubi Patribus admirationi fuit, & ab omnibus multo in pretio habitus. Egregia Virorum Illustrum tam cœvorum, quàm recentiorum de *Melchiore Cano* testimonia simul collecta legis in capite primo *Vindicationum* ejusdem *Melchioris Cani*, quas in fronte postremæ ejus Operum Editionis Patavii anno MDCCLXIV. adornatæ præmisit doctissimus noster *Hyacinthus Serry*, Sac. Facultatis Parisien. Doctor, & in Academia Pataviensi Primarius Theologiæ Professor. Scio non defuisse, æmulos obtrectatores, qui *Melchiorem Canum*, multis licet eruditorum Virorum præconiis celebratum, variis accusationibus laceßere, ejusque nonnullas opiniones improbare tentarunt. Verùm, omnes ejusmodi accusationes dispunctas invenies, æ plenissimè confutatas cap. 2. & in aliis sequentibus *Vindicationum Melchioris Cani*, quas jam citatus *Hyacinthus Serry*, Ordinis Prædicatorum concinnavit. Inter Illustres ex Ordine Prædicatorum assumptos Episcopos locum habet *Ambrosius Catharinus*, natione Italus, Patriâ Senensis, Minorensis primùm Episcopus, deindè Compsanus Archiepiscopus in Regno Neapolitano inauguratus.

Vir

Vir fuit emendatissimis moribus, & animo robusto præditus, humanarum litterarum & juris Canonici peritus, in Theologicis studiis versatissimus, omnique disciplinarum genere excultus, sed ingenio suo plus æquo indulgens, à nonnullis communibus Scholæ Thomisticæ Placitis discessit, & in præcipuos Ordinis sui Theologos, præsertim Cardinalem *Cajetanum*, & *Dominicum Sotum*, calamum felle tinctum acuit, quò fit, ut in Schola Thomistica non benè audiat. Interfuit Concilio Tridentino, in quo elegantem orationem habuit, ac plura scripsit Opera, quorum Catalogum exhibet noster *Ambrosius de Altamura* in *Bibliotheca Dominicana*. Centuriâ IV. ad annum MDLIII. Ejusdem *Ambrosii Catharini* cum laude meminerunt Cardinalis *Palavicinus* in *Historia Concilii Tridentini* libro XIII. cap. VIII. *Vghellus* Tom. 7. & 8. *Italia sacra*, *Bellarminus*, *Philippus Labbeus*, *Miræus*, de Scriptoribus Ecclesiasticis, quibus adungi possunt *Sixtus* & *Antonius Senenses*, alique Dominicani, qui de *Illustribus Viris Ordinis Prædicatorum* scripserunt. In Gallia Sæculo decimo sexto singulari doctrinâ & eximiâ pietate emicuit alter Episcopus, ex Ordine Prædicatorum assumptus, *Guillelmus Parvi*, Normannus, Theologus Parisiensis, Regibus Christianissimis *Ludovico XII.* & *Francisco I.* primùm à Confessionibus, postea Episcopus Trecentis, deindè ad Sylvanectensem Ecclesiam translatus, Rempubicam illustravit tum editis insignium aliquot Scriptorum Operibus, *Gregorii Turonensis*, *Pauli Diaconi*, *Luitprandi Ticinensis* & *Sigiberti*; tum etiam perdoctis, quas proprio Marte præcudit, lucubrationibus, quibus

eximii

eximii Theologi nomen promeritus est apud Viros sui temporis eruditos, qui eum impensè laudant, præsertim *Claudius Seyffellus*, Archiepiscopus Taurinensis, in vita, quam scripsit, *Ludovici XII.* Galliarum Regis, & *Guillelmus Budæus*, qui in Epistola ad *Erasmum*, quæ extat ordine cxcvii. Tomo III. Operum *Erasmi* in postrema Editione Lugduni Batavorum ann. mdcciii. adornatâ, palàm facit, quàm præclare de litteris, ac Viris litteratis *Guillelmus Parvi* meritus sit: *Heri*, inquit, *animi causa* (id quod rarò soleo) *tabernis bibliopolarum* obeundis, pomeridianas aliquot horas consumere statueram: ad *Joannis Parvi* *tabernam* nobilis *bibliopola* offendi *Guillelmum Parvum*, isti, ut arbitror, gentilem: *Virum eundem magnum in primis, Theologumque eximium, eorum sodalium decus, quos Dominicales appellant, cognomento Prædicatores, qui nunc est à Sacro Sanctis confessionibus Regi. Haud alio concionatore Aula ac regius comitatus in magnis celebritatibus utitur, nec Ludovici Regis tempore usa est; Vir omninò ad Ecclesiasticos panegyrismos exactè à natura concinnatus. Is cùm mihi familiariter amicus est, amicosque meos amat, tum eo nomine eum præcipuè observo, quòd librorum reconditorum conquisitor est, atque investigator sagacissimus, ac bibliothecarum penè compilator. Sed nescias, utrùm omnia volumina avidius corroget, an benignius amicis impertiat & commodet &c. Denique, alii duo, qui sequuntur Episcopi ex Ordine Prædicatorum assumpti, Bartholomæus Carranza, & Bartholomæus à Martyribus, velut duo Sydera in Concilio Tridentino effulserunt, & Ecclesiam perdoctis suis Operibus exornarunt. Primus, Bartholomæus Carranza,*

ranza,

ranza, patriâ Mirandensis in Regno Navarra, in Angliam, sub Regno *Mariæ*, heu nimium brevi! Catholicæ religionis instaurandæ causâ vocatus, eo munere egregiè defunctus est, cùmque apud *Philippum* Austriacum, *Caroli V.* Imperatoris filium, & *Mariam*, ejus conjugem, summâ auctoritate polleret, omnem adhibuit operam, ut Anglicanum Regnum ab Hæresibus purgaretur, & in Sanctæ Romanæ Ecclesiæ obedientia permaneret. Archiepiscopus postea Toletanus, ac totius Hispaniæ Primas consecratus, *Carolo V.* Imperatori morienti adfuit, eique Sacramenta administravit. At mortuo Imperatore, ab æmulis de Religione in Hispania postulatus est *Bartholomæus Carranza*, ac multis annis in carcere exagitatus, causamque è vinculis dicere cōactus, nunquàm sibi permisit vel minimum verbum hiscere adversus Judices, sed potius nihilō inferior malorum patientiâ & vitæ innocentia Sanctissimo *Jobo*, sapius testatus est, nihil contra se actum præter jura legum & fori. Romam deinde jussu Sancti *Pii V.* deductus *Bartholomæus Carranza*, illius causa sub hoc Pontifice, ejusque successore *Gregorio XIII.* maturo ac diligenti examine discussa est, nihilque solidi repertum, quod hæreseos damnaretur, sicut contra *Paulum Sarpium* (Scriptorem hæreticum, qui *Historiam Concilii Tridentini*, sub e mentito nomine *Petri Suavis Polani* edidit, quique *Bartholomæum Carranzam* inter Hæreticos recensere ausus est) asserit Cardinalis Palavicinus in *Historia Concilii Tridentini*, Italicè primùm editâ, & postea Latine redditâ à *Joanne Baptista Giattino*, Parte 2. libro 14. sub finem Capitis undecimi, ubi hæc scribit

scribit Eminentiſſimus ille Cardinalis: *Quod ſpectat ad Carranzam*, cur ſilentio *Suavis obvoluit*, expenſa per plures annos illius cauſa, & antea ab *Hiſpanienſi Inquiſitione*, & poſtea à *Romana*, ſedentibus *Pio V. & Gregorio XIII.* nihil ſolidi repertum fuiſſe, ut is manifeſtæ noxæ damnaretur; ſed ſolum ut obſtringeretur ad ejurandum, ob vehementem ſuſpicionem, quam excitaverat de fidei ſuæ pravitate, eundemque carcere liberum obiiſſe, exhibitis non ſolum intaminatæ Fidei, ſed ſingularis pietatis indiſciis. Egregiè etiam *Bartholomæum Carranzam* verbo & ſcripto defendit *Martinus Azpiculeta Navarrus*, Vir juris utriuſque Conſultiſſimus, ac eruditis Operibus toti Orbi notiſſimus, qui illum, octogenario licet proximus, Romam comitatus eſt. Legenda quoque eſt luculenta Apologia, quam pro *Bartholomæo Carranza* concinnavit, & in *Diario Dominicano* inferuit *Thomas Sonegius* Ordinis Prædicatorum. In Conventu Dominicanorum Minervitano, ad quem ab Inquiſitione Romana remiſſus fuerat, piè ritèque Eccleſiæ Sacramentis munitus obiit eruditus & probus ille Archiepiſcopus, ut ait *Spondanus* ad annum MDLIX. Num. XXIX. & in Eccleſia ejusdem Cænobii ſolemni pompâ in medio Chori ſepultus eſt, cum honorifica inſcriptione, quam legiſis apud noſtrum *Ambroſium de Altamura* in Bibliotheca Dominicanâ, centuriâ IV. ad annum MDLXXVI. Inter Opera, quæ ſcripſit *Bartholomæus Carranza*, recenſentur *Tractatus De neceſſaria Epiſcoporum Reſidentia: Summa Conciliorum, Catechiſmus*, & liber *De Patientia*, quem variis tempeſtatibus actus, & in carcere mœrore afflictuſ, ad ſui ſolatium composuit. Unus ſuperest *Bartholomæus*

neus à Martyribus, natione Lusitanus, & ex Ordine Prædicatorum ad Archiepiscopatum Bracarensem assumptus, de quo hic pauca dicemus, cum tanti Viri laudes ac virtutes nec etiam immensæ molis libro exhauriri ac exæquari possint. Aduit *Bartholomæus à Martyribus* Concilio Tridentino, & sacram in eo Reformationem totis viribus promovit. Disciplinam morum in Provincia Bracarenfi instituit, Clerum, Populumque ad meliorem frugem reduxit, Ecclesiæ jura ac libertatem intrepidus defendit. In obeundis Pastoralibus officiis assiduus, singulis annis totam Diocesim suam pedibus per invia montium juga, per abruptas cautes, per acervos nivium, per lapsus horrendos torrentium visitabat magnus ille venator aucupique animarum, in egenos homines, in loca sacra opes suas effusissimâ liberalitate profundebar, & in ejus mensa, vestibus, familiâ, modestia summa & priscis Ecclesiæ temporibus consentanea re lucebat. Oves suæ curæ concreditas postquam per viginti tres & amplius annos doctrinâ, virtutibus, elemosynisque enutrivisset, amplissimæ Archiepiscopatus dignitati nuncium remisit, ut exoptatæ Monasticæ cellæ dulcedine frueretur. Certè, ut breviter dicam, captivorum nullus, gravissimo servitutis jugo oppressus, unquam miserationum finem, libertatemque ardentius expetivit, aut magis anxie, quàm *Bartholomæus à Martyribus* Pontificatus abdicationem, Religionis portum, primamque stationem quæsit, idque testatus est uno responso ad *Ludovicum Granatensem* ejusdem Ordinis, quo agente, ad Archiepiscopatum Bracarensem à *Catharina*, Lusitaniæ Reginâ, invi-

invitus fuerat provectus. Sciscitanti enim ab ipso Ludovico Granatenſi, *an eſſet tranquilliori animo, & formidines ſuſcepti officii, turbationeſque reſediſſent?* incunctanter reſpondit: *immò in dies invaleſcunt, & ut noris quàm ſim miſerandus, juranti crede, me deteriori ſtatu eſſe, homine praſocato animam agente, quam nequeat ad dolorum finem emittere.* Tandem votorum ſuorum compos factus Bartholomaeus à Martyribus, in Conventum Vianenſem, quem à fundamentis erexerat, ſeſe recepit, ubi ſoli Deo & orationi vacans, inter manus & ſuſpiria Fratrum ſuorum obiit, magnâ ſanctitatis opinione poſteris relicta. Plura de heroicis virtutibus Bartholomaei à Martyribus legiſis in ejus vita, quam ſaeculo proximè elapſo ſcripſit Gallicè ſtylo elegantiffimo pius quidem Author, ſuppreſſo de industria proprio nomine, ut hujus Operis longè nobiliſſimi gloriam fugeret. Unum dumtaxat addam teſtimonium Cardinalis Sancti Caroli Borromaei, qui in Epiſtola ad Bartholomaeum à Martyribus hæc habet: *Quid de me dicam, cui in conſpectu animi ſemper ades, & propter excellentem in omni genere virtutis laudem unus mihi ad imitandum propoſitus: mea quidem opinio & cum opinione conſentiens hæc una eſt oratio, nihil eſſe in Archiepiſcopo Bracarenſi, quod abſit à ſummis laudibus, ut non modò iſtius Provinciae, ſed multarum præterea Regionum integritate, & virtute primarius videatur. Multa, eaque Spiritus Sancti unctione perfuſa, Opera ſcripſit Bartholomaeus à Martyribus, præ quibus potiſſimum à Viris eruditis commendantur Stimulus Paſtorum, quem Sanctus Franciſcus Saleſius in Epiſtola xxxiv. libri primi ad quemdam ſibi amicum Epiſcopum,*
foven-

promovendæ pietati, & omnibus curam animarum, habentibus ad munus dignè obeundum informandis, cum primis valdè utilem esse judicat, & *Compendium Spiritualis Doctrinæ*, cujus editionem noster *Ludovicus Granatensis*, vitæ Spiritualis Magister, procuravit, eique Elogium tum Operis, tum Authoris præfixit. Sed de Scriptoribus Ordinis Fratrum Prædicatorum, qui Sæculo decimo sexto Purpurâ, aut Pontificatus Infulis decorati floruerunt, plura non addam; nec enim mihi convenit Historiam Ecclesiasticam compendiosè describenti, & aliundè laboranti rerum copiâ, qualis ex præclaris illustrium illorum Virorum Gestis & Operibus abundè suppetit, singula minutatim, prosequi, maximè, cum mihi adhuc dicendum sit, de aliis Scriptoribus, qui eodem Sæculo in Ordine Prædicatorum in nulla Ecclesiastica dignitate constituti, velut splendidissima Theologiæ Sydera præfulserunt.

D. Ne longiùs, quàm par sit, nostrum, protrahatur Colloquium, illos tantùm proferre hic debes celebriores Theologos, & Scripturæ Sacræ Interpretes, qui Sæculo decimo sexto doctrinæ suæ famâ singulare aliquod Ecclesiæ & Ordini Prædicatorum contulerunt ornamentum.

M. inter Clarissimos Sæculi decimi sexti Ordinis Prædicatorum Theologos locum sibi vindicant *Franciscus à Victoria*, *Dominicus Soto*, *Petrus Soto*, *Franciscus Ferrariensis*, *Franciscus Forerius*, *Bartholomæus Medina*, *Dominicus Bannes*, & *Sixtus Senensis*. Horum primus, seu *Franciscus à Victoria*, à natali Regni Navarræ oppido sic cognominatus, Theo-

Theologiæ in sacra Facultate Parisiensi operam dedit, & in ea celeberrima Academia doctorali Laureâ donatus, in Hispaniam reversus est, ubi in Salmanticensi Universitate Primarii Theologiæ Professoris munere perfungens, in totius Hispaniæ Magistrum evasit, & Academiam Salmanticensem ad maximum gloriæ fastigium evexit. Nullus unquam Magister *Francisco à Viçtoria* fuit discipulis felicior, nec tot ex ullius Theologi Scholâ Heroes, virique præstantes omnium Ordinum prodierunt, quot fuerunt, qui Magistro *Francisco à Viçtoria* gloriabantur, quos inter ex solo Ordine Prædicatorum numerantur *Melchior Canus, Sotus, Medina, Bannes*, & alii doctissimi Viri. Tantam nominis existimationem sibi peperit *Franciscus à Viçtoria*, ut *Matamorus* Hispalensis, Vir sapientissimus, cum in libro *De Academiis & Doctis Viris Hispaniæ*, appellet *Instituti Dominicani splendorem; decus & ornamentum Theologiæ, exemplar antiquæ religionis; Virum excellentem, divinum, incomparabilem, Clarissimum lumen Hispaniæ*. Edidit *Relectiones Theologicas XIII.* stylo claro ac nitido scriptas, & *Commentaria in universam Summam S. Thomæ Aquinatis*. Discipulum *Francisci à Viçtoria*, seu *Dominicum Sotum*, tanquam Magistrum venerata est tota Hispania, illum in Confessarium suum elegit *Carolus V.* Imperator, eumque Concilium Tridentinum, cui interfuit, præ omnibus aliis Theologis audivit, & illi non solum assensere Patres gravissimi, sed etiam summis honoribus, ob egregiam Fidei Catholicæ navatam operam, illum ornarunt, & nomine totius Concilii hoc æterno Insigni & Stemmata donarunt, nempe duabus mani-

manibus confertis, undè flamma emicaret cum hac Inſcriptione: *Fides quæ per dilectionem operatur*. Spiritus paupertatem, quam Sanctus Patriarcha Dominicus velut hæreditariam filiis ſuis moriens reliquit, ita tenacitè ſervavit Dominicus Soto, ut Episcopatum Segobienſem ſibi à Carolo V. Imperatore oblatum pertinaci modèſtiâ recuſarit, & in hoc verè religioſo dignitatum contemptu ad mortem uſque conſtantiffimè perſeveraverit. Præter Commentarium in Epistolam Pauli ad Romanos, ſcripſit in 1v. libros Magiſtri Sententiarum, Tractatum *De Natura & Gratia*, librum *De Juſtitia & Jure*, & Apologiam contra Ambroſium Catharinum. Alter ejusdem cognominis in Ordine Prædicatorum Sæculo decimo ſexto fuit abſolutiſſimus Theologus, videlicèt Petrus Soto, qui à Maria, Angliæ Regina, & Reginaldo Polo, Sedis Apoſtolicæ Legato, in Angliam adſcitus, Oxoniènſem Academiam à Petro Martyre hæretico ſub Eduardo Angliæ Rege variis erroribus corruptam reſtauravit, doctrinamque Catholicam, ac Theologiam Scholaſticam, indè malis hæreticorum artibus eliminatam, poſtliminiò revocavit, ſicut teſtatur Sanderus, Scriptor Anglus, libro 11. *De Schiſmate Anglicano* pag. 245. Sacro Concilio Tridentino, juſſu Pii IV. Pontificis Maximi, interfuit, & in hoc graviffimo Eccleſiæ Confeſſu, omnium Conciliorum, quotquot poſt Apoſtolos habita ſunt, doctiſſimo, ſummam ſolidæ ſcientiæ, contra Hæreticos diſputando, eorumque errores refellendo, exiſtimationem obtinuit. Obiit Tridenti Petrus Soto, dùm celebraretur Concilium, ejusque, mors, conjuncta cum perfectò religioſæ pietatis exemplo, ſum-

moperè displicuit Concilio, inquit Cardinalis Palavinus libro xx. *Historia Concilii Tridentini* cap. xiii. *Brentium*, aliosque Hæreticos Lutheranos quâ verbo, quâ scripto confutavit, ediditque etiam tres libros *De Institutione Sacerdotum*. Eodem sæculo decimo sexto floruit *Franciscus Ferrariensis*, Ordinis FF. Prædicatorum Generalis Magister, & in Theologia Scholastica exercitatissimus, qui *Summam S. Thomæ contra Gentes* Commentariis illustravit, & *Beatæ Osannæ*, Virginis Mantuanæ ejusdem Ordinis, vitam sex libris complexus est. Maximam quoque laudem in Concilio Tridentino promeritus est *Franciscus Forerius*, ejusdem Ordinis Prædicatorum Professor, & Doctor Conimbricentis, pietate & eruditione præstantissimus, qui jussu Patrum Conc. Trid. Indicem librorum prohibitorum contexuit, & unus ex his fuit, quibus Patres *Catechismum* Concilii Tridentini concinnandi provinciam demandarunt, sicut in superiori Colloquio jam observavimus. Scripsit etiam *Franciscus Forerius* Commentarium in Prophetam *Isaiam*, primusque institutus est Sacræ Congregationis *Indicis* Secretarius. Quod perillustre officium, ob tanti Viri celeberrimam memoriam, datum est Dominicanis, sicut Officium Magistri Sacri Palatii ob merita *S. Dominici*, & aliud Generalis Commissarii sanctæ in Hæreticos Inquisitionis in gratiam Sancti *Petri* Martyris, & Sancti *Pii V.* Pontificis Maximi, qui Palatium Sancti Officii amplissimum Romæ extruxit, & Congregationem *S. Officii* ampliavit: Plura de *Francisco Forerio* legis apud nostrum doctissimum *Thomam Souegium*, qui ejus Vitam edidit Tomo iv. *Anni Dominicani*.

Bartholomæus Medina, natione Hispanus, & in Academia Salmanticensi Doctor ac Professor, egregios edidit Commentarios in Summam Tripartitam *S. Thomæ Aquinatis*. Dominicus Bannes, Hispanus Mandragonensis, perdocta Commentaria scripsit in 1. Partem, Secundam Secundæ *Sancti Thomæ*, necnon eruditum Tractatum *De Justitia & jure*. Denique, *Sixtus Senensis*, quem inter Clarissimos Sæculi decimi sexti Ordinis Prædicatorum Theologos retuli, Hebraicè, Græcè, Latineque doctus, multa in Scripturam Sacram edidit volumina, sed præsertim octo scripsit libros *Bibliothecæ Sanctæ*, ubi sacros libros, eorum Authores, antiquas Scripturæ Sacræ Versiones & Commentaria percerasset, necnon Sanctorum Patrum, & Virorum Illustrium Opera expendit, & genuina ac sincera à spuris & dubiis accurato criterio fecernit. Patre Hebræo natus erat *Sixtus Senensis*, & Franciscanæ Familiæ nomen dederat, sicut testatur noster *Vincentius Baronius* in Apologia pro Dominicanis libro iv. Sect. i. sub finem Paragraphi secundi, sed eum in gentilitiam impietatem semel & iterum delapsum, cum ultricibus flammis pernix in errore esset addicendus, ad meliorem mentem revocavit *S. Pius V.* Pontifex Maximus, veniamque Apostasiæ cum facultate (quia id maxime optabat) mutandi Ordinis obtentâ, suis ipse manibus, & propriâ veste induit Sanctissimus Pontifex, & hoc æternum Ecclesiæ, & Reipublicæ Litterariæ, Ordinique Dominicanò ornamentum, summâ prudentiâ ac clementiâ comparavit, ut ipsemet *Sixtus Senensis* præfatur in Epistola Nuncupatoria *Bibliothecæ suæ* ad *S. Pium V.* his verbis:

Tu me olim ab Inferis revocatum, & errorum tenebris erutum, sinceræ veritatis lumine illustrasti, & ad sublimioris Disciplinae observantiam perductum, habitu sanctæ professionis tuæ, tuis ipse vestibus, tuis ipse manibus induisti, & in filium tuo renatum spiritu adoptasti, meque in hoc sacro Prædicatorum Ordine ita benignitate ac liberalitate tua semper in hanc usque diem fovisti, ut nulli magis in terris debeam, quàm Tibi. Obiit Sixtus Senensis Genuæ anno MDLXIX. in Cænobio FF. Prædicatorum S. Mariæ de Castello, cujus erat Alumnus, & in medio Choro sepultus est. Præter hos insignes jam à me laudatos Sæculi XVI. Theologos Dominicanos, alii multò plures ejusdem Ordinis recensentur, quos hic breviter indicabo. Silvester Prieras, Natione Italus Pedemontanus, Sacri Palatii Apostolici Magister, sublimi Vir ingenio, primus omnium adversus nascentem Lutheri Hæresim scripsit, Commentarios etiam in IV Libros Sententiarum elucubravit, & Summam Conscientiæ, quæ dicitur Silvestrina. Quid dicam de Ludovico à Soto Majori, natione Lusitano, & Theologo eruditissimo, sed in suis vulgandis Lucubrationibus adeò modesto, ac pertinaci, ut vix Clementis VIII. & Philippi II. Regis Hispaniarum, imperium extorquere potuerit Commentarium in Cantica Canticorum. Bartholomæus de Spina, patriâ Pisanus, & Sacri Palatii Apostolici Magister, varia de rebus Theologicis edidit Opuscula. Vincentius Bandellus à Castro Novo, Ordinis Prædicatorum Generalis Magister, author est Tractatus De singulari puritate & prærogativa Conceptionis Salvatoris nostri Jesu Christi, seu De Conceptione,

B. Vir-

B. Virginis Mariæ. In Aragonia clauit Cyprianus Benetus, qui sub Julio II. & Leone X. Summis Pontificibus, scripsit eruditos Tractatus *De Prima Orbis Sede, De Concilio, De Ecclesiastica Potestate, De Auctoritate Pontificis Maximi*. In Gallia Joannes Viguerius, patriâ Tolosanus, edidit *Theologicas Institutiones*. In Belgio clauit Joannes Bunderius patria Gandauensis, & Hæreticæ prauitatis Quæfitor, qui varia scripsit aduersus Hæreticos Opera, videlicet *Compendium Rerum Theologicarum, quæ ab Hæreticis in controversiam vocantur: Collationem quatuor Ecclesiæ Doctorem Ambrosii, Hieronymi, Augustini, & Gregorii, super Articulis ab Hæreticis agitis: Scutum Fidei Orthodoxæ aduersus quaslibet Hæreses: De Baptismo contra Mennonem Anabaptistam: Detectionem Nugarum Lutheri: & Confutationem Dogmatum Lutheranorum, & alia hujusmodi Opuscula, de quibus legendus est Aubertus Miræus in Supplemento Bellarmini De Scriptoribus Ecclesiasticis*. Eodem Sæculo XVI. floruerunt in Ordine Prædicatorum doctissimi Theologi, *Chrysostomus Javellus, Canapitius Pedemontanus*, toti Orbi Litterario suis Operibus notissimus: *Ambrosius Pelargus*, natione Germanus, Archiepiscopi Trevirensis in Concilio Tridentino Procurator, qui Symbolum Nicænum, & S. Chrysostomi Liturgiam Notis illustravit, *Oecolampadium*, aliosque Hæreticos, necnon *Desiderium Erasmus* eruditis Lucubrationibus exagitavit. Joannes Ludovicus Vivaldus, Insaber, in Monte Regali natus, scripsit Tractatus *De Vera Contritione, De XII. Ecclesiæ persecutionibus, & alia Opuscula, quorum catalogum texit Ambrosius de Altamura in Biblio-*

theca Dominicana Centuriâ IV. ad annum MDL. Denique, ut, brevitatis ergò, prætermittam alios eximios Theologos, qui Sæculo XVI. Ordinem Prædicatorum illustrarunt, unum tantummodò his, quos hætenùs laudavi, adjungam, videlicet *Alnoldum Badetum*, Natione Gallum, qui edidit *Breviarium de Mirabilibus Mundi*. Item *Margaritam Virorum Illustrium de futura temporis dispositione prænoscentia*. Et *Margaritam adversus Hæreticam pravitatem*. Plura de hoc Scriptore legis apud nostrum *Ambrosium de Altamura*, & apud *Aubertum Miræum* De Scriptoris Sæculi XVI. cap. XI. & *Antonium Possevinum* in *Apparatu sacro*.

D. Cùm de Scriptoris aliorum Ordinum Regularium, necnon de Jurisconsultis, qui Sæculo XVI. floruerunt, adhuc in isto Colloquio dicturi simus, optarem, ut alios illustriores Ordinis FF. Prædicatorum Viros tùm Scripturæ Sacræ Interpretes, tùm Historicos, & Asceticos, seu Concionatores, hic sub una serie exhiberes, teque ab illis breviter expedires, ut de aliis Scriptoris, quos in sequentes Classès distribuisti, differendi nobis sat temporis suppetere possit.

M. Inter peritos Ordinis Prædicatorum, Scripturæ Sacræ Interpretes primas tenent *Santes Pagninus*, & *Hieronymus Oleaster*, quorum primus, Natione Italus, patriâ Lucensis, Concionator Apostolicus, & trium Linguarum, sed Hebrææ potissimùm, longè peritissimus, novam totius Scripturæ Sacræ Versionem sub *Leone X.* Pontifice, Maximo aggressus est, & Vetùs omne Testamentum ex Hebraica Veritate in Latinam Linguam

trans-

transfudit. Ejus Editionem peritissimi quique Hebræorum Rabbini maximis laudibus efferunt, & de ea Illustrissimus *Daniel Huetius* Episcopus Abrincensis, in libro *De Clar. Interpretibus* hoc judicium profert: *Leonis Decimi Pontificis Maximi hortatu & ope, Bibliorum Versionem felicissimo successu tentavit Santes Pagninus Lucensis, Hebraicæ quidem Veritatis ubique ad verbum retinens, majoremque ejus, quàm Latinitatis rationem habens, perfectæ propemodum & absolutæ Sanctorum Voluminum Interpretationis exemplum dedit. Attamen ut punctum omne ferre difficile est, quidam in eo nimiam diligentiam, ambitionem ac curam, tum morosam minutarum quarumque rerum ac levium affectationem, inconcinnitatem etiam & obscuritatem culpaverunt, reclamantibus licet Rabbiorum peritissimis, quibus summopere probatur Interpretatio hæc, ac reliquis antepositur. Præter hanc Veteris Testamenti ex Hebraica Veritate Latinam Versionem, aliam quoque Latinam Novi Testamenti Versionem, juxta fidem Græci Textus, edidit Santes Pagninus, quam Clementi VII. Pontifici Maximo nuncupavit, & alia scripsit Opera ad Scripturæ Sacræ intelligentiam valde necessaria, obiitque Lugduni in Galliis anno MDXLI. in Conventu FF. Prædicatorum. Ei defuncto Cives Lugdunenses, velut parenti suo, solemnes persolverunt exequias, quas Spiritus Roterus, Dominicanus, & Fidei Quæritor Tolosanus, qui tùm Lugduni erat, elegantî stylo prosequitur in Libro, quem edidit contra Hæreticos Calvinistas, ubi hæc habet: Aderam ego Lugduni, quando suum feliciter diem clausit extremum (Santes Pagninus) cujus funus & exequias*

tanto honore & pietate celebravit Civitas Lugdunensis, ut non privatus aliquis homo, sed totius Civitatis parens defunctus putaretur: Nam pullati, nigrisque vestibus induti plurimi Cives, & potentes, feretrum illius profecuti sunt, plusquàm trecentis ardentibus facibus prælucentibus. Hujus tanti honoris cum causam requirerem, responsum accepi: Civitatem Lugdunensem Santi Pagnino perpetuò se fateri obnoxiam, eò quòd nisi illius sancta & magnifica tuba insonnisset, diligenterque illam admonuisset, Lutheranorum perniciosi dogmatibus tota forsitan seducta involutaque devenisset. Ad illustrandas itidem egregiis Commentariis Scripturas Sacras omnem curam, laborem ac industriam adhibuit Hieronymus Oleaster, Natione Lusitanus, Inquisitor Olysiponensis, Lingux Hebraicæ peritissimus, qui summa cum laude interfuit Concilio Tridentino, & scripsit Commentarium in Pentateuchum juxta Santis Pagnini Versionem, addiditque suo erudito Operi septemdecim Articulos ad Sacrarum Scripturarum notitiam faciliùs comparandam. Edidit etiam Commentarios in Isaiam cum Elucidationibus Moralibus, & è vivis excessit Olysipone anno MDLXIII. His duobus Ordinis Prædicatorum omni exceptione majoribus Sacrarum Litterarum Interpretibus quidam alii ejusdem Ordinis jure meritò addi debent, videlicet Jacobus Magdalius, Natione Batavus, Hebraicè & Græcè doctus, qui scripsit Correctorium Bibliorum, eorumque Compendium anno MDVIII. Colonix editum: Damianus Crassus, Ripolensis, qui, præter alios Tractatus, Commentarium in Job concinnavit: Dominicus Buchius, Catharensis, qui Etymon, seu Expositionem in

VII.

VII. *Psalmos Pœnitentiales* in lucem emisit : *Joannes Udalricus Basileensis*, qui erudito *Commentario Epistolam S. Pauli ad Hebræos* interpretatus est : *Placidus Parmensis*, Natione *Italus*, qui *Commentariis* in *Psalmos*, & in *Epistolam S. Pauli ad Romanos* celebre suum nomen reddidit. Inter celebres *Scriptores Historicos*, qui *Sæculo XVI.* in *Ordine Prædicatorum* claruerunt tres dumtaxat impræsentiarum proferam, scilicet *Leandrum Albertum*, *Bernardum Luxemburgium*, & *Thomam Fazellum*. Primus, seu *Leander Albertus*, patriâ *Bononiensis*, Vir fuit politioribus *Litteris* excultus, *Philosophicis* ac *Theologicis Disciplinis* imbutus, in *Mathematicis* clarus, in *Historiis*, atque in antiquis rerum monumentis diligentissimè versatus, ut liquet ex pluribus, quæ scripsit, *Operibus*, & inter quæ præcipuum locum tenent sex *Libri De Viris Illustribus Ordinis Prædicatorum*, & *Descriptio Italiae*, quam *Henrico II. Galliarum Regi* dicavit. *Bernardus* dictus *Luxemburgius* à natali solo in *Belgio*, ubi natus est, *Catalogum Hæreticorum* *Libris* quinque comprehensum contexuit, & alia scripsit *Opuscula*, quæ refert noster *Ambrosius De Altamura* in *Bibliotheca Dominicanâ* *Centuriâ IV.* ad annum *MDXXX.* *Thomas Fazellus*, Natione *Siculus*, eximius fuit *Historicus*, perdoctus *Theologus*, & humanioribus *Litteris* apprime instructus. Latine edidit eleganti stylo *Volumen*, duas in *Decades* partitum *De Rebus Siculis*, & quilibet *Decas* continet *decem Libros*. Scripsit etiam *Librum De Regno Christi*. Denique, ex innumeris penè *Scriptoribus Asceticis*, seu *Concionatoribus*, quos *Sæculo XVI.* protulit *Ordo Prædicatorum*, ali-

aliquos hic referre sufficiet, ne, si singulos per-
censere vellem, dies, vox, viresque me omninò
deficerent. Primus, isque omnium, qui hæcenus
fuerunt Asceticorum Scriptorum parens ac faciliè
Princeps, fuit *Ludovicus Granatensis*, sic cognomi-
natus à natali solo *Granata*, Hispaniæ Urbe cele-
berrimâ. Præter *Rhetoricam Sacram*, quam ad
instituendos Concionatores miro artificio ela-
boravit, alios Tractatus edidit *De Duce Peccato-
rum: De Oratione & Meditatione: Memoriale Vitæ
Christianæ: Catechismum: Plures Tomos De Concio-
nibus*, & alia Opera Ascetica, Spiritus Sancti un-
ctione perfusa, & quibus nihil solidius, altius, sa-
lubrius ad componendos mores, vel divinius &
efficacius ad ciendos pietatis affectus haberi po-
test. Hinc *Gregorius XIII.* Pontifex Maximus Ope-
ra *Ludovici Granatensis*, datis ad ipsum Apostoli-
cis Litteris, laudavit, majoraque piis Libris ipsum
edidisse miracula dixit, quàm si cæcis visum, aut
mortuis à Deo Vitam impetrasset. Tanti etiam Ope-
ra *Ludovici Granatensis* faciebat *S. Franciscus Sa-
lesius*, ut Epistola xxxiv. Lib. I. ad quemdam Epi-
scopum, author ei sit, ut *Ludovicum Granaten-
sem* integrum habeat, non raptim, sed fructuosè,
cum reverentia & devotione legat, ponderet, ex-
timet, devoret, & in purum putumque succum
convertat. Nec dubito ipse, ut obiter dicam, quin,
si juvenes in *Ludovici Granatensis* Operum lectio-
ne assiduè versarentur, verum addiscerent Con-
ciones habendi modum, & ea declinarent vitia,
in quæ hodie frequenter impingunt nonnulli, qui
inter concionandum Scripturæ Sacræ, & Sancto-
rum Patrum syllabas aucupantur, ut novas cogi-
tationes

tiones cudere & novum aliquem sensum extorquere possint, vel meras argutias perpetuò captant, & ita subtilitatibus capiuntur, ut videantur solida fugere & fastidire, vel denique pessimum dicendi genus imitati, inflato stylo, tumentibus verbis, & tinnulis utuntur, quos, ut liberè dicam, dùm aliquandò lego, vel audio, videor mihi videre homines, qui, abjecto more incedendi solito, extremis digitis pedum, quò altiores sint, affectatâ gravitate gradiuntur. Quò enim, ut appositè ait *Antonius Maria Gratianus* in *Vita Joannis Francisci Commendonis Cardinalis*) de rebus maximis atque gravissimis, de Deo, de pietate, de religione, de *Vita* disciplina sacratis in locis ante aras, ante simulacra Dei, & veluti ipsius instinctu numinis dicentibus, inanis ille atque indecorus apparatus, sonitusque verborum? quò illa tanto artificio & varietate distincta, tanto delibutâ fuco, tot strosulis conspersa, tot corrupta conciunnis, tot denique coloribus illita atque picta oratio? Res sacra, Divinaque puram, castam, simplicem orationem, quales mores desiderant: verba delecta, si vis, non tamen nimia cum curâ exquisita, & undique excerpta, ut dignitatis major, quàm gratia ac leporis ratio habita videatur. Sententiæ, quæ gravitate ac severitate laudentur, non tamen specie ac venustate placeant; quæ admirationis ac terroris audientibus, quàm delectationis plus incutiant, perrumpant pectora, unde noxios affectus expellant, non mollitè influentes foveant, denique doceant ad probitatem pietatemque instituant, non ad levitatem, vanitatemque erudiant. Hæc est vera & cum fructu concionandi norma, ad quam suas conciones, & quidquid scripsit de

Vita

Vita Ascetica, exegit *Ludovicus Granatensis*, Orator Christianus omnibus suis numeris absolutus, Vitæ Religiosæ, paupertatis adeò amans, & in moribus suis ita simplex ac modestus, ut Archiepiscopatum Bracarensem à *Catharina*, Lusitanæ Regina, sibi oblatum recusaverit, & Cardinalitias Insulas, quas ipsi *Sixtus V.* Pontifex Maximus destinaverat, humillimè deprecatus fuerit. *Ludovici Granatensis* in promovenda animarum salute zelum æmulatus est *S. Ludovicus Bertrandus*, ejusdem Prædicatorum Ordinis, Natione Hispanus, patriâ Valentinus, qui ad Occidentales Indos Evangelicus Prædicator missus, uno tantum Hispanico usus Idiomate à diversis & dissonis nationibus intelligebatur, suisque fervidis concionibus innumeros Infideles Christianæ Fidei lumine illustravit. Miraculis clarus obiit VI I. Idus Octobris anni MDLXXXI. & Fastis Sanctorum à *Clemente X.* Pontifice Maximo adscriptus est. Inter Scriptores Asceticos Ordinis Prædicatorum haud immeritò recenseri debet *Joannes Tabiensis*, sic dictus à *Tabia*, Liguriæ in Italia natali suo oppido, qui author est *Summæ Summarum de Casibus Conscientiæ*, quæ vulgò *Tabiena* dicitur. Prætermitto alios Scriptores Ordinis Prædicatorum Concionatores, Asceticos, Scripturæ Sacræ Interpretes, Historicos, Theologos, Polemicos, & in omni scientiarum genere illustres, qui sæculo XVI. floruerunt, & quorum numerus propemodum infinitus in hujusce Colloquii angustiis comprehendendi minimè potest. Observat quippè noster *P. Petrus Louvet*, Gallus, Sacræ Facultatis Parisiensis Doctor, in una ex octo Tabulis Graphicis, quibus

bus complexus est Sæculi XVI. Historiam Dominicanorum, edita esse ab anno millesimo quingentesimo usque ad annum millesimum sexcentessimum Volumina centum supra mille à quadringentis Scriptoribus Ordinis Prædicatorum, quos inter, unus Summus Pontifex, sex Cardinales, septem Archiepiscopi, unus Patriarcha, viginti Episcopi, quindecim Inquisitores, sex Magistri Sacri Palatii, totidem Præpositi Ordinis Generales, & ducenti Doctores numerantur. De his Scriptoribus latè disierunt domestici Authores, qui Virorum Illustrium Ordinis Prædicatorum Bibliothecas adornarunt, sed præcipuè nuperus ac doctissimus ejusdem Ordinis Scriptor *Jacobus Echar- dus*, cujus primus Tomus De Scriptoribus Familiz Dominicanæ jam publicam lucem aspexit, alter verò Tomus, qui ejusdem Ordinis Scriptores Sæculorum Ecclesiæ decimi sexti, & decimi septimi complectetur, adhuc sub prælo Parisiensi sudat, ac propedièm exhibit in lucem.

D. Magna sunt, ut video, Familiz Dominicanæ Scriptorum in Ecclesiam protherita, & doctrina adeò immensa, ut Prædicatorum Ordo nec Theologiæ peritiam, nec Linguarum, maxime Græcæ & Hebraicæ, notitiam, nec Librorum, Spiritualium copiam ac excellentiam, nec illustrium in Scripturam Sacram Interpretum famam, nec Concionatorum eloquentiam, nec postremo Moralis Theologiæ uberrimam doctrinam aliis Religiosis Ordinibus, quibus nunc decoratur Ecclesia, invidere possit, aut debeat. Sed ne alios Regulares Ordines debitâ laude defraudemus, eos nunc perlustremus nobiliores Ordinis S. *Augustini*
Scri-

Scriptores, quos in undecima Virorum Sæculi XVI. eruditorum Classe constituisti.

M. In Ordine S. *Augustini*, alii sunt, qui dicuntur *Eremitæ*, quique unum Mendicantium Ordinem cōstituunt; Alii vocantur *Canonici Regulares*, qui itidē S. *Augustinum* patrem se habere gloriantur. Inter Eremitas Ordinis S. *Augustini* hi potissimū Scriptores doctrinā & pietate Sæculo XVI. immortale sibi decus peperere, *Ægidius Viterbiensis*, *Felix Pratenfis*, *Hieronymus Seripandus*, *Joannes Garetius*, *Thomas à Villa Nova*, *Josephus Pamphilus*, *Jacobus Philippus Bergomas*, & *Onuphrius Panuinus*, quorum patriam, eruditionis genus, & Opera breviter hic annotabimus. Primus seu *Ægidius Viterbiensis*, à natali Italiæ Civitate cognominatus, Prior fuit Generalis Ordinis Eremitarum S. *Augustini*, eloquentiā, Linguarum peritiā, Sacrarum Litterarum scientiā, & Historiarum notitiā cumulatissimè præditus. Cardinalis S. R. E. à *Leone X.* Pontifice Maximo creatus est, ac multa egregia edidit Opera, quæ Romæ in Bibliotheca Angelica adhuc Manuscripta aservantur. *Felix Pratenfis*, Natione Etruscus, genere Hebræus, & ex Rabbino factus Eremita Ordinis S. *Augustini*, *Psalterium*, secundū Veritatem Hebraicam, Latine transtulit, & *Leoni X.* Pontifici Maximo obtulit. Hanc *Psalterii* Latinam translationem à *Felice Pratenfi* intra quindecim dies fuisse absolutam indicant hi Versus initio Voluminis præfixi:

*Omnia testificor Felicis acumine nostri
Non plus ter quind facta Latina die.*

Au-

Author est quoque idem *Felix Pratenfis* Versionis libri *Job*, ac primus fuit (teste *Waltono* Prologomeno VIIII. in Sacra Biblia parag. xxvii.) qui variantes Scripturæ Sacræ lectiones inter Judæos Orientales, seu Babylonios, & Occidentales, seu Palæstinos, publicavit in Bibliorum Venetorum Editione anni MDXVIII. Ecclesiam Sæculo XVI. plurimum doctrinâ defendit, ac pietate illustravit *Hieronymus Seripandus*, Trojâ, quod est Apuliæ oppidum, oriundus, Ordinis Eremitarum *S. Augustini* Prior Generalis. Interfuit Concilio Tridentino, ubi eximiam eruditionem cum prudentia, & pietatis laude conjunctam, & ardentissimum ad profligandam Lutheranorum hæresim, zelum in augustissimo illo Patrum Concessu prodidit, atque in præmium operæ, quam Ecclesiæ in defensione Fidei contra Hæreticos impendit, nominatione *Caroli V.* Imperatoris ad Archiepiscopatum Salernitanum provectus est, ac tandem à *Pio IV.* Pontifice Maximo Cardinalitiis Infulis exornatus, Sedis Apostolicæ Legatus, & Concilii Tridentini Præses fuit institutus. Quo in munere obeundo magnam gravissimorum Ecclesiæ negotiorum molem summâ cum omnium admiratione sustinuit, & Hæreticorum contra Fidem Catholicam impetus retudit, eorumque nefarios ausus feliciter dissipavit. Scripsit tres Libros *De Justificatione: Questiones adversus Hæreses: Commentarios* doctissimos in omnes *S. Pauli*, & in septem *Canonicas Epistolas: Conciones*, & alia Opera, obiitque Tridenti anno MDLXIII. indeque Neapolim translatus, ubi apud Eremitas Augustinianos sepultus est. Ad exterminandos Hæreticorum errores omnem operam,

ram, studiaque sua itidè magno cum Ecclesiæ emolumento contulit *Joannes Garetius*, patriâ Lovanientis, & ejusdem Ordinis Eremitarum S. *Augustini* Professor, quippè qui eruditos Libros *De vera Corporis Christi in Eucharistia Sacramento præsentia*, necnon *De Sanctorum Invocatione*, & *De precibus pro Defunctis* scripsit contra Hæreticos. In Concionibus habendis, in promovenda in suo Eremitarum S. *Augustini* Ordine Disciplina Regularis observantiâ, in procuranda ubique animarum salutē totus incubuit *Thomas à Villa Nova*, sic à patrio solo in agro Toletano cognominatus. Fuit *Carolo V.* Imperatori à Concionibus & Consiliis Conscientiæ, deindè Archiepiscopus Valentinus, tantâque in pauperes liberalitate, Vitæ sanctimoniâ, & beatissimâ cœlestium omnium donorum copiâ instructus, ut cum, in Vita, & post obitum miraculis illustrem, *Alexander VII.* Pontifex Maximus in Sanctorum numerum, plaudente totâ Ecclesiâ, retulerit anno MDCLVIII. S. *Thomas à Villa Nova*, studio salutis animarum præstantissimi, Conciones, sacram facundiam, solidam pietatem, & zelum verè Apostolicum spirantes, in publicam lucem prodierunt. *Josephus Pamphilus*, Veronensis, Sacrario Pontificio à *Pio IV.* Summo Pontifice Præfectus & postea Signinus Episcopus creatus, texuit *Chronica* Ordinis sui, seu Eremitarum S. *Augustini*, & alios egregios edidit Libros *De Origine multarum Ecclesiæ Cæremoniarum: De sacris Ritibus Veterum Pontificum in Baptismi, Chrismatis, & Eucharistia Sacramentis administrandis: De Exorcistis, & antiquo Ritu Dæmones expellendi &c.* Alii duo, quos laudavi, Ordinis Eremitarum S. *Augustini*,

stini, in describendis rebus ad sacram Antiquitatem & Historiam attinentibus maximam apud Viros eruditos laudem consecuti sunt, *Philippus Bergomas*, & *Onuphrius Panuinus*. Horum primus è nobili *Forestorum* familia Bergomi natus, Vir fuit. multæ lectionis, Antiquitatis studiosissimus, & *Innocentio VIII.* Pontifici Maximo gratissimus. Scripsit *Supplementum Chronicorum*, quod, juxta Editionem Venetam, incipit ab Orbe condito, & producitur usque ad annum MDLII. Alter, seu *Onuphrius Panuinus*, patriâ fuit Veronensis, quem *Paulus Manutius Helluonem Antiquitatis*; *Scaligerus Patrem Historiæ*; *Lipsius Principalis Historiæ*, & *Fastorum Veterum Patrem*; *Thuanus Virum ad omnes Romanas & Ecclesiasticas Antiquitates è tenebris eruendas natum*; *Aubertus Miræus Virum ad utrumque paratum*, & *Romanis Antiquitatibus cum sacris & Ecclesiasticis, tum profanis eruendis natum* jure optimo appellant. Author Vitæ *S. Philippi Nerii*, linguâ Italicâ ac typis Romanis an. MDCXXI. excusæ, lib. 1. cap. 13. refert, *Onuphrium*, dum viveret, consilium mente concepisſe *Annales Ecclesiæ* conscribendi & *Magdeburgensium Centurias*, adversus Ecclesiam Catholicam scriptas, refellendi; sed *Baronium*, Congregationis Oratorii Presbyterum, à *S. Philippo Nerio* fuisse in somnis admonitum, ut ipse hanc provinciam in se susceperet, & arduum istud Opus, quod *Onuphrius* meditabatur, in rem Catholicæ Ecclesiæ exequeretur. Omnium *Onuphrii* Operum, quæ vel jam typis edita sunt, vel adhuc manuscripta in variis Bibliothecis delitescunt, seriem legelis apud *Possevi-*

num in Apparatu sacro , & apud *Cornelium Curtium* in *Elogiis Augustinianis* .

Inter Canonicos Regulares Ordinis S. *Augustini* , tres præcipuè fuerunt , qui Sæculo XVI. magnâ nominis celebritate claruerunt , videlicet *Martinus Azpilcueta* , vulgò dictus *Navarrus* , eò quòd è *Navarræ* Regno oriundus esset ; *Augustinus Steuchus* , & *Basilius Zanchins* . Primus , seu *Martinus Azpilcueta* , dictus *Navarrus* , summo cum omnium applausu docuit *Tolosæ* , *Salmanticæ* , & *Conimbricæ* , pluribusque perdoctis editis Operibus , in quibus se in utriusque juris scientia versatissimum probat , toto Orbe fuit conspicuus , & tanto in honore ab omnibus habitus , ut ejus sententia , quasi certa quædam lex et Oraculum reciperetur . Romani profectus , S. *Pio V. Gregorio XIII.* & *Sixto V.* Põtificibus Maximis charissimus fuit , ibidèmq; , nostri *Bartholomæi Carranza* , Archiepiscopi Toletani , de Fide ab æmulis postulati , doctrinam & innocentiam egregiè defendit . Jejunii Ecclesiastici , etiam in ætate provectâ observantissimus fuit , sicut ipsemet testatur in suo *Manuali* his verbis ; *Equidem (gratias Deo) octuagesimum annum agens , perindè possum jejunare , ac si annum agerem sexagesimum , immò quinquagesimum* . Obiit Romæ xi. Kal. Jul. ann. MDLXXXVI. ætatis suæ nonagesimo quinto . Alter Canonicus Regularis , seu *Augustinus Steuchus* , patriâ Eugubinus fuit , Bibliothecarius Apostolicus , & postea Chisamenfis Episcopus . Præter decem libros , quos edidit , *De perenni Philosophia* , & tres libros *pro Religione Christiana* adversus Lutheranos , *Pentateuchum*

teuchum Annotationibus, librum *Job* Enarrationibus, & Psalmos præcipuos Commentariis illustravit. Ad hunc *Augustinum Steuchum* Epistolam prolixam scripsit *Desiderius Erasmus*, quæ inter ejus Epistolas extat ordine MCLXXV. part. 2. Tomi 3. postremæ illius Operum Editionis Lugduni Batavorum, in qua *Desiderius Erasmus* varia in Annotationibus *Augustini Steuchi* in Pentateuchum carpit ac notat. Sed *Augustinus Steuchus* ad hanc *Erasmi* Epistolam respondit aliâ non minus prolixâ Epistolâ, quæ inserta est ad calcem *Appendicis* Partis 2. ejusdem Tomi 3. Epistolarum *Erasmi*, & est ordine ultima. Denique, *Basilius Zanchius*, Congregationis Lateranensis Canonicus Regularis, Vaticanæ Bibliothecæ Custos, Annotationes in omnes Scripturæ Sacræ libros ex Sanctis Patribus excerptis. Quæstiones etiam in IV. Libros *Regum*, & duos *Paralipomenon* ex *Theodoreti* potissimum Scriptis defloravit, & in Latinam Linguam vertit. Confundi haud debet iste *Basilius Zanchius* cum *Hieronymo Zanchio*, natione Italo, qui Sæculo XVI. vixit, à Romana Ecclesia defecit, multa Opera erroribus scatentia publicavit, & in Romano Indice Librorum prohibitorum inter Hæreticos primæ classis rejicitur.

D. Inter omnes Regulares Ordines, nullus, ut opinor, in tot familias propagatur, & tam latè per Orbem Christianum diffunditur, quàm Ordo Sancti *Francisci*. Quapropter, nullus dubito, quin hic Ordo de Ecclesia tam benè meritus plures dederit insignes Scriptores, de quibus in hac duodecima Virorum Sæculi decimi sexti eruditorum Classe, juxta præscriptum Ordinem, paululùm differere debemus.

M. De Scriptoribus Ordinis Sancti *Francisci* fuso calamo tractat *Wadinghus* in libro De Scriptoribus Ordinis FF. Minorum; ipse verò, ne in immensum diffundat, illustriores dumtaxat hujus Ordinis hic proferam Scriptores, qui Sæculo decimo sexto in Sacris Litteris interpretandis, in Rebus Theologicis pertractandis, & in Concionibus ad populum habendis magnam sui nominis famam, ad sempiternam hominum memoriam excitarunt. Fuerunt quidem Sæculo decimo sexto multi Viri docti, qui linguas Hebraicam & Græcam callentes, varias Scripturæ Sacræ Versiones adornarunt. At nullus, meâ quidem sententiâ, in Bibliis variis linguis excudendis magis insudavit, & Opus Ecclesiæ utilissimum tam feliciter & accuratè absolvit, quàm *Franciscus Ximènius* è *Cisneros*, natione Hispanus, S. R. E. Cardinalis, & Archiepiscopus Toletanus, ex Ordine FF. Minorum assumptus, Inquisitor Generalis, & Prorex Hispaniarum, qui, accitis undique Viris Linguarum peritissimis, & conquisitis vetustissimis probatissimisque manuscriptis Codicibus ex Vaticanâ, Mediceâ, Venetâ, aliisque Bibliothecis, Biblia Sacra diversis linguis in lucem edenda improbo labore, maximâ sedulitate, & immensis sumptibus curavit, ut ipse testatur in duplici Præloquio, quod huic Operi præfixit. In primo Præloquio ad *Leonem X.* Pontificem Maximum hæc scribit: *Ut ipsa Originalia in promptu haberet quicumque divinarum litterarum studiosus, possetque non solis rivulis esse contentus, sed ex ipso fonte salientis aquæ in vitam æternam sitim pectore extinguere: jussimus Archetypas Sacræ Scripturæ linguas cum adjunctis*
varia-

variarum linguarum translationibus impressioni mandari Sanctitatis tuæ nomini dedicandas, atque imprimis Novum Testamentum Græco-Latinoque sermone excudendum curavimus simul cum lexico Græcorum omnium dictionum, quæ possunt in eo legentibus occurrere, ut his quoque, qui non integram linguæ cognitionem adepti sunt, pro viribus consuleremus. Deinde verò, antequàm Vetus Testamentum aggredieremur, Dictionarium præmissimus Hebræicorum, Chaldaicorumque totius Veteris Instrumenti Vocabulorum Quibus omnibus, veluti pro præludio ita peractis, ad excussionem diversarum Veteris Testamenti linguarum nos convertimus, adjicientes etiam singulis earum suam latinam interpretationem. Quæ in re apertè Beatitudini tuæ id testari possumus, Pater Sanctissime, maximam laboris nostri partem in eo præcipuè fuisse versatam, ut & virorum in linguarum cognitione eminentissimorum operà uteremur, & castigatissima omni ex parte vetustissimaque exemplaria pro Archetypis haberemus, quorum quidem tam Hebræorum, quàm Græcorum ac Latinorum multiplicem copiam non sine summo labore acquisivimus, atque ex ipsis quidem Græcos antiquissimos tum Veteris, tum Novi Testamenti Codices perquàm humanè ad nos misisti, qui nobis in hoc negotio maximo fuerunt adjumento. In altero Præloquio, quod est ad Lectorem, varias Linguas ac Versiones, quibus constant hæc suis curis edita Sacra Biblia, explicat. Eminentiſſimus ille Cardinalis his verbis: Pentateuchus triplicem linguam habet, Hebræicam videlicet, Chaldaicam, & Græcam, quas imprimendas jussimus cum aliis tribus Latinis interpretationibus juxtà correspondentibus, ita ut Hebræica veritati respondeat La-

*tina B. Hieronymi Translatio: Chaldaica verò alia Latina ferè de verbo ad verbum à Viris ejus linguæ peritissimis elaborata: Græcæ autem septuaginta Interpretum Editioni interlinearis Latina Traductio. Agiographi deindè libri simul & Prophetæales duplici linguâ excuduntur, hoc est, Hebræd & Græcâ cum aliis duabus Translationibus Latinis illis correspondentibus At verò libri extra Canonem (idest, Hebræorum, quos tamen ceu Canonicos recipit Ecclesia) Græcam tantùm habent scripturam cum Latina interpretatione: alterâ B. Hieronymi, alterâ interlineari de verba ad verbum Primitiva sive radices dictionum Hebraicarum & Chaldaicarum ad marginem sunt apposita &c. Hęc Ximenii Cardin. Biblia, quæ vulgò Polyglotta Complutensia dicuntur, autoritate Pontificiâ approbavit Leo X. Diplomate dato Romæ die xxii. mensis Martii anni MDXX. cùm jam è vivis excessisset anno MDXVI. Cardinalis Ximenius, ætatis LXXX. In studio & interpretatione Sacrarum Litterarum insudavit etiam, & magnam apud Viros eruditos laudem promeritus est Franciscus Titelmanus, in oppido agri Leodiensis natus, & Ordinis FF. Minorum, Professor, qui Hebraicæ, Chaldaicæ, Græcæ, ac Latinæ Linguarum notitiâ præditus, doctissimos edidit Commentarios in plures libros Script. Sacræ cùm Veteris, tum Novi Testamenti, *Desiderium Erasmus* in Collatione in Epistol. ad Romanos impugnavit, variaque vulgavit Opera sive Dogmatica, sive Ascetica, quæ ejus eximie eruditionis & pietatis perpetua erunt monumenta. Inter Patres Capucinos, ad quos ex FF. Minorum Ordine, strictioris Disciplinæ regularis observantiæ studio, se se*

fese receperat, sua officia ac ministeria Leprosis incredibili charitate exhibendo, obiit an. MDXXXII. sicut asserit *Wadinghus*, non verò anno MDLIII. sicut per errorem obrepfit *Auberto Miræo* in Scriptoribus Sæculi XVI. Sacrarum Litterarum Interpretum Catalogo accenseri quoque debent quatuor alii ejusdem Ordinis FF. Minorum Scriptores, videlicet *Henricus Regius*, *Joannes Ferus*, *Nicolaus Grandis*, & *Seraphinus Cumiranus*, quorum primus, seu *Henricus Regius*, Padebornensis, *Biblia Alphabetica* edidit, quæ primùm excusa fuerunt Coloniae anno MDXXXV. Alter, seu *Joannes Ferus*, natione Germanus, præter multa Concionum volumina, & Opuscula varia, edidit Commentaria in plures Sacros libros tam Veteris, quàm Novi Testamenti, quæ tamen, ut inquit *Wadinghus*, varias passa sunt contradictiones. *Nicolaus Grandis*, in Sacra Facultate Parisiensi Doctor Theologus, Commentarios elaboravit in *Epistolas Sancti Pauli ad Romanos & ad Hebræos*. Denique, *Seraphinus Cumiranus*, Feltrensis, scripsit *Conciliationem locorum Scripturæ Sacræ, quæ inter se pugnare videntur*.

E' Schola FF. Minorum prodierunt Sæculo decimo sexto innumeri penè Theologi, quorum singulares dotes & Opera latè prosequitur *Wadinghus* in libro *De Scriptoribus Ordinis FF. Minorum*. Hic autem consultò prætermisissis haud paucis hujus Ordinis Theologis, qui de *Formalitatibus Scoti*, & de aliis id genus Scholasticis quæstionibus, Ecclesiæ ac Reipublicæ Christianæ parùm utilibus, Tractatus aut libros ediderunt, eos dumtaxat in medium producam Theologos, qui præclaris Operibus Ecclesiā & Ordinem FF. Minorum Sæculo

decimo sexto illustrarunt . Et primo quidem loco reponam *Cornelium Mussum* , Placentinum , qui ex Ordine FF.Minorum Episcopus Bituntinus assumptus , interfuit Concilio Tridentino , ubi vitæ innocentiam , eximiam doctrinam , & sacrâ eloquentiam magnam sui apud Patres admirationem excitavit . Inter alia Opera , quæ perdoctè scripsit , præcipuum locum habent quinque libri , quos lucubrauit , *de Historia Divina* , & Commentarius in omnes *S. Pauli* Epistolas , & in Decalogum . Plura de eo leges apud *Wadingum* in Bibliotheca Scriptorum Ordinis Minorum . Adfuit etiam Concilio Tridentino *Andreas Vega* Hispanus ejusdem Ordinis Minorum , & in Academia Salmanticensi Theologiæ Professor præstantissimus , qui ejusdem Concilii Tridentini *de Justificatione* doctrinam perdoctis Commentariis adversus Hæreticos defendit , de quibus legendus est *Wadingus* . Ad Concilium quoque Tridentinum *Michael de Medina* ejusdem Ord. Professor , à *Philippo II.* Hispaniarum Rege missus est , & scripsit libros septem *de Recta in Deum Fide* : Libros quinque *de Sacrorum Hominum Continentia* : Tractatus *de Purgatorio* , *de Indulgentiis &c.* quos *Wadingus* in Bibliotheca recenset . *Marcus Viguerius* , natione Italus , patriam Savonens in Liguria , Ordinis Minorum , Theologiam Patavii & in Sapientiæ Romanæ Gymnasio postquam diu prælegisset , Episcopus Senogallienfis factus est , dein , inter S. R. E. Cardinales à *Pio II.* Pontifice Maximo allectus , & Episcopatu Prænestino auctus . Extant ab eo scripta *Decachordum Christianum de præcipuis Incarnati Verbi Mysteriis* : item *Lucubratio de excellentia Instrumentorum Dominiæ*

minica Passionis : Liber de *Vita* , *Passione* , *Morte* , *Resurrectione* & *Instrumentis Passionis D. N. Jesu Christi* . Apologiam pro *Julio II.* Pontifice Maximo adversus Conciliabulum Pisanum ab eo conscriptam esse prodit *Posssevinus* Tomo 2. *Aparatus Sac.* pag. 62. *Dialogum* etiam de tollendis abusibus *Ecclesiæ* ab eodem compositum memorat *Simlerus* in *Bibliotheca Tigurin.* pag. 575. *Franciscus Lichetus* , Brixienfis , Ordinis FF. Minorum Generalis Minister , Commentarios adornavit in quatuor Sententiarum libros Doctoris subtilis . *Conradus Cligius* , natione Germanus , & ejusdem Ordinis Minorum , præter *Catechismum* libris iv. comprehensum , scripsit *Locorum Communium Sacræ Theologiæ Sylvam* , & alia Opera , quæ tamen vel exuberantis ingenii vitio , vel fraude Hæreticorum corrupta , correctione indigent , ut inquit *Wadinghus* , quò fit , ut omnia ejus Opera , donec expurgentur , in Indice Romano prohibeantur . *Clemens Dolera* , natione Italus , ex Ministro Generali Ordinis FF. Minorum creatus est S.R. E. Presbyter Cardinalis & Episcopus Fulginatensis , ediditque *Compendium Catholicarum Institutionum ad Christianam Theologiam* , & alia Opera , de quibus consule *Wadinghum* in *Bibliotheca* . *Didacus Stella* , natione Lusitanus , non solum fuit insignis Ordinis Minorum Theologus , sed eximius Concionator , & Scriptor Asceticus , qui libros edidit de contemnendis *Mundi Vanitatibus* , quos *S. Franciscus Salesius* impensè laudat , insuper *Meditationes de Amore Dei* , & librum de modo Concionandi , seu *Rhetoricam Ecclesiasticam* , quâ posteros Concionatores informavit , artemque benè , & utiliter Con-

Conciones ad populum habendi edocuit. Denique, inter doctissimos Theologos Ordinis Minorum adnumerari debent *Petrus Crabbius*, *Alphonsus à Castro*, & *Petrus Galatinus*, quorum primus, seu *Petrus Crabbius*, patriâ Mechliniensis. Vir fuit pietate & eruditione Clarus, qui, post *Jacobum Merlinum*, Ecclesiæ Parisiensis Pœnitentiarium, à quo, ut superius observavimus, in lucem data est Conciliorum Collectio, novam ac multò locupletio rem Conciliorum Collectionem an. MDXXXVIII. typis mandavit Coloniz, eique præter varias Synodos & Epistolas sparsim additas, inseruit Gesta Concilii Chalcedon. Concilium Lateranense sub *Innocentio III.* celebratum, Appendicem copiosam Concilii Constantiensis, Epistolas & Responsiones Synodales XVI. Concilii Basileensis, & Gesta Concilii Florentini ex interpretatione *Bartholomæi Abrahami Cretensis*, & *Vitas Romanorum Pontificum*, quæ omnia desiderantur in prioribus Conciliorum Collectionibus. Hanc novam Conciliorum Collectionem duobus Tomis complexus est *Petrus Crabbius*, quam tamen postea pluribus additamentis auctam, & in tria magnæ molis volumina digestam, novâ Editione anno MDLI. Coloniz donavit, eamque *Carolo V.* Imperatori nuncupavit. In alio perindè Ecclesiæ utili scribendi genere versatus est *Alphonsus à Castro*, natione Hispanus, patriâ Zamorensis, unus è Concilii Tridentini Theologis, & *Philippo II.* Hispaniarum Regi à Sacris Concionibus, qui, præter Homilias, scripsit Opus *adversus omnes Hæreses* in libros XIV. distributum: Libros tres *De Iustâ Hæreticorum Punitiõne*; & libros duos

De

De Potestate Legis Pœnalis. Denique, *Petrus Galatinus*, natione *Apulus*, Opus Theologicum edidit in quinque partes tributum: Item Opus *De Ecclesiæ Catholicæ Institutione, Deformatione, & Reformatione*, aliosque Tractatus, quorum Catalogum exhibet *Wadinghus* in Bibliotheca Scriptorum Ordinis Minorum. Hic autem obiter advertere debes, eundem *Petrum Galatinum* scripsisse librum *De Arcanis Catholicæ Veritatis* adversus Iudæos, ex libro *De Pugione Fidei Raymundi Martini*, Ordinis Prædicatorum, maximam partem compilatū, sicut sole clariùs demonstravit doctrinā & pietate illustris dominus *Josephus de Voisin* in Prolegomenis *Pugionis Fidei* Editionis, quam secundis curis adornavit, tamque insigne plagium detexit. Quin, ante *Josephum de Voisin* hoc *Petri Galatini* furtum subodoratus est *Josephus Justus Scaligerus* in Epistola ad *Casaubonum* datâ Idibus Septembris anni MDIIL. in qua hæc habet: *Addebas de quibusdam in Petri Galatini disputationibus. Scito illos libros esse Compendium duorum ingentium Voluminum, quibus titulum fecit Auctor Raymundus Sebon Dominicanus, eximius Philosophus. At ille, naris emunctæ Criticus, quamvis Petri Galatini furtum optimè olfecerit, atque acutissimè indagaverit, à via tamen veritatis aberravit, primò, dum ait, Raymundum Sebonem esse Dominicanum & Authorem libri De Pugione Fidei. Constat quippe Raymundum Sebonem nec Dominicanum fuisse, nec Authorem libri De Pugione Fidei, sed germanum illius libri Authorem esse Raymundum Martinum, natione Catalanum, patriâ Subiratensem, Conventus Barcinonensis Ordinis FF. Prædicatorū*

alu-

alumnus, sicut testatur *Franciscus Diago*, ejusdem Ordinis, libro 2. *Historia Provinciae Aragoniae* cap. 28. Fallitur præterea *Josephus Scaligerus*, dum asserit, Opus *Petri Galatini De Arcanis Catholice Veritatis* nihil aliud esse, quàm *Compendium* duorum ingentium voluminum *Raymundi Dominici*; cum tamen certum sit, non duo tantum, sed tria volumina libri *Raymundi Martini* Dominici *De Pugione Fidei* extare in variis Bibliothecis, quorum non tam *Compendium*, seu *Epitomen*, aut *Breviarium* confecit *Petrus Galatinus* in suo libro *De Arcanis Catholica Veritatis*, quàm omnia bona, quæ eo in libro habet, ab illo suffuratus est, suppressio penitus *Raymundi Martini* nomine, nec vel minimum quidem indicato fonte, ex quo plenissimè biberat, & aquas inde haustas in suos alveos derivaverat. Sed de Scriptoribus Ordinis *S. Francisci* hætenus satis.

D. Superest adhuc unus Religiosorum Mendicantium Ordo, videlicet Carmelitarum; de cuius Scriptoribus, qui præclaris ingenii sui monumentis, omnique bonarum Litterarum genere Christi Ecclesiam locupletarunt, breviter in hac decima tertia Virorum Sæculi XVI. eruditorum, Classe disserere debemus.

M. Prætermitto, ne longiori deductâ Scriptorum serie, tibi fastidium ingeram, doctissimos Theologos Scholasticos, qui Sæculo XVI. magnum Ordini Carmelitarum splendorem contulerunt, & tres tantum mihi notos, illius Ordinis Scriptores, quorum Opera eruditis & asceticis Viris maximè probantur, hic indicabo, videlicet *S. Theresiam à Jesu*, Spiritualis & Cælestis doctrinæ Magistram

gistrum ; *Everardum Billichium*, & *Baptistam Mantuanum*, cognomento *Hispaniolum*. In primis, certò affirmare possum, ex Hispania, sanctitatis & doctrinæ feracissimâ, non extitisse Sæculo XVI. quidquam ad Religionis Christianæ gloriam & majestatem illustrius illâ Deo dilectâ Virgine *Theresiâ*, quæ Abulæ in Regno Castellæ parentibus non minùs nobilitate, quàm vitæ integritate conspicuis nata, ad Moniales Ordinis *S. Mariæ de Monte Carmelo* anno ætatis suæ vigesimo se contulit, & ejusdem Ordinis non solùm in mulieribus, sed & in Viris reformationem aggressa, de sola Dei misericordia confidens, humanis omnibus destituta auxiliis, & adversantibus plerùmque ac contradicentibus potestatibus Sæculi, ad optatum exitum perduxit, materque evasit Carmelitarum excalceatorum tam Virorum, quàm Mulierum Ordinis latissimè propagati, quo nullum Sanctitate & eruditione, seu utrâque Theologiâ, Mysticâ & Scholasticâ, superiorem Ecclesia habet, ut opportunè ostendemus in sequenti Colloquio, ubi agemus de Religiosis Ordinibus, qui Sæculo XVI. fuerunt instituti. Actum profectò agerem, si hîc summam *S. Theresiæ* pietatem, ardentissimam in Deum, & proximum charitatem, cæterasque virtutes, quibus in gradu heroico excellebat, describendas susceperem. Dicam tantùm, ejus doctrinam adeò Cœlestem esse, ut verè ipsa dici possit *Doctrina disciplina Dei, & Electrix operum illius*. Scripsit, præter plures Epistolas, quæ germanam ac solidam pietatem ubique spirant, *Vitæ suæ Relationes*, *Viam Perfectionis*, *Fundationum Cœnobiorum suorum* librum unum, *Castrum animæ & in Cantica*
Can-

Canticorum librum unum, quorum Operum asceticorum excellentiam egregiè commendat *Gregorius XV.* Pontifex Maximus in Canonizationis Sanctæ *Theresiæ* Diplomate, ubi ait, Sanctam illam Virginem, Cœlestis sapientiæ imbris à Deo irrigatam, edidisse de Mystica Theologia, & de aliis etiam rebus libros multâ pietate refertos, ex quibus fidelium mentes uberrimos fructus percipiunt, & ad supernæ patriæ desiderium excitantur. Esset hic locus opportunissimus, si per Colloquiorum nostrorum brevitatem liceret, meo, totiusque Ordinis nomine, testandi gratissimum animum non solum in Sanctam *Theresiam*, quæ, suum in Dominicanos ut significaret affectum, in una ex suis Epistolis se *Dominicam in Passione*, idest, ex animo totoque affectu Dominicanam se esse profitebatur; sed etiam in Reverendos Patres Carmelitanos excalceatos, S. *Theresiæ* filios, qui de Schola nostrâ optimè meriti sunt, & S. *Thomæ* doctrinæ maximum splendorem atque auctoritatem conciliarunt laudabili illo Statuto, & quasi voto de S. Doctore Angelico ubique sequendo, quod Carmelitarum Ordo inter Constitutiones, & suæ Religionis fundamenta posuit, & sanctè etiamnum observat. Sed, cum huic officio plenè satisfacere non possim, perpetua illa & arctissima amicitia, quâ RR. PP. Carmelitas Excalceatos colit Schola Thomistica, æternum erit nostræ in illos observantiæ monumentum. *Everardus Billichius*, Carmelita Colonienfis, in Concilio Tridentino, & Ratisponensi Colloquio pro tuenda Fide Catholica multum allaboravit. *Defensionem* judicii *Universitatis Colonienfis* adversus calumnias *Melancthonis*, *Buceri*, *Olden-*

Oldendorpi, & *Affectarum* in publicam lucem emisit : Item librum *de diffidiis Ecclesiæ componendis*. Denique, *Baptista Mantuanus*, cognomento dictus *Spagnolus*, seu *Hispaniolus*, gente erat Italus, patriâ Mantuanus, & Ordinis Carmelitani in Conventu Mantuano alumnus, ac postea totius Ordinis Generalis Præfectus, cui tamen dignitati, post triennium, ultrò cessit, ut Deo ac sacris studiis faciliùs vacaret. Linguarum Latinæ & Hebrææ peritus fuit, eximius Theologus, & Poëta optimus, adeoque castus, ut Poëticam venam rebus lascivis aut prophanis impendere piaculum duxerit. Obiit Mantuæ xi. Kal. Aprilis ann. MDXVI. eique mortuo *Fredericus*, Mantuæ Dux, Statuam marmoream posuit. Præter multa sacra Poëmata, scripsit contra Poëtas impudica scribentes : *Historiam Redemptoris Mundi Matris Ecclesiæ Lauretanæ* : *Apologiam pro Carmelitis* : *Traëctatum de parte Corporis B. Mariæ*, in qua conceptus est *Iesus Christus* : *De patientia libros tres*, & alia Opera, quæ simul collecta studio *Laurentii Cuperi*, Bruxellensium Prioris, prodierunt Antuerpiæ anno MDLXXVI. Plura de Carmelitani Ordinis Scriptoribus non addam, eò quòd Clarissimi Societatis Jesu Scriptores, de quibus in sequenti, seu decimâ quartâ Virorum Sæcul. XVI. eruditorum Classe, sermonem habituri sumus, amplissimum dicendi suppedient argumentum :

D. Cùm in Societatem *Jesu*, doctrinâ, legibus, vitâ, moribus & Scriptis ubique laudatissimam, sic ab initio fuerim animatus, ut vero ejus honori consulere semper in votis habuerim, incessit, nuperrimè animum libido pervoluendi Bibliothe-

thecam Scriptorum Societatis Jesu, & statim in prima Præfatione (cujus Author est R. P. Petrus Ribadeneira ejusdem Societatis Theologus) hæc verba perlegi, quæ me singulari admiratione perculerunt: *Mihi quidem*, inquit ille, *certè permirum videtur, in tam exiguo nostrorum numero tam multos extitisse Scriptores, qui brevissimo tempore lucubrationes suas litteris mandarunt, & omne penè Scriptorum genus magna cum laude sunt persecuti. Etenim, ut ex multis pauca attingam, quod genus ingenuarum artium est, quod argumentum, quæ tractatio, in qua nostri non sint peregre regie versati? quam scriptis suis non explicarint, auxerint, ornarint? Nam si ab ipsis quasi incunabulis ac primis Grammatices rudimentis ducas exordium, & per severiores Disciplinas, cœper per gradus quosdam, ad culmina sacre ascendas Theologiæ, nihil certè reperies à nostris prætermisum, quod ad scientias omnes illustrandas pertinere videatur &c.* Volebam quidem ulterius progredi, sed, ut candidè fatear, immensi illius libri moles me, magni laboris impatientem, à lectione deterruit. Quocircà obsecro te, ut præcipuos ac primi subfelli Scriptorum Societatis Jesu breviter in hac decima quarta Virorum Sæculi decimi sexti eruditorum Classe per censere, eorumque Opera indicare non graveris.

M. Istud Scriptorum Societatis Jesu elogium, quod in Præfatione Petri Ribadeneira ad Bibliothecam Scriptorum Societatis Jesu lætitasti, splendidum quidem, elegans, ac magnificum est, modestum tamen præ aliis encomiis, quæ in Imagine primi Sæculi Societatis Jesu habentur, & à quibus referendis, ne longior sim, consultò in præ-

præsentia abstinerebo, atque in recensendis dumtaxat præstantioribus hujus Societatis Scriptoribus, eorumque lucubrationibus debitâ commendatione celebrandis, paululûm immorabor. Incipiam porrò à S. *Ignatio Loyola*, Societatis Jesu parente ac Conditore, meoque in Cœlis singulari Patrono, cujus nomine in Sacro Baptismatis fonte divinâ providentiâ fui donatus. Natione Hispanus fuit *Ignatius de Loyola*, qui, dùm viveret, varias, ita permittente Deo, persecutiones passus est, præsertim Parisiis, ubi ab æmulatorum manibus ac furore liberatus est authoritate ac potentiâ Dominici *Matthæi Ori*, Inquisitoris Parisiensis, ad cujus tribunal semel & iterûm fuit delatus, sicut testatur *Orlandinus* libro 1. Historiæ Societatis Jesu. Nec solûm Parisiis & in Gallia *Ignatium de Loyola* ab eo Dominicano Fidei Quæsitore humaniter & perhonorificè tractatum narrat *Orlandinus*, sed etiam lib. 2. ejusdem Historiæ num. 31. asserit, *Ignatium de Loyola*, à suis æmulis Salmanticæ in Hispania impetitum, sese testimonio Dominici *Matthæi Ori*, quem Parisiis vindicem ac defenso-rem habuerat, tutatum fuisse. Variis præterea circa librum *Exercitiorum spiritualium*, quem edidit, quique à *Paulo III.* aliisque Romanis Pontificibus postea approbatus est, atque à Viris doctissimis ac religiosissimis summè laudatus, procellis agitatus est *Ignatius de Loyola*. Neque enim, ut obiter dicam, assentior illis, qui volunt, Authorem illius libri *Exercitiorum spiritualium* esse *Garciam Cifnerium*, Montiserrati Religiosum Benedictinum; maximè cùm ex testimoniis Romanorum Pontificum constet, hunc librum *Exercitiorum spiritualium*

à S. Ignatio, dùm Manresæ esset, compositum fuisse, & jussu Pauli III. recognitum esse à P. Foscarario Dominicano, & Sacri-Palatii Apostolici Magistro, qui egregium de illo protulit testimonium præfixum huic libro, Editione Romanâ primâ, anno MDXCVI. excuso: *Non poterunt*, inquit ille Dominicanus, *tâm Sancta Exercitia non maximum commodum præstare cuilibet studioso: idèò obviis etiam vulnis amplectenda sunt.* In secunda verò Editione ejusdem libri, sic ejus utilitatem commendat idem Sacri Palatii Apostolici Magister: *cùm nequeat subsistere diù Christiana Religio sine exercitiis, & meditationibus aliquibus spiritualibus (in meditatione enim, inquit Vates, exardescit anima mea) nullas arbitror magis opportunas, his, quæ procul dubio ex Scripturarum studiis: & longo rerum usu natæ sunt.* Præter hunc admirabilem *Exercitiorum spiritualium* librum, quem ad posteros transmittit Ignatius de Loyola, plures scripsit pias Epistolas ad suos filios, eisque Constitutiones dedit, in quarum Parte quarta, cap. XIV. sancitâ lege jubet, ut doctrinam Thomisticam sectentur: *In Theologia*, inquit Vir Dei, *legatur Vetus & novum Testamentum, & doctrina S. Thomæ*; eique nullo nomine, nullo prætextu, nullove titulo, lituram aliquam, exceptionemve præigi unquam passus est, quandiù vixit Beatissimus ille Societatis Jesu Parens, & germanæ S. Thomæ Aquinatis doctrinæ sectator strenuus; sed potius Christianæ pacis amantissimus, si quæ vidit ætate suâ dissensionum istarum ac novitatum pullulare semina, acutum eâ, quâ potuit, pietate ac religione compressit, illo proinde dignus elogio, quo cum Cardinalis *Franciscus à Monte*

d Monte coram Gregorio XV. Pontifice Maximo coronavit, dùm virtutum ac miraculorum gesta, pro Canonica ejus Apotheosi referret: Novas, inquit, opiniones nunquàm admisit, & in Theologia Scholastica doctrinam Angelici Doct̃oris secutus est. Et certè, Maffejus Societatis Jesu, libro 1. de Vita S. Ignatii cap. 19. & alii ejusdem Societatis probatissimæ fidei Scriptores, disertè testantur, Ignatium de Loyola Lutetiæ Parisiorum apud FF. Prædicatores in Collegio Generali S. Jacobi Theologiæ operam navasse, eâque ratione subindè factum, ut qui, nascente Societate Jesu, eidem, necdùm peractis Theologicis studiis, nomen dabant, ad Fratrum Prædicatorum Scholas, Lectiones Theologicas excepturi, mitterentur; quod olim Vallisoleti atque Abulæ fieri solitum ipsimet Societatis Jesu Scriptores litteris prodiderunt. Ita nempè, qui tum temporis Ignatii mentem, animumque propius ebiberant, se nunquàm melius instituendos autumabant, quàm si eum Doctrinæ fontem attingerent, undè sanctissimus Pater hausisset. Ad Vitam immortalem migravit S. Ignatius de Loyola, pridie Kal. Augusti anni MDLVI. & à Gregorio XV. Pontifice Maximo, heroicis ejus virtutibus ac miraculis ritè probatis, in Cælitum numerum relatus est IV. Id. Martii an. MDCXXXIII. De Societate Jesu, cujus fundamenta jecit S. Ignatius de Loyola, & cujus incrementum haud parùm promoverunt Religiosi Dominicani, commodiùs agemus in proximo Colloquio, ubi de Religiosis Ordinibus, qui sæculo XVI. originem habuerunt, sermonem instituemus.

Post S. Ignatium de Loyola, Societatis Jesu

Auctorem ac Parentem, inter Clarissimos ejusdem Societatis Scriptores, qui Sæculo XVI. doctrinâ & pietate effulserunt, eos, qui sequuntur, potissimum laudabo, videlicet *Jacobum Laynes*, *S. Franciscum Xaverium*, *Martinum Olavium*, *Petrum Canisium*, *Henricum Canisium*, *Franciscum Ribera*, *Joannem Ferdinandum*, *Alphonsum Salmeronem*, *Hieronymum Pradum*, *Franciscum Toletum*, *Blasium Viegam*, *Joannem Maldonatum* & *Emmanuellem Sa*. De quibus singillatim aliquid dicturus, ordiar à *Jacobo Laynes*, natione Hispano, patriâ ex oppido Castellæ Almazan, qui fuit Vir ingenio maximo, judicio acerrimo, excellenti memoriâ, prudentiâ singulari, innocentia & vitæ sanctimoniâ admirandus; modestiâ, affabilitate ac suavitate morum haud vulgaritèr præditus. Sancto *Ignatio de Loyola* ad meliorem vitam translato, Præpositus Generalis Societatis Jesu electus *Jacobus Laynes*, eam octo annos & dimidium sapientissimè rexit. In Galliam à *Pio IV.* Pontifice Maximo cum *Hypolito Estensi*, Cardinali Legato, ad restinguendum incendiū, eo in Regno ab Hæreticis Calvinianis excitatum, missus, interfuit publico totius hujusce Regni Poissiaco Conventui, in quo, sicut in superiori Colloquio jam observavimus, maximâ Sententiarum & verborum gravitate repressit, coram *Catharina*, Regina matre, *Theodorum Bezam*, *Petrum Martyrem*, aliosque nefarios Hæreticorum Antesignanos frænavit, ac prorsus elingues reddidit. Concilio Generali Tridentino interfuit, & in eo multa suæ eruditionis specimina edidit. Tandem absoluto Concilio Tridentino, Romam reversus, ibi obiit die 19. Januarii an. MDLXV. ætatis suæ LIII.

Præ.

Præclara felicissimi ingenii sui atque exquisitæ eruditionis suæ monumenta reliquit, quæ tamen, ut observat *Philippus Alegambius* in Bibliotheca Scriptorum Societatis Jesu, ob varias, quibus distentus erat, occupationes, limare, eisque ultimam manum adinovere haud potuit *Jacobus Laines*. De illius etiam Scriptis legendi sunt *Franciscus Sacchinus* in Historia Societatis Jesu, & *Petrus Ribadeneira* in Catalogo Scriptorum ejusdem Societatis. Exactis in Academia Parisiensi Philoſophiæ & Theologiæ studiis, sese socium Sancto *Ignatio* adjunxit *Franciscus Xaverius*, natione Hispanus, patriâ Navarrus, qui à *Paulo III.* Pontifice Maximo, *Joannis III.* Lusitanix Regis rogatu, ad Orientalem Indiam missus est, ubi innumeros Populos Evangelii luce perfudit. Dein, in Japoniam primus Cœlestis doctrinæ lumen invexit, ideoque Japponum primus Apostolus jure merito dictus, Tot remotas Infidelium Regiones pedibus lustrasse, & Cœlesti luce collustrasse non contentus *Franciscus Xaverius*, latissimum Sinensium Imperium penetrare voluit, sed in ipso hujusce Regni aditu sanctissimè obiit die 11. mensis Decembris anni MDLII. & à *Gregorio XV.* Pontifice Maximo Sanctorum Catalogo adscriptus est die xii. mensis Martii anni MDCXXII. S. *Francisci Xaverii* virtutum ornamenta, præcipuè submissionem animi, charitatem erga Deum, zelum animarum, magnanimitatem, fortitudinem, in adversis patientiam, perpetuum Orationis studium, vitæ asperitatem, Evangelicæ paupertatis amorem, cæterasque virtutes heroicas complexus est *Petrus Ribadeneira* in Vita Sancti *Ignatii de Loyola*. Sex quoque libros

de S. *Francisci Xaverii* moribus, vitâ, obitu & miraculis scripsit *Horatius Tursellinus*, elegans Societatis Jesu Scriptor. Extant complures S. *Francisci Xaverii* Epistolæ zelum Apostolicum spirantes, & alia quædam Opuscula, quorum meminit *Alegambius* in Bibliotheca Scriptorum Societatis Jesu. Inter primos S. *Ignatii* socios annumeratur *Martinus Olavius*, natione Hispanus, patriâ Cantaber, ex oppido *Viçtoria*, qui postquàm in Academia Parisiensi Doctor in Sacra Theologia inauguratus, sapientiæ laude floruiſſet, & *Ottonis* Cardinalis *Truchessii*, Episcopi Augustani, nomine, Synodo Tridentinæ adfuisset, ibique Orationem summo cum totius Concilii applausu habuisset, Societati Jesu nomen dedit, ac brevi inter Professores adscriptus, Romano præfectus est Collegio, in quo Theologiam magnâ cum sui nominis famâ docuit, scripsitque *Affertiones de conditione, lapsu & reparatione hominis*, necnon ad *Decretum Parisiense à Sorbonicis Doctoribus contra Societatem Jesu in ipsis suis initiis latum Responſionem*, quæ, ut testatur *Alegambius* in Bibliotheca, extat in Historia Societatis Jesu Tomo 1. libro 15. num. 46. Societatem Jesu recens natam *Petrus Canisius*, natione Belga, patriâ Noviomagensis, doctrinâ ac præstantis ingenii monumentis mirum in modum illustravit. Germaniam superiorem, primus à Sancto Patriarcha *Ignatio* institutus Præpositus Provincialis, prudentissimè rexit, Hæreticos disputationibus repressit, Catholicos confirmavit, suisque ferventissimis Concionibus ad meliorem frugem revocavit. Scripsit libros quinque de *Beatissima Maria Virgine: Parvum Catechismum Catholicorum* :

Com-

Commentarios de Verbi Dei Corruptelis, & alia
 plura Opuscula Dogmatica, Exegetica, Polemi-
 ca, & Ascetica, quæ recenset *Philippus Alegambe*
 in Bibliotheca Scriptorum Societatis Jesu. Hic
Petrus Canisius fratrem habuit ejusdem Societatis
Henricum Canisium, omnis litteraturæ studiosum,
 & sacrorum Canonum in Academia Ingolstadiensi
 Interpretem, qui plura edidit Opera in jus Cano-
 nicum & Civile, sed præsertim sex Tomos *Anti-
 quæ Lætionis*, in quibus varia exhibet Scriptorum
 priscorum monumenta ad Historiam mediæ æta-
 tis illustrandam, nunquam antehac evulgata.
Franciscus Ribera, natione Hispanus, patriâ ex op-
 pido Castellæ Villacastia, maximum doctrinâ suâ
 Societati Jesu contulit splendorem. Vir quippè fuit
 egregiè doctus ac pius, ingenio excellenti, judicio
 acri, in sanctorum Patrum Operibus versatus, &
 linguarum Latinæ, Græcæ, ac Hebraicæ peritissi-
 mus. Scripsit, præter Vitam S. *Theresiæ*, doctissi-
 mos Commentarios in XII. Prophetas Minores, in
Epistolam Pauli ad Hebræos, in *Evangelium S. Joann-*
is, & in *Apocalipsin*, necnon libros quinque De
Templo Salomonis. Plura de hoc erudito Scriptore
 leges apud *Alegambium* in Bibliotheca Scripto-
 rum Societatis Jesu. *Joannes Ferdinandus*, natione
 Hispanus, patriâ Toletanus, & insignis Societatis
 Jesu Theologus, Scripturam Sac. per multos annos
 Romæ interpretatus est. Dein, in Belgium missus
 ad operam in Castris militibus Catholicis præ-
 standam, per quinquennium ibi versatus multos
 pertulit labores & gravissima pericula adivit, è
 quibus divinâ ope liberatus, & è Belgio in Hispa-
 niam reversus, annos quindecim ultissimis Con-

cionibus consumpsit, scripsitque *Divinarum Scripturarum juxta sanctorum Patrum Sententias locupletissimum Thesaurum* Tomis tribus comprehensum. Tertio tamen Tomo *Joannes Ferdinandus*, morte interceptus, finem imponere haud potuit, teste *Alegambio* in Bibliotheca sæpius laudatâ Scriptorum Soc. Jesu. Unus ex decem primis Sociis S. Patriarchæ *Ignatii* esse meruit *Alphonsus Salmeron*, natione Hispanus, patriâ Toletanus, qui in Academia Parisiensi Philosophicis ac Theologicis excultus disciplinis, Conc. Trid. sub *Paulo III.* sub *Julio III.* & sub *Pio IV.* interfuit, atque in eo Orationem habuit pereruditam de *S. Joanne Evangelista*, Patrum hujus Concilii auribus dignam. *Novum Testamentum* sexdecim Tomis perdoctè interpretatus est. Hæreticorum perpetuus hostis fuit, quos disputationibus, lectionibus ac Scriptis semper exagitavit. Doctrinæ *S. Thomæ* fuit addictissimus, ut videre est præsertim in Disputatione *xxi.* in caput *viii.* Epistolæ *S. Pauli* ad Romanos, ubi disertis verbis Prædestinationem gratuitam, idest, ante omnem prævisionem meritorum, multis momentis adstruit, omnemque præscientiam boni usus gratiæ exploratricem eliminat. De *Alphonso Salmeronis* Operibus lege *Possëwinum* in Apparatu sacro, & *Alegambium* in Bibliotheca Scriptorum Societatis Jesu. *Hieronymus Pradus*, natione Hispanus, ejusdem Societatis Jesu Professor, Sacras Litteras in Academia Cordubensi publicè exposuit, & eruditum edidit Commentarium in priora sex & viginti Capita Prophetæ *Ezechielis*, reliqua verò Capita, præsertim ea, quæ Urbis ac Templi Hierosolymitani spectant apparatus, explanavit alter

Socie-

Societatis Jesu Theologus, seu *Joannes Baptista Villalpandus*. Societatem Jesu sacrae purpuræ honore primus ornavit *Franciscus Toletus*, natione Hispanus, patriâ Cordubensis, postquam sub *Pio V.* & sex aliis succedentibus Romanis Pontificibus Concionatoris Apostolici munus magno cum fructu, & summo omnium applausu obiisset, suorumque Auditorum animos non tam verborum elegantia, quam Sententiarum gravitate, recondita doctrinæ excellentiâ, ordinis dispositione, ingenii perspicuitate ac magnitudine in admirationem rapuisset. Ejus operâ sæpius usi sunt Summi Pontifices. *Pius V.* Cardinali *Joanni Francisco Commendano*, in Germaniam ad *Maximilianum* Imperatorem, & *Sigismundum* Poloniæ Regem misso Legato, *Franciscum Toletum* comitem adjunxit. *Gregorius XIII.* eum in Belgium misit, ut Pontificium Diploma contra errores *Michaelis Baji* ab Academia Lovaniensi, & ab ipsomet *Michaele Bajo* recipi curaret, quod ipse feliciter & ex animi sententiâ perfecit. Sacra Biblia recognoscendi, & à mendis, quæ in ea Typographorum incuriâ irrepsierant, repurgandi provinciam ei demandavit *Sixtus V.* actandem illum, vitæ Sanctimoniâ cum eximia eruditione & prudentiâ in rebus agendis singulari conjunctâ clarissimum, *Clemens VIII.* in Cardinalem Collegium cooptavit; sub cujus Pontificatu in negotio de *Henrici IV.* Galliarum Regis cum Sancta Sede reconciliatione promptam & egregiam navavit operam *Cardin. Toletus*, & in absolutione ejusdem Regis à Summo Pontifice impetrandâ præclare meritus est de universa Gallia, de Rege *Henrico IV.* qui tanti beneficii memor,

Cardi-

Cardinali *Toleto* mortuo anno MDCVI. solemnī ritu Parisiis in Ecclesia Principe parentavit. Præter Philosophicas lucubrationes, edidit *Franciscus Toletus* Summam Casuum Conscientiæ, seu *Instructionem Sacerdotum*, & eruditos Commentarios in Evangelium S. *Joannis*, in priora duodecim Capitula Evangelii S. *Luçæ*, in Epistolam ad Romanos, & Sermones xv. in Psalmum xxxi. Inter Scripturæ Sacræ Interpretes, quos Ecclesiæ Sæculo XV. dedit laudatissima Jesu Societas, locum habere debet *Blasius Viegas*, natione Lusitanus, & Sacrarum Litterarum in Academia Eborensi Professor, qui egregiis Commentariis *Apocalypsin* illustravit. At in Sacrarum Litterarum interpretatione nullum, juxta peritorum Criticorum judicium, doctiorem protulit Societas Jesu *Joanne Maldonato*, in Bætica Hispaniæ nato, qui à teneris annis omni litterarum genere excultus, ad exactum Philosophiæ & Theologiæ studium singularem pietatem, morum candorem & acerrimum judicium cum attulisset, in celebrem evasit Oratorem ac Theologum, atque Superiorum jussu Romæ primùm Theologiam docuit, deindè, per decem annos Parisiis magno cum applausu & frequenti omnium ordinum concursu in Collegio Societatis Jesu Claromontano docendi munus obivit. Occasione tamen peculiaris cujusdā opinionis, quam in suis lectionibus propugnauerat, gravem cum sacrâ Facultate Parisiensi litem sustinuit, cujus originem & causam, omniaque monumenta ad illam spectantia refert *Egassius Bulaeus* Tomo VI. *Historiæ Universitatis Parisiensis*. Romam à *Gregorio XIII.* Pontifice Maximo ad concinnandam novam septuaginta Interpretum Versionis

tionis Editionem vocatus *Joannes Maldonatus*, ibi tandem meritis clarus è vivis excessit die v. mensis Januarii anni Christi MDLXXXIII. ætatis suæ L. Post ejus obitum, operâ ac curâ *Clementis Puteani*, ejusdem Societatis Jesu Theologi doctissimi, prodierunt in lucem eruditissima illius Commentaria in quatuor Evangelistas, in quibus, ut testantur periti Critici, nullum in Theologia probatum Græcum, Latinumve authorem prætermisit *Joannes Maldonatus*, quin totum legerit, perlegeritque diligenter ac notarit; quò fit, ut tantâ eruditione, ac tantâ rerum scientiâ ejus Commentaria sint re-ferta. Scripsit etiam Vir ille disertus juxtâ ac do-ctus alia Commentaria in Prophetas *Jeremiam*, *Baruch*, *Ezechielem*, & *Daniclem*, & alia plura perdocta Opera, de quibus legendus est *Philippus Alegambius* in Bibliotheca Scriptorum Societatis Jesu. Denique, *Emmanuel Sa*, natione Lusitanus, inter insignes Societatis Jesu Theologos celebris, Vir fuit eloquentiâ & eruditione conspicuus, qui, Sacrarum Litterarum Interpretis, & Concionatoris Apostolici Romæ summâ cum laude functus officio, scripsit, præter *Aphorismos Casuum Conscientiæ*, *Scholia in quatuor Evangelia*, brevia quidem, sed erudita, & ex selectis sacrorum Doctorum Sententiis excerpta, & *Annotationes in omnem Scripturam Sacram*, Opus concisum quidem & contractum, sed indefesso studio elaboratum atque perfectum. Sunt nonnulli eruditi Critici, qui asserunt, *Emmanuelem Sa* multa ex *Francisco Vatablo* deflorasse, eaque in suas Annotationes in Scripturam Sacram convassasse. Missos facio, brevitatis ergò, alios longè plures Societatis Jesu Scriptores,

Theo.

Theologos, Scripturæ Sacræ Interpretes, Polemicos, Alecticos, Historicos, Grammaticos, quorum Opera, & Elogia iusto & eleganti calamo describuntur in Societatis Jesu Scriptorum Bibliotheca, quæ incepta est à *Petro Ribadeneira* ejusdem Societatis Theologo anno MDCII. continuata deinde à *Philippo Alegambe* ex eadem Societate ad annum MDCXLI. & tandem producta usque ad annum MDCLXXV. à *Nathanaele Sotuelo*, ejusdem Societatis Jesu Presbytero. De industria etiam prætermisi *Ludovicum Molinam*, & *Leonardum Lessium*, Societatis Jesu Theologos, tum quia de illis sub finem Colloquii tertii jam mentionem feci, tum quia etiam consultius etie duxi, paci silentio litare, quam obligata intempestivè retractare vulnera, & obortari, horumce Scriptorum occasione, Dominicanos inter & Patres Societatis Jesu invidiosam repetere litem. Hæc igitur hætenus à me dicta sufficiant in laudem celeberrimæ Societatis Jesu, quam de me optimè meritam officiis meis semper promereri satagam. Ingratus alioqu岸 jure optimo audirem, si Patribus Societatis Jesu, à quibus, dum adolescens essem, in Collegio Avenionensi Grammatices elementa suscepi, & Christianæ Religionis Mysteria, necnon piè vivendi modum edoctus sum, innumeras non perolverem grates, & majores me debere grato ac sincero animo palàm non significarem, cum, teste Philosopho, Parentibus & Magistris pares referre gratias nemo possit. Quòd si verò nunc Scholæ Thomisticæ ex juramento addictus, & puro Sancti *Thomæ* doctrinæ lacte potatus, aliquas Theologorum Societatis Jesu opiniones probare minimè possim,

possim, ob id tamen ingrati animi labem nullus mihi inurere debet, maximè cùm appositè dicat insignis Poëta *Horatius* :

*Diversum sentire duos de rebus eisdem ,
Incolumi licuit semper amicitia .*

Constantèr itaque, quandiù suppetent vires, doctrinam *S. Thomæ*, in cujus verba juravi, pro aris ac focis propugnabo, & ab ea ne latum quidem unguem desciscam; sed charitatem fraternam, quã secundùm Deum nihil priùs & antiquiùs habere debemus, nunquàm, Divinâ opitulante gratiâ, lædam, quia, ut ait *S. Augustinus* cap. 9. libri 3. De Baptismo contra Donatistas: *Hujus fraternæ charitatis inimici, si vè apertè foris sint, si vè intùs esse videantur, Pseudochristiani sunt & Antichristi.*

D. Ultimam tandem attigimus Virorum Sæculi XVI. eruditorum Classẽ, in qua de peritis Jurisconsultis sermonem cùm sis habiturus, eos primùm recensere debes, qui in Gallia, deindè illos qui in Italia, postremò, alios, qui in Hispania, Germania, & in cæteris Nationibus celebre sibi nomen pepererunt.

M. Undecim è Gallia proferam illustres Jurisconsultos, qui perdoctis Operibus nomen suum Sæculo XVI. immortalitati consecrarunt, videlicet *Petrum Rebuffum*, *Raymundum Rufum*, *Andream Tiraquellum*, *Joannem Quintinum*, *Joannem Stephanum Durantium*, *Barnabam Brissonium*, *Bertrandum Argentraum*, *Jacobum Cujacium*, *Nicolaum Boerium*, *Renatum Chioppinum*, & *Petrum Gregorium*,

gorium, quorum eximias dotes & erudititas lucubrationes hic breviter referemus. In primis, *Petrus Rebuffus*, apud Montempessulanum in Occitania, Gallicæ Provincia, natus, in Academiis Tolosana, Pictaviensi, Bituricensi & Parisiensi Jus & praxim Canonica magna cum laude docuit, ac multa Opera in lucem emisit, quorum præcipua ad Beneficia Ecclesiastica pertinent, nimirum *Praxis Beneficiorum*, quæ in tres partes divisa est, *Practica Cancellariæ Apostolicæ*, & *Additiones in Regulas Cancellariæ*, quibus addi debent Commentaria in *Concordata Francisci I. cum Leone X. Tractatus De Pacificis Possessoribus: Tractatus Congruæ Portionis Beneficiorum: Tractatus De Decimis, de Fendis &c.* ac *Tractatus specialis De Jure Nominationum Academicarum*. Mitto ejus Commentaria in *Constitutiones Regias*, & si quæ alia ad jus Civile & Gallicum magis quàm ad Pontificium referuntur. *Raymundus Rufus* Apologiam, seu defensionem adornavit pro Romano Pontifice, Cardinalibus, Episcopis, totoque Ordine sacro, contra *Carolus Molinæum*, Natione Gallum, & non vulgarem Sæculi XVI. Jurisconsultum, quem tamen in multis ab Ecclesiâ improbatum, & ad classem Hæreticorum primæ classis in Indice Romano ablegatum, consultius esse duxi hic omninò prætermittere, eumque ex Illustrium Jurisconsultorum Catalogo expungere, in quo soli Catholici Scriptores locum habere merentur. *Andreas Tiraquellus*, Senior, Fontenaii in Pictonibus natus & in Curia Parisiensi Senator, præter alia Opera, scripsit *Tractatum De Privilegiis Pie Causæ*. Eodem Sæculo XVI. *Joannes Quintinus*, Heduus, five Augustodunensis in Galliis, &
ex

ex Ordine Hospitalario S. *Joannis Hyerosolymitani* Religiosus Presbyter, inter Jurisperitos claruit Parisiis, ubi Ordinarius juris Professor fuit. Complura edidit Opera. Synodum Gangrensem Græcè & Latine publicavit, necnon octoginta quinque Canones Apostolorum, cum vetustis Joannis Monachi Zonaræ Scholiis latine versis. Librum quoque Tertulliani *De Præscriptionibus Hæreticorum*, eruditis Scholiis & Commentariis illustravit. Eadem ætate vixit *Joannes Stephanus Durantius*, Tolosæ in Galliis natus, & postea ejusdem Civitatis Senatus Præses, quam dignitatem summâ integritate & æquitate, cum perfecta utriusque juris notitia conjunctis, præclare gessit ab anno MDLXVIII. usque ad annum MDLXXIX. quo, obortâ Tolosæ immani seditione, *Durantius*, dum, pro ratione Officii, jus nomenque Regium tueri conatur, crudeliter sævientium manibus peremptus est. Edidit tres Libros *De Ritibus Ecclesiæ Catholicæ*: quod quidem Opus, firmandis Orthodoxorum partibus utilissimum, *Sixto V.* Summo Pontifici adeò acceptum fuit, ut illud Romæ excudi jussit, & ejus authorem singulari benevolentia sit prosecutus. Fontenaii in Pictonibus natus *Barnabas Brissonnus*, jussu *Henrici III.* Galliarum Regis Codicem Gallici juris composuit, Eruditum etiam Opus *De Verborum*, quæ ad jus pertinent, *significatione*, conscripsit. In Parlamento Britannicæ *Bertrandus Argentæus* Senator, præter suæ Gentis Historiam, Annotationes edidit in jus Aremoricorum Municipale. At peritos jam laudatos Gallicæ Jurisperitos eruditione superavit *Jacobus Cujacius*, Tolosæ in Galliis humili genere natus, qui non Parentum,

nec

nec Magistratum ope, sed ingenii propriis viribus & improbo labore, ad summam omnis litteraturæ peritiam pervenit, ac præclarum evasit jurisprudentiæ lumen. In Academiis Cadurcensi, Bituricensi, Valentina, Taurinensi, & Parisiensi, incredibili Auditorum concursu & applausu jurisprudentiam docuit per annos fermè quadraginta, indefesso labore continuas sex septemve horas singulis lectionibus meditandis ac digerendis impendere solitus. Ad Bononiensem Academiam, *Gregorius XIII.* Pontifex Maximus, *Cujacium*, paucis ante obitum annis, per litteras invitavit amplissimis conditionibus, sed ob ingravescentis ætatis incommoda perhonorificum illud sibi oblatum munus *Cujacius* obire minimè potuit. Nota sunt ejus Opera, quorum duo Volumina ab ipso Authore edita sunt; reliqua verò, collatis Auditorum Scriptis, quæ ex ore dicentis exceperant, ad Tomos octo excreverunt, & in his extant *Recitationes ad Secundum, Tertium, Quartum Decretalium*, ad quas interpretandas, non nisi provectâ jam ætate accessit, viam monstrans sequentibus, quâ studium Canonum tractare, atque excolere oporteret. Vitam *Jacobi Cujacii* scripsit *Papirius Massonus*, & in ea testatur, nullum Sæculo XVI. sive in Gallia, sive in Germania, aut Italia, alijsq; Regnis & Provinciis juris Interpretem fuisse, qui non deberi plurimum *Cujacio* putaverit ad exponendi juris Romani solertiam. Addit etiam, *Cujacium* scripsisse atque edidisse plurima, quæ & stylo & gravitate rerum, *Africanum, & Papinianum* redolent. De *Nicolao Boerio*, erudito Galliarum Jurisconsulto, breviter dicam, cum Senatus Bur-

diga-

digalensis Præfidentem, fuisse, ejusque Opera apud Jurisprudentiæ peritos in maximo pretio esse. *Renatus Choppinus*, patriâ Andegavus, inter Parisienses Advocatos doctrinâ & judicio excelluit. Præter Libros de *Dominio Franciæ*, aliosque, quibus Jus Gallicum exposuit, duos De *jure Sacro Tractatus* edidit, nimirum *De Sacra Politia Forensi* Libros tres, *Henrico III.* dicatos, & *Monasticum*, seu De jure Cænobitarum, Libros duos. Postremò, *Petrus Gregorius*, Tolosæ natus, ac vulgò à patria dictus *Tolosanus*, publicè Jura interpretatus est in Academiis Tolosana & Cadurcensi. Deinde, in Lotharingicam Mussipontanam Universitatem, à *Carolo*, Lotharingiæ Duce, recens institutam, accitus est, atque in ea utrumque Jus magna cum laude professus. Circumferuntur duobus voluminibus comprehensa ejus Opera, ad Jus Pontificium spectantia, quæ à peritis Jurisconsultis maxime commendantur. Hi sunt celebriores Jurisconsulti, qui Sæculo XVI. in Gallia floruerunt.

D. Habuitne Italia Sæculo XVI. perindè claros Jurisconsultos, ac Jurisprudentiæ peritos?

M. Habuit Italia Sæculo XVI. celeberrimos Jurisconsultos, ex quibus novem dumtaxat, qui præ cæteris aliis in Jurisprudentiæ peritia excellerunt, impræsentiarum laudabo, videlicet *Hugonem Boncompagnum*, *Laurentium Campegius*, *Petrum Paulum Parisium*, *Andream Alciatum*, *Augustinum Berozum*, *Joannem Paulum Lancelottum*, *Guidonem Pancirolum*, *Joannem Franciscum Sannazarium*, & *Prosperum Sanctacrucium*, à quibus nos hic breviter expedire necesse est. *Hugo Boncompagnus*, patriâ Bononiensis, Juris utriusque Doctor,

ac Professor, & postea Summus Pontifex, dictus *Gregorius XIII.* principem inter peritos Italiae Saeculi XVI. Jurisconsultos locum jure optimo obtinere debet, ejusque studiis, curis, auspiciis & auctoritati emendationem *Gratiani*, totiusque Canonici Juris acceptam referre Ecclesia & Respublica Litteraria gloriantur. *Laurentius Campegius*, patriam itidem Bononienſis, ac deinde S. R. E. Cardinalis, Jus Cæsareum Patavii unâ cum patre suo *Joanne Campegio* cum plausu maximo, & secundâ omnium admurmuratione professus est. Parem in Jurisprudentiæ studio, ac professione laudem consecutus est *Petrus Paulus Parisius*, natione Calaber, patriam Consentinus, qui, postquam Patavii, ac Bononiæ Jus Pontificium docuisset, Romam se contulit, ibique Auditoris Camerae Apostolicæ functus est officio; Dein, Mediolani Senator à *Carolo V.* Imp. dictus, & Senis Præfectus, tum patriæ suæ Episcopus, ac tandem à *Paulo III.* Pontifice Maximo, Cardinalitiâ dignitate decoratus est. Præter Commentarium in Decretales Romanorum Pontificum Epistolas, edidit *Consiliorum de re Beneficiaria* Volumina IV. & alia Canonica Opera. *Andreas Alciatus*, patriam Mediolanensis, Jurisprudentiam, barbaro dicendi genere antea conspurcatam, humaniorum Litterarum, cum Græcarum, tum Latinarum lumine illustrare, atque ad veros fontes revocatam, pristino nitore restituere cœpit, habitus inter Juris Interpretes doctissimus, & inter doctissimos Juris Consultissimus. Jus Civile docuit primùm Avarici Biturigum in Galliis, deinde Ticini in Insubria, atque Commentaria scripsit in aliquot Juris Canonici Rubricas & Capitula.

pitula. Optandum sanè esset, ut Jurisconsulti, & hi, qui Romæ, vel in aliis præsertim Italiæ locis, Causarum Patroni sunt à Republica constituti, hunc purum *Andree Alciati* latinè scribendi modum imitarentur, suasque in Foro Scriptiones modestâ quadam ac temperatâ verborum elegantia exornarent, quas tamen, ut plurimum barbaro, inquinato, ac planè culinario scribendi genere fœdatas prodire in lucem ægrè semper tulerunt, & etiamnum jure optimo queruntur Viri eruditi, quibus patriæ & bonarum litterarum honos cura ac cordi est. Sed redeamus ad Illustres Italiæ Sæculi XVI. Jurisconsultos. *Augustinus Berojus*, Bononiæ Juris Canonici Professor, emisit in lucem, *Consilia*, & *Commentarios in Decretales*. Ad Juris Canonici studium ut juvenibus viam faciliorem sterneret *Joannes Paulus Lancelottus*, patriâ Perusinus, *Institutiones Juris Canonici*, Imperatoris *Justiniani* exemplo, conscripsit, easque hortatu *Pauli IV.* susceptas, *Pii IV.* auspiciis, paulò ante Tridentini Concilii exitum, in vulgus emisit. Scripsit etiam idem *Lancelottus* de comparatione utriusque Juris, Pontificii ac Cæsarei, & de utriusque interpretandi ratione; addidit quoque Indices Corpori juris Canonici. *Guido Pancirolus*, natione Italus, patriâ Rhegiensis, fuit doctissimus & elegantissimus Jurisconsultus, nec solum in jure Civili, sed etiam in omnibus bonis litteris, quas humaniores vocamus, & in Romanis Antiquitatibus optimè versatus. Plures composuit Libros, inter quos præcipui sunt: *Commentarius in Notitiam Dignitatum utriusque Imperii Orientalis & Occidentalis*: *Thesaurus variarum Lectionum in tres*

*libros digestus: Responſionum & Allegationum in jure Tomus unicus: De Origine & Auctoritate Jurisconsultorum, & de claris Legum Interpretibus libri quatuor, & aliz perdoctæ lucubrationes, quæ cum penitioris omnis Antiquitatis peritissimum, fuisse apertè demonstrant. Joannes Franciscus Sannazarus, patriâ Papiensis, Senator Mediolanensis, Jus Civile, & Pontificium magnâ nominis celebritate docuit in Academiis Papiensi, seu Tici-nensi, & Avenionensi, pluraque in Jus Civile & Pontificium Scripta reliquit, quibus non pauca Responſa adjecit. Edidit quoque librum *De peste*, sicut testatur *Pancirolus*, mox à me laudatus libro 2. *De claris Legum Interpretibus* cap. 157. pag. 334. Denique *Prosper Sanctacrucius*, patriâ Romanus, & S. R. E. Cardinalis, edidit *Decisiones Rote*, cujus duodecim Vir fuerat, & obiit sub finem Sæculi XVI. Plura de peritis Italiæ Jurisconsultis si scire desideres, legelis *Pancirolium* in libris *De claris Legum Interpretibus*, quos si hîc persequi vellem, nimis longum eſſet, & à brevitate, quam nobis præscriptimus, omninò alienum.*

D. Percurramus, si placet, alios Jurisconsultos, qui in Hispania, Germania, & in cæteris nationibus, utriusque Juris peritiâ Sæculo XVI. insignes fuerunt, eorumque deductâ serie, finem Colloquio nostro, ne longius excurrat, tandem imponamus.

M. Hispaniani septem potissimum Jurisconsulti doctissimi Sæculo XVI. illustrarunt, nimirum *Ludovicus Gomeſius*, *Didacus Covaruvias*, *Antonius Covaruvias*, *Antonius Augustinus*, *Joannes Bernardus Dias*, *Franciscus Vargas*, & *Garcias Loaysa*. Horum

rum primus, seu *Ludovicus Gomeſius*, Oriolâ, Regni Valentia Civitate, oriundus, in Academia Patavina Jus profeſſus eſt. Deindè Romam profeſtus, Rotæ Auditor, ac deinùm Episcopuſ, Sarnenſis creatus fuit, & in *Sextum Decretaliuſ*, atque in *Regulas Cancellariæ Commentariuſ* adornavit. Alter, seu *Didacuſ Covaruvias* Toleti natus, in Salmanticensi Academia Jus Pontificiuſ interpretatuſ eſt, poſtea, à *Philippo II.* Hiſpaniaruſ Rege ad Conciliuſ Tridentinuſ miſſuſ, indèque reverſuſ, Rodericiæ primuſ Civitatuſ, deindè Segobienſiſ, deinùm Conchenſiſ Episcopuſ fuit deſignatuſ. Multa ſcripſit Opera, quæ duuſ in Tomoſ diviſa, ad Jus Pontificiuſ maxima ex parte referuntur, quæque, ob congruam methoduſ, ſtyluſ puruſ atque perſpicuſ, necnon ſingulareſ eruditioneſ, quâ ſunt reſperſa, in magno pretio à Viriſ erudiſiſ habentur. Hic *Didacuſ Covaruvias* fratrem germanuſ habuit *Antonjuſ Covaruviam*, Toleti pariter natuſ, & à *Philippo II.* Catholico Rege miſſuſ ad Conciliuſ Tridentinuſ, ubi ex inſigni utriuſque Juris peritiâ magnam ſibi laudem peperit, ſcripſitque libruſ *De jure Luſitanici Regni*, eidem *Philippo II.* Hiſpaniaruſ Regi dicatuſ. *Antoniuſ Auguſtinuſ*, Cæſarauguſtæ, è nobili atque excellentioruſ Viroruſ fecundâ familiâ ortuſ, abſoluto juridiſi ſtudiuſ curriculo, Romam venit, ibique à *Paulo III.* Sacri Palatii Apoſtolici Auditor factuſ eſt. Paulò poſt, à *Julio III.* Pontifice Maximo, in Angliam miſſuſ fuit ad *Philippuſ II.* qui *Mariam*, Angliæ Reginam, uxoreſ duxerat, ſed *Mariæ* Regiuſ morte mutatiſ rebuſ, & dominante in Anglia Hæreſi, Romam reverſuſ

est *Antonius Augustinus*, & Allifanus Episcopus dictus à *Paulo IV.* mox ad Episcopatum Ilerdensensem à *Pio IV.* translatus, ad Synodum Tridentinam accessit, ubi id imprimis egit, ut soluta Disciplina ad pristinum decus revocaretur. Indè in Hispaniam reversus, Ilerdensensem Ecclesiam annis tredecim cum eximia pietate, & præsertim effusissimâ in pauperes liberalitate rexit. Tandem ad Archiepiscopatum Tarraconensem à *Gregorio XIII.* Pontifice Maximo provectus, obiit septuagenario major, anno MDLXXXVI. Præter multa Opera, quibus humaniora studia, & jus Civile illustravit *Antonius Augustinus*, eximiis etiam lucubrationibus Jus Canonicum & res sacras exornavit. Extant ejus generis *Antiquæ quatuor Collectiones Decretalium*, & *Canones Pœnitentiales*, utrumque Opus cum eruditis ipsius Notis: *De Emendatione Gratiani* libri duo, quos, occasione adornatæ mandato *Gregorii XIII.* novæ *Decreti Gratiani* Editionis, lucubravit. Edidit etiam *Constitutiones Provinciales Tarraconenses* & *Epitomen juris Pontificii*. Plura de hoc cèleberrimo Jurisconsulto legis in Oratione Funebri, quâ ipsum mortuum laudavit *Andreas Scottus* Societatis Jesu, quæque ad calcem librorum *Antonii Augustini De Emendatione Gratiani*, Baluzianæ Editionis, inserta est. *Ioannes Bernardus Dias*, Calaguritanus Episcopus, & *Carolo V.* Imperatori à Consiliis, scripsit *Prædicam Criminalem Canonicam*, & *Regulas juris cum ampliacionibus & restrictionibus*. Regnante in Hispania *Philippo II.* floruit *Franciscus Vargas*, peritus Jurisconsultus, qui ab eodem Rege ad *Pium IV.* Pontificem Maximum Legatus missus est, & librum *De*
Episcopis

Episcoporum jurisdictione, & Romani Pontificis Auctoritate Romæ publici juris fecit anno MDLVI. Denique, Garcias Loaysa, Complutensis Academix Doctor, Toletanus Canonicus, & Archidiaconus, ac postea Archiepiscopus Toletanus, Concilia Hispaniæ unum in Corpus collegit, Notisque doctissimis illustrata luce publicâ donavit. His clarissimis Hispaniæ sæculi XVI. Jurisconsultis merito addendus est Martinus de Azpicuelta, Canonicus Regularis Ordinis S. Augustini, vulgò dictus Doctor Navarrus, eò quòd in Regno Navarræ in lucem editus esset, quem tamen consultò hic prætermitto, quia illum in undecima Virorum sæculi XVI. eruditorum Classe inter eximios Scriptores Canonicos Regulares Ordinis S. Augustini jam recensui, nec plura de illo hìc adjicere animus est, ne ventosâ loquacitate, tibi fastidium, ingeram, cujus patientiâ me nimium adhuc indigere sentio. Non possum attamen, antequàm finem Colloquio nostro imponam, quin, paucis saltem verbis, indicem quosdam alios celebriores Jurisconsultos, qui Sæculo XVI. in Germania & in aliis nationibus de Jure tam Canonico, quàm Civili optimè meriti sunt. Sebastianus Brant, Argentorati in Germania natus, multa scripsit tum metro, tum prosâ, sed præsertim Breves utriusque Juris Titulorum Expositiones. Alter Jurisconsultus Germanus Daniel Venatorius scripsit totius juris Canonici methodicam dilucidationem, quinque libris distinctam, sub Titulis Decretalium antiquarum, quam Danieli Archiepiscopo Electori Moguntino, ac Prælati & Canonicis Capitularibus ejusdem Ecclesiæ nuncupavit anno MDLXXIX.

Boetius Epo, *Frisius*, *Lutetia*, *Lovanii*, & *Duaci*, *Jurisprudentiam* summâ cum laude docuit, & scripsit *Ecclesiasticarum Antiquitatum Sintagma*: *Heroicas & Ecclesiasticas Quaestiones*, aliaque Opera. In *Westphalia* *Romani Græcique Juris* consultissimus, & rerum *Turcicarum* apprimè peritus fuit *Joannes Leunclavius*, cujus eruditio ex *Scriptoribus*, quos transtulit, facile æstimari potest. Latine quippè vertit *Scriptores Græcos Xenophontem*, *Nazianzenum*, *Constantinum Manassem*, *Michaelem Glycam*, & alios. *Synopsin* quoque 60. librorum *Βασιλικῶν*, idest, universi *Juris Romani*, cum *Annotationibus* evulgavit. *Annales* etiam *Sultanorum Othomanidarum* ex lingua *Turcica* latine reddidit, & *Historiam Musulmannicam*, è monumentis ipsorum *Turcarum* excerptam, concinnavit. Denique, ut cæteros mittam celebres *Sæculi XVI. Jurisconsultos*, *Franciscus Balduinus*, natione *Belga*, patriâ *Atrebatensis*, *Jurisconsultorum* hujus *Sæculi* fuit facile *Princeps*. *Avarici Biturigum*, *Lutetiæ Parisiorum*, & in pluribus *Germaniæ Academiis Jurisprudentiam* incredibili cum omnium applausu professus est. Multa extant ab ipso conscripta Volumina, in quibus maximè operam dedit, ut *Jurisprudentiam* cum *Historia* & humanioribus litteris conjungeret, exemploque probavit, quod in ore frequenter habebat: *Historiam cum Jurisprudentia conjungi oportere*. Hæc præsertim *Francisci Baldوينi* Opera in maximo pretio habentur apud *Viros eruditos*: *Leges & Edicta Veterum Imperatorum*, *De Christianis*: *Historia Carthaginensis Collationis*: *Delibatio Africana Historiæ Ecclesiasticæ*, sive *Optati*

ti Milevitani de Schismate Donatistarum libri septem : *Victoris Uticensis de Wandalica persecutione libri tres*, cum Prolegomenis & Annotationibus ejusdem Balduini : *Prolegomena in Minutii Felicis Octavium* : & Liber, quem de Catholica Religione adversus Hæreticos *Joannem Calvinum*, & *Theodorum Bezam* edidit. Hæc, inquam, Opera, in quibus *Franciscus Balduinus* palam fecit, quantum in Jurisprudencia, in sacra Antiquitate, & Historia Ecclesiastica versatus esset, omnium Virorum eruditorum judicio maximè probantur. Obiit *Franciscus Balduinus* Lutetiæ nono Kal. Novemb. anni MDLXXIII. ætatis LIII. Sed de illustribus Sæc. XVI. Viris, eorumque Operibus, hæc pro tuo & aliorum tyronum captu dicta sufficiant. Neque enim doctis scribere, nec difficili arduarum Quæstionum, quæ à Viris eruditis, & Critices Disciplinæ peritis ventilantur, examine, gloriam in nostris Colloquiis aucupari animus est, sed tuo dumtaxat, & aliorum juniorum profectui consulere, atque nondum gnaris sacrorum studiorum, & Ecclesiasticæ Historiæ viam aperire, aut lævigare decrevi; eos imitari contentus, qui ut Viatoribus, quibus per vasta sylvarum agendum iter est, locorum opacum horrorem, excisis densiorum arborum ramis, in apertam vertunt lucem, vel sublati senticetis ac complanatis salebris, pervia ex inviis faciunt, atque ad trivium addunt quædam signa, seu indicia, quæ Viatoribus, quò quisque trames ducat, quasi digito præmonstrant. Sic ipse in nostris Colloquiis, ut tibi, aliisque junioribus viam ad amplissimum Historiæ Ecclesiasticæ studium faciliorem sternere possim, breviter quidem, sed dilucidè,

dè, distinctè, ac ordinatè disponere atque digere-
re studeo omnia, quorum cognitio ad assequen-
dam Historiæ Ecclesiasticæ notitiam necessaria
esse possunt. Hunc finem, quem mihi ab initio
præstitui, si semel consecutus fuero, abundè mihi
satisfactum erit.

D. Perplacet mihi hæc, quam hætenùs ob-
servasti in describenda & illustranda Historiâ Ec-
clesiasticâ, facilis & expedita Methodus, per quam
præcipua Historiæ Ecclesiasticæ Monumenta, quæ
magno & cæco, ut ita dicam, labore in volutan-
dis immensis penè Voluminibus sæpenumero fru-
strâ quærantur, nec nisi per diuturni temporis ja-
cturam sigillatim percipi solent, ea ex sexcentis
diversi generis Authoribus tedulò conquisita, col-
lecta, & ordine digesta, tam solidâ brevitate cum
claritate conjunctâ in nostris Colloquiis refers, &
ob oculos ponis, ut paucos intra menses facili ne-
gotio perdisci & in promptu haberi possint. Certè
hanc methodum studiosæ juventuti utilissimam
esse, ego experiens quotidie probò. Sed præsentì
Colloquio nostro finem imponamus, & aliud
proximum, in quo de Doctrina Fidei, de Disci-
plinâ tam Ecclesiasticâ, quàm Monasticâ, necnon
de Morali doctrinâ Sæculi XVI. dicturi sumus, ad
sequentem, si placet, hebdomadam, propter ca-
lores æstivos, procrastinemus, quò vires nostras
brevis interposito otio, reficiamus.

COLLOQUIUM SEXTUM,

*De Doctrina Fidei , de Disciplinà tam
Ecclesiasticà , quàm Monasticà , nec-
non de Ethices Christianæ Doctrinà
Sæculi decimi sexti.*

MAGI-
STER.

DOctrinam Ecclesiæ Catholicæ Sæculo XVI. multis in Fidei Capitibus ab Hæreticis Lutheranis, Calvinistis, aliisque exitiosis Religionis pestibus impetitam fuisse jam ostendimus in Colloquio tertio, remque profectò immensi laboris in præsentia aggrederer, si ejusdem doctrinæ Ecclesiæ Catholicæ adversus enatas eo Sæculo hæreses defensionem suscipere vellem, cum, teste Doctissimo Bellarmino libro 4. De Ecclesia cap. 9. Protestantium, seu Hæreticorum Sæculi XVI. pestifera Doctrina conspiraret cum viginti antiquis hæresibus, quas jam sepultas & omninò extinctas sacrilegâ temeritate ex orco revocarunt. Missâ itaque hac Controversiarum multitudine, quæ singulari conscribendo Operi planè sufficeret, Author tibi sum, ut eadem arma in recentiorum Sectarum errores intorqueas, quibus in nostris superiorum Sæculorum Colloquiis antiquas Hæreses debellavimus ac profligavimus.

D. Probè quidem intèllego, non expedire, ut hîc Polemicorum more Controversias adversùs singu-

singulos Hæreticorum Sæculi XVI. errores instituas, id enim non patitur Colloquiorum nostrorum brevitās; nihilofeciùs ad confirmandam Catholicam doctrinam, quam à Christo & ab Apostolis profectam, atque inviolabili temporum serie ad nos usque perductam, constanter adhuc retinet Ecclesia Romana: maximam à me inibis gratiam, si perspicua & peremptoria velis adducere argumenta, quibus generatim evincas, Authores Hæresum Sæculi XVI. fuisse impostores, eorum Sectas esse Satanæ Synagogas, ac solam Ecclesiam Romanam esse veram Sponsam Christi, quæ sicut lilium inter spinas refulget, & extra quam nemini ad salutem æternam aditus patere potest.

M. Authores Hæresum Sæculi XVI. fuisse, impostores, multis; jisque evidentibus argumentis demonstrari potest, quorum primum petitur ex eorum doctrinâ, quæ, tota quanta est, ex antiquis conflatur Hæresibus, quæ antiquitus ab Ecclesia Catholica fuerunt proscriptæ. Pauca ad hujusce veritatis confirmationem percurram pestiferæ ipsorum doctrinæ capita (plura enim referre non permittit Colloquiorum nostrorum brevitās) ut ex his discas, quàm execranda & abominanda sit eorum doctrina ex tam sæculentis lacunis & gurgitibus hausta. In primis, antiqua Heresis est, ab Ecclesia Catholicâ damnata, quod Deus sit auctor peccati. Hanc tamen Hæresim renovarunt Sectarii Sæculi XVI. *Lutherus* quippè in Assertionibus, Articulo xxxvi. ait: *Mala opera Deus in impiis operatur.* Clariùs *Philippus Melancthon* in cap. 8. Epistolæ ad Romanos: *Non est*, inquit, *cui frigidum glossema recipiamus, Deum mala per-*
mit-

mittere, non etiam facere. Clarissimè Calvinus lib. 1. Institutionum cap. xviii. Dicitur, ait, idem satan excæcare infidelium mentes: Sed undè hoc, nisi quòd à Deo ipso manat efficacia erroris, ut mendaciis credant. Sic per summam impietatem Sectarii Sæculi XVI. immitem, crudelem, Busiride & Mezentio nequiores Deum faciunt, scelerisque authorem, qui immani quâdam vires suas ostentandi libidine infortunatos homines æternis pœnis ultrò devoveat: quasi talium sit Deo animus deliciarum egens, aut pars sit illius felicitatis infelices facere, eosque sempiternis suppliciis cruciare. Antiqua Hæresis est, olim in Manichæis ab Ecclesia Catholica jure merito proscripta, quòd nullum sit, ac planè extinctum liberum hominis arbitrium. Hanc tamen, jam pridem consepultam Hæresim postliminiò revocarunt Sectarii Sæculi XVI. Lutherus siquidem loco mox à me laudato disertè docet, liberum arbitrium esse figmentum in rebus, esse titulum sine re, & omnia ex necessitate absoluta evenire. Item ait: Non est dubium, Satana Magistro, in Ecclesiam venisse hoc nomen liberum arbitrium. Hinc scelestus ille Hæresiarcha librum edidit, cui titulum indidit: De Servo Arbitrio. Idem post Lutherum affirmant Melanctonus loco jam citato, & Calvinus libro 2. Institutionum cap. 3. parag. 5. ubi hæc habet: Quod libertate abdicatam voluntatem, dico necessitate in malum trahi vel duci, mirum est, si cui videatur aspera locutio. Antiqua Hæresis est damnata ab Ecclesia Romana, quòd sola Fides in Christum mediatorem absque bonis operibus ad justificationem & salutem sufficiat, Hanc Hæresim profitentur Sectarii Sæculi XVI. Calvinus, Lu-
the-

therus, & alii, asserentes, hanc Fidem justifican-
tem nullo, quantumvis gravissimo, peccato amit-
ti posse, excepto solo apostasiæ à Fide peccato,
per quod tantum hanc Fidem justificantem deper-
di contendunt. Ex quo capitali horumce Hæreti-
corum errore sequitur planè, ut sæpius observa-
vimus, totius Moralis Christianæ exterminium.
Damnarunt Patres Concilii Nicæni impiam Hære-
sim *Arii* negantis, Christum esse Deum & con-
substantialiam æterno Patri. Hanc post hominum
memoriam teterrimam Hæresim Sæculo XVI. de-
nuò suscitaverunt sacrilegi Sæctarii *Lælius*, & *Fau-
stus Socini*. Verbo dicam, Antiqui Hæretici docue-
runt, præcepta Dei esse impossibilia, Ecclesiam
non esse vitibilem, nec indefectibilem, Episcopos
non esse simplicibus Presbyteris superiores, San-
ctos non esse invocandos, nullumque eorum Re-
liquiis & Imaginibus cultum deferendum; nega-
runt realem Corporis & Sanguinis Christi in Eu-
charistia præsentiam, Primatum Romani Pontifi-
cis, necessitatem Baptismi ad salutem, preces pro
defunctis fundendi consuetudinem, & implendi
vota obligationem, aliosque ejusmodi errores pro-
fuderunt, quos omnes Sæctarii Sæculi XVI. reco-
xerunt, instaurarunt, eisque complures non
minùs infestos addiderunt. Undè facilè colligere
potes, Sæctarios Sæculi XVI. impostores fuisse,
cùm eorum doctrina nihil aliud sit, quàm sentina
& colluvies anteriorum Hæresum, atque à vera &
antiquâ Sæctorum Patrum & Conciliorum doctri-
nâ omninò abhorreat. Adeò verum est, quod *Vin-
centius Lirinensis* cap. 43. *Commonitorii adversus
Hæreses* scribit, solenne esse Hæreticis, ut semper
pro-

profanis molitionibus gaudeant, *Antiquitatis scita fastidiant, & per oppositiones falsi nominis scientia, à Fide naufragent. Contra verò Catholicorum hoc proprium, deposita Sanctorum Patrum, & commissæ servare, damnare profanas novitates, & sicut dixit Apostolus: si quis annuntiaverit, præterquàm quod acceptum est, anathema sit.*

Sed quò clariùs tibi constet, Sectarios Sæculi XVI. fuisse impoltores, animum tantispèr adverte ad insolentem & inulitatum planè modum, quo virulentam suam doctrinam, absque ulla prorsùs acceptâ missione, disseminarunt, suasque Sectas propagarunt. Nec enim prætexere poterant illi Sectarii, se ab Ecclesia Romana missos, ordinatos, ac vocatos fuisse ad regimen animarum; id, inquam, prætexere non poterant Sæculi XVI. Sectarii, tum quia *Lutherus* non erat Episcopus, nec ullius Ecclesiæ Pastor; *Calvinus* verò jactitat, manus suas non fuisse pollutas fætido oleo, quo manus Sacerdotum in Ecclesia Romana inungi solent: Tum quia si Ecclesia Romana Sectarios Sæculi XVI. misisset, ordinasset, & ad regimen animarum vocasset, ergò tum temporis vera erat & Apostolica Ecclesia, ergò illi Sectarii fuerunt rei manifesti schismatis, utpotè qui à vera & Apostolica Ecclesia se separaverint: tum quia denique *Lutherus*, & *Calvinus* pertendunt, Ecclesiam Romanam totalitèr Sæculo XVI. à Christo defecisse, ac subindè omni jurisdictione & autoritate mittendi & ordinandi Pastores caruisse. Non igitur Sæculi XVI. Sectarii suam ab Ecclesia Romana missionem acceperunt. Undè ergò missionem suam habuerunt? Dicent, sat scio, hujus temporis hæretici, primos illos

illos Sectarum conditores à Deo extraordinariè missos ac suscitatos esse, ut labenti Ecclesiæ succurrerent, & somnolentos Pastores, quemadmodum olim anseres, Gallis in Capitolium irruētibus, sopitos custodes, clamoribus excitarent. At extraordinariam illam missionem, quam obtendunt hæretici nostri temporis, omninò commentitiam esse luculentis argumentis facilè demonstrari potest. Primò, quia Prophetæ, & aliqui Sancti, quos Deus ad suum reparandum cultum extraordinariè in veteri lege aliquandò suscitavit, Religionem judaicam non immutarunt, Sacerdotum Successionem non præsciderunt, Pastores novi ordinis non præfecerunt, sed in vitia dumtaxat exarsit eorum zelus, peccantes increpuerunt, verbo Dei terruerunt. At *Lutherus*, *Calvinus*, alique pseudo-reformatores Ecclesiæ, Pastorum successionem ab Apostolis ad suum usq; schisma decurrentem interruperunt, novam & à Sæculis inauditam Sacerdotum originem propriâ auctoritate instituerunt, Altaria manu armatâ & instructo exercitu suffoderunt, templa succenderunt, quæ in eis erant sacratiora, proculcarunt, omnibus Sacerdotibus bellum indixerunt, quos potuere, crudeliter enecarunt, & qui effugere manus eorum, in illos anathema pronuntiarunt. Quò fit, ut meritò ab illis, si superis placet, Ecclesiæ Reformatoribus possimus cum *Tertulliano* lib. de Præscript. cap. 37. percontari: *Qui eslis, quando & undè venistis?* vel illos his verbis *S. Augustini* contra partem *Donati* provocare: *Numerate Sacerdotes vel ab ipsa Petri Sede, & in Ordine illo Patrum quis cui successit, videte. Ipsa est petra, quam non vincunt superbæ Infero-*

ferorum portæ. Secundò, hi, quos Deus identidè ad corrigendos pravos mores, & tollendos abusus suscitavit, suam extraordinariam missionem probarunt vitæ sanctimoniâ, & evidentiâ miraculorum, quæ eis populorum fidem conciliabant. At *Lutherus*, *Calvinus*, alique huius fursuris Sectarum Sæculi XVI. Antesignani, fuerunt homines audaces, sibi placentes, ventri & libidini dediti, in conviviis suis luxuriantes, pœnitentiæ osores, Monastici Instituti desertores; petulantes, & insolentissimæ superbiæ supra omnes mortales sese extollentes, ut videre est in eorum Scriptis, quæ dæmoniis sunt plena, & atrocissimis scatent convitiis, quibus homines etiam spectatissimos, & in dignitate constitutos continuò onerant, dominationem spernunt, & Maiestatem Divinam blasphemant. Qui autem credibile est, huiusmodi homines superbos, impudicos, contumeliosos & blasphemos ad reformandam Ecclesiam à Deo extraordinariè fuisse missos? Nec magis suam extraordinariam missionem evidentiâ miraculorum, probarunt isti novarum Sectarum Coriphæi, cùm certum sit, eos nullum unquàm ad fidem doctrinæ suæ adstruendam miraculum patrasse, sicut testatur ipsemet *Desiderius Erasmus* in sua contra *Lutherum De Libero Arbitrio Collatione*, quæ extat ad calcem Tomi IX. ejus Operum Editionis postremæ Lugduni Batavorum, ubi hæc habet singulari observatione digna: Non credebatur Apostolis, nisi miracula fidem adstruxissent doctrinæ: nunc quilibet sibi postulat credi, quod affirmet se habere Spiritum Evangelicum. Apostoli, quoniam excutiebant viperas, sanabant agrotos, excitabant mortuos, impositâ ma-

nu dabant donum Linguarum : ita demum creditum est , & vix creditum est illis paradoxa docentibus . Nunc cum juxta communem opinionem adferant penè *παράδοξα* , nullus illorum adhuc extitit , qui vel equum claudum sanare potuerit . Aque utinam quidam absque miraculis præstarent sinceritatem ac simplicitatem morum Apostolicorum , qui nobis tardiusculis essent miraculorum vice . Nobis veterum orthodoxorum interpretationem adferentibus , statim occidunt , homines erant . Rogantibus , quonam argumento sciri possit , quæ sit vera interpretatio Scripturæ Sacræ , cum utrinque sint homines ? respondent , indicio Spiritus . Si roges , cur illis (seu veteribus Orthodoxis Scripturæ Sacræ Interpretibus) quorum aliquot etiam miraculis editis inclaruere mundo , defuerit spiritus potius quam ipsis ? sic respondent , quasi mille trecentis annis nullum fuerit Evangelium in mundo . Si requiras ab illis Vitam Spiritu dignam ? respondent , se Fide justos esse , non operibus . Si requiras miracula ? dicunt , jam olim cessasse , nec opus esse jam in tanta luce Scripturarum &c. Fictitia itaque est hæc extraordinaria missio , quam hæretici nostri temporis primis suarum Sectarum Conditoribus asserere ac vindicare frustra moliuntur , quod tamen cum nemini hætenus persuadere potuerint , eò tandem devenerunt , ut dicant , primos suarum Sectarum Architectos suam missionem & Pastoralem auctoritatem à Principibus & Magistratibus accepisse . Quæ in re deploratæ suæ Causæ manifestum produnt argumentum . Nullibi quippè legitur in Scriptura Sacra , quam tamen Hæretici unicam Fidei nostræ regulam esse clamitant , nullibi , inquam , in Scriptura Sacra legitur , jus ordinandi & mit-

& mittendi Pastores, eosque populo præficiendi competere ullo modo Principibus Laïcis aut Magistratibus, sed potiùs Scriptura Sacra ejusmodi Ordinationes à Laïcis factas omninò reprobant. Christus Dominus, ut ait Apostolus *Paulus* Epistolæ ad Hebræos cap. v. *non seipsum clarificavit ut Pontifex fieret, sed qui locutus est ad eum: Filius meus es tu.* Idem Apostolus *Titum* Episcopum Cretæ reliquit, ut Presbyteros per Civitates constitueret, & *Timotheum* à se Episcopum ordinatum misit Ephesum, præscribens ritum & formam consecrandi Episcopos, adeò ut nullus in illis partibus potuerit esse Episcopus aut Presbyter, nisi acceptâ à *Tito*, vel *Timotheo* manuû impositione. Hunc morem ordinandi Episcopos & Sacerdotes constantè tenuit hætenùs Ecclesia, & quamvis aliquandò Episcopi, vel alii Ecclesiæ Ministri à plebe fuerint postulati, sive etiam electi, nunquàm tamen à plebe Ordinati & missi fuerunt, sed dumtaxat ab illis, qui, mediante successione, Ordinationem & Missionem ab Apostolis acceperant. Cùm igitur Sectarii Sæculi XVI. nec ordinariam missionem ab Ecclesia acceperint, nec à Deo extraordinariè missi fuerint, nec tandem à Principibus Laïcis, seu Magistratibus, Missionem, Ordinationem ac Pastoralem animas regendi auctoritatem accipere hæud potuerint, planum, ac expeditum est, illos fuisse impostores, fures ac latrones, qui non intrarunt per ostium in ovile, planè similes his falsis Prophetis, quos Deus apud *Hieremiam* cap. xiv. vers. 14. increpat his verbis: *Et dixit Dominus ad me: Falsò Prophetæ vaticinantur in nomine meo, non misi eos, & non præcepi eis, neque locutus sum ad eos: Visio-*

nem mendacem, & divinationem, & fraudulentiam, & seductionem cordis sui prophetant vobis &c. Ab his impostoribus originem habent omnes Sectæ hæreticorum hujus temporis, quibus jure merito dicere possum: *Attendite ad petram undè excisi estis, & ad Cavernam laci de qua præcisi estis: Lutherum, Calvinum, Socinum, aliosque Hæresiar-chas sæculi decimi sexti Duces sequimini, quos sola ambitio, libido & crapula fecerunt Apostatas, qui doctrinam à sexdecim sæculis planè inauditam, & toti mundo ignotam, armantes cives in patriam, subditos in Principem, filios in parentes, Christianos in Ecclesiam Christi, prædicarunt, nec alia signa sui Apostolatus exhibuerunt, nisi illa, quibus Alcoranum promulgavit scelestissimus Mahumetes, nimirum occisorum hominum stragem, sanguinis ubique inundantis effusionem, Templorum profanationem, sacrarum Reliquiarum combustionem, mactationem Sacerdotum, constuprationem Virginum, Monasteriorum prædam, & alia id genus summæ crudelitatis portenta.* Hos, inquam, Apostatas, Ecclesiam imaginariam fingentes & fabricantes sine fundamento, hos Doctores à se natos, hos Pastores sine missione, hos Prophetas sine miraculis, erigentes templa sine altaribus, Religionem sine Sacrificio, Fidem sine operibus, toti retrò Antiquitati & universæ Ecclesiæ prætulistis, vosque à totius Orbis unitate nefario Schismatis sacrilegio divisistis. *Redite prævaricatores ad cor, agnoscite, intus lucente veritate, quàm fallaci fulgore cæcos illos Duces impostores sequendo in hæc præcipitia delapsi estis, ac tandem aliquandò, depulsa erro-*
rum

rum vestrorum caligine, aperite oculos, evigilate ad salutem, amate pacem, redite ad unitatem.

D. Ipso sole meridiano coruscante clariùs percipio, primos recentium Sectarum Auctores fuisse impostores, eosque seditiosis suis libris ac prædicationibus non inspirasse illam sapientiam, quæ defursum est, pudicam, pacificam, modestam; sed eam, quæ ex zelo amaro proficiscitur, terrenam, animale, diabolicam, ut habetur in Epistola Catholica S. Jacobi cap. 3. Verum, ulterius pergamus, si placet, & ostende, recentes illas *Lutheri, Calvinii*, aliorumque Hæresiarcharum Sæculi XVI. Sectas esse Synagogas Satanz, solamque Ecclesiam Romanam esse veram Sponsam Christi, à qua qui extorres sunt, salutem æternam sperare non possunt.

M. Ecclesia Romana non solum Doctrinam Apostolicam, seu quam docuerunt Apostoli, firmitèr huc usque illibatam retinuit, sed etiam; mediante successione non interrupta ab Apostolis descendente, habet etiamnum veros ac legitimos Pastores, qui ab illis ordinati ac missi fuerunt. Quò fit, ut Ecclesia Romana verè dici debeat *Apostolica*, ad discrimen Sectarum Hæreticorum, in quibus, ut mox commonstravimus, interrupta, immò penitus præcisa est legitimorum Pastorum successio, eorumque loco præfecti alii, qui à veris Eccl. Pastoribus nec missi nec ordinati, prædicandi officium, & regimen animarum sacrilegâ temeritate usurparunt. Novatores, ut declinent vim, hujus argumenti, quod ipsorum jugulum petit, eosque Schismaticos, ac proinde illorum Sectas

Satanæ Synagogas esse apertissimè demonstrat, in omne latus sese vertunt, nec inveniunt, ubi firmum pedem figere possint, quia perpetuam suorum Pastorum ac Doctorum sibi à temporibus Apostolorum succedentium seriem nullatenus ostendere queunt. Omni itaque ratione destituti hæretici nostri temporis, Ecclesiam Romanam calumniantur, à qua dicunt, doctrinam ab Apostolis traditam fuisse immutam atque adulteratam. Sed libenter scire velim ab illis pseudo reformatis, quonam imperante, quo sedente Pontifice, quâ arte, cujus industriâ, quâ viâ, quâ potentiâ facta fuerit hæc in Romana Ecclesia doctrinæ Apostolicæ immutatio? Quæ Orthodoxorum Episcoporum Concilia hanc doctrinæ Apostolicæ immutationem damnaverint atque proscripserint? Nec enim, ut sæpius diximus in nostris præcedentibus Colloquiis, credibile est, Orbem sub Cælo totum, veluti profundo lethargo laborantem, obnatauisse, dum Caput Orbis Roma nova Dogmata caderet, maximè cum ex Historia Ecclesiæ compertum sit, variis Hæresibus, quæ in Ecclesia emerferunt, sese statim Catholicos opposuisse, eosque à defensione Fidei Majorum nec minis, nec blandimentis, nec vitâ, nec morte deterreri unquam potuisse. Quâ fronte ergo Sectarii asserere audent, Ecclesiam Romanam, ante *Lutheri*, *Calvini*, aliorumque Sæculi decimi sexti Hæresiarcharum adventum, Doctrinam ab Apostolis traditam, cunctis oscitantibus & dormitantibus, immò consentientibus & applaudentibus, immutasse atque corrupisse? Sed, quod satis festivum ac lepidum est, sibi in hoc putido mendacio non constant ipsi-

met

met Hæretici, qui passim in suis Scriptis fatentur, Doctrinam Ecclesiæ Romanæ, quam aggrediuntur, ex Veterum Patrum fontibus derivari; idque apertè Centuriatores Magdeburgenses profitentur, qui propterea singulis quibusque Centuriis quosdam in Sanctis Patribus naves admittunt, quia nimirum Ecclesiæ Romanæ controversis Dogmatibus palàm suffragantur. Sic mentitur iniquitas sibi, & dispellitur hæc calumnia, quam Hæretici, filii iniquitatis, inurunt Ecclesiæ Romanæ, quæ, velint nolint, est asylus fidei, portus salutis, errorum dignoscendorum Lydius lapis, judicandorum ac proscribendorum indefectibilis Magistra, quæque, ut verbis utar *Vincentii Lirinensis* in suo Commonitorio adversus Hæreses capite trigesimo secundo: *Sedula, & cauta Depositorum apud se custos, nihil in iis unquam permutat, nihil minuit, nihil addit, non amputat necessaria, non apponit superflua*. Præter illud argumentum, peticum ex perenni Pastorum successione, quæ in sola Ecclesia Romana adhuc conservatur, aliud, ad probandum recentiores Hæreticorum Sectas esse Satanz Synagogas, & Ecclesiam Romanam esse veram Christi Sponsam, non minus efficax suppetit argumentum, quo omni luce evidentius ostendunt Polemici nostri Scriptores, solam Ecclesiam Romanam esse unam, Sanctam & Catholicam, seu toto Orbe diffusam, eamque his tribus Notis, quæ soli veræ Christi Ecclesiæ convenire possunt, a spuris & illegitimis Hæreticorum Conventiculis facilè discerni posse. Et primò quidem, sola Ecclesia Romana est una ratione Doctrinæ, quia omnes Catholici in eandem doctrinam, seu

eadem Dogmata Fidei conspirant , ejusque indeficienti judicio , velut sacræ anchoræ , indivulsè adherent , juxtà illud *Matthæi* cap. 18. *Dic Ecclesiæ : Si quis autem Ecclesiam non audierit , sit sibi sicut Ethnicus & Publicanus* . Est etiam sola Ecclesia Romana una , ratione regiminis sub uno supremo Pastore , Romano videlicet Pontifice , qui est Caput ejus Visibile , & sub aliis Pastoribus , qui Summo Pontifici subordinantur , quique omnes , tam ille , quàm illi , continuatâ successionè ab Apostolis ordinati sunt . At recentioribus Lutheranorum , Calvinistarum , Anglicanorum , aliorumque Hæreticorum Sectis deest unitas doctrinæ , variant quippè circà Fidei Dogmata ; Ecclesiam ut infallibilem , & supremum Controversiarum judicem non agnoscunt , sed solùm interiorem nescio quam Spiritus Sancti assistentiam , seu revelationem , per quam , ut ajunt , privatus quisque apud ipsos , etiam mulierculæ , percipiunt verum ac germanum Scripturæ Sacræ sensum , & constituuntur judices Controversiarum , quæ circà Fidem oriri possunt , ita ut Pastorum definitionibus adherere minimè debeant , nisi id ipsum , quod illis credendum præponunt , sibi à Spiritu interno immediatè fuerit revelatum . Eo autem semel admissio illo Spiritu interno , qui reverà est Spiritus vertiginis , quæ pax , quæ Societas , quæ in doctrina Fidei unitas apud Hæreticos esse unquàm poterit ? Annon Lutheranus , Calvinianus , Socinianus , & quivis Hæreticus ex certâ illâ interiorem Spiritus Sancti assistentiam , seu revelationem , habendi fiduciâ , somnia cordis sui effutient tanquàm Dei revelationes ? Quis verò modus , quæ ratio compescendi & in

& in ordinem redigendi illos fanaticos, cum incerta illis sint Pastorum judicia, nihilque pro vero habeant, nisi quod spiritu privato tale judicaverint? Potuitne, quæso, infernus, ad scindendam unitatem doctrinæ, & inducendam confusionem Babyloniam, quidquam pestilentius evomere? Nec solum recentioribus Hæreticorum Sectis deest unitas doctrinæ, sed etiam deest unitas Cathedræ, seu regiminis Ecclesiastici. Pastores siquidem in Sectis Hæreticorum nec ab Apostolis continuâ successione sunt Ordinati, nec supremo Capiti, seu Romano Pontifici, subordinantur, sed potius diro Schismate divulsi sunt ab ejus Cathedra, quæ tamen, ut docent Sancti Patres, centrum est unitatis Ecclesiæ: *Navigare audent* (inquit S. Cyprianus Epistolâ LV.) *ad Petri Cathedram, atque ad Ecclesiam Principalem, unde unitas Sacerdotalis exorta est*, idem docet Optatus Milevitanus libro 2. contra Parmenianum, Hæreticum Donatistam, ubi hæc habet: *Negare non potes, scire te in Urbe Roma Petro primò Cathedram Episcopalem esse collatam In qua una Cathedræ unitas ab omnibus servaretur, nec ceteri Apostoli singulas sibi quisque defenderent, ut jam Schismaticus & peccator esset, qui contra singularem Cathedram, alteram collocaret.* Nec minus clarè suam eâ de re mentem exprimit S. Hieronymus in Epistola ad Damasum Papam: *Si quis Cathedræ Petri jungitur, meus est.* Cum igitur recentiorum Sectarum Pastores à Cathedra S. Petri, seu Romani Pontificis, sint separati, liquidò colligitur, ejusmodi Hæreticorum Sectas non solum carere unitate Doctrinæ, sed etiam unitate Cathedræ, seu regiminis Ecclesiastici, ac subin-

subindè illas esse Synagogas Satanæ , solamque Ecclesiam Romanam , cui unitas cum Doctrinæ , tum Cathedræ ad amussim convenit , veram esse Christi Ecclesiam . Altera veræ Ecclesiæ Christi Nota est Sanctitas , quam sola Ecclesia Romana , exclusis omnibus Hæreticorum Sectis , ceu proprium characterem , sibi vendicat . Est enim Ecclesia Romana Sancta , primò ob Sanctitatem Capitit , nempe Christi , qui Spiritum suum diffundit in omnia membra sui Corporis , *secundùm operationem in mensuram unius cujusque membri* , inquit Apostolus Paulus cap.4. Epistolæ ad Ephesios , aliis gratiam justificantem , aliis perseverantiæ donum , omnibus fidem . Secundò , Ecclesia Romana est Sancta ob Sanctitatem finis , scilicet ob cultum divinum , quem unice amplificare ac propagare intendit . Terziò , ob Instituti Sanctitatem , omnia quippe Ecclesiæ Romanæ præcepta , consilia , Sacramenta Sancta sunt , & ad salutem fidelium diriguntur . Quartò , Ecclesia Romana Sancta est in membris suis , non quòd omnia ejus membra à peccato sint immunia ; sed quia multos protulit Sanctos , in terris non minus fulgentes , quàm Sydera coruscant in Cœlis , sicut ex Gestis Sanctorum nullâ unquàm oblivione delendis certissimè constat . Annales Ecclesiæ Romanæ referti sunt Viris eremi cultoribus Angelicam in terris vitam ducentibus , innumerabilibus Romanorum Pontificum , zelantissimorum Episcoporum , Sacerdotum , Monachorum , & Virginum Choris , in quibus Deus planè mirabilis est . Hæc si non credant Hæretici , perlustrent Carthusianorum , Benedictinorum Congregationis S. Mauri , Cisterciensium

sium Congregationis, vulgò dictæ de l'Atrape, & aliorum Religiosorum, apud quos viget strictior Regularis Disciplina observatio, Cœnobia, & tunc videre poterunt, Sanctos necdum defecisse in Ecclesia Romana. Vidimus hac nostra tempestate Sanctiss. Romanos Pontifices, qui nihil tam curæ ac cordi habuerunt, quàm ut Sacras Disciplinæ Ecclesiasticæ Leges instaurarent, collabentes retinerent, vigentes totâ contentione custodirent, & Moralis Christianæ puritatem, quam nonnulli laxis opinionibus fœdabant, sartam tectam omnibus studiis conservarent. Vidimus & nranibus nostris contrectavimus Eminentissimum Cardinalem & Archiepiscopum Beneventanum *Vincentium Mariam Ursinum*, Ordinis FF. Prædicatorum, ex illustrissima & antiquissima prosapiâ oriundum, & tamen omnibus præ summâ humilitate inclinaturn, mundo mortuum, orationibus instantem, in vigiliis pernoctantem, corpus macerantem, persæpè prædicantem, primitivæ Ecclesiæ Antistitum vitæ rationem in suis moribus exprimentem, libertatis Ecclesiasticæ intrepidum propugnato-rem, in amplissima Diœcesi sua peragrandâ continuurn, Patrem pauperum, nulli labori, nullis humanis respectibus parcentem, atque id unicè optantem, ut Sacerdotes ad sacrorum Canonum normam mores exigant suos. Plura de hoc religiosissimo Cardinali dicerem testis oculatus, nisi scriptum esset: *Ne laudaveris hominem in vita sua, nec est segura laudatio, nisi post mortem.* Sed præmittere haud possum alium S. R. E. Cardinalem, qui nuperrimè ad Deum migravit, *Josephum Mariam Thomasium*, Ordinis Clericorum Regularium.

Thea-

Theatinorum, Virum immensâ eruditione cum eximiâ pietate conjunctâ præditum, quem ipse Romæ vidi, sæpiùsque tetigi ejus lecti duritiem, palearum stramen, asperum cilicii indusium. Suspexi hujus optimi Cardinalis, ex clarissima ac piissima familia originem ducentis, modestiam humanâ majorem, animum à fastu omninò alienum, charitatem, quæ est vinculum perfectionis, erga Deum ferventissimam, erga proximum effusissimam, restaurandi disciplinam morum, & Ethicam Christianam à corruptelis repurgandi ardentissimum, zelum. Hæc omnia non solum Scriptores illius vitæ, sed uno ore contestantur omnes, quotquot eum Romæ viderunt, ipsiusque pretiosam in conspectu Domini mortem maximis præconiis celebrarunt. Sed & Opera ab illo typis mandata testimonium perhibent de ipso, suntque solidæ ejus pietatis, reconditæ eruditionis, & exactæ Linguarum exoticarum, quas apprimè callebar, peritiæ, monumenta immortalitate dignissima. Hæc, & alia innumera, omnibus patentia, sanctitatis exempla, quæ brevitati consulendo, prætermittere cogor, aperte probant Sanctitatem Ecclesiæ Romanæ. Jam verò in Hæreticorum Sectas oculos conjice, & confestim intelliges, omnia Sanctitatis testimonia ab his Hæreticorum Sectis penitus exulare. Non urgebo quidem hic quæ de Lutheranorum, Calvinistarum, aliorumque hujus temporis Sectariorum vitiis ac sceleribus litteris tradiderunt multi Scriptores, quorum etiam nonnulli his Sectis fuerunt addicti, quique illorum hæreticorum vitam omni flagitiorum genere refertam insectantur, ut in iis, præter superbiam, luxum, fastum, vanam gloriam,

riam, invidum zelum, Religionis abusum, ministerii contemptum, neglectum omnis disciplinæ, juramenta, blasphemias, Schismata, dissidia, ac boni omnis dissipationem, nihil omnino Christiani hominis relinquunt. Non hæc, inquam, persequar, sed sufficiet si dixerim, quod cum omnes illi Sectarii Evangelica Consilia expungant, divina præcepta esse impossibilia dicant, liberum hominis arbitriū extinguant, bona opera de medio tollant, ac per solam fidem homines justificari doceant, necesse est ut fateantur, Sectas suas, interclusâ penitus ad salutem viâ, nulla posse proferre sanctitatis testimonia. Et sanè, ut obiter dicam, quâ fieri potest, ut ejusmodi Sectæ aliqua proferant sanctitatis testimonia, ubi Religionis status in tot factiones discerptus, nullâ fide ac virtute imbutus, totus ad vitia profluit? ubi operum justitia vilescit? pro Jejuniis, & aliis Pœnitentiæ exercitiis, ventris regnat ingluvies: pro Christiana honestate, luxur: pro castitate, libido: pro carnis maceratione, omne impudicitia genus: pro modestia, tumor, ac intolerabilis superbia: pro virtutibus, vitia: demum pro Evangelica sanctimoniâ, turpissima vita impunè colitur, & laudatur. Sed veniamus ad tertiam, veræ Christi Ecclesiæ tesseram, seu Notam, quæ est *Catholicitas*, quæque in hoc consistit, ut sit per totum Orbem diffusa. Hanc porro veræ Ecclesiæ Christi Notam soli Romanæ Ecclesiæ eximiam esse, ex eo potissimum liquet, quod Ecclesia Romana per universum Orbem diffundatur, suosque palmires à mari usque ad mare extendat. Eminent nimirum in Asia, in America, in Japonia, in Brasilia, in Europa, in Africa: è contrâ verò Hæreticorum, aut Schi-

Schismaticorum Societates, quæ cum eâ non communicant, in aliquibus tantùm, aut Europæ, aut aliarum Orientis partium angulis reperiuntur. Soli Romani Pontifices, qui sunt Vicarii Christi, de salute omnium Gentium solliciti, ad Infideles, toto Orbe nostro remotissimos, ab initio semper miserunt, mittuntque quotidie Viros Apostolicos, labores, pericula, mortemque laceessere paratos, ut novos populos Christo acquirant, & Catholicæ Ecclesiæ ditioni subjiciant, eisque ad Christianam religionem semel conversis nunquam permittant, ut quidquam antiquorum Ethnicismi cœremoniarum, seu superstitionum, vero Dei cultui admisceant. Ex adversò Hæretici & Schismatici conversionem Infidelium promovere non curant, aut si ad illas Nationes, quas jam Viri Apostolici verâ Christi Fide illustrarunt, mercaturæ exercendæ causâ, se aliquando conferant, tritico lolium & zizaniâ intermîscent, veramque Fidem penitus corrumpunt. Hinc appositè ait *Tertullianus* in lib. de Præscriptione: *Negotium est Hæreticis non Ethnicos convertendi, sed nostros evertendi, hanc magis gloriam captant, si stantibus ruinam, non si jacentibus elevationem operentur. Apostoli de mortuis vivos suscitabant, isti de vivis mortuos faciunt.* Imminuta quidem fuit Ecclesiæ Romanæ diffusio schismatibus tùm Græcorum in Oriente, tùm Hæresiarcharum Sæculi XVI. in Occidente. At illa Ecclesiæ Romanæ diffusionis diminutio abundè résarcita fuit Barbararum nationum conversione. Scilicet eo tempore, quo Græci in Oriente conflarunt Schisma, Septentrionales Populi, Hungari, Sueci, Dani, Christianæ Religioni, & Romanæ Eccle-

Ecclesiæ nomen dederunt. Sæculo autem decimo sexto, non multò post exortas novas Sæctariorum Hereses, Indi Orientales & Occidentales, Japonenses, Brasilienses, Canadenses, innumeræque aliæ gentes, ut ostendimus in primo Colloquio, Catholicæ, seu Romanæ Ecclesiæ Fidem sunt amplexæ. Cùm igitur sola Ecclesia Romana, exclusis omnibus Hæreticorum & Schismaticorum Sæctis, Catholica dicatur, jure optimo dicere possum cum S. *Augustino* cap. 4. libri contra Epist. Fundamenti: *Tenet me* (in Ecclesiæ Romanæ gremio) *ipsum Catholicæ nomen*; quod non sine causa inter tam multas hæreses, in ista Ecclesia sola obtinuit, ut cùm omnes hæretici se Catholicos dici velint, quærenti tamen peregrino alicui, ubi ad Catholicam conveniant, nullus hæreticorum vel Basilicam suam, vel domum audeat ostendere. Hæc argumenta, quæ hætenus adduxi ad probandum solam Ecclesiam Romanam esse veram Christi Sponsam, Sæctas verò Hæreticorum esse Synagogas Satanæ, sat superque tibi sufficere debent, ut intelligas, Ecclesiæ Romanæ doctrinam, à Christo & Apostolis profectam, perpetuâ temporum serie ad nos usque puram & integram pervenisse; doctrinam verò Hæreticorum huic è diametro oppositam, innumeris scatere erroribus, à doctrina Apostolica toto Cælo distare, ac subindè reprobendam, dirisque omnibus esse devovendam.

D. Quamvis hæc argumenta ad probandum generatim adversus hæreticos veram esse & Apostolicam Ecclesiæ Romanæ Doctrinam abundè sufficere possint, optarem tamen, ni molestum sit, ut hic breviter indicares viam, methodum

dum & Disciplinas, quibus potissimum instructi fuere Scriptores Sæculi XVI. ad vindicandam Ecclesiæ Romanæ doctrinam ab erroribus hæreticorum ejusdem Sæculi.

M. Scriptores ac Theologi Sæculi XVI. ut pervicaciam Hæreticorum, qui à mendacio stabant, atque antiqua Religionis Christianæ Dogmata convellere, novaque invehere audebant, facilius retundere possent, pristinam Sacrorum studiorum rationem, penè intermissam, ardentius instaurarunt, & Theologiæ Scholasticæ studio, sacre Antiquitatis ac Linguarum peritiâ, Sanctorum Patrum doctrinæ, Historiæ ac Disciplinæ Ecclesiasticæ accuratam cognitionem, necnon Critices ac Chronologiæ Disciplinas, atque copiosam humaniorum Litterarum suppellectilem sapientissimè adjunxerunt, iisque armis instructi, tot tantosque radios indè emiserunt, ut his perstricta Hæreticorum, perduellionis signa adversus Ecclesiæ Arcem erigentium, acies obtusa penitus fuerit atque profligata. Gloriabantur in primis Novatores Sæculi XVI. Linguarum Hebraicæ & Græcæ peritiâ, iisque imbuti, rem totam Theologicam ad Grammaticorum tricas callidè redigebant, & Scripturam Sacram, aliter ac Ecclesia Catholica, per summam temeritatem interpretabantur. Secundò, Sanctos Patres, eos saltem, qui primis Ecclesiæ Sæculis floruerunt, obtorto collo, ad suas partes trahere moliebantur. Denique, Catholicis Scholæ Theologis Historiæ & Disciplinæ Ecclesiasticæ ignorantiam, Disciplinarum Critices & Chronologiæ, humaniorumque Litterarum neglectum elato supercilio objiciebant.

Hinc

Hinc factum est, ut Catholici Scholæ Theologi, ad hanc Hæreticorum frangendam audaciam, eadem doctrinæ subsidia, easdemque Disciplinas, quibus sese Hæretici plurimum jactitabant, in Ecclesiæ Catholicæ castra pertulerint, summo studio atque indultriâ perpolierint, & ad veritatem Catholicam forti brachio defendendam feliciter converterint. Et primò quidem Theologi Scholastici Sæculi XVI. non levem & perfunctoriam, sed plenam ac perfectam Sacrarum Linguarum Hebraicæ & Græcæ notitiam assecuti, earum beneficio falsas Hæreticorum Interpretationes Scripturæ Sacræ, eorumque ratiunculas pervaserunt, solidisque argumentis oppugnarunt. Secundò, Theologi Sæculi XVI. in eam maximè curam incubuerunt, ut diurnâ nocturnâque manu versarent Sanctorum Patrum Scripta, genuina à spuriis secernerent, asutâs à falsariis lacinias, interpolationesque distinguerent, & omni argumentorum genere probarent, nullum novitiis Hæreticorum commentis à Sanctorum Patrum testimoniis peti posse præsidium. Postremò, Theologi & Scriptores Sæculi XVI. Historiæ ac Disciplinæ Ecclesiasticæ studium, humaniores Litteras, & Disciplinas Criticas ac Chronologiæ impensè coluerunt, ut videre est in *Onuphrii*, *Baronii*, aliorumque Scriptorum, quos in superiori Colloquio percensui, doctissimis Operibus, in quibus omnia quæ ad Theologiam Dogmaticam, Polemicam, Asceticam, ad Historiam & Disciplinam Ecclesiæ, ad Criticam, & Chronologiam attinent, pertractantur puro & eleganti scribendi genere, quod Scripturæ Sacræ autoritatibus, & Historiæ monumentis,

congruè suo loco positis , velut sale optimo , inspergitur , & Veterum illustratur Patrum Sententiis ad rem facientibus , quæ legentium animos non solum Sacrâ & Ecclesiasticâ eruditione locupletant , sed ad virtutis amorem inflammant. Hanc viam & methodum secuti , iisque Disciplinis instructi Theologi & Scriptores Sæculi XVI. falsa Hæreticorum dogmata maximo cum Ecclesiæ emolumento confutarunt , optandumque esset , ut hi , qui modò Scholæ Cathedras ac subsellia implent , eorum velligiis insisterent ; & non tantum edocerent Theologiam Scholasticam , quæ Hæreticorum errores pressò pede insequitur , nodos subtiliter explicat , offusas veritati tenebras dissipat , atque involutas fraudes in medium diem producit , sed suos insuper discipulos ad Scripturæ Sacræ , Historiæ & Disciplinæ Ecclesiasticæ studium , ad Critices , Chronologiæ , humaniorumque Litterarum cultum & amorem excitarent , cum certum sit , ejusmodi Discipularum usum , esse Theologis apprimè necessarium , siue Scripturam Sacram interpretari velint , siue adversus Hæreses aciem instruere , siue Scholastico in pulvere adolescentes , quasi in palæstra , exercere , siue res in Ecclesia gestas investigare , siue denique homines à vitiis abducere , & ad virtutes perducere cum utilitate desiderent .

D. Hanc esse veram & utilissimam Sacræ Doctrinæ explicandæ methodum , fatentur ipsimet doctiores Theologi Scholastici , quos inter *Bartholomæus Medina* Dominicanus , quem nuperimè legebam , Quæst. 1. Introductionis in 3. Partem Summæ S. Thomæ hæc habet : *Exhibendus est*

Theo-

Theologiæ Magister, qui rigidas & valdè implexas quæstiones agitât, ostendens quantum in palæstra literaria profecerit, quæ verò ad charitatem & pietatem conducunt, tanquàm pervia & exposita negligens. Si quid explicandum est ex D. Paulo, aut verò ex sacro eloquio, videtur in alium mundum translatus: Si de instantibus, si de hæceitatibus velis aliquid, plura dabit, quàm quæ tribus onerariis navibus vehi possent. Hi sunt sanè, de quibus dicit Apostolus Paulus, quòd languent circa quæstiones & pugnas verborum, quòd conversi sunt in vaniloquium. Quibus verbis juremeritò doctissimus ille Theologus carpit quosdam Theologiæ Scholasticæ Professores, qui neglectis necessariis Disciplinis, frivolis dumtaxat & vanis indulgent quæstionibus, intricis, nugis & quisquiliis, omne tempus infumunt, & quâdam innovandi prurigine titillati, nova Commenta procudunt, atque iis mordicè adhærent; cùm tamen vera Theologia, sicut sæpiùs me monuisti, terminis à Majoribus sapienter constitutis circumscribi, & ad Sanctorum Patrum doctrinæ normam revocari deberet. Quod sanè non est Theologiam Scholasticam damnare (sicut perperam faciunt Hæretici, qui ab hac strenua ratiocinandi duce multùm sibi metuunt) sed dumtaxat abusus in eam temerè investos corrigere, & palmites inaniter luxuriantes refecare, quò uberior cognitæ veritatis fructus ad maturitatem perveniat, & Ecclesiæ utilitatem afferat. At de Doctrina Sæculi XVI. satis hætenùs diximus. Nunc in Disciplinam, quæ eodem Sæculo vixit, sedulò inquiramus, & primùm expendamus præcipua Ecclesiasticæ Disciplinæ Capita; postea, de Monastica

stica Disciplina, & de Religiosis Ordinibus, qui Sæculo XVI. instituti, aut reformati fuerunt, continenti ordine tractaturi.

M. Ad revocandam vetustissimorum temporum incorruptam Ecclesiæ Disciplinam, Patres Oecumenicæ Synodi Tridentinæ cogitationes omnes suas, consilia omnia, auctoritatemque, omnem retulerunt. *Disciplina* siquidem (ut rectè observat *Ludovicus Thomassinus* in Præfatione in Veterem & Novam Ecclesiæ Disciplinam) *mutatur in dies, & labentibus annis senescit, ac pristinae rursum se restituit juventuti; alia & alia subindè, & augmenta experitur, & decrementa.* Suus erat juvenuta vigor eximius, sed obrepebant & vitia. Vitia illa sustulit ætas posterior: Verùm, dùm bona accedunt nova, veterum alicubi splendor evanescit. Senectus languidior est, ut testatur remissio illa & indulgentia, quam hisce temporibus omninò necessariam putant. Verùm, ad trutinam expendas omnia, ut juventuti, ita & senectuti experieris sua inesse vitia, suas virtutes. Quod priori Disciplinæ deerat, adjecere Concilia, Pontifices & Patres. Quid dicam nuperrimi, seu Tridentini, Oecumenici Concilii Leges, quid egregia illa Statuta complurium nostris temporibus Episcoporum, qui excellenti & doctrinâ & pietate, velut quædam Ecclesiæ Sidera splendent; nonne quidquid vitii & labis in hujus ætatis inoleverat Disciplina, vel abstersere, vel abstergere sedulo pergunt. Ut igitur Disciplinam Ecclesiæ, à Concilio Tridentino Sæculo XVI. restitutam, plenè perspectam habere possis, præcipua hic percurreremus Statuta, quæ circa Ecclesiæ Ministros, videlicet Clericos, Presbyteros, Episcopos & Metro-

poli-

politanos eadem Synodus promulgavit, atque pro reformatione morum executioni mandari iussit. Circà Clericos decernit primò Sacra Synodus Tridentina Sess. 23. cap. 2. neminem ad Sacros Ordines promoveri debere, nisi priùs certò constet, eum Beneficium Ecclesiasticum, quod sibi ad victum honestè sufficiat, pacificè possidere: *Cum non deceat*, inquit Patres Concilii Tridentini, eos, qui Divino ministerio sunt adscripti, cum Ordinis dedecore mendicare, aut sordidum aliquem quæstum exercere, compertumque sit, complures plerisque in locis ad Sacros Ordines nullo ferè delectu admitti, qui variis artibus ac fallaciis consingunt se Beneficium Ecclesiasticum, aut etiam idoneas facultates obtinere; statuit Sancta Synodus, ne quis deinceps Clericus Sæcularis (quamvis aliàs sit idoneus moribus, scientia & atate) ad Sacros Ordines promoveatur, nisi priùs legitimè constet, eum Beneficium Ecclesiasticum, quod sibi ad victum honestè sufficiat, pacificè possidere. Patrimonium verò vel pensionem obtinentes ordinari posthac non possint, nisi illi, quos Episcopus judicaverit assumendos pro necessitate vel commoditate Ecclesiarum suarum &c. Idem confirmat Sacra Synodus cap. xvi. ejusdem Sessionis, ubi sancit, ut nullus in posterum ordinetur, qui illi Ecclesiæ, aut pio Loco, pro cujus necessitate aut utilitate assumitur, non adscribatur, ubi suis fungatur muneribus, nec incertis vagetur Sedibus. Hujus Decreti Patrum Concilii Tridentini necessitatem Cardinalis Bellarminus in Epistola ad Nepotem suum Episcopum Theanensem declarat his verbis: *Maximus est abusus ordinari quoslibet ad titulum Patrimonii. Plurimi enim ordinari cupiunt pro utilitate*

sua, non Ecclesiæ: & de celebratione Missæ faciunt artem de pane lucrando. Unde Sacerdotium contempnibile redditur, & Ecclesiæ scandalis patet. Quodd spectat modum ac tempus Ordinationis Clericorum, Sacra Synodus cap. 4. Sess. 23. prohibet tonsurâ initiari, nisi qui Confirmationis Sacramentum ante susceperint, quique legere & scribere sciant, & de quibus sit probabilis conjectura, eos hoc intuitu statum eligere Clericalem, ut perfectius Deo serviant. Unusquisque autem Clericus, juxta Concilium Tridentinum Sess. 23. cap. VIII. à proprio Episcopo, & non ab alio ad Ordines promoveri debet sub pœna suspensionis à susceptorum Ordinum executione, quamdiù proprio Episcopo (qui est Episcopus originis, domicilii, & Beneficii) videbitur expedire. Nullus etiam Clericus, ex Concilii Tridentini Decreto Sess. 23. cap. 12. ad Subdiaconatus Ordinem ante annum vigesimum secundum, ad Diaconatus ante vigesimum tertium, & ad Presbyteratus ordinem ante vigesimum quintum promoveri potest. Nec tamen singuli ea in ætate constituti debent ad hos Ordines assumi, sed dumtaxat digni, quorum probata vita senectus sit. Ut autem Clerici ad pietatem facilius institui, & scientiis ad regimen animarum necessariis imbuï possent, Patres Concilii Tridentini cap. 18. ejusdem 23. Sessionis injungunt, ut in singulis Diocœsibus Collegia Ecclesiastica seu Seminaria instituantur, in quibus juvenes Ecclesiæ servitio destinati educantur, scientiis, functionibus, & ritibus Ecclesiasticis, cantu, disciplinis Clericalibus, & sanctis moribus informantur, tantique momenti ejusmodi Seminariorum pro juvenum

num Clericorum instructione erectiones esse duxerunt Tridentini Patres, ut in hunc finem Episcopis jus & potestatem tribuant obligandi ad annuas pro constituendis & fovendis Seminariis contributiones quoscumque Beneficia possidentes, atque etiam uniendi pro eorum fundatione aliqua Beneficia simplicia cujuscumque sint dignitatis vel qualitatis, etiam antequam vacent, sine cultus Divini & illa obtinentium præjudicio, adeo ut talis unio nullam possit appellatione suspendi aut impediri. Ex his Seminariis, pro institutione juvenum Clericorum erectis, maximam Ecclesia percipit utilitatem, hisque acceptam refert suorum Ministrorum probitatem, maximè, cum experientia constet, Adolescentium animos, nisi rectè instituantur, pronos esse ad mundi voluptates sequendas, in ludo, venatione, epulis tempus malè perdere, & nisi à teneris annis ad pietatem, & religionem informantur, antequam vitiis habitus totos homines possideant, nunquam perfectè, ac sine maximo & singulari propemodum Dei omnipotentis auxilio, in Ecclesiastica Disciplina perseverare, ut testantur Patres Tridentini cap. 18. Sess. 23. Est igitur, quòd plurimum in Domino gaudeamus, dum in hoc ipso Sæculo, plures cernimus Clericos ex Seminariis prodeuntes, pietatis sinceros æmulatores, & Spiritu Ecclesiastico plenos, qui Sacros Canones, *Spiritu Dei conditos, & totius Orbis reverentiâ consecratos*, ut ait Summus Pontifex S. Leo Epistolâ LXXXIV. in intimo spiritu insculptos, atque infixos gerunt, ad quorum normam mores suos pro virili exigere satagunt, & dum propter temporum difficultates,

non observantur, dolent & ingemiscunt. Nec sacras illas Regulas, tanquam Lacedæmoniorum, aut Atheniensium pridem exoletas Leges otiosè spectant, sed tanquam Cœlestia Instituta, nullâ unquam corruptelâ minuenda venerantur & probant. Hinc omnibus studiis has sanctissimas Leges instaurandas curant, conculcatas renovant, colabentes retinent, vigentes totâ contentione custodiunt.

D. Maximum sanè Ecclesiasticæ Disciplinæ decus & incrementum afferunt hæc erecta Seminaria pro juvenum Clericorum educatione, cui modis omnibus consulere, maximi interest Reipublicæ Christianæ. Cum enim, sicut te sæpius dicentem audiui, puerorum ingenium ad vitia proclive, perniciosum exemplum statim arripiat, non aliter, quam ignem vicinum admota palea, eò præcipua Parentum ac Magistrorum cura intendi deberet, ut pueri jam indè ab incunabulis, inter ipsas blanditias nutricum, & parentum oscula, inter Litteratorum manus, persuasiones imbiberent Christo dignas, atque eo pacto omnes vulgò errores ab ipsis usque radicibus ex eorum animis revellerentur, & in eorum locum salutare infererentur opiniones, quæ progressu temporis roboratæ, nullis rebus per totum vitæ cursum, possent convelli, propterea quod *nihil vel aliud insidet animo, vel hæret tenacius, quam quod rudibus*, ut inquit Fabius, *inditur annis*. Sed prosequamur, si placet, alia Ecclesiasticæ Disciplinæ Capita, eaque percurramus Statuta, quæ circa Presbyteros condidit Synodus Tridentina.

M. Cupiens Sancta Synodus Tridentina Ecclesia-

clesiasticam Disciplinam in Christiano populo non solum restitui, sed etiam perpetuò sartam tectam conservari, multa Statuta circa Presbyteros edidit, quorum præcipua hic breviter referemus. Et primò quidem, circa illiteratos & imperitos Parochialium Ecclesiarum Rectores, hæc capite 6. Sessionis xi. decernit Sancta Synodus: *Quia illiterati & imperiti Parochialium Ecclesiarum Rectores sacris minus apti sunt officiis, & alii propter vitæ eorum turpitudinem potius destruunt, quàm ædificant; Episcopi, tanquam Apostolicæ Sedis Legati, eisdem illiteratis & imperitis, si aliàs honestæ vitæ sint, Coadjutores aut Vicarios pro tempore deputare, partemque eisdem fructuum pro sufficiente victu assignare, vel aliter providere possint, quacumque appellatione & exemptione remota, Eos verò, qui turpiter & scandalosè vivunt, postquàm præmoniti fuerint, coercere & castigare: & si adhuc incorrigibiles in sua nequitia perseverent, eos Beneficiis, juxta Sacrorum Canonum Constitutiones, exemptione & appellatione quacumque remota, privandi facultatem habeant.* Secundò, Sess. 22. in Decreto de observandis & evitandis in celebratione Missæ statuit Synodus Tridentina, ut singuli Episcopi in suis Diocæsibus interdican, ne cui vago & ignoto Sacerdoti Missas celebrare permittant. Neminem præterea, qui publicè & notoriè calumniosus sit, aut sancto Altari ministrare, aut sacris interesse permittat. Tertiò, Clericos, & Presbyteros, qui Beneficia possident, quibus animarum cura, aut Ecclesiasticum ministerium annexum est, ad personalem Residentiam, obligatos esse declarat Synodus Tridentina cap. 3. Sessionis 23. eademque Residentiæ Lege obstrictos esse

esse Canonicos sancit capite 12. Sessionis 24. ubi hæc habet: *Obtinentibus in Cathedralibus, aut Collegiatis Dignitates, Canonicatus, Præbendas, aut portiones, non liceat vigore cujuslibet Statuti, aut Consuetudinis ultra tres menses ab eisdem Ecclesiis quolibet anno abesse alioquin primo anno privetur unusquisque dimidia parte fructuum, quos ratione etiam Præbendæ ac Residentiæ fecit suos. Quòd si iterum eadem fuerit usus negligentia, privetur omnibus fructibus, quos eodem anno lucratus fuerit. Crescente verò contumaciâ, contra eos juxta Sacrorum Canonum Constitutiones procedatur. Omnes verò per se & non per Substitutos Divina compellantur obire Officia, Episcopo celebranti, aut alia Pontificalia exercenti assistere & inservire debent Canonici, atque in Choro, ad psallendum instituto, Hymnis, & Canticis Dei nomen reverenter, distinctè devotèque laudare. Vestitu insuper decenti tam in Ecclesia, quàm extra, assidue utantur; ab illicitisque venationibus, aucupiiis, choreis, tabernis, lusibus abstineant, atque ea morum integritate polleant, ut meritò Ecclesiæ senatus dici possint. Ab hac tamen Residentiæ Lege ad certum tempus exemptos voluit Synodus Tridentina Canonicos & Beneficiarios, qui in celeberrimis Academicis vel docent, vel student, juxta Summorum Pontificum Honorii III. & Bonifacii VIII. Constitutiones. Quartò, quoniam multi Clerici & Sacerdotes improbæ cupiditatis affectu ea quæ benè Sacris Canonibus constituta sunt, variis artibus eludere, & plura simul Beneficia obtinere non erubescunt, Sacra Synodus Tridentina cap. 17. Sess. 24. statuit ut in posterum unum tantum Beneficium Ecclesiasticum singulis conferatur, quod quidem si ad vitam ejus, cui*
con-

confertur, honestè sustentandam non sufficiat, liceat nihilominus aliud simplex sufficiens, dummodò utrumque personalem Residentiam non requirat, eidem conferri. Quintò, cùm nihil tam turpe sit Clericis & Sacerdotibus, qui se Divino cultui addixerunt, quàm in impudicitiz sordibus, immundoque concubinato versari, Synodus Tridentina cap. 14. postremæ Sessionis jubet, ut ejusmodi impudici Clerici & Sacerdotes, si à suis Episcopis admoniti resipiscere nolint, pœnis à Sacris Canonibus vel Statutis Ecclesiarum impositis puniantur, ita ut, si Beneficia possideant, Beneficiis, portionibus, officiis & pensionibus quibuscumque Ecclesiasticis perpetuò priventur, atque inhabiles & indigni quibuscumque honoribus, dignitatibus, Beneficiis & officiis in posterum reddantur, & Excommunicationis gladio plectantur: si verò Beneficia Ecclesiastica, aut pensiones non habeant, juxtà delicti & contumaciæ perviciam ab ipso Episcopo carceris pœnâ, suspensione ab Ordine, ac inhabilitate ad Beneficia obtinenda, aliisque modis juxta sacros Canones puniantur. Quâ in re obiter advertere debes, hanc de perpetua castitate Sacerdotibus ac Clericis majoribus ab Ecclesia indictam legem tantâ cum disciplinæ severitate fuisse in antiquis Ecclesiæ temporibus observatam, ut Sacerdotes & Diaconi, qui se luxuriæ crimine commaculassent, in perpetuum gradu dejicerentur, & in Monasteriis pœnitentiam acturi, atque ad Laicam Communionem redacti recluderentur. Ex quo facilè intelligere potes, quàm gravitèr etiamnum Clericus aut Sacerdòs puniri deberet, qui ad sacratissima Mysteria, ipsis

Ange-

Angelis tremenda, impuras manus, impurum animum, & à nefandis libidinibus adhuc calentem inferre non reformidaret. Sextò, ne Sacerdotes in Sacramento pœnitentiæ indulgentiores essent, & lenimentis, quæ peccatoribus perniciofa essent, uterentur; præcipit sancta Synodus Tridentina, cap. 8. Sessionis 14. Sacerdotibus, ut pro modò criminum congruam pœnitentiam imponant: *Debent Sacerdotes Domini, quantum spiritus & prudentia suggererit, pro qualitate criminum, & pœnitentiæ facultate, salutare & convenientes satisfactiones injungere; ne si fortè peccatis conniveant, & indulgentius cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur.* Quæ verba Concilii Tridentini quantum terroris Confessariis afferre, quantam debent ingenerare cautionem, ne in tribunali Pœnitentiæ leves satisfactiones pro gravissimis peccatis imponant, ne peccatoribus, qui absque emendationis spe eadem frequenter admittunt flagitia, præproperam impertiantur absolutionem, & ne in dispensatione Sacramenti Pœnitentiæ indiligenter explorent, sufficientemne, verum ac sincerum dolorem afferat pœnitens, & tale non peccandi propositum, cui meritò confidi possit. Denique, Concilium Tridentinum omnes antiquos Canones, qui ad Sacerdotes pertinebant, renovavit, nec minùs, quàm olim, castos & sanctos voluit esse Sacerdotes. Quamobrèm, vehementer hallucinati sunt quidam nuperi Casuistæ, qui ausi sunt asserere, antiquos Canones de vita & moribus Clericorum & Sacerdotum fuisse per desuetudinem abrogatos, cum potius Synodus Tridentina no-

vum

vum eis addiderit robur, quod mala, quæ multitudine peccantium inuenta est, consuetudo, infringere minimè potest, sed ei, tanquàm corruptelæ & prævaricationi, maximo, ut par est, zelo obniti & reluctari debent pii Sacerdotes, Davidicam, illam vocem semper in ore, semper in corde penitùs infixam habentes: *Prævaricantes reputavi omnes peccatores terræ: idèd dilexi testimonia tua.*

D. Nullus profectò dubito, quin suus Disciplina Ecclesiasticæ pristinus brevì restitueretur splendor, si ad illas sanctissimas Regulas à Concilio Tridentino constitutas Clerici ac Sacerdotes suos satagerent componere mores. Sed videamus modò, quid circa Episcopos, quos, teste Apostolo Paulo, *Spiritus Sanctus posuit regere Ecclesiam suam*, & ex quorum bono regimine atque exemplis reliquorum membrorum Ecclesiæ corpus componentium salus dependet, statuerit Synodus Tridentina?

M. Synodus Tridentina Capite 1. postremæ, seu vigesimæ quintæ Sessionis, in Decreto de Reformatione, Episcopos, ut piè vivant, seque redditu Ecclesiæ fideles dispensatores exhibeant, adhortatur his verbis, quæ cùm sint verè aurea, & divino spiritu plena, hic integra inferere necessarium esse duxi: *Optandum est, inquit Sacra illa Synodus, ut ii, qui Episcopale ministerium suscipiunt, quæ sint suæ partes agnoscant, ac se non ad propria commoda, non ad divitias aut luxum, sed ad labores & sollicitudines pro Dei gloria vocatos esse intelligant. Nec enim dubitandum est, & fideles reliquos ad religionem innocentiamque faciliùs inflammandos, si Præpositos suos viderint non ea quæ mundi sunt, sed animarum*

marum salutem ac caelestem patriam cogitantes . Hæc cum ad restituendam Ecclesiasticam Disciplinam præcipua esse Sancta Synodus animadvertat , admonet Episcopos omnes , ut secum ea sæpè meditantes , factis etiam ipsis ac vitæ actionibus , quod est veluti perpetuum prædicandi genus quoddam , se muneri suo conformes ostendant . In primis verò mores suos omnes ita componant , ut reliqui ab eis frugalitatis , modestiæ , continentiæ , ac , quæ nos tantopere commendat Deo , sanctæ humilitatis exempla petere possint . Quapropter exemplo Patrum nostrorum in Concilio Carthaginensi non solum jubet , ut Episcopi modestâ suppellectili , & mensâ ac frugali victu contenti sint , verum etiam in reliquo vitæ genere ac totâ ejus domo caveant , nequid appareat quod à Sancto hoc instituto sit alienum , quodque non simplicitatem , Dei Zelum , ac vanitatum contemptum præferat . omninò verò eis interdicat , ne ex redditibus Ecclesiæ consanguineos familiaresve suos augere studeant : cum & Apostolorum Canones prohibeant , ne res Ecclesiasticas , quæ Dei sunt , consanguineis donent , sed si pauperes sint , iis , ut pauperibus , distribuant ; eas autem non distrahant , nec dissipent illorum causâ , immò , quàm maxime petest , eos Sancta Synodus monet , ut omnem humanum hunc erga fratres , nepotes , propinquosque carnis affectum , undè multorum malorum in Ecclesia seminarium extat , penitus deponant . Quæ vero de Episcopis dicta sunt , eadem non solum in quibuscumque Beneficia Ecclesiastica , tam sæcularia , quàm regularia obtinentibus , pro gradus sui conditione observari , sed ad S. R. E. Cardinales pertinere decernit ; quorum consilio apud Sanctissimum Romanum Pontificem cum universalis Ecclesiæ administratio nitatur , nefas videri potest , non
iis

*iis etiam virtutum insignibus , ac vivendi disciplina eos fulgere , quæ meritò omnium in se oculos conver-
tant . Præter hanc generalem Parænesim , quâ Synodus Tridentina omnes Episcopos ad Pastoralia munia dignè obeunda adhortatur , eos insuper Sess. vi. cap. 1. de reformatione & Sess. xxi. cap. 1. ad residentiam, antiquis Canonibus, & Decretalibus Epistolis Summorum Pontificum imperatam, fortiùs adstringit, his verbis : Cùm præcepto divino mandatum sit omnibus , quibus animarum cura commissa est , oves suas agnoscere , pro his Sacrificium offerre, verbique divini Prædicatione, Sacramentorum administratione , ac bonorum omnium exemplo pascere , pauperum , aliorumque miserabilium personarum, curam paternam gerere , & in cætera munia Pastoralia incumbere : quæ omnia nequaquàm ab his præstari & impleri possunt , qui gregi suo non invigilant neque assistunt , sed mercenariorum more deserunt : Sacrosancta Synodus eos admonet & hortatur , ut divinatorum præceptorum memores, factique forma gregis, in judicio & veritate pascant & regant. Hinc declarat ibidè S. Synodus, eos, qui contra vim hujus Decreti de residentia à suis Ecclesiis ultra tres menses aut continuos aut interruptos abfuerint , præter mortalis peccati reatum , quem incurrunt , pro rata temporis absentia , fructus non facere suos . Quæ autem sint legitimæ causæ , propter quas Episcopi abesse possint, & per id tempus tutâ consciëntiâ facere fructus suos , Sacra Synodus exprimit hisce verbis : Nam cum Christiana charitas,urgens necessitas, debita obedientia , ac evidens Ecclesiæ , vel Reipublicæ utilitas , aliquos nonnunquàm abesse postulent & exigant, &c. Utinam his dumtaxat legitimis cautis per-*

permoti Episcopi, & absque ullo sibi à Deo crediti gregis detrimento, à suis Ecclesiis abessent! Alia Episcoporum officia præscribens Synodus Tridentina, & præcipuè è Sacris Ordinationibus omnem Simoniz umbram amovere volens, præcipit cap. 1. Sessionis vigesimæ primæ Episcopis, ut gratis Ordines conferant, dimissorias & testimoniales litteras concedant, nec pro Sigillo, nec aliâ quâcumque de causâ aliquid, etiam spontè oblatum, accipiant. Notariis tamen indulget, ut decimam auri partem accipiant, tribus tamen suppositis conditionibus, scilicet dummodò eis nullum salarium ab Episcopo sit constitutum; dummodò non sint in locis, in quibus viget laudabilis consuetudo nihil accipiendi; dummodò tandèm Episcopis ex Notarii commodis aliquod emolumentum directè vel indirectè provenire haud possit. Denique, cum ad refarciendam Ecclesiæ Disciplinam, nihil efficacius sit celebratione Conciliorum, Visitationibus Episcoporum, Verbi Dei prædicatione, populi, ad suscipienda cum fructu Ecclesiæ Sacramenta, diligenti instructione, & peccatorum publicè delinquentium congruâ satisfactione; ideò Synodus Tridentina capite 2. Sessionis 24. decernit, ut Concilia Provincialia, sicubi omissa sunt, pro moderandis moribus, corrigendis excessibus, controversiis componendis, aliisque ex Sacris Canonibus permixtis, renoveantur, & quolibet saltem triennio celebrentur; Diocesana verò Synodi quotannis habeantur. Secundò, Capite tertio ejusdem Sessionis præcipit Synodus Tridentina Patriarchis, Primatibus, Metropolitanis & Episcopis, ut propriam Diocesim per se ipsos, aut, si legitimè impediti fue-

fuerint , per suum Generalem Vicarium , aut Visi-
torem , si quotannis totam , propter ejus latitu-
dinem , visitare non possint , saltẽm majorem ejus
partem , ita tamen , ut tota biennio per se, vel Vi-
sitatores suos compleatur , visitare non prætẽr-
mittant . Tertiò , mandat Synodus Tridentina
Capite 4. ejusdem Sessionis Episcopis, ut in Eccle-
sia suâ ipsi per se, aut, si legitimẽ impediti fuerint,
per eos , quos ad prædicationis munus assumant ,
in aliis verò Ecclesiis per Parochos , saltẽm omni-
bus Dominicis, solemnibus diebus festis, tempore
autem jejuniorum Quadragesimæ , & adventus
Domini quotidie, vel saltẽm tribus in hebdomada
diebus , si ita oportere duxerint , Sacras Scriptu-
ras, divinamque legem annuncient . Quartò , San-
cta Synodus jubet Capite 7. ejusdem Sessionis
omnibus Episcopis , ut non solum , cum Sacra-
menta Ecclesiæ per se ipsos populo administrare
debent, prius illorum vim & usum , pro suscipien-
tium captu , explicent ; sed etiam idem à singulis
Parochis piẽ prudentẽrque , etiam linguâ verna-
culâ , si opus sit , servari studeant , juxta formam
à Sancta Synodo Tridentina in Catechesi singulis
Sacramentis præscribendam . Quintò , Synodus
Tridentina cap. 8. ejusdem Sessionis statuit , ut
publicẽ peccantibus condigna pro modo culpæ
Pœnitentia publica injungatur , quò videlicet eos ,
quos exemplo suo aut scandalo offenderunt , aut
ad malos mores provocarunt , suæ emendationis
testimonio ad rectam revocent vitam . Permittit
tamen Sancta Synodus Episcopo facultatem publi-
cæ hoc Pœnitentiæ genus in aliud secretum com-
mutandi , quandò ita magis judicaverit expedire .

At in eos, qui Monomachiâ, seu duello, configunt, omni severitate legum animadverti debere sanxit Synodus Tridentina cap. 19. Sessionis vigesimæ quintæ, ubi primò declarat, Principes, qui locum ad monomachiam in terris suis inter Christianos concesserint, eo ipso esse excommunicatos, ac jurisdictione & dominio Civitatis, Castri, aut loci, in quo, vel apud quem duellû fieri permiserint, quod ab Ecclesia obtinent, privari. Secundò, decernit, eos, qui duellum, seu pugnam commiserint, & qui eorum Patrini vocantur, excommunicationis, ac omnium bonorum proscriptionis, ac perpetuæ infamiæ pœnam incurrere, & ut homicidas, juxtâ Sacros Canones, puniri debere, ipsisque, si in conflictu decedant, perpetuò Ecclesiasticam sepulturam esse denegandam. Tertiò, eodem excommunicationis fulmine percellit eos, qui in causa duelli, tam juræ, quàm facti consilium dederint, aut aliâ quâcumque ratione id alicui suaserint, aut pugnantes spectaverint. Sic detestabilem duellorum usum, fabricante diabolo, introductum, cum serperet in dies, ac manaret latius, cum turpissimi gladiatores, immò grassatores ac sicarii, mutuis sese cœdibus ac parricidiis conficerent, cum terribilissimæ carnificinæ ubique vestigia ac monumenta fixissent, saluberrimo illo Edicto, severiorique disciplinâ compescuit Synodus Tridentina.

D. Præscribitne Synodus Tridentina omnia officia, quæ Metropolitanis juxtâ Sacros Canones obeunda incumbunt?

M. Metropolitanorum officia juxtâ Sacros Canones accuratè præscribit Synodus Tridentina.

Et

Et primò quidem, capite primo Sessionis sextæ, in Decreto de Reformatione, monet omnes Patriarchas, Primates, & Metropolitanos, ut in omnibus laborent, & ministerium suum impleant; imple-
 re autem illud se nequaquam posse sciant, si greges sibi commissos, mercenariorum more, deserant, atque ovium suarum, quarum sanguis de eorum est manibus à supremo judice requirendus, custodiæ minimè incumbant, cum certissimum sit, non admitti pastoris excusationem, si lupo oves comedit, & pastor nescit. Quapropter, Sancta Synodus omnes antiquos Canones contra non reii-
 dentes promulgatos innovat, & statuit, ut *Metropolitanus suffraganeos Episcopos absentes, Metropolitanum verò absentem suffraganeus Episcopus antiquior residens, sub pœna interdicti ingressus Ecclesiæ, eo ipso incurrenda, infra tres menses per litteras, seu nuncium, Romano Pontifici denunciare teneatur, qui in ipsos absentes, prout cujusque major, aut minor contumacia exegerit, suæ supremæ Sedis autoritate, animadvertere, & Ecclesiis ipsis de Pastoribus utilioribus providere poterit, sicut in Domino noverit salubriter expedire. Secundò, decernit Sancta Synodus cap. 1. in Decreto de Reformatione Sessionis vigesimæ tertiæ, legitimas absentiae causas à Romano Pontifice, aut à Metropolitano, vel eo absente, à suffraganeo Episcopo antiquiori residente, qui idem Metropolitani absentiam probare debet, in scriptis esse approbandas. Tertiò, ibidem sancit Sacra Synodus ad Episcopum Metropolitanum cum Concilio Provinciali pertinere, judicare de licentiis à se, vel suffraganeis datis, & videre, ne quis eo jure abutatur, & ut pœnis Canonicis errantes punian-*

tur. Quartò, si Cathedralium Ecclesiarum Prælati in Seminarii erectione, ejusque conservatione negligentes fuerint, ac suam portionem solvere detrectaverint, eos Metropolitanus acriter corripere, ad id cogere, & ut quamprimum hoc sanctum & pium opus, ubicumque fieri poterit, promoveatur, studiosè curare debet. Tenetur etiam ex Concilio Tridentino Metropolitanus, tanquam Sedis Apostolicæ delegatus, dare operam ut Verbum Dei, diebus saltem Dominicis & Festis solemnibus annuncietur in Parochialibus Ecclesiis, quæ subjectæ sunt Monasteriis in nulla Diœcesi existentibus, & ad id compellere Abbates & Regulares Prælatos, si negligentes fuerint. Ad ipsum quoque Metropolitanum pertinet, unum aut plura eligere Collegia in Ecclesia Metropolitana, vel in alia Provinciæ suæ Ecclesia commodiori, ubi pueri illarum Ecclesiarum, quæ ob paupertatem Collegium erigere non possunt, educuntur. Quintò, Metropolitanus quolibet saltem triennio tenetur celebrare Concilium Provinciale, & si aliquis dubius aut difficilis abusus sit extirpandus, vel aliqua gravior quæstio incidat, Episcopus, antequàm Controversiam dirimat, Metropolitanus & Conprovincialium Episcoporum in Concilio Provinciali sententiam expectare debet, ita tamen ut nihil, inconsulto Romano Pontifice, novum aut in Ecclesia hætenus inusitatum decernatur. Sextò, si Capitulum, Sede vacante, Vicarium Generalem instituere neglexerit, ad Metropolitanum deputatio hujusmodi devolvitur, juxta Concilium Tridentinum Sessione xxiv. cap. xvi. Denique, quod maxime observare debes, Synodus Tridentina capi-

te I. Sessionis XIII. in Decreto de Reformatione admonet generatim omnes Patriarchas, Primates, Metropolitanos & Episcopos, ut se Pastores, non percussores esse meminerint, atque præesse subditis oportere, ut non in eis dominantur, sed illos tanquàm filios, & fratres diligant, elaborentque, ut hortando & monendo ab illicitis deterreant; illos verò, qui per humanam fragilitatem peccant, arguant, obsecrent, increpent, juxta Apostoli præceptum, in omni bonitate & sapientia: cum sæpè plus ergà corrigendos agat benevolentia, quàm austeritas; plus charitas, quàm potestas. Sin autem, ob delicti gravitatem, virgà opus fuerit, tunc cum mansuetudine rigor, cum misericordia judicium, cum lenitate severitas adhibenda est; ut sine asperitate disciplina populis salutaris, ac necessaria conservetur, & qui correcti fuerint, emendentur, aut, si resipiscere noluerint, cæteri, salubri in eos animadversionis exemplo, à vitiis deterreantur. Hæc sunt præcipua Capita, quæ ad restaurandam Ecclesiæ Disciplinam, circà Clericos, Presbyteros, Episcopos & Metropolitanos sanxit Synodus Tridentina, in quibus contemplari licet genuinam primitivæ Disciplinæ faciem, ad quam Ecclesia Romana, quantum hodierna ferunt tempora, semet totam componit, optatque enixè, ut pristinæ Disciplinæ vigor in integrum restituatur, ut suus Episcopis constet honor & pretium; sint Sacerdotes & Clerici doctrinâ sani, disciplinis exculi, moribus graves, candidi & inculpati; sint denique Laici in fide firmi, in bonis operibus assidui, ubique conversatione, charitate, vitæque puritate præluceant, juxta illud Matthæi cap. v. *Videant opera vestra bona, ut glorificent Patrem vestrū*

qui in Cælis est. Quid ad hæc, amabo, hæretici nostri temporis reponent? qui speciosum Reformatorum titulum perperam ambiunt, & qui tamen non solum Hierarchicum Ordinem, & Pastorum subordinationem ad supremum Pontificem Romanum, à Christo Domino institutam, à se prorsus abdicarunt, verum etiã omnem Disciplinæ Ecclesiasticæ, & Sacramenti Pœnitentiæ rigorem penitus sustulerunt, necessitatem bonorum operum, Votorum obligationem, ciborum delectum, Cœremonias Ecclesiæ, jejunia, preces horarias ab Ecclesia præscriptas, exploserunt; qui professi salvificum Evangelium Christi, flagitiosissimè vivunt, impurè viventes fovent, promiscuè turbæ dant jus interpretandi Scripturam Sacram, & pronuntiandi de articulis fidei; qui tandem invertunt, confundunt, perduntque seditiosè omnia, optimis pessima sufficiunt, solvunt potestatem Principum, plebem in optimos quosque armant, subindè tumultus excitant, ad arma identidem; ut nunc videmus in Palatinatu, nullis de causis procurrunt, quodque satis lepidum est, dum isti hæretici perpetuò Ecclesiæ reformationem crepant, & in mores Episcoporum ac Sacerdotum acriter invehuntur, Principibus suæ Sectæ permittunt polygamiam, & Ministros suos cogunt inire nuptias. Quæ malum, quæso, est ista Salacitas? undè tanta carnis rebellio in his, quæ se jactant agi spiritu Christi? certè, ut liberè dicam, tot malorum ac vitiorum, quæ nunc apud hæreticos impune regnant, nullam aliam causam invenio, nisi quia ab initio eorum Sectæ coaluerunt ex hominibus absque fræno, absque pudore, absque
nulla

ulla morum disciplina viventibus, quorum plerique erant decoctores, profugi, desertores Instituti sui, novarum rerum, ac licentiæ cupidi, juvenes, mulierculæ incogitantes, erronei, milites, aliique sceleribus infames, ex quibus cum originem suam traxerint hæretici nostri temporis, quid mirum, si errores & vitia, quibus illorum Majores fuerunt infecti, jure hæreditatis ac possessionis etiamnum retineant?

D. Hic opportunè venit in mentem celebris, quæ Sæculo XVI. in Galliis circa electionem & collationem Beneficiorum facta est Ecclesiasticæ Disciplinæ immutatio, videlicet Pragmaticæ Sanctionis abolitio, in cujus locum substitutum est *Concordatum Gallicum*; quod, sicut in superioribus Colloquiis observasti, initum est *Leonem X.* Pontificem Maximum inter & *Franciscum I.* Galliarum Regem. Ostende ergò nunc, quorsum in Galliis abolita fuerit Pragmatica Sanctio? & quibus potissimum conditionibus constet istud Concordatum Gallicum?

M. Pragmatica Sanctio nihil aliud est, ut alibi jam observavimus, quam Constitutio in Bituricensi Concilio sub *Carolo VII.* Galliarum Rege anno MCCCXXXVI. promissa, quæque talis erat, ut viginti tres contineret articulos, & in id præsertim collimaret, ut Galliarum Regni Beneficiorum Collatoribus ordinariis sua relinquerentur jura conferendi Beneficia: Ut Cathedrali vacante Sede, à Clero sive Capitulo eligerentur Episcopi, & ut omnes particulares Reservationes, ac gratiæ Expectativæ abolerentur. Hanc Pragmaticam Sanctionem Episcopi, aliique Viri Ecclesiastici

Gallicanam repræsentantes Ecclesiam, obtulerunt *Carolo VII.* Galliarum Regi, qui statim præcepit ut in toto suo Regno observaretur, & Regias inter Constitutiones describeretur. Jussit etiam idem Rex Curia Parlamenti, aliisque Magistratibus, ut hanc Pragmaticam Sanctionem à Personis Ecclesiasticis & Sæcularibus observari, & executioni mandari curarent, gravi pœnâ rebellibus irrogatâ. Promulgata autem fuit Pragmatica Sanctio in Senatu Parisiensi die *xi. i.* mensis Julii anni millesimi quadringentesimi trigésimi noni. Id ægrè admodum tulerunt Romani Pontifices, & ad Pragmaticam illam Sanctionem penitus abrogandam suas omnes curas adhibuerunt. *Eugenius IV.* Pontifex Maximus huic Pragmaticæ Sanctioni intercessit, eamque vehementer improbavit, ut constat ex ejus Litteris ad *Carolum VII.* Galliarum Regem datis, quas descripsit *Odoricus Raynaldus* ad an. *mccccxxxix. num. xxxvi.* *Pius II.* in Concilio, quod anno *mccclix.* indixit Mantuæ, Pragmaticam Sanctionem graviter perstrinxit, & mortuo *Carolo VII.* ejus filium *Ludovicum XI.* Christianiss. Regem, ad abrogandam Pragmaticam Sanctionem pertraxit, indeque incredibili lætitiâ affectus, ut refert *Gobelinus Tomo vii. Commentariorum*, Romæ, ob tam faustum de abrogatâ Pragmaticâ Sanctione nuntium, indixit triduo justitium, & supplicationes per omnia templa fieri, & pompas Sacrorum per Urbem duci. Dimisso Consistorio, universa Curia & Urbis populus exultavit: ad noctem lucere ignes, canere tubæ, campanæ resonare omnes, saltare juvenes, choros ducere, cantare viri, ac Senes inter se gloriari, qui priusquàm morerentur, sublatam Pragmaticam

ticam vidissent: Laudare Pontificem, cujus tempore id donum datum esset: Regem extollere, cujus mentem tanta incessisset pietas: Tantò res videri dignior, atque admirabilior, quantò minus sperata fuisset. Neque quisquam erat, qui post quatuor & viginti annos inveteratum Pragmatica morbum sub Pio Pontifice auferri posse consideret: Satis consultum iri Apostolica Sedi existimabant omnes, si malum non ingravesceret. Verùm, Pragmaticam Sanctionem, quæ sub Christianissimis Regibus Ludovico XI. & Carolo VIII. in Galliis aboleri omninò non potuerat, revocavit Ludovicus XII. Galliarum Rex, & Caroli VIII. successor, qui, ob infaustum dissidium, quod cum Julio II. Pontifice Maximo habuit, Edictum anno MCCCCXCIX. promulgavit, quo sanxit, ut in universo Galliarum Regno ad summos juris apices observaretur Pragmatica Sanctio, quæ proinde eo Regio roborata Edicto viguit, donec tandem Franciscus I. Rex Christianissimus, & Ludovici XII. successor, eam in integrum sublatam, compulerit Gallos ad recipiendum Concordatum, quod ipse Bononiæ in Italia inierat cum Leone X. Pontifice Maximo, moxque in Concilio Lateranensi V. fuerat approbatum anno MDXVI. Porro, in hoc Concordato, quod Gallicum vocant, adimitur Capitulo, vacante Sede Cathedrali, facultas eligendi Episcopum, jusque Nominationis ad Prælaturas Galliarum Regibus confertur sub certis conditionibus, quas hic breviter annotabimus. Prima conditio est, ut Christianissimi Reges nomen ad Episcopatum vacantem virum gravem, Doctorem, vel Licentiatum in Theologia aut in Jure, in celebri Academia, qui vigesimum septimum ætatis annum

annum ad minùs attigerit. Ad istas tamen graduum Scholasticorum leges non adstringuntur Principes Regiæ stirpis, & natalium splendore clarî Proceres, qui subindè ad Ecclesiæ Prælaturas nominari & provehi possunt, etsi nullos gradus in Universitatibus fuerint assecuti. Excipiuntur etiam Religiosi Mendicantes, vel alii Regulares, qui doctrinæ præstantiâ insignes, iis inscripti sunt Collegiis, vel Ordinibus, ubi ad gradus non adspiratur. Altera conditio est, ut habeatur inquisitio in mores personæ à Rege Christianissimo nominatè coràm ipsius Ordinario, vel Nuntio aut Legato Sedis Apostolicæ, eaque Inquisitio unâ cum Nominatione Regiâ Romam deferatur, quò Summo Pontifici constet, nominatum à Christianissimo Rege iis pollere dotibus, quæ Sacris Canonibus præscriptæ sunt. Quòd si Rex Christianissimus nominet aliquem, qui his careat dotibus, potest quidem Summus Pontifex illum repudiare, sed tres alios menses Regi Christianissimo concedit, intra quos alterum nominare & Summo Pontifici Canonice instituendum præsentare potest. Tertia conditio est, ut Rex Christianissimus nominet intra sex menses à die vacantis Beneficii numerandos, ne videlicet diuturnâ Ecclesiarum vacatione salus animarum grave pateretur dispendium. Quarta conditio est, ut Summus Pontifex (si aliqui Regni Galliæ Prælati in Curia Romana moriantur) nominationem habeat ad eorum Episcopatus, aliave vacantia Beneficia. His conditionibus limitatum est in Concordato Gallico jus à Leone X. Pontifice Maximo concessum Regi Christianissimo nominandi ad Prælaturas. Sed, quia jus Regiæ Nominatio-

nationis ad Prælaturas Provinciæ, & Aremoricæ non erat in Concordato Gallico expressum, *Leo X.* Pontifex Maximus speciali Indulto jus Regiæ Nominationis ad Prælaturas in Provinciam & Aremoricam extendit, dum viveret Rex *Franciscus I.* quod ejus successoribus alii Pontifices confirmarunt. Extant duo *Pii IV.* Pontificis Maximi eâ de re Diplomata *Carolo Nono* Galliarum Regi anno MDLXIV. data apud Clarissimos *Puteanos* in *Historia Concordatorum*. Observavimus in sexto Colloquio in Historiam Sæculi XV. Galliarum Regem non nominare ad Abbantias Monialium in vim Concordati Gallici, sed in vim Pontificii Indulti, quo *Clemens VII.* jus ad illas nominandi *Francisco I.* concessit. Ibidem etiam advertimus, jus eligendi Abbates & Priores ad Regem Christianissimum, per Concordatum Gallicum fuisse quidem translatum, illud tamen jus Regiæ Nominationis non extendi ad illa Monasteria, quæ suos Abbates aut Priores eligendi singulari gaudent privilegio, cui nec Summus Pontifex, nec Rex Christianissimus quidquam derogare voluerunt. Quocircâ, Regiæ Nominationi Monasteria illa in Galliis non subsunt, quæ per Generales Præpositos reguntur, quibus adjungendæ sunt quatuor Cistercensis Abbatix filix, *Pontiniacum*, *Feritas*, *Claravallis*, & *Morismundus*. Item Abbatix, sive Prioratus, quorum caput est *Casa Benedicti* in Bituricensi Diocesi, Gallicè *Chesalbenoist*, & celebris altera Abbatia in Suburbio Biturigum *S. Sulpitio* consecrata. Hæ quippè Abbatix, sive Prioratus, antiquam suos Abbates vel Priores eligendi libertatem sartam, testam hætenus conservarunt. Sed de abolitione

Pragma-

Pragmaticæ Sanctionis, & de Concordato Gallico plura leges apud jam citatos clarissimos *Puteanos* in *Historia Concordatorum*, apud *Franciscum Pinssonium* in lib. *De Pragmatica Sanctione*, & in *Notis ad Indulta*, & apud *Doujatium* in *Specimine Juris Ecclesiastici*.

D. Quibus potissimum de causis abolita est in Galliis Pragmatica Sanctio?

M. Duabus præsertim de causis abolita est in Galliis Pragmatica Sanctio. Primam insinuat *Leo X.* Pontifex Maximus in Concordatis Titulo quarto, ubi testatur, Electiones in Galliis jam diu eò devenisse, ut *pleræque per abusum sæcularis potestatis tumultuosæ & violentæ essent*, vel *Simoniacæ*, vel *carnis & sanguinis*, pluribusque aliis cupiditatibus sordidatæ, vel implicatæ periurio, quòd Electores, quanquam juramento constricti ad eligendum magis idoneum, privatis nihilominus indulgerent affectibus, vel precibus & blanditiis amicorum delinirentur, undè gravissima mala emergebant, quæ in dies radices altiores agebant, nec ullo pacto extirpari poterant. Altera ratio, cur in Galliis abolita fuerit Pragmatica Sanctio, petitur ex sublata libertate Electionum, quæ à Capitulis ad nutum Regis ut plurimum fieri solebant. Rex siquidem sæpius preces in imperium vertebat, ac subindè necessitatem imponebat Capitulis, quæ suis electionibus aliquid hinc etiam præsidii fore sperabant, & libertatis umbram saltem aliquam, si quos Rex commendaret, hos eligerent. Hinc Illustrissimus *Petrus de Marca*, Archiepiscopus Parisiensis, libro VI. *De concordia Sacerdotii & Imperii* observat, præter clancularias vel

vel apertas factiones & artes, quæ in Galliis in-
 ejusmodi Electionibus frequentissimè occurrebant,
 ipsas insuper Regum Christianissimorum preces
 imperiosas vim attulisse Electionibus. Jure itaque
 optimo abolita est Pragmatica Sanctio, & in ejus
 locum subrogatum est Concordatum Gallicum, cu-
 jus beneficio restituta ac firmata est Ecclesiæ Ro-
 manæ cum Gallicanâ exoptatissima concordia, quæ
 Pragmaticæ Sanctiōis defensione haud parùm
 turbata erat; sublata itidem est Reservationum &
 gratiarum Expectativarum olim introducta con-
 suetudo; præcisè penitus omnes ambitionis & Si-
 moniæ occasiones, quibus creberrimè Electorum
 suffragia rogabantur, à Laïcis Principibus concilia-
 bantur, & interdum extorquebantur. Præter hæc
 commoda, quæ ex Pragmaticæ Sanctiōis aboli-
 tione, & Concordati institutione & promulgatio-
 ne percepit Gallicana Ecclesia, aliud *Petrus de*
Marca loco mox à me laudato adducit magnum
 Ecclesiæ Gallicanæ & Regni ex receptione *Concor-*
dati secutum emolumentum, per quod *finis impo-*
situs est litibus, quas in Romana Curia contestari rece-
ptum erat sumptibus immensis, ut electionum nullitas
discuteretur. Quò fiebat, ut partes contendentes ad
inopiam redigerentur, regno incommoda importaren-
tur, & Ecclesia ob id diù vacarent. Hic tamen obi-
 rër advertere debes, quòd, licèt abrogatâ in
 Galliis Pragmaticâ Sanctiōe, multa secum com-
 moda advexerit Concordati Gallici institutio, ni-
 hilominus Senatus Parisiensis abolitioni Pragma-
 ticæ Sanctiōis, & Concordati Gallici promulga-
 tioni diù ac fortitèr resistit, Academia etiam Pari-
 siensis apertè reclamavit, & Clerus Gallicanus, vi
 dumta-

dumtaxat ac metu compulsus, prædicti Concordati promulgationem passus est, quandoquidem Rex ita jubebat, sed eam liberis suffragiis non approbavit, imò Regibus Christianissimis *Henrico III. & Henrico IV.* sæpè supplicavit, ut, hoc Concordato Gallico abrogato, revocaretur Pragmatica Sanctio, & restitueretur libertas Electionum. Duo etiam illustres Scriptores Ecclesiastici & Cleri Gallicani Episcopi, *Genebrardus*, & *Spondanus*, hanc Concordati Gallici promulgationem ore & calamo improbarunt. Prior, seu *Gilbertus Genebrardus*, Archiepiscopus Aquensis, librum *De Sacramentum Electionum jure & necessitate ad Ecclesiæ Gallicanæ redintegrationem* edidit; & libro IV. Chronologiæ ad annum MDXVI. *Concordatum Gallicum* vocat *Mysterium iniquitatis*, quo perditam Ecclesiam Gallicanam cernimus. Et rursus: Anno, inquit, millesimo quingentesimo decimo sexto abrogata est in Galliis Pragmatica Sanctio, & Concordata, ut vocant, substituuntur, fremente universo Clero, Scholasticis, Populo, bonis denique & doctis hominibus. Alter verò Scriptor, seu, *Henricus Spondanus*, Apamiarum in Gallia Narbonensi Episcopus, hæc habet ad annum MDXV. num. x. Sic autem, sublata penitus Sanctione Pragmatica, ejus loco facta sunt Capitula illa, quæ Concordatorum nomine promulgata, fuere Sessione xi. Concilii Lateranensis, non tamen sine omnium Gallia Ordinum gravissima conclamatione: mirantibus multis vehementissime, quòd cum Pontifex fratrum suorum Cardinalium suffragiis eligatur, Episcopos & alios Prælatos eligendi potestatem, iis ad quos pariter de jure competebat, ademerit, & in Reges transtulerit; atque infausa permutatione, temporali sibi

sibi reservato, spirituale abdicaverit. Verum, et si Clerus Gallicanus, Academia Parisiensis, Amplissimus Senatus, & nonnulli Scriptores Galli, quos inter reponi debent *Genebrardus*, & *Spondanus*, hoc Concordatum Gallicum, speciosis quidem, sed reapse falsis rationibus freti improbarint, nec statim novam illam Disciplinae mutationem concoquere potuerint, attamen postquam, semoto partium studio & abdicatis omnibus praedjudiciis, rationum, quibus nitebantur, levitatem agnoverunt, & Concordati Gallici commodum sunt experti, tandem lubentissime acquieverunt, utroque facti sunt, hanc novam per Concordatum Gallicum inductam Ecclesiae Disciplinam non fore incommodam, sed potius utilem, modò Rex Christianissimus, sicut ei ex Concordato incumbit, nominaret, seu designaret ad Episcopatus & Abbatias viros doctrinâ & pietate conspicuos, dignos tanto munere, & ferendo oneri, quod Angelicis humeris formidandum est, pares. Quod cum Reges Christianissimi summâ cum laude & pietate haec in rem Ecclesiae executi fuerint, nullum multis abhinc annis auditum est in Galliis murmur adversus *Concordatum*, secundum quod Gallicanae Ecclesiae Politia disponitur ac regitur, omniaque Beneficia pacifice conferuntur.

D. Cedo, si placet, praecipuas rationes, quibus Clerus Gallicanus, Academia Parisiensis, & aliqui Scriptores Galli movebantur, ut tanto cum studio Pragmaticam Sanctionem defenderent, & ex adverso tam fortiter Concordati promulgationi obfisterent.

M. Tres praesertim rationes adducebant hi, qui

qui in Galliis Concordati promulgationi obfirmatis animis intercedebant. Prima ratio petebatur ex novitate Disciplina, quæ, abrogatâ Pragmaticâ Sanctione, per Concordatum in Ecclesiam inducebatur. Hæc, inquam, Disciplina novitate suâ Gallorum animos percellerat, adeo ut in hac maximè causa locum habuerit hæc præclara *S. Augustini* Sententia Epistolâ cxix. *Ipsa mutatio consuetudinis etiam quæ adjuvat utilitate, novitate perturbat.* Verum, hæc Gallorum ratio nullius roboris erat, quia hæc Disciplina, quantumvis nova videretur, obviis tamen ulnis excipienda erat eò vel solò nomine, quod præsentissimum adferret remedium multis malis & corruptelis, quæ sacras Electiones ita infecerant, ut vix sanari possent, nisi Electiones ipsæ abrogarentur, quæ per se quidem bonæ, hominum tamen ad vitia proclivium malis artibus noxiæ magis, quàm utiles Ecclesiæ progressu temporis evaserant. Galli itaque, qui huius Disciplina per Concordatum invehit novitate fuerunt perturbati, trepidaverunt timore, ubi non erat timor. Altera ratio, quam contra Concordatum opponebant Galli, in hoc maximè sita erat, quod sibi persuaderent, *Leonem X.* Pontificem Maximum concessisse *Francisco I.* Regi Christianissimo, ejusque successoribus, Spiritualia Ecclesiarum jura, dum eis jus indulgit nominandi, vi Concordati, ad Episcopatus Galliarum Regni. Verum, vana & falsa omninò erat hæc Gallorum persuasio. Neque enim vi Concordati data unquam sunt Regibus Christianissimis Spiritualia Ecclesiarum jura, sed solùm eis concessum est jus Patronatus, seu Præsentationis ad Beneficia Regni Galliarum.

Galliæ. Undè, sicut penès Episcopos summa, semper est potestas in minora Beneficia, maximè quoad jus spirituale, quanquàm ea conferant ad nominationem Patronorum Laicorum, ita penès Summum Pontificem residet in omnia Beneficia Ecclesiæ, maximè quoad jus spirituale, potestas, licèt Regibus Christianissimis jus impertiatur nominandi, vi Concordati, ad Episcopatus & alia Beneficia Galliarum Regni. Quod quidem novum non esse fatetur ipsemet *Spondanus* loco mox à me laudato, ubi hæc habet: *Quod etiam Leo X. Pontifex Maximus eidem Francisco I. Regi Christianissimo concesserit ac successoribus in perpetuum, Ecclesiarum Cathedralium ac Monasteriorum nominationem, quæ prius ab electione Collegiorum ac Conventuum pendeat, haud quidem id novum fuit, cum aliàs viderimus, id jam olim Zachariam Romanum Pontificem permisisse Pippino Caroli Magni parenti & Sancto Ludovico Regi Alexandrum IV. Horruit tamen iste, seu S. Ludovicus Rex, eo quanquàm spontè oblato jure uti, quòd intelligeret, ut dicebat, non se posse illud suscipere absque periculo animæ suæ & Regni. Jus itaque à Leone X. concessum Francisco I. Galliarum Regi, ejusque successoribus, nominandi ad Episcopatus, aliaque Beneficia, non est novum, nec sese extendit ad spiritualia Beneficiorum Jura, sed est dumtaxat jus patronatus, seu præsentationis ad Beneficia, quòd certè Viro Laico concedi posse in confessio est apud omnes Theologos, nec alia unquàm fuit Ecclesiæ sententia ante mille annos, ex quo locus nimirum fuit Laico Patronatui. Tertiam tandem rationem, contra Concordatum desumebant Galli ex Sacris Canonibus ac*

Decretis Conciliorum Generalium, præsertim septimi & octavi, quibus districtè & sub pœnâ depositionis inhibetur, ne quis *per sæculares Principes*, vel *imperatoria potestate* ad Episcopatum provehatur. His autem Synodorum Generalium Decretis contrarium penitus videbatur Concordatum, quod Regibus Christianissimis jus asseribat nominandi ad Episcopatus & alia Beneficia totius Galliarum Regni. Sed hæc Gallorum ratio ex Sacris Conciliorum Generalium Canonibus petita nullum planè robur adversus Concordatum habere poterat, quia licèt antiqui Canones prohibeant, ne quis ab Imperatore, vel à Principibus sæcularibus per vim ad Episcopatum intrudatur; quamvis etiam Summi Pontifices, ut latè ostendimus in Colloquio tertio in Historiam Sæculi undecimi, jure merito damnarint Investiturarum usum, quo Imperatores Episcopatus & alia Beneficia indignis propriâ authoritate, & reclamante Ecclesiâ, conferebant; nunquàm tamen Sacri Canones, aut Romani Pontifices prohibuerunt, ne Principes Ecclesiis nominent seu designent Episcopos, si id ipsis Ecclesiâ conceliterit, vel permiserit, cum tunc, accedente illâ Ecclesiæ concessione, Principes id præstent non Jure Imperii, seu propriæ authoritatis, sed ex mera Ecclesiæ indulgentiâ. Porro, Reges Christianissimi non sibi arrogant Jus nominandi propriâ authoritate ad Episcopatus & Beneficia Galliarum Regni, sed totum illud Jus, quo potiuntur, acceptum referunt soli Ecclesiæ concessioni *Francisco I.* Regi Christianissimo, ejusque Successoribus à *Leone X.* Pontifice Maximo per Concordatum

datum factæ , quæ nullo pacto Sacris Conciliorum Generalium Canonibus ac Decretis adversatur. Præterquàmquod , etsi Decreta Conciliorum Generalium prohiberent , ne Principes Laici nominent ad Episcopatus , attamen cùm ejusmodi Decreta non ad Fidem , sed ad Disciplinam dumtaxat pertineant , ea à Summis Pontificibus temperari , immò abrogari posse , si evidens particulare Ecclesiarum necessitas , vel utilitas postulet , nemo est , qui inficias ire , aut in dubium revocare velit , maximè cùm constet , Disciplinæ capita pro temporum & locorum varietate mutationem facile subire , multaque veteris Disciplinæ Capita , Conciliorum Generalium Canonibus firmata , vel desuetudine , contrariis institutis quandoque abrogari . Potuit ergò *Leo X.* Pontifex Maximus hæc Decreta Conciliorum Generalium , ad solam Disciplinam spectantia , abrogare propter evidens Ecclesiæ Gallicanæ bonum , quod postulabat , ut Capitulorum Electiones , ambitu , simoniâ , aliisque vitiis horrendum in modum id temporis fœdatæ abrogarentur , & nominationibus ad Episcopatus & Beneficia Galliarum Regni aliter provideretur ; quod sapientissimè per Concordatum Gallicum præstitit Summus ille Pontifex . Absit ergò , ut quis dicat , *Leonem X.* antiquos Canones violasse , Disciplinam evertisse , dùm novum Jus Concordati pro Ecclesia Gallicana instituit , ex quo multa secuta sunt commoda , ac multò majora indies , ut speramus , promanabunt , si Christianissimus Rex *Ludovicus XV.* Majorum suorum vestigiis insistens , nominet ad Episcopatus & Beneficia Viros Ecclesiasticos doctrinâ & pietate insignes ,

quibus semper abundavit, & etiamnum feracissimum est Galliarum Regnum, cujus habenas, juxta omnium Gallorum vota, propediem moderabitur Juvenis ille Rex, quo, si mea exaudiuntur vota, nemo felicius regnabit, nemo diutius vivet, eritque *Clodovæis* illustrior, *Pippinis* fortior, *Carolus* felicior, *Philippis* Augustior, *Henricis* major, *Ludovicis* (si quid eorum addi potest pietati & nomini) etiam melior. His, quæ de abrogatâ Pragmatica Sanctione, & de suffecto in ejus locum Concordato Gallico hætenus dixi, addam dumtaxat, errare nonnullos Scriptores, qui maximis laudibus Pragmaticam Sanctionem efferunt, eò quòd, ut ajunt, eâ in Galliis vigente, libera à Capitulis fierent electiones Episcoporum; in hoc, inquam, errare illos Scriptores duplici momento, breviter evinco. Primò, quia, vigente in Galliis Pragmaticâ Sanctione, Reges Christianissimi suis precibus, quæ, ut superius ex Illustrissimo *Petro de Marca* Archiepiscopo Parisiensi observavi, vim imperii habebant, Capitulis necessitatem imponebant eligendi quos ipsi postulabant Episcopos. Secundo, vigente in Galliis Pragmaticâ Sanctione, Reges Christianissimi *Carolus VII.* *Ludovicus XI.* & *Carolus VIII.* interdum impediabant, ne à Capitulis fierent electiones Episcoporum, rogabantque Summos Pontifices, ut quodam in Galliis vacaturos Episcopatus sibi reservarent, ad Sux Majestatis preces conferendos, sicut nonnullis exemplis probat doctissimus *Ludovicus Thomassinus* parte IV. *Disciplina Ecclesiastica de Beneficiis* lib. 2. cap. 41. Patet igitur, vigente adhuc in Galliis Pragmaticâ Sanctione, sæpius Capitula, impedi-

dientibus Regibus Christianissimis, plenam non habuisse libertatem eligendi Episcopos, ac subinde mirum videri non debere, si tandem abrogatâ Pragmaticâ Sanctione, Capitulis Jus eligendi Episcopos fuerit ademptum, & Regibus Christianissimis Jus nominandi ad Episcopatus, Abbantias, & Beneficia Galliarum Regni à Leone X. Pontifice Maximo adjudicatum & concessum sub his conditionibus, quas superiùs assignavimus. Sed de Disciplina Ecclesiastica Sæculi XVI. plura dicere non vacat, expeditque ut Monasticæ Disciplinae ejusdem Sæculi præcipua nunc Capita percurramus.

D. Rerum, quæ Disciplinam Monasticam spectant, narrationem auspicari debes ab institutione Ordinum, qui Sæculo XVI. ab Ecclesia approbati novum Statui Monastico vel Regulari incrementum atque splendorem contulerunt.

M. Multi Sæculo XVI. Ordines Regulares prodierunt, videlicet Ordo institutus à S. Ignatio de Loyola, vulgò dictus, *Societas Jesu*; Ordo Capuccinorum; Ordo Clericorum Regularium *Theatinorum*; Ordo Charitatis; Ordo Carmelitarum Discalceatorum; quibus accesserunt variz Congregationes, seu Congregatio *Somaschæ* Clericorum Regularium; Congregatio Fratrum Minorum S. Francisci strictioris Observantiæ, qui *Recollecti* appellantur; Congregatio Clericorum Regularium S. Pauli Decollati; Congregatio Clericorum Regularium ministrantium Infirmis; Congregatio Beatæ Mariæ Fulienfis, & Congregatio Clericorum Regularium Minorum: De istorum Regularium Ordinum & Congregationum Insti-

tutione, Authore, Legibus & præclaris in Ecclesiam promeritis pauca hic dicemus, quæ in Annalibus prædictorum Ordinum & Congregationum fusiùs descripta leguntur.

D. Quo anno florentissima Societas *Jesu* fuit à S. *Ignatio de Loyola* instituta, & quo pacto ad istud gloriæ fastigium, quod nunc eam attigisse videmus, pervenit?

M. Anno millesimo quingentesimo trigesimo quarto *Ignatius de Loyola*, nobilis Cantaber, sex Sociis Parisiis sibi adjunctis, die sacrâ Assumptioni Deiparæ Virginis, apud Montem Martyrum, Societatis vota cum illis emisit, & clarissimi hujus Ordinis fundamenta jecit, cujus Summa, ad prædicationem Verbi apud Infideles, Romani Pontificis arbitrio, suscipiendam, eive operam suam in aliis religionis operibus addicendam, pertinebat, speciali in id obedientiæ voto cæteris demùm addito. Hujus Societatis Authori Sanctissimo *Ignatio* nihil chariùs, nihil pretiosius fuit Evangelicâ paupertate, quâ Socii, vulgò dicti *Jesuitæ*, supra ipsos Religiosos FF. Minores videntur eminere, quia illis S. *Ignatius* nullum jus ad stipendia, ad redditus annuos, saltem in Domo professâ, permittit, unâ facultate recipiendi, quæ spontè erogarentur, contentus, jus omne abdicavit repetendi etiam quæ Legato darentur; & si quod prædium habere illis licet, ad rusticandum, dumtaxat concessum est, non ad ferendas, aut metendas segetes, & si quæ ibi nascuntur, non esui ad panem, sed tantum Jumentis ad pabulum dari possint. Alia sanctissima Statuta, quibus Socios obstrinxit S. *Ignatius*, legi possunt in Constitutione.

tutionibus Societatis Jesu, in quibus commentandis *Suarez*, doctissimus Societatis Theologus, totus est in tertio *De Religione* Tomo, undè etiam *Rodrigues*, ejusdem Societatis Jesu Scriptor, hausit quæcumque suis in libris asceticis tradidit documenta virtutis Christianæ. Hanc Societatem sanctissimis munitam Constitutionibus, ad majorem Dei gloriam, utilitatem Ecclesiæ, Fidei propagationem, Christianæ Juventutis institutionem, pietatis restaurationem à *S. Ignatio* conditam approbarunt Summi Pontifices *Paulus III.* anno MDXL. *Julius III.* an. MDLII. *Gregorius XIII.* an. MDLXXXIV. & *Gregorius XV.* an. MDCXXI. eamque inter Ordines Mendicantium numerandam, communibusque Mendicantium Sodalitiorum Privilegiis frui debere sanxit *Pius V.* Pontifex Sanctissimus. Multis, gravibusque procellis jactata est nascenti illi Societas, atque diurnam cum celeberrima Academia Parisiensi litem habuit, cujus originem, Acta & Instrumenta ad eam spectantia cum fusè describebat *Egassius Bulaus* Tomo VI. *Historia Universitatis Parisiensis*, eam silentio hic omninò prætermittam, ne obductam jam cicatricem videar quasi de industria refricare voluisse. Obiter tantum dicam, Patres Dominicanos de nascente & à multis vexatâ Societate benè meritos fuisse, ejusque Institutum totis viribus propugnare, augere, & amplificare studuisse, sicut fatentur *Orlandinus*, & *Sacchinus*, elegantissimi Societatis Jesu Historiæ Scriptores. Illi quippè testantur primò, *S. Ignatium*, Societatis Jesu Authorem, à *Matthæo Ori*, Dominicano & Inquisitore Parisiensi, à furore æmulatorum, & à rabie Scholasticorum fuisse ereptum. Secundò,

impensè laudant Dominicanos , quòd non solùm ,
 permiserint Patribus Societatis Jesu , ut suas Do-
 mos eorum Conventibus vicinas, ut videre est Ro-
 mæ , Parisiis , & Tolosæ , abdicato Jure , de quo
 alii pertinaciùs contendebant , extruerent , sed
 etiam illâ viciniâ plurimùm latarentur , sæpiùsque
 Patres Societatis Jesu suis Cœnobiis summâ cum
 humanitate exciperent . Denique, duo illi insignes
 Historiæ Societatis Jesu Scriptores , *Nicolaus Or-
 landinus*, & *Franciscus Sacchinus*, referunt multa ac
 singularia beneficia , quibus Patres Dominicani
 nascentem Societatem sibi devinxerunt. Duos præ-
 ferim Dominicanos , videlicet *Joannem Pennam*,
 & *Mancium* laudat *Orlandinus* , à quibus ait Cau-
 sam Societatis Jesu fuisse acerrimè propugnatam.
 De primo Dominicano ita habet *Orlandinus* lib. 8.
 Historiæ Societatis Jesu Numero quadragesimo
 nono: *Joannes Penna ex eodem Ordine Prædicatorum*,
singulari pietate ac doctrina vir , & Salmanticensium
Doctorum è numero , acri studio Divini honoris ac-
census , non dubitavit recentem Ordinem , seu Socie-
tatem Jesu , injuriâ vexatum , scripto etiam litteris-
que defendere . De altero verò Doninicano , seu de
Mancio , hæc scribit idem Orlandinus libro 13. Nu-
mero trigésimo octavo : Plurimùm profecit Mancii
quoque sententia , qui sacro Prædicatorum ex Ordine
vir magni nominis , in Hispania , Complutique nobilis
Professor Divinæ Sapientiæ, idemque cùm perstudiosus
Familiæ nostræ , tùm ipsi Præsuli Toletano percharus
erat , permissio ejus examini Exercitiorum Volumine,
eoque accuratè perlecto , libera voce respondit , nihil
se in eo deprehendisse censoriâ notâ , vel animadver-
sione dignum . Eandem in Dominicanos grati ani-
 mi

mi significationem exhibet *Sacchinus*, alter Historiæ Societatis Jesu Scriptor, seu Continuator, qui libro 4. Historiæ Societatis Jesu Num. 150. testatur, Collegium Braccarense Patrum Societatis Jesu munificentia *Bartholomæi à Martyribus* Archiepiscopi Braccarensis, Ordinis Prædicatorum, fuisse extructum ac locupletatum; & libro 11. Numero 99. asserit, Societatem Jesu à *Ludovico Granatensi*, nobili Familæ Dominicanæ Scriptore, plurimum in Lusitania adjutam & auctam fuisse, atque apud Reges, summâ, quâ valebat, gratiâ commendatam. Sed, missis aliis benè multis testimoniis benevolentia, quæ memorant duo illi Societatis Jesu Historiæ Scriptores, existimo, ardentissimum illud Dominicanorum in nascentem Societatem studium illustriori exemplo comprobari haud posse, quàm *S. Pii V.* Pontificis Maximi, ex Ordine Prædicatorum assumpti, qui præter innumera privilegia, quæ Societati Jesu indulgit, voluit insuper, ut Patres ejusdem Societatis in Basilica Vaticana *S. Petri Pœnitentiariorum* munere fungerentur, eosque prætulit Religiosis Familæ suæ Dominicanæ, quos dumtaxat in Basilica Liberiana *S. Mariæ Majoris* Pœnitentarios constituit. Hæc omnia breviter referre operæ pretium duxi, ut indè intelligas, Familiam Dominic. in Soc. Jesu optimè fuisse & etiamnum esse affectam. De Viris doctrinâ & Vitæ sanctimoniâ illustribus, qui Sæculo XVI. ex Societate Jesu prodierunt, sat in superiori Colloquio diximus. De Missionibus verò, quas apud Indos Orientales, Japonios, Æthyopes, Congitanos, Sinas, aliasque Gentes remotissimas, suscepit florentissima illa Societas,

cietas , cùm hic differere nimis longum esset , author tibi sum , ut legas , si tibi per otium liceat , illos Scriptores , qui , semoto partium studio , Missiones & labores novissimorum istorum Apostolorum sincero , & non venali calamo , descripserunt .

D. Mirum profectò mihi accidit , quod mox ajebas , videlicet Patres Societatis Jesu voto paupertatis , quo illos obstrinxit *S. Ignatius* , eminere supra ipsos Religiosos FF. Minores , etiam Capuccinos . Hactenùs siquidem , ut candidè fatear , nesciebam , Patres Societatis Jesu non solùm cum FF. Minoribus & Capuccinis de paupertate contendere , verùm etiam illis superiores esse . Sed quoniam in Capuccinorum sermonem incidimus , obsecro te , ut hic breviter ostendas , quem Authorem habeant , quamve Disciplinam regularem sequatur Ordo Capuccinorum ?

M. Ordo Capuccinorum Authorem habuit *F. Matthæum de Basso* , ex Umbria oriundum , Ordinis Minorum Observantium , qui anno MDXXV. severioris pœnitentiæ , & angustioris paupertatis studio inflammatus , unâ cum *Ludovico* , & *Raphaele* Forosempronienfibus , instituit Congregationem FF. Minorum Eremitarum , qui à Capuccio acuminato dicti sunt Capuccini . Hanc Congregationem approbarunt Romani Pontifices *Clemens VII.* anno MDXXVII. *Paulus III.* anno MDXXXV. eamque multis privilegiis exornarunt *S. Pius V.* *Sixtus V.* *Paulus V.* *Gregorius XIV.* *Urbanus VIII.* & *Gregorius XV.* Olim Capuccini regebantur à proprio Vicario Generali ab ipsis quidem electo , sed à Ministro Generali FF. Minorum Conventualium instituendo . Sed postea Fratrum Minorum Con-

ventua-

venzialium jugum, favente Sede Apostolicâ, excuserunt Capuccini, & Ministrum Generalem eligendi facultatem obtinuerunt. *Bernardinum Ochinum*, qui à Fide Catholica ad Hæresim Antitrinitariorum defecit, Authorem fuisse Ordinis Capuccinorum, fabula est, quam meritò explodit *Zacharias Boverius* in Annalibus Capuccinorum, sicut jam in Colloquio tertio, agendo de *Bernardino Ochino*, observavimus. Disciplinam Regularem, quam sequuntur Capuccini, elegantius describere haud possum, quàm mutuando verba, *Antonii Mariæ Gratiani* in Vita *Joannis Francisci Commendoni* Cardinalis, ubi hæc habet: *Horum, seu Capuccinorum, est Vita omnis dura atque inops; cibis illis victusque in dies quæsitus simplex sine lenocinio, aut conditione ulla: pellere non irritare famem, corporique alimenta præbere, non etiam oblectamenta volunt, quod crebris insuper jejuniis, vigiliisque exercitum, domitumque habent, quò purior mens, solutiorque divinarum rerum contemplationi atque cultui vacet. Vestitus, cetera vitæ congruens, horridus, vilisque, unicâ tunica ac brevi pallio operiuntur, è ciliciis, aut non absimili materia confectis, perpetuoque iisdem nullo æstatis, aut hyemis discrimine, sine calceis nudo pede per nives, per saxa aspretaque incedunt, crepidati tantùm sacra faciunt. Quietem aut humi, aut per angustum grabato, stramentove recumbentes, capiunt, non aliâ, quàm quâ amiciuntur veste contenti. Domicilia eorum rarò in Urbibus, pleraque omnia in solitudine hominum. Denique omnis est in eo disciplina, ut à corpore, humanisque curis abstractus animus, divinis operetur rebus, paupere victu, cultuque & religione gaudens. Multi*
Vitæ

Vitæ sanctimoniâ conspicui ex Capuccinorum Ordine prodierunt, quos inter B. *Felicem à Contalicio* Sanctorum Fastis *Clemens XI.* Pontifex Maximus solemni Ecclesiæ ritu adscripsit die xxii. mensis Maji anni mdccxii.

D. Quænam fuerunt exordia & incrementa Ordinis Clericorum Regularium Theatinorum?

M. *Cajetanus Tienæus*, nobilis Vincentinus, unâ cum tribus Sociis, quos inter eminebat *Joannes Petrus Carafa*, Archiepiscopus Theatinus, qui postea fuit Summus Pontifex, dictus *Paulus IV.* Ordinem Clericorum Regularium anno mdxxiv. instituit, qui *Theatini* fuerunt appellati à *Joanne Paulo Carafa*, qui, ut mox dixi, fuit Archiepiscopus Theatinus, & deinde Pontifex Maximus, dictus *Paulus IV.* Tribus solemnibus Votis, quæ sunt cæteris Regularibus communia, hoc peculiare adjecerunt institutum, non tantum ne quid possideant, verum etiam, nec mendicando aut postulando vitam sustentent, sed spontaneis dumtaxat oblationibus & eleemosynis alantur, &, abjectâ prorsus rerum terrenarum sollicitudine, in solo providentiæ sinu quiescant. Hic Ordo, quem *Clemens VII.* Pontifex Maximus Constitutione datâ die xxiv. mensis Junii anni mdxxiv. approbavit ac plurimis gratiis auxit, non potuit propter arctissimum Vitæ institutum latè propagari. Si enim excipias Italiam, in qua hic Ordo plures habet domos, in Galliis unicam, in Germania, quatuor, in Hispania quinque, in Lusitania unam, in Polonia unam, & in Urbe Goæ unam tantum possidet. Verum, quamvis hic Clericorum Regularium Theatinorum Ordo non sit latè diffusus,

innu-

innumeros tamen è suo sinu emisit Missionarios, qui in Indiis Orientalibus, in Russia, & aliis Provinciis adjacentibus Catholicam Fidem ardentissimo zelo succenti propagarunt. Protulit etiam idem Ordo Clarissimos Concionatores, qui in Italia & aliis regionibus reformationem Cleri, & morum populi depravari emendationem fervidis suis Concionibus feliciter promoverunt. Peperit quadringentos & amplius Scriptores eximios, qui de Theologia Scholastica, Polemicâ, Exegeticâ, Asceticâ complures ediderunt libros omnigenâ eruditione refertos. Dedit Ecclesiâ ducentos & amplius aut Archiepiscopos, aut Episcopos; Cardinales quinque, quorum unus, seu *Joannes Petrus Carafa* ad Summum Pontificatum provectus est, dictusque *Paulus IV.* Denique, inter plures Alumnos suos Vitæ sanctimoniam conspicuos, duos hic Ordo habere meruit solemni ritu ab Ecclesia in Sanctorum album adscriptos, videlicet *S. Cajetanum Tienæum*, quem *Clemens X.* Summus Pontifex Sanctorum numero accensuit, & *S. Andreæ Avellinum*, quem nuperrimè, hoc est, die *xxii.* mensis Maji anni *mdccxii.* *Clemens XI.* Sanctorum Fastis inseruit. Horumce Sanctorum vestigia prestat *Josephus Maria Thomafius*, Cardinalis ejusdem Ordinis Clericorum Regularium Theatinorum, Alumnus, qui, ut superius observavi, paucis ab hinc annis Romæ sanctè obiit, & quinto ab ejus obitu mense *Venerabilis* titulo donatus est à Summo Pontifice *Clemente XI.* qui etiam jussit, ut quamprimum fierent Processus & Scripturæ de fama sanctitatis *Venerabilis* illius Servi Dei, de Heroicis ejus virtutibus, Miraculisque ab eo patris,

tratis , ut plenâ ac distinctâ de iis omnibus habitâ relatione , ad solemnem piissimi hujus Cardinalis Beatificationem procedi possit .

D. Perge, quæso, aliorum Regularium Ordinum , qui Sæculo XVI. fuerunt instituti , breviter , quoad ejus fieri poterit , referre originem .

M. Ordo Charitatis , ut in Gallia nuncupatur , à *Joanne de Deo* , natione Lusitano , ad officia charitatis erga pauperes , præsertim infirmos , institutus , initium Granatæ , anno MDXXXVI I. habere cæpit , sed non nisi Kalendis mensis Ianuarii anni MDLXX I. confirmatus est à S. *Pio V.* Pontifice Maximo , cumque tandem in Italia , Germania , Gallia , & Polonia propagatum *Paulus V.* Pontifex Maximus , tribus solemnibus votis , obedientiæ , castitatis & paupertatis , quarto addito voto de curandis infirmis , in Cætum verè regularem , erexit anno MDCXVI I. Hic Ordo apud Italos vulgò nominatur : *Fate ben Fratelli* , totusque , non in acquirendis scientiis versatur , sed in curandis infirmis pauperibus occupatur , quibus summâ charitate inservit . S. *Joannes de Deo* istius Ordinis Pater , vitæ Sanctimoniâ & miraculis clarus , in Beatorum numerum ab *Urbano VIII.* die XXI. Septembris anni MDCXXX. relatus est , & postea ab *Alexandro VIII.* Catalogo Sanctorum adscriptus fuit XVI I. Kalend. Novembris anni MDCXC.

Ordinem Carmelitarum ad antiquam primæ Regulæ , & priscæ Disciplinæ observantiam restituit Sæculo XVI. Sancta *Theresia de Jesu* , nobilis virgo Abulensis , quæ plurima tum Discalceatorum Fratrum , tum Sacrarum ejusdem Instituti ac Reformationis Virginum condidit intra breve tempus

pus Monasteria, bonum Christi odorem ubique spirantia. In ea promovenda Carmelitarum Ordinis instauratione consiliis & operâ Dominicanorum, usa est Beata *Theresia*. Illa quippè, dùm mente agitaret egregium istud facinus, scripsit Epistolam ad *S. Ludovicum Bertrandum*, Dominicanum, eximiis virtutibus ornatum, eumque rogavit, ut consilium mentemque suam eâ de re aperire non gravaretur. Annuit vir ille Sanctissimus, & post tres menses, quibus divinum numen ferventioribus solitò precibus sollicitavit, rerum omnium serie, futurique Ordinis cumulatissimâ gloriâ divinitus agnitâ, rescripsit, admovendam esse absque ulla cunctationes operi manum, & post quinquaginta annos nullum futurum clariorem in Orbe Ordinem, nullique Sanctitate & doctrinâ inferiorem, quem Sancta illa Virgo moliebatur. Quo responso accepto, confestim jacta sunt reformationis Carmelitarum Ordinis fundamenta, & oraculi simul & voti *S. Ludovici Bertrandi* veritatem brevè eventus subsecutus comprobavit. Et sanè, ut nihil in præsentia dicam de innumeris penè viris, qui Sanctitate conspicui, & in Perside pro Fidei propagatione Apostolicis laboribus clari ex Ordine Carmelitarum Discalceatorum promanarunt, certum est, hunc Ordinem doctissimos protulisse Theologos, quorum accessione maximè illustrata est Schola *S. Thomæ*, cujus illibatæ doctrinæ speciali Statuto, hætenus sanctissimè observato, hujus Ordinis Viri Religiosi sese addixerunt. Quot enim & quàm egregii Theologi Carmelitæ Discalceati in Divo Thoma Aquinate illustrando sudarunt, quibus non habuit Angelicus Doctor fortiores

tiores pugiles, nec acriores vindices adversarii etiamnum persentiunt? Norunt omnes, quantum in eo scribendi genere laudis consecuti sint Carmelitæ Discalceati Complutenses Philosophi, & Salmanticenses Theologi, qui fidelissimi doctrinæ *S. Thomæ* interpretes, Scriptis luculentissimis germanam Sancti illius Doctoris mentem, ejusque reconditos sensus toti Orbi litterario patefecerunt. Hæc Clarissima Theresiani Ordinis Lumina inter sua Scholæ Thomisticæ ornamenta reponere non dubitat Dominicana Familia, maximè cum inviolabile utriusque Instituti, Theresiani videlicet & Dominicani, fœdus, junctis mutuâ Charitate, quæ nunquam dissolvetur, animis, utriusque Ordinis gloriam & communem & individuum efficiat. Sed de Sacro illo Carmelitarum Discalceatorum Ordine, qui proprium Præpositum, Generalem habet, quemque *Gregorius XIII.* Pontifex Maximus die *xxi* mensis Junii ann. *MDLXXX.* approbavit, plura legis in ejus Annalibus, & apud *Aubertum Miræum* in Originibus Monasticis.

D. Quem Authorem habuerunt illæ Congregationes, quas Sæculo XVI. ad Regularis Disciplinæ incrementum institutas paulò superiùs memorasti?

M. Congregatio Clericorum Regularium, qui *Somaschi* appellantur à loco ita dicto, qui est Mediolanum inter & Bergomum, Authorem habet *Hieronymum Emilianum*, nobilem Venetum & Senatorem, qui multos nobiles Laicos, & nonnullos Sacerdotes anno *MDXXXI.* congregavit ad gerendam Orphanorum curam, ut videlicet cer-

tis

tis in locis collecti educarentur, & in pietate, literis, vel artium Mechanicarum tyrocinio instituerentur. Hanc Congregationem *Somaschorum* (qui etiam appellantur *Clerici Regulares S. Majoli de Papis*, à loco, ubi fuit primum hujus Congregationis Collegium) approbavit *Paulus III.* anno MDXL. Privilegiis ornavit *Paulus IV.* Facultatem verò emittendi solemniter tria vota Regularia concessit *Pius V.* Cum hac Clericorum Regularium Congregatione *Somascha* Sodalitatem *Christianæ Doctrinæ*, quæ sub *Pio V.* anno MDLXXI. institui cœperat, ut pueri, alique divinæ legis ignari sacrâ doctrinâ erudirentur, *Paulus V.* anno MDCXVI. certis legibus unitam voluit.

Congregatio Fratrum Minorum *S. Francisci* strictioris Observantiæ instituta est à quibusdam ejusdem Ordinis Professoribus, quos postea *Recollektos* nuncuparunt, eò quòd Regulam *S. Francisci* purè, juxta Litteram & Declarationes *Nicolai III.* & *Clementis V.* Romanorum Pontificum, observare satagerent. Hanc *Recollektorum* Congregationem confirmavit *Clemens VII.* decimo sexto Kalendas Decembris anni MDXXXII.

Congregationi Clericorum Regularium *S. Pauli Decollati* initium dederunt Mediolani anno MDXXVI. viri quidam ejusdem Civitatis Nobiles, qui ferventissimis *Seraphini Firmani* Canonici Regularis concionibus ad contemptum mundi, & Dei amorem inflammati, homines ad pœnitentiam adhortari, eosque publicâ *S. Pauli* Epistolarum lectione benè vivendi normam edocere cœperunt, ac multis ex illis in suum consortium adsciverunt, ex quibus tandem coaluit hæc Con-

gregatio Clericorum Regularium S. *Pauli Decolati*, qui vulgò appellantur *Barnabæ*, à S. *Barnabæ* apud Mediolanum Basilicâ, quæ ipsis ad peragenda officia sua concessa est. Hanc Congregationem *Clemens VII.* die xviii. Februarii anni MDxxviii. approbavit, multisque Privilegiis donarunt *Paulus III.* *Julius III.* *Gregorius XIII.* *Sixtus V.* & *Paulus V.* quorum Constitutiones in Bullario Romano legi possunt.

Congregatio Clericorum Regularium ministrantium Infirmis Authorem habet *Camillum de Laliis*, Theatinæ Diœcesis Presbyterum, à quo Romæ fuit instituta, & postea à *Sixto V.* Pontifice Maximo approbata est die xvi. mensis Martii anni MDLxxv. Eiusdem Congregationis Regulam confirmavit *Gregorius XIV.* die xxi. Septembris anni MDxc. eamque deinde reformavit *Clemens VIII.* Kalendis Januarii anni MDC. Horum Pontificum Romanorum Constitutiones eâ de re editæ extant in Bullario Romano. Congregationi *Beatæ Mariæ Fulienfis*, exordium dedit anno MDLxxviii. *Joannes Barreria*, gallicè *De la Barriere*, Cadurcensis, Monasterii Fulienfis, Ordinis Cisterciensis, in Diœcesi olim Tolosanâ, nunc Rivenfi, Abbas, qui Monachos ad severiorem disciplinam, primævumque SS. *Benedicti* & *Bernardi* Institutum, per carnis abstinentiam, aliaque arctissima Statuta reduxit. Hanc *Fulienfium* Congregationem approbavit *Sixtus V.* die v. Maji anni MDLxxxvi. eamque postea *Clemens VIII.* & *Paulus V.* Abbatis Cisterciensis jurisdictioni ac subjectioni exemerunt, variisque Privilegiis auxerunt. Congregatio Clericorum Regularium Minorum insti-

instituta est à *Joanne Augustino Adorno*, Genuensi Presbytero, fuitque confirmata à *Sixto V.* anno MDLXXXVI. Præter has Congregationes, aliæ Sæculo XVI. prodierunt, nimirum Congregatio Discalceatorum Ordinis S. *Augustini*, quæ à *Clemente VIII.* anno MDXCV. approbata est; Congregatio Discalceatorum Ordinis Sanctissimæ Trinitatis de Redemptione Captivorum, quæ itidem à *Clemente VIII.* fuit confirmata. Monasteria Ordinis S. *Basilii* in Italia, Sicilia, & Hispania in unam Congregationem sub Abbate Generali anno MDLXXIX. reduxit *Gregorius XIII.* Pontifex Maximus. Annuens etiam idem Summus Pontifex precibus S. *Philippi Nerii*, Presbyteri Florentini, ac Præpositi nonnullorum Presbyterorum Sæcularium in modum Congregationis sub ejus directione viventium, concessit ei anno MDLXXV. Ecclesiam Parochialem S. *Mariæ Vallicellæ*, in qua ab ipsis & cura animarum excerceri, & peculiaria eorundem Presbyterorum & Clericorum Instituta celebrari possent, indèque fluxit Oratorii Congregationis institutio, cujus Constitutiones anno MDCXI. approbavit *Paulus V.* Summus Pontifex. Hæc Congregatio Oratorii (teste Spondano ad annum MDLXXV. Num. XI.) vixit sub eodem *Philippo Nerio*, ejus Institutore, pietate & doctrinâ, viros producens, utrâque eâ virtute, aliisque Christianis dotibus insignes. Inter quos eminentissimè præcelluit *Cæsar ille Baronius*, cujus nomen per universum terrarum Orbem in benedictione & laude existit, eratque jam tum in contubernio *Philippi Nerii*, celebris hujus Congregationis conditoris. Si plura de Congregationis Oratorii Insti-

tutione scire desideres, legis mox citatum Cardinalem *Baronium*, qui Tomo I. Annalium Ecclesiæ ad annum Christi LVII. Num. 164. pluribus ostendit, Congregationis *Oratorii* institutionem apprimè respondere formæ Conventûs ab Apostolo *Paulo* præscripti Capite decimo quarto Epistolæ suæ primæ ad Corinthios. Hic tantùm obiter dicam, S. *Philippum Nerium*, celeberrimæ *Oratorii* Congregationis Parentem, Ordini quoque FF. Prædicatorum amantissimum juxta ac beneficentissimum Patrem se ultrò, dùm viveret, præbuisse. Solebat quippè, ut testatur *Riccus* in ejus Vita, Choro cum Dominicanis, sæpè nocturno etiam tempore, adesse, Theologos hujus Ordinis libenter auscultare, Juvenes Novitios Conventus Minervitani ad pietatem informare, frequentibus colloquiis dignari, eorum corda superno gaudio replere, tantoque studio Familiæ Dominicanæ commoda procurare, ut, quotiès res Dominicanæ Familiæ, sibi charissimæ, in discrimen aliquod adducerentur, illicò *Philippus Nerius* Oratione, sui corporis afflictionibus, miraculis etiam, imminetia damna procul depelleret. Hæc S. *Philippi Nerii* ergà Prædicatorum Ordinem, cujus ipse alumnus sum, singularis benevolentia, ac paterni amoris argumenta, non solùm publicis Ordinis nostri consignata monumentis, verùm etiam cordibus omnium Dominicanorum, velut tabulis ære perennioribus, semper insculpta permanebunt, nosque ad sinceris animis colendam ac singulari veneratione prosequendam *Oratorii* Congregationem, à Sancto illo Benefactore nostro & in Cælis patrono institutam, continuò, velut admotis stimulis,

mulis, provocabunt. Hic tamen velim advertas, hanc Oratorii Congregationem, quam *S. Philippus Nerius* in Italia fundavit, & *Gregorius XIII.* approbavit, esse planè diversam ab eà Congregatione piorum Sacerdotum, quam anno *MDCXIII.* sub nuncupatione *Oratorii Jesu Christi Domini Nostri*, ad petitionem *Mariæ Mediceæ* Reginæ, & *Henrici Gondii*, Archiepiscopi Parisiensis, in Regno Galliarum institutam *Paulus V.* Pontifex Maximus approbavit. Hujus siquidem Gallicanæ Congregationis *Oratorii Jesu*, quæ paulatim per omnes penè, aut saltè præcipuas Galliarum Regni Civitates, non exiguo populorum fructu, dilatata est, quæque doctissimos Theologos, eximios Concionatores, egregios Scriptores Asceticos & Scripturæ Sacræ Interpretes protulit, Institutor, primusque Generalis Præpositus fuit *Petrus de Berulle*, Presbyter Parisinus, postea S. R. E. Cardinalis.

D. Quænam Sæculo XVI. vixit in Religiosis Ordinibus Monastica, sive Regularis Disciplina?

M. Synodus Tridentina circa Monasticam seu Regularem Sæculi XVI. Disciplinam Sess. xxv. multa decrevit, quæ hic delibare sufficiet. Et primò quidem in antecessum observare debes, gravem abusum in Galliis Sæculis Ecclesiæ XV. & XVI. irrepsisse circa nominationem ad Abbatis Regulares, quæ non Viris Religiosis conferebantur, sed Clericis Sæcularibus commendabantur, indeque dicebantur *Abbates Commendatarii*, qui Monasteriorum bona dilapidabant, quodque gravius est, in causa erant, cur Disciplina omnis Monastica in Cœnobiis cessaret, frigeret ac penitus extin-

gueretur cultus divinus, omniaque ædificia tam lapidea, quam spiritalia funditus diruerentur. In hunc pestilentem abusum in Galliis grassantem Joannes Caruajal, Portuensis Episcopus & Cardinalis, coram Paulo II. Pontifice Maximo (sicut refert Cardinalis Papiensis Epistolâ nonagesimâ tertiâ) acriter invecus est in hunc modum: *Vereor, Beatissime Pontifex, ne propediem audiamus omnia Galliarum Cænobia commendata esse, & nullum reliquum quod Abbatem suum habeat: ita quidquid ibi à nobis decernitur, Commendatio est..... Approbavit Judicium Pontifex, & adjecit, credere se à Pontificatu Callixti in eam diem amplius quam quingenta Monasteria esse jam commendata, atque adeò in metu sibi esse, ne corruptela hæc maturius opinione in scandalum grave erumperet. Subdit Cardinalis Papiensis: Commendandorum ab initio Cænobiorum non ea fuit ratio Patribus nostris, ut saginæ Ecclesiasticorum illa darentur, sed ut fide & studio Majoris alicujus ea, quæ occupata à Sacularibus essent, redimerentur, & divinus cultus in pristinum statum revocaretur. Deflexit res, & in abusum hunc venit odibilem Deo, & sorti nostræ infamem. Ad quæ Cardinalis Papiensis verba Henricus Spondanus in Annalibus Ecclesiæ ad annum MCCCCLXIV. hæc subjungit: Si Cardinalis Papiensis infamiam erubescere Commendationum Ecclesiasticis factarum, quid dixisset de infamissimo subsecuto abusu concedendi illas non solum Sacularibus, verum & persæpe turpibus & indignis personis? Sed quoniam in hæc frequentissimè conclamatum est, semperque in cassum; ne nos inutili labore stylum in eadem acuamus, Papirii Massoni, pii Viri, in suis Pontificum ac Regum*
Frax.

Francorum Historiis, verba referre liceat, exclamationis: O incestuosas Beneficiorum perpetuas Commendationes! quo errore Gallia in funestum penè morbum incidit. Absentibus enim Episcopis, & Monasteriorum legitimis verisque Patribus, oves deglubi necesse est, templa dirui, disciplinam ruere, plurimos ab Ecclesia abigi, litterarum studia deferi, & aulicos, corruptissimum hominum genus, pinguedine Ecclesiastica inflatos intumescere, vendique & emi passim Sacerdotia, quod cum olim simonia esset, hodiè industria censetur. Sed hujusmodi homines immortalis Deus, etsi serò, graviter tamen ulciscetur. Ad hunc itaque abusum, qui præsertim in Galliis sæculo XV. & XVI. gliscebatur, penitus exterminandum omnem curam ac diligentiam Romani Pontifices adhibuerunt, præcipuè Leo X. in Concilio Lateranensi Sessione IX. ac tandem Synodus Tridentina, quæ Sessione XXV. Cap. XXI. de Regularium Reformatione, sanxit ut Monasteria deinceps Regularibus conferrentur, & Ordinum Capita nemini commendarentur: Cum, inquiunt Patres Tridentini, pleraque Monasteria, etiam Abbatiæ, Prioratus, & Præpositura, ex mala eorum, quibus commissa fuerunt, administratione, non levia passa fuerint tam in spiritualibus, quam in temporalibus detrimenta; cupit Sancta Synodus ea ad congruam Monastica Vitæ Disciplinam omninò revocare. Verùm, adeò dura difficilisque est præsentium temporum conditio, ut nec statim omnibus, nec commune ubique, quod optaret, remedium possit adhiberi. Ut autem nihil prætermittat, undè prædictis salubriter aliquandò provideri possit, primùm quidem confidit, Sanctissimum Romanum Pontificem pro sua pietate & prudentia

curaturum, quantum hæc tempora ferre posse viderit, ut iis, quæ nunc commendata reperiuntur, & quæ suos Conventus habent, Regulares Personæ ejusdem Ordinis expressè professæ, & quæ gregi præire, & præesse possint, præficiantur. Quæ verò in posterum vacabunt, nonnisi Regularibus spectatæ virtutis, & sanctitatis conferantur. Quoad ea verò Monasteria, quæ Capita sunt ac Primates Ordinum, sive Abbatiæ, sive Prioratus, quæ filia illorum Capitum nuncupantur, teneantur illi, qui in præsentia ea in Commendam obtinent, nisi sit eis de Regulari Successore provisum, infra sex menses Religionem illorum Ordinum propriam solemniter profiteri, aut iis cedere; aliàs Commendæ prædictæ ipso jure vacare censeantur. Optandum quidem fuisset, ut hoc saluberrimum Concilii Tridentini Decretum ubique locorum fuisset executioni mandatum, sed non tulit temporum iniquitas, ut istud Disciplinæ Caput in omnibus Regnis ac Provinciis obtineret. Hinc etiamnum Galliarum Rex, Sedis Apostolicæ indulgentiâ, consuetudine & possessione firmatâ, Clericos Sæculares ad Abbatiæ & Prioratus Regulares nominat, sed eâ tamen lege, ut solo Commendationis titulo ea Beneficia Regularia possideant. Hic tamen obiter advertere debes, non esse per se & intrinsecus deformes illas Monasteriorum Commendationes, quæ Sæcularibus Clericis benè meritis fiunt, immò in Ecclesiæ bonum cedere, si Abbates Commendatarii Ecclesiasticis redditibus, tanquàm fideles dispensatores, utantur, non ut domini; si credita sibi Monasteria, omni adhibitâ curâ tueantur, si res ipsorum cum spirituales, tum temporales, pro viribus promo-
veant,

veant , nec dissipari sinant , si ut Patres ac protectores Monachorum se gerant , si ædificia collabi , si pessumdari disciplinam Monasticam , si numerum Monachorum debitum ad Officia divina ritè celebranda , eorumque jura ac privilegia imminui non permittant , si eleemosynas erogent , hospitalitatem exercent , vel ut hæc pietatis & justitiæ officia à Monachis impleantur , ex sua reddituum portione aliquid decerpant & conferant. Hanc esse Ecclesiæ mentem , Monasteria , seu Abbatias aut Prioratus Regulares Clericis Sæcularibus commendantis , certissimum est , contra quam qui operantur , æternam sibi damnationem accerunt .

Secundò , ad restaurandam Monasticam Disciplinam Synodus Tridentina in Decreto de Regularibus & Monialibus , quod XXI. Capitulis constat , jubet , ne professio religiosa , sive virorum , sive mulierum fiat , nisi exacto integro probationis anno , & decimo sexto ætatis anno completo , professionem verò ante hunc annum factam , irritam declarat . Tertiò , præcipit eadem Sancta Synodus , ut Regulares omnes tam viri , quam mulieres , ad Regulæ , quam professi sunt , præscriptum , vitam instituant : *Quò faciliùs ac maturiùs ubi collapsa est vetus & regularis Disciplina instauretur , & constantiùs , ubi conservata est , perseveret , præcipit (Sancta Synodus) ut omnes Regulares , tam viri , quam mulieres , ad suæ professionis perfectionem , obedientiæ , paupertatis , & castitatis ac si quæ alia sunt alicujus regulæ & Ordinis peculiaria vota & præcepta , ad eorum respectivè essentiam , necnon ad communem vitam , victum & vestitum pertinentia , fideliter observent , omnisque cura & diligentia à*
Super-

Superioribus adhibeatur , tàm in Capitulis Generalibus & Provincialibus , quàm in eorum vifitationibus , quæ suis temporibus facere non prætermittant , ut ab illis non recedant : cùm compertum fit , ab eis non posse ea , quæ ad substantiam regularis vitæ pertinent , relaxari . Si enim ea , quæ bases sunt & fundamenta totius disciplinæ regularis exactè non fuerint conservata , totum corruat ædificium necesse est. Quartò, Synodus Tridentina omnibus Monasteriis , exceptis tamen Conventibus Capuccinorum , & Minorum de Observantia , permittit , ut bona immobilia possideant , omnibus tamen Regularibus proprietatem vetat , ipsisque districtè prohibet , ne à suis Conventibus recedant , etiam prætextu ad Superiores suos accedendi , nisi ab eisdem missi aut vocati fuerint . Qui verò sine prædicto mandato in scriptis obtento repertus fuerit , ab Ordinariis locorum , tanquàm desertor sui Instituti , puniatur , illi autem , qui studiorum causà ad Universitates mittuntur , in Conventibus tantùm habitent , alioqui ab Ordinariis contra eos procedatur. Quintò, statuit Synodus Tridentina , ut Regularis non subditus Episcopo , qui intra Claustra Monasterii degit , & extra ea ita notoriè deliquerit , ut populo scandalo sit ; Episcopo instante , à suo Superiore intra tempus ab Episcopo præfigendum severè puniatur , ac de punitione Episcopum certiorrem faciat : sin minus , à suo Superiore officio privetur , & delinquens ab Episcopo puniri possit . Sextò , præscribit eadem Synodus rationem eligendi Superiores , decernitque , id fieri debere per vota secreta . Declarat insuper , quo pacto procedendum sit erga eos , qui post emissam professionem reclamant , & ad sæculum redire volunt : quicumque ,
ait

ait Sancta illa Synodus, Regularis prætendat, se per vim aut metum ingressum esse Religionem, aut etiam dicat, ante ætatem debitam professum esse, aut quid simile, velitque habitum dimittere quâcunque ex causa, aut etiam cum habitu sine licentia Superiorum discedere: non audiatur nisi intra quinquennium tantum à die professionis & tunc non aliter nisi causas, quas prætendit, deduxerit coram Superiore & Ordinario. Quod si ante habitum spontè dimiserit, nullatenus audiatur, nec ad allegandum quamcunque causam admittatur, sed ad Monasterium redire cogatur, & tanquam Apostata puniatur. Postremò, Synodus Tridentina prohibet Regularibus, ne in Ecclesiis, etiam suorum Ordinum, contradicente Episcopo, Conciones habeant: Ne promulgent Indulgentias absque Episcoporum licentiâ & mandato: Ne privatis in domibus, seu Oratoriis, quæ sunt extra Ecclesiam, Missæ sacrificium celebrent: Ne in minori ætate, quàm quæ ab eadem Synodo Tridentina præscripta est, & sine diligenti Episcopi examine ordinentur: Ne confessiones Sæcularium, etiam Sacerdotum audiant, nisi sint ab Episcopis approbati: Ne Monasteria tam Virorum, quàm Mulierum erigant, sine Episcopi, in cujus Diocesi erigenda sunt, licentiâ priùs obtentâ. Hæc sunt in summâ utilissima Decreta, quæ pro Reformatione Monasticæ seu Regularis Disciplinae sanxit Synodus Tridentina, ad quorum normam faxit Deus, ut omnes Monasticæ, aut Regularis vitæ professores vitam suam exigant, morum innocentiam sectentur, mundi negotiis & illecebris non implicentur, atque primitivam Observantiam jugiter colant, ne, si laxiori Disciplinâ

à san-

à sanctissimis Majorum suorum Institutis desciscant, experiantur tandem verum esse, quod S. Bernardus in Apologia ad Guillelmum Abbatem scripsit: *Quis in principio cum Ordo cepit Monasticus, ad tantam crederet Monachos inertiam devenire? O quantum distamus ab iis, qui in diebus Antonii extiterunt Monachi! sic Macarius vixit? sic Basilius docuit? sic Antonius instituit? sic Patres in Ægypto conversati sunt?*

D. Ediditne Concilium Tridentinum aliqua Statuta ad conservandum vigorem Disciplinae, quam Moniales juxta Sacros Canones observare tenentur?

M. Concilium Tridentinum Sess. xxv. nonnulla pro Monialibus edidit Decreta, quæ hic inferre non abs re erit. Primum quidem jubet Sancta Synodus Tridentina Episcopis, ut Clausuræ Monialium curam habeant, eamque, ubi violata fuerit, diligenter restituant, ac inobedientes, per Censuras Ecclesiasticas, quæcumque appellatione postpositâ, compellant. Verum, quia non sufficit, ut Moniales, quæ mundo nuncium penitus remiserunt, Clausuram observent, sed debent insuper soli Deo, orationi, precibus, piorum librorum lectioni, & aliis id genus spiritualibus exercitiis vacare, atque à vanis hominum Colloquiis abstinere; ideò justâ de causa Sacra Congregatio, Concilii Tridentini Interpres, declaravit, peccare mortaliter Regulares, qui absque licentia Crates Monasteriorum Monialium adeunt, ut cum eis colloquantur. Hæc Sacræ Congregationis Concilii Interpretis Declaratio à Summo Pontifice Clemente IX. approbata, his verbis concepta est:

Die

Die 11. Maji 1669. S. Congregatio Eminentissimorum S. R. E. Cardinalium Concilii Tridentini Interpretum, habitâ notitiâ, quòd nonnulli Regulares absque licentia Crates Monasteriorum Monialium adire & frequentare non dubitent, prætendentes, non esse interdictum per breve tempus, etiam usque ad quadrantem horæ cum dimidio, quod horologio arenario aliquandò metiuntur, Moniales, aliasque personas intra Clausuram existentes, alloqui, & hanc opinionem tanquam tutam asserunt, disseminant, & etiam in scriptis forsân evulgent, proprias graviter illaqueantes conscientias, & scandala confoventes; ad hujusmodi perniciosos errores eliminandos, opinionem prædictam improbens, rejiciens & damnans, declaravit, Regulares cujuscumque Ordinis, Militiæ, Societatis, Congregationis, Instituti, etiam de quibus specialis mentio foret habenda, qui ad Monasteria Monialium, quamvis ab Ordinarii jurisdictione quomodolibet exempta, & etiam ipsis Regularibus subjecta, vel aliâs speciali mentione digna, absque legitima facultate accedunt, colloquendo, etiam per quodcumque modicum tempus, cum Monialibus, aut aliis intra Clausuram degentibus, peccare mortaliter, eosque sub excommunicationis & privationis vocis actiivæ, & passivæ, aliisque contra Regulares accedentes sine licentia ad Monasteria Monialium statutis pænis posse ab Ordinario, tanquam Sedis Apostolicæ delegato, carcerari. Et die 7. Junii ejusdem anni, facta relatione SS. D. N. Sanctitas Sua præsentem declarationem approbavit, ac typis dari, servarique jussit. Eamdem Declarationem, quæ districtè prohibet, ne Regulares colloquia misceant cum Monialibus, cum aliqui, variis adhibitis interpretationibus, emollire, aut eludere

dere tentarent, Sacra Congregatio Eminentissimorum Cardinalium, Concilii Tridentini Interpretum, denuò confirmavit, & confictas illas Interpretationes damnavit die 21. mensis Maji anni 1678.

Præterea, Sancta Synodus Tridentina ejusdem Sessionis xxv. Cap. xviii. anathemati subjicit omnes & singulas personas cujuscumque qualitatibus & conditionis fuerint, tam Clericos, quam Laicos, Sæculares, vel Regulares, atque etiam quâlibet dignitate fulgentes, si quomodocumque coegerint aliquam virginem, vel viduam, aut aliam quamcumque mulierem invitam ad ingrediendum in Monasterium, vel ad suscipiendum habitum cujuscumque Religionis, vel ad emittendam professionem, quique consilium, auxilium, vel favorem dederint, quique scientes, eam non spontè ingredi Monasterium, aut habitum suscipere, aut professionem emittere, quoquo modo eidem actui vel præsentiam, vel consensum, vel auctoritatem interposuerint. Id autem sapientissimè decrevit Concilium Tridentinum ad cohibendam insatiabilem cupiditatem parentum, qui (ut ait Concilium Remense anno MDLXXXIII. Titulo de Regularibus & Monasteriis Num. 3.) *Liberis ingressum Religionis procurant, vel quòd natura sint ad res gerendas inepti, animo hebetes, vel corpore vitiosi, aut valdè deformes, vel certè ut aliis liberis, istorum quasi ablegatione, ampliores relinquunt opes.*

Tertio, Synodus Tridentina fancit, ut Moniales singulis saltem mensibus Confessionem peccatorum faciant, Sacrosanctam Eucharistiam suscipiant,

scipiant, eoque se salutari præsidio muniant ad omnes oppugnationes Dæmonis fortiter superandas. Jubet tamen eadem Synodus Episcopis, & aliis Superioribus, ut bis, aut ter in anno offerant Confessarium extraordinarium, qui omnium Monialium Confessiones audiat. Denique, ne Moniales causas identidem prætexerent exeundi è Monasterio, & hæc illac vagandi, Synodus Tridentina statuit, nemini Sanctimonialium licere, post Professionem, exire è Monasterio, etiam ad breve tempus, quocumque prætextu, *nisi aliqua ex legitima causa ab Episcopo approbanda, Indultis quibuscumque, & Privilegiis non obstantibus*. Hanc autem facultatem S. Pius V. Pontifex Maximus in Constitutione, quæ incipit: *Decori*, ad tres dumtaxat casus restringit, scilicet *magni incendii, vel infirmitatis, lepræ, aut epidemiæ*. Quapropter, peccant mortaliter Superiores, qui præter tres illos casus à S. Pio V. præfixos, Monialibus è Monasterio exeundi facultatem impertiuntur.

D. Superest, ut sub finem nostri Colloquii Synopsim exhibeas doctrinæ Moralis, quæ viguit Sæculo XVI. eâdemque operâ aliquot ejusdem Sæculi proponas Scriptores, ex quorum Operibus saluberrima possim Disciplinæ Moralis, Vitæque Asceticæ haurire documenta.

M. Disciplinam morum Sæculi XVI. plenissimè nos docet S. Carolus Borromæus Cardinalis & Archiepiscopus Mediolanensis, qui mores sui Sæculi, à quibus profectò mores Sæculi, in quo vivimus, non discepan, nativis coloribus depingit, & ad morum Disciplinam restituendam efficacissima suppeditat remedia, quæ si mox executioni manda-

mandarentur, omni procul dubio brevè in melius mores hominum mutarentur. Audi igitur primò sanctum illum Cardinalem, animarum salutis ficientissimum, sic graphicè in Oratione Provincialis Concilii Mediolanensis sexti mores sui Sæculi describentem: *superbiæ vitio, quàm multi turgescent? quanta indè morborum pestis, quàm profusus vestium luxus, quàm novus & inauditus pomparum apparatus, quàm varius barbarico opere ornatus, quàm innumerabilis servorum grex, quàm effusa omnium rerum profluvies* At verò, quàm latè patet inexhausta illa pecuniæ sitis, & idolorum servitus avaritia, & illa malorum omnium radix cupiditas. ex hoc morbo nefaria quæque existunt. Hinc fæneraticii contractus, hinc mendacia, perjuriaeque commercii contrahendis, hinc falsa quæque, hinc adulterina & corruptæ merces, hinc doli, fallaciæ, fraudes, & subdola quæque artificia, hinc alienorum bonorum quasi aucupia, hinc judiciorum iniquitas, judicum corruptela, pupillorum oppressiones, viduarum desolatio, & injuria denique omnis Juvenes quibus cupiditatum flammis, quasi summis febrium caloribus, & concupiscentiæ igne non exardescunt? delitiis affluunt, oculos habent plenos adulterii, & flagranti isto ardore concitati, bibunt quasi aquam iniquitatem omnem Quàm isti petulantes! quàm contumaces! quàm effrenati! quàm projectà audaciâ præcipites! quàm turbulenti & domi & foris! quàm impudenti licentia ad nefaria quæque concitati! sunt plerique alii homines, qui ethnico more, & joculari quadam licentia Satanae, larvis induti furiunt & bacchantur, choreas ducunt, tripudiâ agunt, spectacula prophana edunt, atque in aliis istiusmodi actionibus usque adeò insaniunt, ut
in

in tanta peccatorum, quæ indè existunt, colluvie, ne culpam quidem agnoscant. Sunt qui præ quadam virtutum torpedine, tanquàm in mollitie carnis jacentes; ne desideria quidem rectè agendi concipiunt, nedùm Sanctarum actionum officia exequentur. Alii quàm plurimi ad terram proni, humi repentes, non cælestia, sed terrena tantùm spectant, & tanquàm filii terræ animo dimisso, ut pecudes ad pastum, ad crapulas & comestiones abjecti, gulæ, ventri & ganeis dediti sunt. Alii in divinis laudibus muti, & in maledictis, blasphemis, diris imprecationibus, contumeliis exercitati sunt. Permulti item rerum divinarum, atque adè rudimentorum fidei ignari, verè cæci sunt. At surdi quàm infiniti, qui in malè agendo sunt pertinaci animo, voluntateque obfirmata, Dei vocibus obsurdescunt. pietate non molliuntur, minis non cedunt, precibus non commoventur, mentis sensu hebescentes, pericula salutis non timent, homines non metuant, & quod gravissimum est, Deum non verentur. Post hæc, idem Sanctus Cardinalis deplorat sui Sæculi Clericorum mores, quorum alii, inquit, avari sunt, alii lites intendunt, alii studiorum prætextu ab Ecclesia absunt, à functionibus Ecclesiasticis sese abducunt, & à Clericali disciplina refugiunt. Alii scientia inflati, præ se alios etiam seniores, quos vereri debent, superbè contemnunt, Beneficia Ecclesiastica tenuia contumaciter respuunt, ampla præposterè ambiunt &c. Viden, quàm accuratè S. Carolus Borromæus, vero salutis animarum zelo accensus, vicia & mores sui Sæculi describat?

D. Video sanè; sed optarem ut ea indicares remedia, quæ ad restituendam morum Disciplinam suggerit sanctus ille Cardinalis.

M. Inter multa, eaque efficacissima, quæ ad restituendam morum Disciplinam sufficit S. Carolus Borromæus remedia, quatuor potissimum feligam, quæ si ad praxim redigantur, benè profectò de proxima morum emendatione sperare debemus. Primum remedium insinuat sanctus ille, Cardinalis in Oratione jam citatâ, quam habuit in sexto Concilio Provinciali Mediolanensi, ubi hæc habet: *Eam ob causam, summâ animi nostri Episcopalis consensione, unâ conspiratione, uno spiritu expladantur illæ voces hominum, qui populum nostrum decipiunt, dicentes: Pax, & non est pax: quàm imperitè hoc jactitant: quàm iniquo etiam animo sunt isti, qui curant contritionem filia populi mei cum ignominia, dicentes, pax, pax, & non est pax. An ubi malorum lues; pacis, concordia, & bonorum status? an ubi variæ morborum species, recta valetudo? an ubi adhuc morum corruptela, disciplina Christianæ perfectio? attendite, quæso, qui isti homines sunt cum talia dicunt: Liniunt parietem luto absque paleis, absque temperatura: vident visionem pacis, & non est pax.... Longè absint à nobis voces istorum, qui consuunt pulvillos sub omni cubito manus, & faciunt cervicalia sub capite universæ ætatis ad capiendas omnes animas. Næ istis adulationum vocibus, vocumque blanditiis, cum nos fallere studeant, tàm istis etiam illecebris populos nostros decipiunt: dicunt enim bonum malum, & malum bonum. O popule meus, quis poterit omnia mala, quæ te undique premunt, enumerando percensere? audent tamen isti à salutis viâ te adulationibus longius abducere. Popule meus, qui te in tanta malorum colluvione beatum dicunt, ipsi te decipiunt, & viam gressuum tuorum dissipant. Ex quibus*

bus S. Caroli Borromæi verbis facili negotio intelligere potes, quàm jure meritò Romani Pontifices *Alexander VII. & Innocentius XI.* proscripserint varias opiniones quorundam Theologorù, qui puras Ethices Christianæ Regulas, teneris, cercis, flexilibus, & in quamcumque formam ductilibus institutis, dùm mollire conabantur, depravabant; atque peccatoribus, nimia facilitate veniæ, tribuebant incentivum peccandi.

Alterum ad restituendam morum disciplinam remedium exhibet S. Carolus Borromæus in Oratione Concilii primi Provincialis Mediolanensis, ubi sic effatur: *In delictis corrigendis illa nobis ineunda ratio est, ut pro vi & modo morborum, agrorumque natura, medicinam accomodemus, nunc lenibus admonitionis & objurgationis remediis errata castigantes, nunc acriori curatione utentes, denique exulceratis partibus ferrum & ignem admoventes, quemadmodùm mali ratio, & contagionis periculum postulabit, memores semper nos esse Patres, non Dominos. Morum autem Disciplinam facilè restituemus, si qua ratione, quibusve factis primùm constituta, diùque conservata est, eamdem nos in restituenda adhibebimus, illorum vestigia persequentes, qui hanc bonorum amplitudinem nobis, Deo authore, suâ virtute pepererunt. Proponamus nobis, quæso, illorum vitæ sanctitatem, & in administratione sui officii sapientiam. Erant integri, casti, simplices, modesti, humiles, benè morati, in oratione & lectione assidui, sui despicientes, in alienæ salutis cura & cogitatione defixi, consilio & operâ benigni, hospitales, in domestico cultu, & victu parci, in alios benefici & liberales. Pascebant assiduè oves sibi commissas, triplici salutis*

cibo, Verbo, Exemplo, & Sacramentis Hac si, ut debemus, Patres, ante oculos habebimus, facile intelligemus, quid in restitutione Ecclesiastica Disciplina nobis sit hoc tempore agendum. In quo illud etiam animadvertendum erit, ut quemadmodum in conformanda & constituenda Ecclesiastica ratione Christus Dominus ab ipsis Apostolis, quos Christianæ vitæ Magistros esse voluerat, initium fecit; sic nos à nobis ipsis Pastoribus, quos vivendi exempla aliis tradere oportet, in confirmanda restituendaque morum Disciplina exordiamur. Qua in re palàm ostendit S. Carolus Borromæus, ad restituendam morum disciplinam multum juvare Episcoporum Sanctimoniam, quâ cæteris verbo & exemplo præfulgere debent, eorumque constantiam, quâ Sacrorum Canonum observationi sedulò invigilare, & irrepentibus aut invalescentibus abusibus vehementius obniti ac reluctari tenentur. Ad ipsos quippè Episcopos, ut ait Vincentius Lirinensis spectat clarissimam posteris formulam præmonstrare, quonam modo deinceps per singula queque errorum vaniloquia, sacræ vetustatis auctoritate, prophana novitatis conteratur audacia. Neque hoc sanè novum, siquidem mos iste semper in Ecclesia piguit, ut quo quisque floretet religiosior, eò promptius novellis adinventionibus contraheret. Proprium igitur Episcoporum officium est, pravas consuetudines & morum corruptelas, quoquo modo invecas, confestim extirpare, nec ullo pacto permittere ut radices agant, quia mala consuetudo, inquit Concilium Sueslionense III. anno 866. celebratum, quæ non minùs quàm perniciofa corruptela vitanda est, nisi radicitus evellatur, in privilegiorum jus ab improbis assumitur; & incipiunt

piunt prævaricationes & variæ præsumptiones celerimè non compressæ, pro legibus venerari & privilegiorum more perpetuò celebrari.

Tertium ad restituendam morum disciplinam remedium præbet *S. Carolus Borromæus Part. I. Instructionum Pastorum cap. XIII.* ubi monet Concionatores, ut omni persuasionum vi publicorum peccatorum illecebras, quas homines, depravatæ consuetudinis errore decepti, pro nihilo putant, graviter reprehendant, atque in summum odium adducere contendant, præsertim spectacula, ludos, ludicrasque res id generis, quæ ab Ethnicorum moribus originem ducunt: Choreas, saltationes ac tripudia, à quibus mortiferæ cupiditates excitantur: scenicas, personatasque actiones, unde, tanquam è quodam seminario, semina malefactorum, ac flagitiorum penè omnium existunt: omnem Insuper infœdentur in muliebri vestitu luxum, caudatas vestes, superbum ornatum, deformem illam capitis ornandi speciem, muliebres fucos ac pigmenta, cæteraque ad mollitiem, atque ideò ad libidinis incitamentum fædè excogitata: Effusam etiam virorum impensam & omnem intemperantiam omni studio coarguant: Epulas sumptuosas, & comessationes immoderatas, à frugalitate Christiana alienas, omnis intemperantiæ, impudiciæ, libidinis, aliorumque vitiorum illecebras increpent, atque planè dissuadeant: in omnem aleam, omnemque ejus generis ludum, unde jurgiis, furto, maledictis ac aliis malis, maleficiisque quasi fores aperiuntur, invehantur, & multorum otiosam vitam ac voluptariam objurgare atque exagitare non desinant. Nec solum in vitiis

& moribus hominum increpandis zelum suum, exercere debent Concionatores, sed etiam, uti jubet idem S. Cardinalis cap. xx. 1. Partis *Institutionum*, sæpissimè monere debent parentes, liberos, Uxorem, Dominum, Servum, Clericum, Laicum, Privatum, Magistratum, ejus officii, quod cujusque proprium erit, ut hoc pacto sequantur exemplum Apostoli *Pauli*, qui excellens, omnibusque numeris absolutus universarum gentium Concinator, omnes ad officii sui functiones erudit. Ab hoc fine, quem ad promovendam salutem fidelium sibi unicè præscribere debent Christiani Oratores, videant quantum absint illi Concionatores, qui lenocinantis odore laudis, & illecebroso gloriolæ gustu titillati, non quærunt, quid accommodatè dicere possint ad persuadendum vel instituendum populum, sed quid novi, subtilis & inauditi, quod in nullius unquam imaginationem venerit, & ejuratis omnibus humanæ & Ecclesiasticæ eloquentiæ legibus, uni student novitati conceptuum, & nescio quarum cogitationum, quibus ad emendandos mores, tollenda vitia, inferendasque virtutes nihil ineptius, nihil frigidius, nihil infructuosius esse potest.

Quartum denique, illudque cæteris longè efficacius ad restituendam morum disciplinam remedium tradit S. *Carolus Borromæus* Parte 2. *Institutionum Pastorum* cap. 15. & sequentibus, ubi multas præscribit Regulas, quæ à Confessariis in Sacramento Pœnitentiæ observari debent. Et primò quidè docet, non solum absolvi non debere illos, qui peccato mortali valedicere constanter non decernunt, sed esse præterea consultum absolutionem differ-

re,

re, donec evidens appareat emendatio in iis, qui tametsi dicant ac polliceantur, quod se eximent à peccato, tamen Confessario probabilem faciunt metum, ne contrarium contingat: Ex hoc genere esse solent plerique adolescentes, qui in otio vitam agunt, qui luxui dediti, crapulam & amores inhonestos sequuntur, libidinibus pascuntur, verba obscena proferunt, murmurant, in odiis ac detractationibus versantur quotidie: & Confessionem differunt in ultimos Quadragessimæ dies. Idem faciendum est cum iis (scilicet ut differatur absolutio) qui cum multos annos in peccatis suis perdurant, nullâ interim adhibitâ operâ in emendationem Vitæ, in eadem peccata iterum atque iterum labuntur. Deindè, nec eos absolvat, qui cum peccatis mortalibus, simul etiam eorum occasiones vitare planè non proponunt. Idem prorsus inculcat Sanctus ille Cardinalis Actorum Parte 4. in Instructione Confessariorum pag. 767. his verbis: Sacerdos neminem sic affectum absolvere debet, ut probabile censeat in eadem peccata recasurum, si in iisdem occasionebus perseveret; sed certum temporis spatium sumeret ad emendationem ejus explorandam. Et paulò superiùs Confessarios, inquit, monitos volumus, ut iis, quos peccata non dimissuros, probabiliter existimabunt, quantumvis polliceantur ac spondeant, ea se dimissuros, absolutionem procrastinent, quoad emendationem perspexerint, necnon iis, qui per multos annos in eadem peccata prolapsi erunt, neque operam ullam ac correctionem vitæ contulerint. Hanc disciplinam, ad peccatorum conversionem perutilem, à S. Francisco Xaverio Societatis Jesu, Indiarum Apostolo, & S. Carolo Borromæo cœvo, fuisse in Sacramento Pœnitentiæ ergà solutioris vitæ homines diligen-

tissimè observatam asserit *Turfellinus* libro VI. *Vitæ S. Francisci Xaverii* cap. XVI. eamque suo calculo approbant omnes sanioris Moralis doctrinæ Theologi, qui constanter docent, non statim concedendum esse absolutionis beneficium tum iis, qui diuturnam & inveteratam habent peccandi consuetudinem, atque iteratis lapsibus firmum sibi vitæ in melius commutandæ propositum non adesse fidem faciunt; tum etiam illis, qui in proxima peccandi occasione versantur, nec eam tamen, sæpius licet admoniti, deserere, & ad meliorem frugem se recipere nolunt. Hinc justissimè de causâ Sanctissimus Pontifex *Innocentius XI.* ovium sibi à Deo creditarum saluti sedulò incumbens, inter sexaginta quinque quorundam laxiorum Casuistarum propositiones die 2. Martii anni 1679. à se proscriptas, tres istas sequentes confixit, quarum prima, quæ est ordine quinquagesima octava, sic habet: *Non tenemur Confessario interroganti fateri peccati alicujus consuetudinem.* Altera, quæ est ordine sexagesima, his verbis concepta est: *Pœnitenti habenti consuetudinem peccandi contra Legem Dei, Naturæ, aut Ecclesiæ, etsi emendationis spes nulla appareat, nec est neganda, nec differenda absolutio, dummodò ore proferat, se dolere, & proponere emendationem.* Tertia, quæ est ordine sexagesima prima, hæc est: *Potest aliquandò absolvi, qui in proxima occasione peccandi versatur, quam potest, & non vult omittere; quin immò directè, & ex proposito querit, aut ei se ingerit.* Has tres Propositiones ab *Innocentio XI.* Pontifice Maximo jure optimo censurâ fuisse inultas, constans est omnium Theologorum doctrina, tum quia, ut inquit

S. Au

S. *Augustinus* Sermone 7. de Tempore : *Pœnitentiam certam non facit , nisi odium peccati , & amor Dei , & ut optimè ait Cardinalis Bellarminus* Sermone 8. de Adventu : *Non esset tanta facilitas peccandi , si non esset tanta facilitas absolvendi .*

Præter hanc tutissimam Regulam,quam Confessariis præscribit S. *Carolus Borromæus* , aliam non minus necessariam statuit Capite xx. Partis secundæ *Instructionum Pastorum* ,ubi hæc habet : *In satisfactionibus vel pœnitentiis Confessarius circumspectus esse debet, ne adedò leves illæ sint & faciles, ut potestas clavium in contemptum veniat , ipseque particeps fiat & consors aliorum peccatorum , neque nimis graves , aut longæ jubeantur , ut vel recusent ea exequi , vel etiamsi acceptas habent , postea tamen plenè non perficiant . Idcirco Confessarius Canones Pœnitentiales ad unguem sciat oportet , nam quamvis illi possint , & debeant secundum prudentis & timorati Confessoris arbitrium mitigari , prout Pœnitentis contritio, personarum qualitas, diversaque conditio, aliæque circumstantiæ ostendent , utilissimum tamen est , semper ipsos Canones præ oculis habere,atque eos tanquam adamussim respicere , quantum conveniens erit: Et quidem Confessarius etsi pro modo antiquo Canonum pœnitentiam non habet sequi , tamen Pœnitenti nonnunquam articulos in eis explicatos tractabit , ut sic ad majorem dolorem adducatur , pœnitentiamque leviusculam , quam ipsi dedit , alacrius exequatur, & interim hæc quoque perspicietur utilitas, quæ proficitur ex benignitate , quam hodie Sancta Mater Ecclesia cum Pœnitentibus observat , quandò disciplina Ecclesiasticæ rigorem eis tantoperè moderatur . Curet etiam ut satisfactiones peccatis commissis respondeant.*

Hac

Hac Regulâ S. Caroli Borromæi docentur Confessarii contentaneas peccatorum gravitati pœnitentias, seu pœnas satisfactorias imponere, quæ, ut ait Concilium Tridentinum Sessione 14. Cap. 8. *procul dubio magnoperè à peccato revocant, & quasi freno quodam coercent, cautioreſque & vigilantiores in futurum Pœnitentes efficiunt. Medentur quoque peccatorum reliquiis, & vitiosos habitus malè vivendo comparatos contrariis virtutum actionibus tollunt. Neque verò securior ulla via in Ecclesia Dei unquam exiſtimata fuit ad amovendam imminentem à Domino pœnam, quàm ut hac pœnitentiæ opera homines cum vero animi dolore frequentent.* Sit ergò Confessarius in condonandis peccatis nec rigidus, nec mollis; Peccatori oleum infundat & vinum; oleum benignitatis ne desperet; vinum ſeveritatis, ne plaga putrefcens periculoſior fiat. Dispositiones Pœnitentium diligenter exploret, ſit omnibus omnia factus, ac præſertim caveat, ne intempeſtivâ ſeveritate Peccatores à pœnitentiæ tribunali arceat, vel, ſi ex adverſo pernicioſis palpationibus vulnera, quæ ſecari & exuri debent, operiat, ſi leviffima ſatisfactionis opera pro graviſſimis delictis injungat, ſi pauculorum Plalmorum recitationem pro infinitis perjuriis, blaſphemiis, pro multorum annorum adulteriis & libidinum monſtris imponat, in ſe alienorum peccatorum onera ſuſcipiat, ſicut loco mox à me laudato attulit Concilium Tridentinum. Cæteras Regulas, quas ad reſtituendam morum diſciplinam S. Carolus Borromæus Confessariis præſtituit, ne longior ſim, miſſas facio. Conſultius eſt ut eas attento animo legas in eâ, quam Sanctus ille Cardinalis edidit, Confessariorum

reriorum

riorum Inſtructione, quam ad conſervandam Chriſtianæ Moralis integritatem adeò utilem & neceſſariam eſſe judicavit Clerus Gallicanus, ut eam anno MDCLVII. publicâ luce donari curaverit, quò, ut ait idem doctiſſimus Clerus, *graffantes ad Evangelicæ morum institutionis perniciem novarum opinionum labes, oppoſito velut obice, coercerentur, & tanquàm aliqua mole reprimi poſſet novarum opinionum torrens, qui Chriſtianam morum Doctrinam perditum ibat.* Quin, & jubente Innocentio XII. Pontifice, Maximo, Cardinalis Carpegna, ejuſdem Pontificis Vicarius, anno Jubilæi, ſeu MDCC. ejuſdem S. Caroli Borromæi Inſtitutionem Confessariorum itali-co idiomate exaratam in publicam lucem emiſit, eique Paſtorale Mandatum præfixit, quo omnibus Confessariis præcipit, ut in Sacramentorum, præſertim Pœnitentiæ & Eucharistiæ, adminiſtratione, ad praxim, quam præmonſtravit & docuit S. Carolus Borromæus, totam ovium ſibi creditarum regiminis rationem exigant, nec unquàm privatiſ patiantur ſe abduci nonnullorum Theologorum corruptelis, qui, dum Sanctorum Patrum doctrinæ, & incorrupto Eccleſiæ lumini propriæ mentis lumen antepoſuerunt, à via veritatis exorbitarunt.

D. Necdùm mihi indicaſti ea Scriptorum Sæculi XVI. Aſcetica Opera, quorum frequens lectio ad probè informandos mores multùm conferre, meumque animum opinionibus Chriſtiano dignis imbuere, & adverſus omnes doctrinæ moralis corruptelas communire poteſt.

M. Sicut Pictores nonniſi optimas tabulas ſibi proponunt, ita & ipſe tres Sæculi XVI. Vitæ ſpiritualis Scriptores omnibus ſuis numeris abſolutos

solutos tibi proponam, ex quorum Operibus perfectæ pietatis exempla, & modum benè beatèque vivendi excerpere debes. Primus est *Ludovicus Granatensis*, Ordinis Prædicatorum, quem omnes agnoscunt ut Magistrum & Asceticorum Scriptorum parentem, cujus Opera tanti fecit *S. Franciscus Salesius*, ut Episcopum sibi amicissimum in Epistola xxxiv. libri primi ad ea jugitèr lætanda adhortetur his verbis: *Ludovicum Granatensem integrum habeas, tibi que Breviarium sit alterum. Cardinalis Borromæus alià ad concionandum Theologia non utebatur, & tamen concionabatur egregiè. At non hic illius præcipuus usus est. Animum scilicèt ad veræ devotionis amorem dirigit tuum, & ad omnia exercitia spiritualia. Ipsius lætionem à Duce Peccatorum auspiceris velim, tum ad Memoriale transeas; tandèm totum perlegas. Verùm, ut fructuosè legatur, non raptim legendus & quasi devorandus, sed ponderandus & æstimandus est. Per singula capita in eo meditandum, ejusque doctrina magnà consideratione, & præcibus ad Deum, animæ applicanda. Cum reverentia & devotione legendus est, ceu liber, utilissima, quibus anima cœlitùs afflari ac erudiri possit, continens documenta, ex quibus omnes animæ facultates reformatæ &c. Pervolve igitur sæpiùs Opera Ludovici Granatensis, qui inter Asceticos Scriptores, eum locum, quem *S. Thomas*, Doctor Angelicus, habet inter Scholasticos, occupat primum. Alter Sæculi XVI. Scriptor Asceticus, cujus Operum lætioni sedulò itidèm incumbere debes, est *Bartholomæus à Martyribus*, Archiepiscopus Bracarensis, Ordinis Prædicatorum, cujus extant duo libri in lucem editi, piorum omnium virorum commendatione*

datione digni. Primus inscribitur *Stimulus Pastorum*, Episcopis, & Sacerdotibus curam animarum gerentibus ad munus optinè obeundum informandis apprimè utilem, cujus adeò lectionem, amico Episcopo *Franciscus Salesius* Epistolâ mox à me laudatâ commendat. Alterum *Bartholomæi à Martyribus* librum, seu *Compendium spiritualis Doctrinæ*, edendum curavit *Ludovicus Granatensis*, ei-que istud elogium præfixit: *Quo tempore quidquid de Mystica Theologia à Summis Viris, hoc est, Dionysio, Bernardo, Bonaventura, Gerson* scriptum est, studiosè legens, has gemmas super aurum & topazion pretiosas Novis ministravit (*Bartholomæus à Martyribus*) Quibus ego legendis tantoperè delectatus sum, ut ferè affirmare possem, me nihil hætenus in vita legisse, quod acriores piis hominibus stimulos ad hujus cælestis Philosophiæ amorem adderet, majoremque lucem his, qui huic studio dediti sunt, præferret. In hoc *Compendio spiritualis Doctrinæ*, quod concinnavit noster *Bartholomæus à Martyribus*, memini me legisse Num.xx1. cap. 7. præclaram Sententiam, quam hic prætermittere minimè debeo, quippè quæ, instar Regulæ, te ad benè tutòque operandum poterit dirigere: *in quolibet negotio agendo (inquit) si incertus sis, quid potiùs eligas, antequàm statuas quid agendum sit, priùs ipse considera, quid tu fratri in ea re consuleres. Item quid acturus esses, si instaret tunc hora mortis. Item cogita quid malles egisse cùm steteris in die judicii coram Domino, & illud age. Si dubitas adhuc, elige illud quod naturæ tuæ ac affectionibus molestius est, ac magis adversatur.* Hanc verè auream *Bartholomæi à Martyribus* Sententiam si semper præ oculis habeas, certus sum,

te

te in momentoso salutis tuæ negotio opinionem, minus probabilem minusque tutam, relicta probabiliiori ac tutiori, nunquam secuturum. Postremò, ad benè instituendos mores tuos, sæpius leges Opera Moralia S. *Theresiæ* Virginis, & Ordinis Carmelitarum excalceatorum Fundatricis dignissimæ, quæ germanam pietatem ubique spirant, Lectores *caelestis Doctrinæ pabulo*, ut ait Ecclesia, nutriunt, & ad summum perfectionis Vitæ spiritualis culmen provehunt. Hos Sæculi XVI. Scriptores Asceticos, quos præsertim perpensa rerum spiritualium cognitio, librata iudicii maturitas, opinionum delectus, & servandæ Doctrinæ Moralis castimoniam studium commendant, nocturnam debes versare manu, versare diurnam. At quorundam, Scriptorum Opera, quæ Ethicæ Christianæ integritatem labefaciunt, & in quibus nihil singulare reperire est præter promiscuam loquacitatem, temerariam de rebus ignotissimis, & minimè meditati aut digestis disserendi fiduciam, incredibiles à veris purisque fontibus evagationes, inanes ratiunculas ad excusandas excusationes in peccatis excogitatas, importunè solum repetitos vulgarium, cantilenarum susurros, quodque gravius est, periculosas, & noxias in doctrina Morali opiniones, Vaticano protritæ fulmine: hæc, inquam, Scriptorum Opera, quæ tibi, aliisque incautis venenum propinare possunt, ne digito quidem attingere debes, nedum legere; optandumque esset, ut natalitiis tenebris damnarentur Morales illi libri, in quibus propositiones aut sententiæ à Sede Apostolica proscriptæ vulgantur, recoquuntur, refinguntur.

D. Cùm

D. Cùm vera virtus nihil aliud sit , quàm scientia fugiendorum atque expetendorum, curabo , quàm diligentissimè potero , ut eos dumtaxat libros pervolvam , qui mihi veræ , & Christianæ pietatis semina, Divinæ Legis amorem , atque salubria Moralis Doctrinæ Christianæ documenta, instillare poterunt ; ab his verò libris , qui meos mores corrumpere possent , & quorum immensâ mole oppressus jam jam gemere cœpit universus litterarius orbis , penitùs abstinebo , secutus hac in re consilium *Theophili Raynaudi* Societatis Jesu Theologi , qui , ut nuperrimè legebam, in Opere, quod edidit *De Malis ac Bonis libris , seu de justa aut injusta eorumdem confixione* , hæc Erotemate primo scribit : *Nihil deterius , inutilius , & damnosius scripture malâ & libro malo; eò quippe virus non modò præsens , & raptim transiens , sed durabile , & in innumeros eadem nocendi facultate grassari aptum, continetur Liber enim malus , non secùs ac pannus pestilens , quoscumque attactu ejus pollui contigerit , facillimè inficit , atque in mortem abripit, quod malo suo compererunt , qui minùs cautè se ea in parte gesserunt . Et, paucis interjectis, subdit : Sanè, si prævum Collocutorem , qui perpauca unâ operâ potest inficere , devitandum studiosè in confesso est , quia corrumpunt bonos mores colloquia mala , quantò certius est , devitandum esse authorem mali Operis , qui simul infinitos potest corrumpere . Prudentissimo itaque hujus Theologi Societatis Jesu consilio utar, in tantis lascivientium Scriptorum acervis , non plus negotii deinceps cum illis , qui in doctrina Morali malè audiunt, habere volo, quàm Romani cum Gallo Provinciæ hominibus , quos hoc anno*

no. MDCCXX. peste afflatos esse dicunt, commercium aut societatem ullam, se habere velle optimo jure nuperrimè, Pontificio promulgato Edicto, declararunt.

Finis septimi Tomi.

